


圖書保存會



朝鮮群書大系續々第一輯

懲必錄全

第 六 正
七 年 二 月
購 入 號

朝鮮古書刊行會



3 2169 7598 1

懲愆錄

懲愆錄者何記亂後事也其在亂前者往往亦記所以本其始也嗚呼壬辰之禍慘矣浹旬之間三都失守八方瓦解乘輿播越其得有今日天也亦由祖宗仁厚之澤固結於民而思漢之心未已聖上事大之誠感動皇極而存邢之師屢出不然則殆矣詩曰予其懲而愆後患此懲愆錄所以作也若余者以無似受國重任於流離板蕩之際危不持顛不扶罪死無赦尙視息田畝間苟延性命豈非寬典憂悻稍定每念前日事未嘗不惶愧靡容乃於閑中粗述其耳目所逮者自壬辰至于戊戌總若干言因以狀啓疏箭文移及雜錄附其後雖無可觀者亦皆當日事蹟故不能去旣以寓畝畝惓惓願忠之意又以著愚臣報國無狀之罪云

懲誌錄卷之一

萬曆丙戌間。日本國使橘康廣。以其國王平秀吉書來。始日本國王源氏立國於洪武初。與我修隣好殆二百年。其初我國亦嘗遣使修慶弔禮。申叔舟以書狀往來。卽其一也。後叔舟臨卒。成宗問所欲言。叔舟對曰。願國家母與日本失和。成廟感其言。命副提學李亨元書狀官金訢修睦。到對馬島。使臣以風水驚疑得疾。上書言狀。成廟命致書幣於島主而回。自是不復遣使。每其國信使至。依禮接待而已。至是平秀吉代源氏爲王。秀吉者。或云華人。流入倭國。負薪爲生。一日國王出過於路中。異其爲人。招補軍伍。勇力善鬪。積功至大官。因得權。竟奪源氏而代之。或曰。源氏爲他人所弑。秀吉又殺其人而奪國云。用兵平定諸島。域內六十六州。合而爲一。遂有外侵之志。乃曰。我使每往朝鮮。而朝鮮使不至。是鄙我也。遂使康廣來求通信。書辭甚倨。有今天下歸朕一握之語。蓋源氏之亡。已十餘年。諸島倭歲往來我國。而畏其令嚴不泄。故朝廷不知也。康廣時年五十餘。容貌傀偉。鬚髮半白。所經館驛。必舍上室。舉止倨傲。與平時倭使絕異。人頗恠之。故事。一路郡邑。凡遇倭使。發境內民夫。執槍夾道。以示軍威。康廣過仁同。睨視執槍者。笑曰。汝輩槍竿太短矣。到尙州。牧使宋應洄。享之。妓樂成列。康廣見應洄衰白。使譯官語之曰。老夫數年在干戈中。鬚髮盡

白使君處聲妓之間。百無所憂。而猶爲皓白何哉。蓋諷之也。及至。禮曹判書押宴酒酣。康廣散胡椒於筵上。妓工爭取之。無復倫次。康廣回所館。歎息語譯曰。汝國亡矣。紀綱已毀。不亡何待。及還。朝廷但報其書。辭以水路迷昧。不許遣使。康廣歸報。秀吉大怒。殺康廣。又滅族。蓋康廣與其兄康年。自源氏時。來朝我國。受職名。其言頗爲我國地。故爲秀吉所害云。

日本國使平義智來。秀吉旣殺橘康廣。令義智來求信使。義智者。其國主兵大將。平行長女婿也。爲秀吉腹心。對馬島太守宗盛長。世守馬島。服事我國。時秀吉去宗氏。使義智代主島務。以我國不諳海道爲辭。拒通信。詐言義智乃島主子。熟海路。與之偕行。便欲使我。無辭以拒。因又窺覘我虛實。平調信僧立蘇等同至。義智年少精悍。他倭皆畏之。俯伏膝行。不敢仰視。久留東平館。必邀我使與俱。朝議依違而已。數年前。倭寇全羅道。損竹島。殺邊將李太源。捕得生口。言我國邊氓沙乙背同者。叛入倭中。導倭爲寇。朝廷憤之。至是人或言。宜令日本。刷還叛民。然後議通信。以觀誠否。使館客諷之。義智曰。此不難。卽遣平調信。歸報其國。不數月。悉捕我民之在其國者。十餘人來獻。上御仁政殿。大陳兵威。鎖沙乙背同等。入庭詰問。斬於城外。賞義智內廐馬一匹。後引見倭使一行。賜宴。義智立蘇等。皆入殿內。以次進爵。時余判禮曹。亦宴倭使於曹中。然通信之議久未決。余爲大提學。將撰國書。啓請速定議。勿致生釁。明日。朝講。知

事邊協等亦啓宜遣使報答。且見彼中動靜而來。非失計也。於是朝議始定。命擇可使者。大臣以僉知黃允吉。司成金誠一。爲上副使。典籍許箴。爲書狀官。庚寅三月。遂與義智等同發。時義智獻二孔雀及鳥銃槍刀等物。命放孔雀於南陽海島。下鳥銃於軍器寺。我國之有鳥銃始此。

辛卯春。通信使黃允吉。金誠一等。回自日本。倭人平調信。玄蘇偕來。初允吉等。上年四月二十九日。自釜山浦乘船抵對馬島。留一月。又自馬島。水行四十餘里。到一岐島。歷博多州長門州浪古耶。至七月二十二日。始至國都。蓋倭人故迂廻其路。且處處留滯。故累月乃至。其在對馬島。平義智請使臣宴山寺中。使臣已在座。義智乘轎入門。至階方下。金誠一怒曰。對馬島。乃我國藩臣。使臣奉命至。豈敢慢侮如此。吾不可受此宴。卽起出。許箴等繼出。義智歸咎於擔轎者殺之。奉其首來謝。自是倭人敬憚誠一。待之加禮。望見下馬。到其國館於大剌。適平秀吉往擊東山道。留數月。秀吉回。又託以修治宮室。不卽受國書。前後留館五月。始傳命。其國尊其天皇。自秀吉以下。皆以臣禮處之。秀吉在國中。不稱王。但稱關白。或稱博陸侯。所謂關白者。取霍光凡事皆先關白之語。而稱之也。其接我使也。許乘轎入其宮。以笳角前導。陞堂行禮。秀吉容貌矮陋。面色黧黑。無異表。但微覺目光閃閃。射人云。設三重席。南向地坐。戴紗帽穿黑袍。諸臣數人列坐。引我使就席。不設宴具。前置一卓。中有熟餅一器。以瓦甌行酒。酒

亦濁。其禮極簡。數巡而罷。無拜揖酬酢之節。有頃。秀吉忽起入內。在席者皆不動。俄而有人便服抱小兒從內出。徘徊堂中。視之乃秀吉也。坐中俯伏而已。已而出臨楹外。招我國樂工。盛奏衆樂而聽之。小兒遺溺衣上。秀吉笑呼侍者。一女倭應聲走出。授其兒更他衣。皆肆意自得。旁若無人。使臣辭出。其後不得再見。與上副使銀四百兩。書狀通事以下有差。我使將回。不時裁答書令先行。誠一曰。吾爲使臣。奉國書來。若無報書。與委命於草莽同。允吉懼見留遽發至界濱待之。答書始來。而辭意悖慢。非我所望也。誠一不受。改定數次。然後行。凡所經由。諸倭贈遺。誠一皆卻之。允吉還泊釜山。馳啓情形。以爲必有兵禍。既復命。上引見而問之。允吉對如前。誠一曰。臣不見其有是。因言允吉搖動人心。非宜。於是議者或主允吉。或主誠一。余問誠一曰。君言與黃使不同。萬一有兵。將奈何。曰。吾亦豈能必倭終不動。但黃言太重。中外驚惑。故解之耳。時倭書有率兵超入大明之語。余謂當卽具由奏聞天朝。首相以爲恐。皇朝罪我私通倭國。不如諱之。余曰。因事往來隣邦。有國之所不免。成化間。日本亦嘗因我求貢。中國卽據實奏聞天朝。降勅回諭。前事已然。非獨今日。今諱不聞。於大義不可。况賊若實有犯順之謀。從他處奏聞。而天朝反疑我國。同心隱諱。則其罪不止於通信而已也。朝廷多是余議者。遂遣金應南等馳奏。時福建人許儀後。陳申等。被擄在倭中。已密報倭情。及琉球國世子尙寧。連遣

使報聲息。獨我使未至。天朝疑我貳於倭。論議藉藉。閣老許國曾使我國。獨言朝鮮至誠事大。必不與倭叛。姑待之。未久。應南等賫奏至。許公大喜。而朝議始釋然云。

朝廷憂倭。擇知邊事宰臣。巡察下三道以備之。金晬爲慶尙監司。李洸爲全羅監司。尹先覺爲忠清監司。令備器械修城池。慶尙道築城尤多。如永川清道三嘉大邱星州釜山東萊晉州安東尙州左右兵營。或新築或增修。時昇平旣久。中外狃安。民以勞役爲憚。怨聲載路。余同年前典籍李魯。陝川人。貽書余言。築城非計。且曰。三嘉前阻鼎津。倭能飛渡乎。何爲浪築勞民。夫以萬里滄溟。猶不能禦倭。而欲限一衣帶水。必倭之不能渡。其亦踈矣。而一時人議如此。弘文館亦上筭論之。然兩南所築。皆不得形勢。且以濶大容衆爲務。如晉州城。本據險可守。至是以爲小。移東面下就平地。其後賊由此入城。城遂不保。大抵城以堅小爲貴。而猶恐其不廣。亦時論然也。至於軍政之本。擇將之要。組練之方。百不一舉。以至於敗。

擢井邑縣監李舜臣。爲全羅左道水軍節度使。舜臣有膽略善騎射。嘗爲造山萬戶。時北邊多事。舜臣以計誘致叛胡于乙其乃。縛送兵營斬之。虜患遂息。巡察使鄭彥信。令舜臣護鹿屯島屯田。一日大霧。軍人盡出收禾。柵中但有十餘人。俄而虜騎四集。舜臣閉柵門。自以柳葉箭從柵內連射賊數十墮馬。虜驚駭

退走。舜臣開門，軍騎大呼逐之。虜衆大奔，盡奪所掠而還。然朝無推挽者，登第十餘年不調。始爲井邑縣監，是時倭聲日急，上命備邊司各薦才堪將帥者，余舉舜臣，遂自井邑超拜水使人，或疑其驟。時在朝武將中，唯申砬、李鎰最有名。慶尙右兵使曹大坤，年老無勇，衆憂不堪間寄。余於經席啓請以鎰代大坤，兵曹判書洪汝諄曰：「名將當在京都，鎰不可遣。」余再啓曰：「凡事貴預，況治兵禦賊，尤不可猝辦。一朝有變，鎰終不得不遣，等遣之，寧早往一日，使預備待變。庶或有益，不然倉卒之際，以客將馳下，既不諳本道形勢，又不識軍士勇怯，此兵家所忌，必有後悔。」不答。余又出備邊司，與諸人議，啓請修祖宗鎮管之法，大略以爲：國初各道軍兵，皆分屬鎮管，有事則鎮管統率屬邑，鱗次整頓，以待主將號令。以慶尙道言之，則金海、大邱尙州、慶州、安東、晉州，是爲六鎮。管脫有敵兵，一鎮之軍，雖或失利，他鎮次第嚴兵堅守，不至於靡然奔潰。往在乙卯變後，金秀文在全羅道，始改分軍法，割道內諸邑，散屬於巡邊使防禦使，助防將都元帥及本道兵水使，名曰制勝方略，諸道皆效之。於是鎮管之名雖存，而其實不相維繫。一有警急，則必將遠近俱動，使無將之軍，先聚於原野之中，以待將帥於千里之外。將不時至，而賊鋒已逼，則軍心驚懼，此必潰之道也。大衆一潰，難可復合。此時將帥雖至，誰與爲戰？不如更修祖宗鎮管之制，平時易於訓練，有事得以調集，且使前後相應，內外相倚，不至於土崩瓦解。於事

爲便事。下本道慶尙監司金晬以爲制勝方略。行用已久。不可猝變。議遂寢。壬辰春。分遣申礪李鎰巡視邊備。鎰往忠清全羅道。礪往京畿黃海道。皆閱月而還。所點者弓矢槍刀而已。郡邑率以文具避法。無他備禦長策。礪素有殘暴之名。所至殺人立威。守令畏之。發民治道。供帳極侈。雖大臣之行不如也。旣復命。四月一日。礪來見余于私第。余問早晚有變。公當任之。公料今日賊勢難易如何。礪甚輕之。以爲不足憂。余曰不然。往者倭但恃短兵。今則兼有鳥銃長技。不可輕視。礪遽曰。雖有鳥銃。豈能盡中。余曰。國家昇平久。士卒怯弱。果然有急。極難支吾。意數年後。人頗習兵。或還收拾未可知。其初則吾甚憂之。礪都不省悟而去。蓋礪於癸未。爲穩城府使。叛胡圍鍾城。礪馳往救之。以十餘騎突擊虜解去。朝廷以礪才堪大將。陞爲北兵使。平安兵使未久。階資憲。至欲以爲兵曹判書。意氣方銳。正如趙括輕秦。略無臨事以懼之意。識者憂焉。

遞慶尙右兵使曹大坤。特旨以承旨金誠一代之。備邊司啓誠一儒臣也。不合此時邊帥之任。不允誠一遂拜辭而行。四月十三日。倭兵犯境。陷釜山浦。僉使鄭撥死。先是倭平調信立蘇等。與通信使偕來。館於東平館。備邊司請令黃允吉金誠一等。私以酒饌往慰。因從容問其國事。鈞察情形。以備策應。許之。誠一至館。立蘇果密語曰。中國久絕日本。不通朝貢。平秀吉以此心懷憤恥。欲起兵端。朝鮮先爲奏聞。使貢路得達。則必無事。而日本六十六州之民。亦

免兵革之勞矣。誠一等。因以大義責諭之。立蘇又曰。昔高麗導元兵擊日本。日本以此報怨於朝鮮。勢所宜然。其言漸悖。自是再不復問。而調信立蘇自回。辛卯夏。平義智又到釜山浦。爲邊將言。日本欲通大明。若朝鮮爲之奏聞。則幸甚。不然。兩國將失和氣。此乃大事。故來告。邊將以聞。時朝議方咎通信。且怒其悖。慢不報。義智泊船十餘日。怏怏而去。是後倭人不復至。釜山浦留館倭。常有數十餘人。稍稍入歸。一館幾空。人怪之。是日倭船自對馬島蔽海而來。望之不見。其際。釜山僉使鄭撥出獵。絕影島。狼狽入城。倭兵隨至。登陸。四面雲集。不移時。城陷。左水使朴泓見賊勢大。不敢出兵。棄城逃。倭分兵陷西平浦。多大浦。多大僉使尹興信力戰被殺。左兵使李珪聞聲息。自兵營入東萊。及釜山陷。珪恇撓失措。託言欲在外掎角。出城退陣于蘇山驛。府使宋象賢留與同守。珪不從。十五日。倭進迫東萊。象賢登城南門。督戰半日。而城陷。象賢堅坐受刃而死。倭人嘉其死守。棺斂之。埋於城外。立標以識之。於是郡縣望風奔潰。密陽府使朴晉自東萊奔還。欲阻鵠院隘路以禦之。賊陷梁山。至鵠院。見其守兵。從山後乘高。蟻附散漫而至。守隘者望之皆散。晉馳還密陽。縱火焚軍器倉庫。棄城入山。李珪奔還兵營。先出其妾。城中洶洶。軍一夜四五驚。珪乘曉亦脫身遁去。衆軍大潰。賊分道長驅。連陷諸邑。無一人敢拒者。金海府使徐禮元閉門城守。賊刈城外麥禾。填壕。頃刻與城齊。因躡城。草溪郡守李某先遁。禮元繼出。城遂陷。巡察

使金晬初在晉州聞變馳向東萊至中路聞賊兵已近不能前還走右道不知所爲但檄列邑諭民避賊由是道內皆空愈不可爲矣龍宮縣監禹伏龍領邑軍赴兵營食永川路邊有河陽軍數百屬防禦使向上道過其前伏龍怒軍士不下馬拘之責以欲叛河陽軍出兵使公文示之方自辨伏龍目其軍圍而殺之皆盡積尸滿野巡察使以功聞伏龍爲通政代鄭熙績爲安東府使後河陽人孤兒寡妻每逢使臣之來遮馬首號冤伏龍有時名故無伸理者云

十七日早朝邊報始至乃左水使朴泓狀啓也大臣備邊司會賓廳請對不許卽啓請以李鎰爲巡邊使下中路成應吉爲左防禦使下左道趙傲爲右防禦使下西路劉克良爲助防將守竹嶺邊璣爲助防將守鳥嶺以慶州府尹尹仁涵儒臣懦弱起復前江界府使邊應星爲慶州府尹皆令自擇軍官以去俄而釜山陷報又至時釜山受圍人不能通泓狀啓但云登高以望赤旗滿城中以此知城陷李鎰欲率京中精兵三百名去取兵曹選兵案視之皆閭閻市井白徒胥吏儒生居半臨時點閱儒生具冠服持試卷吏戴平頂巾自懇求免者充滿於庭無可遣者鎰受命三日不發不得已令鎰先行使別將俞沃隨後領去余啓兵曹判書洪汝諄不能治任且軍士多怨可遞於是金應南代爲判書沈忠謙爲參判臺諫啓請宜使大臣爲體察使檢督諸將首相以余應命余請以金應南爲副以前義州牧使金汝暢有武略時汝暢坐事繫

獄。啓請貸罪自隨。募武士可堪裨將者，得八十餘人。旣而急報絡繹，聞賊鋒已過密陽大丘，將近嶺下。余謂應南及申，曰：「寇深事已急矣，將若之何？」曰：「鎰以孤軍在前，而無後繼，體察使雖下去，非戰將，何不使猛將星馳先下？」爲鎰策應耶，觀硃意，欲自行援鎰，余與應南請對。啓如硃言。上卽召申，硃問之，遂以硃爲都巡邊使，硃出闕門外，自行招募，武士無願從者。時余在中樞府治行事，硃至余所，見階庭間應募者簇立，色甚怒，指金判書謂余曰：「如此公者，大監帶去，安用小人，願爲副使而去。」余知硃怒，武士不從已，笑曰：「同是國事，何分彼此，令公旣行急，吾所得軍官，可先帶行。」吾當別募隨行。因以軍官單子授之。硃遂回顧庭中，武士曰：「來，乃引之而出。」諸人皆慄然而去。金汝勳亦同去，意甚不樂。硃臨行，上引見賜寶劍，曰：「李鎰以下不用命者，用此劍。」硃辭出，又詣賓廳見大臣，將下階，頭上紗帽忽落在地上，見者失色。到龍仁，啓事狀中，不署其名，人或疑其心亂。

逮慶尙右兵使金誠一下獄，未至，還以爲招諭使，以咸安郡守柳崇仁爲兵使。初，誠一到尙州，聞賊已犯境，晝夜馳赴本營，遇曹大坤於路中，交印節。時賊已陷金海，分掠右道諸邑，誠一進與賊遇，將士欲走，誠一下馬踞胡床不動，呼軍官李宗仁曰：「汝勇士也，不可見賊先退。」有一賊著金假面，揮刃突進，宗仁馳馬而出，一箭迎射殪之。諸賊却走，不敢前，誠一收召離散，移檄郡縣，以爲牽綴之。

計。上以誠一前使日本。言賊未易至。解人心。誤國事。命遣義禁府都事拿來。事將不測。監司金晬聞誠一被逮。出別於路上。誠一辭氣慷慨。無一語及己事。惟勉晬以盡力討賊。老吏河自溶歎曰。己死之不恤。而惟國事是憂。真忠臣也。誠一行至稷山。上怒霽。且知誠一得本道士民心。命赦其罪。爲右道招諭使。使諭道內人民起兵討賊。時柳崇仁有戰功。故超拜兵使。

以僉知金玜爲慶尙左道安集使。時監司金晬在右道。而賊兵橫貫中路。與左道聲聞不通。守令皆棄官逃走。民心解散。朝廷聞之。以金玜榮川人。詳知本道民情。可以安集。故白遣之。玜既至。左道之民始聞朝廷之令。稍稍還集。榮川豐基二邑。賊幸不至。而義兵頗起云。

賊陷尙州。巡邊使李鎰兵敗奔還忠州。初慶尙道巡察使金晬聞賊變。卽依方略分軍移文列邑。各率所屬屯聚信地。以待京將之至。聞慶以下守令皆引其軍赴大丘。露次川邊。待巡邊使既數日。巡邊使未及來。而賊漸近。衆軍自相驚動。會大雨。衣裝沾濕。糧餉不繼。夜中皆潰散。守令悉以單騎奔還。巡邊使入聞慶。縣中已空。不見一人。自發倉穀餉所率人。而過歷咸昌至尙州。牧使金澣託以支待巡邊使于出站。遁入山中。獨判官權吉守邑。鎰以無兵責吉。曳之庭欲斬之。吉哀告願自出招呼。達夜搜索村落間。詰朝得數百人以至。皆農民也。鎰留尙州一日。發倉開糶。誘出散民。從山谷中。介介而來。又數百餘人。倉卒編伍。

爲軍無一堪戰者。時賊已至善山。暮有開寧縣人來報賊近。鎰以爲惑。衆將斬之。其人呼曰。願姑囚我。明早賊未至。死未晚也。是夜賊兵屯長川。距尙州二十里。而鎰軍無斥候。故賊來不知。翌朝。鎰猶謂無賊。出開寧人於獄。斬以徇衆。因率所得民軍。合京來將士。僅八九百。習陣于州北川邊。依山爲陣。陣中立大將旗。鎰被甲立馬大旗下。從事官尹暹朴箒及判官權吉。沙斤察訪金宗武等。皆下馬在鎰馬後。有頃。有數人從林木間出。徘徊眺望而回。衆疑爲賊候。而懲開寧人不敢告。旣又望見城中。數處煙起。鎰始使軍官一人往探。軍官跨馬。二驛卒執鞚。緩緩去。倭先伏橋下。以鳥銃中軍官墜馬。斬首而去。我軍望見。奪氣。俄而賊大至。以鳥銃十餘衝之。中者卽斃。鎰急呼軍人發射矢。數十步輒墜。不能傷賊。賊已分出左右翼。持旗幟繞軍後。圍抱而來。鎰知事急。撥回馬向北走。軍大亂。各自逃命。得脫者無幾。從事以下未及上馬者。悉爲賊所害。賊追鎰急。鎰棄馬脫衣服。披髮赤體而走。到開慶。索紙筆。馳啓敗狀。欲退守烏嶺。聞申礪在忠州。遂趨忠州。

以右相李陽元爲守城大將。李戡邊彥琇爲京城左右衛將。商山君朴忠儼爲京城巡檢使。使修都城。起復金命元爲都元帥。守漢江。時李鎰敗報已至。人心洶洶。內間有去郇之意。外庭不知。理馬金應壽到賓廳。與首相耳語。去而復來。觀者疑之。蓋首相時爲司僕提調。故也都承旨李恒福於掌中書立馬永康。

門內六字示我。臺諫劾首相誤國請罷。不允。宗親聚閣門外痛哭。請勿棄城。領府事金貴榮。尤憤憤與諸大臣入對。請固守京城。且曰。倡議棄城者。乃小人也。上教曰。宗社在此。予將何適。衆遂退。然事不可爲矣。抄發坊里民及公私賤胥吏三醫司。分守城堞。計堞三萬餘。而守城人口僅七千。率皆烏合。皆有縋城逃散之心。上番軍士。雖屬於兵曹。而與下吏相與爲奸。受賂私放者甚多。官員不問去留。臨急皆不可用。軍政解弛。一至於此。大臣請建儲以繫人心。從之。

遣同知事李德馨。使倭軍尙州之敗。有倭學通事景應舜者。在李鎰軍中。爲賊所獲。倭將平行長。以平秀吉書契及送禮曹公文一道。授應舜出送。且曰。在東萊時。生得蔚山郡守。傳送書契。而至今未報。郡守即李彥誠。自賊中回而畏得廷不朝。鮮若有意講和。可令李德馨於二十八日。會我於忠州。蓋德馨往年嘗爲宣慰使。接待倭使。故行長欲見之。應舜至京。時事急。計無所出。意或因此緩兵。德馨亦自請行。令禮曹裁答書。挾應舜而去。德馨在道。聞忠州已陷。先使應復。馨遂從中路還。命於平壤。

熒惑犯南斗。徵京畿江原黃海平安咸鏡等道兵。入援京師。以吏曹判書李元翼。爲平安道都巡察使。知事崔興源。爲黃海道都巡察使。皆即日發遣。以將有西狩之議。而元翼曾爲安州牧使。興源爲黃海監司。皆有惠政。爲民心所喜。故

使之先往。撫諭軍民以備巡幸。

賊兵入忠州。申砬迎戰。敗績而死。諸軍大潰。砬至忠州。忠清道郡縣兵來會者八千餘人。砬欲保鳥嶺。聞鎰敗。膽落。還忠州。且召李鎰邊璣等。俱到忠州。棄險不守。號令煩擾。見者知必敗。有所親軍官密報賊已踰嶺。乃二十七日初昏也。砬忽跳出城。軍中擾擾。不知砬所在。夜深潛還客舍。明朝謂軍官妄言。引出斬之。狀啓猶云。賊未離尙州。不知賊兵已在十里內也。因率軍出陣于彈琴臺。前兩水間。其地左右多稻田。水草交雜。不便馳驅。少頃。賊從丹月驛分路而至。勢如風雨。一路循山而東。一路沿江而下。炮響震地。塵埃接天。砬不知所爲。鞭馬欲親自突陣者。再不得入。還赴江沒于水中而死。諸軍悉赴江中。屍蔽江而下。金汝勳亦死。亂兵中。李鎰從東邊山谷間脫走。初朝廷聞賊兵盛。憂李鎰獨力難支。以申砬一時名將。士卒畏服。使引重兵隨其後。欲兩將協勢。庶幾捍賊計未失也。不幸水道水陸將皆恇。其在海中也。左水使朴泓一兵不出。右水使元均雖水路稍遠。所領舟艦既多。且賊兵非一日俱至。可悉衆前進。耀兵相持。幸而一捷。則賊當有後顧慮。未必遽深入。而乃望風遠避。不一交兵。及賊登陸。左右兵使李珪曹大坤。或遁或遞。賊鳴鼓橫行。蹈數百里無人之地。晝夜北上。無一處敢齟齬。少緩其勢者。不十日。已至尙州。李鎰客將無軍。猝與相角。勢固不敵。砬未至忠州。而鎰先敗。進退失據。事是以大謬。嗚呼痛哉。後聞賊入尙

州猶以過險爲憚。聞慶縣南十餘里有古城。曰姑母。據左右道交會處。兩峽如束。中盤大川。路出其下。賊恐有守兵。使人再三覘覷。知無兵。乃歌舞而過云。其後天將李提督如松。追賊過烏嶺。歎曰。有險如此。而不知守。申總兵。可謂無謀矣。蓋礮雖輕銳。得時名。籌略非其所長。古人云。將不知兵。以其國與敵。今雖悔之無及。猶可爲後日之戒。故備著云。

四月三十日曉。車駕西巡。申礮旣去。都人日望捷報。前日夕。有氈笠三人。走馬入崇仁門。城內人爭問軍前消息。答曰。我乃巡邊使軍官奴僕。昨日巡邊使敗死於忠州。諸軍大潰。俺等脫身獨來。欲歸報家人避兵耳。聞者大驚。所過傳相告語。不移時。滿城俱震。初昏。召宰執議出避。上御東廂地坐。張燈燭。宗室河源君。河陵君等侍坐。大臣啓。事勢至此。車駕暫出幸平壤。請兵天朝。以圖收復。掌令權快請對。造膝大聲呼。請固守京城。語囂甚。余謂曰。雖危亂之際。君臣之禮。不可如是。可少退以。啓。快連呼曰。左相亦爲此言耶。然則京城可棄乎。余啓曰。權快言甚忠。但事勢不得不然。因請分遣。王子諸道。使呼召勤王。世子隨駕定議。大臣出在。閣門外得旨。臨海君可往咸鏡道。領府事金貴榮。柒溪君尹卓然從。順和君可往江原道。長溪君黃廷或。護軍黃赫。同知李陞從。蓋赫女爲順和夫人。而李陞爲原州人。故并遣之。時右相爲留將。領相并宰臣數十人。以扈從點出。余無所命。政院啓扈從不可無柳某。於是

令扈行。內醫趙英璇、政院吏申德麟十餘人，大呼言：「京都不可棄，俄而李鎰狀啓至，而宮中衛士盡散，更漏不鳴，得火炬於宣傳官廳，發狀啓讀之。」內云：「賊今明日當入都城，狀入良久。」駕出三廳，禁軍奔竄，昏黑中互相抵觸。適羽林衛池貴壽過前，余認之，責令扈從。貴壽曰：「敢不盡力。」并呼其類二人而至。過景福宮前，市街兩邊哭聲相聞。承文院書員李守謙執余馬鞵，問曰：「院中文書當如何？」余令收拾其緊關者追來，守謙哭而去。出敦義門到沙峴，東方向明，回視城中，南大門內大倉火起，烟焰已騰空矣。踰沙峴至石橋，雨作。京畿監司權徵追至扈從，至碧蹄驛，雨甚，一行皆沾濕。上入驛少頃，卽出，衆官自此多還入都城者，侍從臺諫往往多落後不至。過惠陰嶺，雨如注，宮人騎弱馬，以物蒙面號哭而行。過馬山驛，有人在田間，望之痛哭曰：「國家棄我去，我輩何恃而生也？」至臨津，雨不止。上御舟中，召首相及臣入對，旣渡，已向昏，不能辨色。臨津南麓，舊有丞廳，恐賊取材作筏橋以濟，命焚之。火光照江北，得尋路而行。初更到東坡驛，坡州牧使許晉長湍府使具孝淵，以支持差使員在其處，略設御厨，扈衛人終日飢來，亂入厨中，搶奪以食。將闕，上供晉孝淵懼而逃。五月初一日朝，引見大臣，問南方巡察使有能勤王者否。日晚，乘輿欲發，向開城，而京畿吏卒逃散，無扈衛人。適黃海監司趙仁得率本道兵將入援，瑞興府使南嶷先到，有軍數百人，馬五六十匹，以此始發。臨行，司鑰崔彥俊出曰：

宮中人昨日不食。今又未食。得少米饒飢可行。索南嶷軍人所持糧。雜大少米二三斗以入。午至招賢站。趙仁得來朝。設帳幕於路中以迎之。百官始得食。夕次于開城府。御南門外公署。臺諫交章劾首相交結誤國等罪。不允。二日。臺諫仍啓首相罷。余陞爲之。崔興源爲左相。尹斗壽爲右相。咸鏡北道兵使申碯。遞來是日午。上御南城門樓。慰諭人民。有旨令各陳所懷。有一人出行俯伏。問何言。對曰。願召鄭政承。蓋鄭澈時竄在江界。故云然。上曰。知道。卽命召澈赴行在。夕還宮。余以罪罷。俞泓爲右相。崔興源尹斗壽以次而陞。聞賊尙未至京城。衆議皆咎去那之失。使承旨申礫。還入京城。察形勢。初三日。賊入京城。留都將李陽元。元帥金命元皆走。初賊自東萊分三路以進。一路由梁山密陽清道大丘仁同善山。至尙州。敗李鎰軍。一路由左道長鬢機張。陷左兵營蔚山慶州永川新寧義興軍威比安。渡龍宮河豐津。出聞慶。與中路兵合。踰鳥嶺入忠州。又自忠州分兩路。一趨驪州渡江。由楊根渡龍津。出於京城東。一趨竹山龍仁。至漢江之南。又一路由金海從星州茂溪縣渡江。歷知禮金山。出忠清道永同。進陷清州向京畿。旌旗劒戟。千里相連。炮聲相聞。所過或十里或五六十里。皆據險設營柵。留兵以守。夜則舉火相應。都元帥金命元在濟川亭。望見賊至。不敢戰。悉沉軍器火炮器械于江中。變服以逃。從事官沈友正。固止不從。李陽元在城中。聞漢江軍已散。知城不可守。亦出走楊州。江原道助防。

將元豪初率兵數百守驪州北岸與賊相持賊不能渡者數日既而江原道巡察使柳永吉檄召元豪歸本道賊毀閭里民家及官舍取屋材聯爲長筏以渡中流爲水所漂死者甚多而豪旣去江上無一守者故累日畢渡於是賊三路兵皆入京城城中之民先已散去無一人矣金命元旣失漢江欲向行在至臨津狀啓言狀命更徵京畿黃海兵守臨津且命申碯同守以遏賊西下之路是日車駕發開城次于金郊驛余雖罷散不敢後從行四日車駕過興義金巖平山府次于寶山驛初出開城時倉卒留宗廟神主于穆清殿有宗室一人號泣啓不當委神主於賊所於是達夜馳至開城奉還云五日車駕過安城龍泉劔水驛次于鳳山郡六日進次黃州七日過中和入平壤三道巡察使之軍潰於龍仁初全羅道巡察使李洸率本道兵入援聞車駕西狩京城已陷收兵還全州道內人咎洸不戰而回多憤惋不平者洸不自安更調兵與忠清道巡察使尹國馨合軍而進慶尙巡察使金晬亦自其道率軍官數十餘人來會兵總五萬餘至龍仁望見北斗門山上有賊小壘洸易之先使勇士白光彥李時禮等嘗賊光彥等率先鋒登山去賊壘十餘步下馬發射賊不出日晚賊見光彥等稍解發白刃大呼突出光彥等倉皇索馬欲走不及皆爲賊所害諸軍聞之震懼時三巡察皆文人不閑兵務軍數雖多而號令不一且不據險設備眞古人所謂軍行如春遊安得不敗者也明日賊知我軍心

怯。數人揮刃賈勇而前。三道軍望之大潰。聲如崩山。委棄軍資器械。無數塞路。人不能行。賊悉取而焚之。洩還全羅。國警還公州。辟還慶尙右道。副元帥申恪與賊戰于楊州。敗之。斬首六十餘級。遣宣傳官。卽軍中斬之。恪初從金命元爲副。漢江之潰。恪不從命元。隨李陽元于楊州。時咸鏡南道兵使李渾兵適至。恪合兵遇賊。自京城出散掠閭閻。邀擊破之。自倭入我國。始有此捷。人皆踊躍。金命元在臨津。狀啓恪。擅自他適。不從號令。右相俞泓遽請誅之。宣傳官旣行。而捷報至。朝廷使人追止不及。恪雖武人。而素清慎。嘗爲延安府使。修城浚壕。多備軍器。後李廷毓守延安。人以爲恪之功。死非其罪。且有九十歲。老母聞者莫不痛之。遣知事韓應寅。帥平安道江邊精兵三千人。赴臨津擊賊。令勿受金命元節制。時應寅赴京。新回。尹左相言於衆曰。斯人狀貌有福氣。必能辦事。遂行。

韓應寅。金命元之師。潰于臨津。賊渡江。初。命元在臨津北。分付諸軍。列守江灘。歛江中船隻。悉在北岸。賊結陣于臨津南。無船可渡。但出遊兵。隔江交戰。相持十餘日。賊終不能渡。一日。賊焚江上廬幕。撤帷帳。載軍器。爲退遁狀。以誘我軍。申碯素輕銳。無謀。以爲賊實遁。欲渡江。追躡京畿。監司權徵與碯合。命元不能禁。是日。應寅亦至。將悉衆追賊。應寅所將。皆江邊健兒。與北虜近。備諳戰陣形勢。告應寅曰。軍士遠來罷弊。尙未食。器械未整。後軍亦未齊到。且賊之情僞。未

可知。願少休。明日觀勢進戰。應寅以爲逗留。斬數人。命元以應寅新自朝廷來。且令勿受已節制。故雖知不可。而不敢言。別將劉克良年老習兵。力言不宜輕進。申結欲斬之。克良曰。吾結髮從軍。豈以避死爲心。所以云云者。恐誤國事耳。憤憤而出。率其屬先渡。我軍旣入險地。賊果伏精兵於山後。一時俱起。諸軍奔潰。克良下馬坐地曰。此吾死所也。彎弓射賊數人。爲賊所害。申結亦死。軍士奔至江岸。不得渡。從巖石上自投入江。如風中亂葉。其未及投江者。賊從後奮長刀斫之。皆匍匐受刃。無敢拒者。命元應寅在江北望之。喪氣。商山君朴忠傑適在軍中。騎馬先走。衆望之以爲命元。皆呼曰。元帥去矣。諸守灘軍。應聲皆散。命元應寅還。行在朝廷不問。京畿監司權徵。入加平郡避亂。賊遂乘勝西下。不可復止矣。

賊兵入咸鏡道。兩王子陷賊中。從臣金貴榮黃廷或黃赫。及本道監司柳永立。北兵使韓克誠等。皆被執。南兵使李渾。走至甲山。爲我民所害。南北道郡縣皆沒于賊。有倭學通事咸廷虎者。在京城。爲賊將清正所得。因隨清正入北道。賊退後逃還京城。見余言北道事頗詳。清正在賊將中。尤勇悍善鬪。與平行長同渡臨津。至黃海道安城驛。謀分搶兩界。各議所向未決。二賊拈鬪。行長得平安道。清正得咸鏡道。於是清正擒安城居民二人。使向導。二人辭以生長此地。不諳北路。清正卽斬之。一人懼請先導。從谷山地踰老里峴。出於鐵嶺北。日行

數百里。勢如風雨。北道兵使韓克誠。率六鎮兵。相遇於海汀倉。北兵善騎射。地又平衍。乃左右迭出。且馳且射。賊不能支。退入倉中。時日已暮。軍士欲少休。俟賊出。明日復戰。克誠不聽。揮其軍圍之。賊出倉中。穀石列置爲城。以避矢石。從其內多發鳥銃。我軍櫛比而立。重疊如束。中必貫穿。或一丸斃三四人。軍遂潰。克誠收兵。退屯嶺上。欲天明更戰。夜賊潛行。環我軍散伏于草間。朝大霧。我軍猶意賊在山下。忽一聲炮響。從四面大呼突起。皆賊兵也。軍遂驚潰。將士向無賊處奔走。悉陷泥澤中。賊追至芟刈。死者無數。克誠遁入鏡城。遂被擒。兩王子臨海君順和君。俱至會寧府。蓋順和君。初在江原道。賊兵入江原道。故轉向北道。是時賊窮追。王子會寧吏鞠景仁。率其類叛。先縛王子及從臣。以迎賊。賊將清正。解其縛。留置軍中。還屯咸興。獨漆溪君尹卓然。路中稱病。從他路。深入別害堡。同知李瑩。不從。王子留江原道。皆免執。柳永立拘賊中數日。賊以爲文官。防禁少懈。永立乘間脫走。還行在。

李鎰至平壤。鎰旣敗于忠州。渡江入江原道界。輾轉至行在。時諸將自京城南下。或走或死。無一人扈駕者。聞賊將至。人心益懼。鎰於武將中。素有重名。雖奔敗之餘。而人聞其來。無不喜悅。鎰旣屢敗。竄荆棘中。戴平涼子。穿白布衫。草屨而至。形容憔悴。觀者歎息。余語之曰。此處人將倚君爲重。而槁枯如此。何以慰衆。索行橐。得藍色紗帖裏與之。於是諸宰。或與駿笠。或與銀頂子彩纓。當面

改換服飾一新，獨無有脫靴與之者。猶著草屨。余笑曰：錦衣草屨不相稱矣。左右皆笑。俄而碧潼土兵任旭景探報賊已至鳳山。余謂左相曰：賊之斥候應已至江外。此間詠歸樓下江水岐而爲二。水淺可涉。萬一賊得我民嚮導，而暗渡猝至，則城危矣。何不急遣鎰往把淺灘，以防不測乎？尹公曰：然。卽遣鎰。時鎰所率江原道軍僅數十餘人。益以他軍。鎰坐含毬門點兵，不卽行。余念事急，遣人視之。猶在門上。余連語尹公使催之。鎰始去。既出城，無指路者，誤向江西路。遇平壤座首金乃胤自外來，問之使前。引馳至萬頃臺下。距城纔十餘里。望見江南岸，賊兵來聚者已數百。江中小島居民驚呼奔散。鎰急令武士十餘人入島中射之。軍士畏不卽進。鎰拔劔欲斬之。然後乃進。賊已在水中多近岸。我軍急以強弓射之。連斃六七。而賊遂退。鎰仍留守渡口。

遼東都司使鎮撫林世祿來探倭情。上接見于大同館。余自五月罷。六月初一日收叙。是日承命接待唐將。時遼東聞倭犯我國未久。又聞都城不守。車駕西遷。既又聞倭兵已至平壤。甚疑之。以爲倭變雖急。不應猝遽如此。或云我國爲倭先導。世祿之來。余與之同上練光亭。望察形勢。有一倭從江東林木間。乍見乍隱。已而二三倭繼出。或坐或立。意態安閒。若行路休息之狀。余指示世祿曰：此倭候也。世祿倚柱而望。殊有不信之色。曰：倭兵何其少也。余曰：倭巧詐。雖大兵在後。而先來偵探者。不過數輩。若見其少而忽之。則必陷於賊術矣。

世祿唯唯，亟求回吝，馳去。命左相尹斗壽率都元帥金命元、巡察使李元翼等守平壤。數日前，城中人聞車駕欲出避，各自逃散，闔里幾空。上命世子出大同館門，集城中父老，諭以堅守之意。父老進前曰：「但聞東宮之令，民心不信，必得聖上親諭，乃可明日。」上不得已，御館門，令承旨曉諭如昨。父老數十人拜伏痛哭，承命而退。遂各分出招呼，悉追老弱男婦子弟之竄伏山谷者入城。城中皆滿，及賊見形於大同江邊，宰臣盧稷等奉廟社位版，并護宮人先出。於是城中吏民作亂，挺刃橫路，縱擊之。墜廟社主路中，指從行宰臣大罵曰：「汝等平日偷食國祿，今乃誤國欺民，乃爾耶！」余自練光亭赴行宮路上，見婦女幼稚，皆怒髮上指，相與號呼曰：「既欲棄城，何故給我輩入城？獨使魚肉於賊手耶？」至宮門，亂民塞街，皆袒臂持兵杖，遇人輒擊，紛囂雜沓，不可禁。諸宰在門內朝堂者，皆失色，起立於庭中。余恐亂民入宮門，出立門外階上，見其中有年長多髯者，以手招之，其人卽至。乃土官也。余諭之曰：「汝輩欲竭力守城，不願車駕出城，爲國之忠則至矣，但因此作亂，至於驚擾宮門，事甚可駭。且朝廷方啓請堅守，上已許之。汝輩何事乃爾？觀汝貌樣，乃有識人，須以此意曉諭衆人而退，不爾則汝輩將陷重罪，不可赦也。其人卽棄杖歛手曰：「小民聞欲棄城，不勝憤氣，妄動如此。今聞此言，小人雖迷劣，臂中卽豁然矣。遂揮其衆而散。蓋前此朝臣聞賊兵將近，皆請出避，兩司弘文館連日伏閣力

請寅城府院君鄭澈。尤主避出之議。余曰。今日事勢與前在京城時有異。京城則軍民崩潰。雖欲守之。末由也。此城前阻江水。而民心頗固。且近中原地方。若堅守數日。天兵必來救。猶可藉以卻賊。不然從此至義州。更無可據之地。勢必至於亡國。左相尹斗壽同余議。余又請鄭澈曰。平時每意公慷慨不避難。易不圖今日之議如此也。尹相詠文山詩曰。我欲借劔斬倭臣。寅城大怒。奮袂而起。平壤人亦聞余爲守議。故是日聞余言。頗順從而退。夕召監司宋言慎。責以不能鎮定亂民。言慎摘發其倡首者三人。斬於大同門內。餘皆散去。時已定出城。而不知所適。朝臣多言北道地僻路險。可以避兵。蓋是時賊兵已犯咸鏡道。而道路不通。且無報變者。故朝廷不知也。於是同知李希得。曾爲永興府使。有惠政得民心。以爲咸鏡道巡察使。兵曹佐郎金義元。爲從事官。在北道。而內殿及宮嬪以下。先出向北。臣固爭曰。車駕西狩。本欲倚仗天兵。以圖興復耳。今既請兵于天朝。而顧深入北道。中間賊兵阻隔。天朝聲問亦無可通之路。况望恢復乎。且賊散出諸道。安知北道必無賊兵。若不幸既入其處。而賊兵隨至。則他無去路。只有北虜而已。何處可依。其爲危迫。不亦甚乎。今朝臣家屬多避亂于北道。故各顧私計。皆言向北便。臣有老母。亦聞東出避亂。雖不知在處。而必流入於江原咸鏡之間。臣亦以私計言之。則豈無向北之情哉。只以國家大計。不與人臣同。故敢此懇陳耳。因嗚咽流涕。上惻然曰。卿母安。

在予之故矣。既退，知事韓準又獨請對，力言向北之便。於是中殿遂向咸鏡道。時賊至大同江已三日矣。余輩在練光亭，望見越邊，有一倭以木末懸小紙，挿江沙上，令火炮匠金生麗、棹小舟往取之。倭不帶兵器，與生麗握手拊背，極款狎，附書以送。書至，尹相欲不開見。余曰：「開見何妨。」開視則書面云：「上朝鮮國禮曹判書李公閣下。蓋與李德馨書，而平調信立蘇所裁也。大槩欲見德馨講解，德馨以扁舟會平調信立蘇于江中，相勞問如平日。立蘇言：日本欲借道朝貢中原，而朝鮮不許，故事至此。今亦借一條路，使日本達中原，則無事矣。德馨責以負約，且令退兵。後議講解，調信等語頗不遜，遂各罷去。夕賊數千，結陣於江東岸上。」

六月十一日，車駕出平壤向寧邊。大臣崔興源、俞泓、鄭澈等扈從。左相與金元帥、李巡察、元翼留守平壤，余亦以接待唐將留。是日賊攻城，左相、元帥、巡察及余在練光亭。本道監司宋言慎守大同城門樓，兵使李潤德守浮碧樓。以上江灘，慈山郡守尹裕後等守長慶門。城中士卒民夫合三四千，分配城堞。而部伍不明，城上人或疎或密，或人上有人，肩背相磨，或連數梁無一人。散掛衣服於乙密臺，近處松樹間名曰疑兵。隔江望賊兵，亦不甚多。東大院岸上排作一字陣，列豎紅白旗。如我國挽章樣，出十餘騎向羊角島，入江中。水沒馬腹，皆按轡列立，示將渡江之狀。其餘往來江上者，或一二或三四，荷大劍，日光下射。

閃閃如電。或非真劍。以木爲之。沃以白蠟。以眩人眼者。然遠不可辨。又六七賊持鳥銃到江邊。向城放。聲響甚壯。丸過江入城。遠者入大同館。散落瓦上。幾千餘步。或中城樓柱。深入數寸。有紅衣賊見練光亭上諸公會坐。知爲將帥。挾鳥銃邪睨。漸進至沙渚上。放丸中亭上二人。然遠故不重傷。余令軍官姜士益從防牌內。以片箭射之。矢及沙上。賊遽巡而卻。元師發善射者。乘快船中流射賊。船稍近東岸。賊亦退避。我軍從船上發立字銃。火箭如椽過江。倭衆仰視。皆叫噪而散。箭落地。爭聚觀之。是日以不卽整兵船。斬工吏房一人。時久不雨。江水日縮。曾分遣宰臣。禱雨檀君箕子東明王廟。猶不雨。余謂尹相曰。此處水深。無船。賊終不能渡。惟水上多淺灘。早晚賊必由此渡。渡則城不可守。何不嚴備。金元帥性緩。但曰。已命李潤德守之矣。余曰。潤德輩何可倚仗。指李巡察曰。公等會坐一處。如宴集。無益於事。不可往護江灘耶。李曰。若令往見。敢不盡力。於是尹相謂李曰。公可往。李起出。余時承命。只應接唐將。不參軍務。默念必敗。不如早迎。唐將於中路。速進一步來救。庶可有濟。日暮。遂與從事官洪宗祿辛慶晉。出城。夜深到順安。路中逢李陽元。從事官金廷睦。自淮陽來。聞賊兵至鐵嶺矣。明日過肅川。至安州。遼東鎮撫林世祿。又來。接受咨文。送行在。翌日。聞車駕已離寧邊。次博川。余馳詣博川。上御東軒。引見臣。問平壤可守乎。臣對曰。人心頗固。似可守。但援兵不可不速進。故臣爲此以來。欲迎着天兵。請

速馳援。而至今未見兵至。玆以爲憫。上手取尹斗壽狀。啓示臣曰。昨日已令老弱出城云。人心必搖。何以能守。臣對曰。誠如聖慮。臣在彼時。未見此事。大概觀其處形勢。賊必由淺灘以渡。宜多布菱鐵於水中以備之。上使問此縣亦有菱鐵否。對有數千介。上曰。急募人送之平壤。臣又啓曰。平壤以西。江西龍岡。甌山咸從等邑。倉穀多。人民衆。聞賊兵已近。則必驚駭散失。宜急遣侍從一人。自此馳去。鎮撫之。且收兵爲平壤繼援便。上曰。誰人可去。對曰。兵曹正郎李幼澄。有計慮。可遣。又啓。臣事急不可遲滯。當達夜馳去。以迎見。唐將爲期。遂辭退出。見李幼澄言。上前所達。幼澄愕然曰。此乃賊藪。何可進。余責之曰。食祿不避難。臣子之義。今國事危急如此。雖湯火不可避。願以此一行爲難乎。幼澄默然有恨色。余旣拜辭出。至大定江邊。日已平西矣。回望廣通院。野有散卒。絡繹而來。疑平壤失守。使軍官數輩馳往收之。得十九人而至。乃義州龍川等處之軍。而往平壤守江灘者也。言昨日賊已從王城灘渡江。江上軍潰。兵使李潤德遁走。余大驚。卽於路中爲書狀。遣軍官崔允元馳報。行在夜入嘉山郡。是日夕。內殿至博川。蓋在路聞賊兵已入北道。故不前而回。通川郡守鄭述遣使進物膳。

平壤陷。車駕次于嘉山。東宮奉廟社主。自博川入山郡。初賊兵分駐江沙上。作十餘屯。結草爲幕。旣累日不得渡江。警備頗怠。金命元等自城上望見。

以爲可乘夜掩襲抄擇精兵使高彥伯等領之從浮碧樓下綾羅渡潛以船渡軍初約三更舉事失時刻既渡已昧爽矣見諸幕中賊猶未起遂前突第一陣賊驚擾我軍多射殺賊土兵任旭景先登力戰爲賊所害奪賊馬三百餘匹俄而列屯賊悉起大至我軍退走還趨船船上人見賊已迫後中流不敢艤船淹死者甚衆餘軍又從王城灘亂流而渡賊始知水淺可涉是日暮舉衆由灘以濟我軍守灘者不敢發一矢皆散走賊既渡猶疑城中有備遲回不前是夜尹斗壽命元開城門盡出城中人沉軍器火炮于風月樓池水中斗壽等由普通門而出至順安賊無追躡者從事官金信元獨出大同門乘船順流向江西明日賊至城外登牧丹峰良久觀望知城空無人乃入城始車駕至平壤廷議皆以糧餉爲憂盡取列邑田稅輸到平壤及城陷并本倉穀十餘萬石皆爲賊所有時余狀報至博川又巡察使李元翼從事官李好閔亦自平壤來言賊渡江狀夜車駕及內殿發向嘉山命世子奉廟社別由他路使之收召四方以圖興復分臣僚從行領議政崔興源以命從世子右議政俞泓亦自請隨世子上不答駕既出泓伏路邊辭去內官屢啓右相俞泓請辭上終不答泓遂從東宮時尹斗壽在平壤未還行在無大臣惟鄭澈以舊相從駕至嘉山已五鼓矣車駕次于定州自駕出平壤人心崩潰所過亂民輒入倉庫搶掠穀物順安

肅川安州寧邊博川。以次皆敗。是日。駕發嘉山。郡守沈信謙謂余曰。此郡糧穀頗優。官廳亦有白米一千石。欲以此餉天兵。不幸事至於此。公若少留鎮定。則邑人不敢動。不然亂作。小人亦不敢留此。將向海邊躲避矣。時信謙已不能令其下矣。獨余所帶軍官六人。及路中所收潰卒十九人。余約束使之自隨。故各帶弓箭在傍。信謙欲藉此自護。故云。然余不忍遽發。少坐大門。日已過午。更念無上命而擅留不行。於義未安。遂與信謙別行。上曉星嶺。回望嘉山。則郡中已亂矣。信謙盡失倉穀而逃。翌日。車駕出定州向宣川。命臣留定州。州人已四散避亂。獨老吏白鶴松等數人在城中而已。余伏路邊。送駕出城。掩泣坐延薰樓下。軍官數人在左右階下。所收潰卒十九人。猶不去。繫馬路邊。柳木相環而坐。向晚見南門有執杖者。自外連絡而來。向左邊去。使軍官視之。聚於倉下者已數百。余念已所率寡弱。若亂民益多。而與之爭鬪。則難制。不如先攻弱者。使之驚散爲可。於是視城門。又有繼至者十餘人。余急呼軍官。從十九卒馳捕之。其人望見奔走。追及捕九人而至。卽令披髮反接而赤脫之。徇于倉邊道路。十餘卒隨其後大呼曰。擒鞠倉賊。將行刑梟首。城中人見之。於是已聚倉下者望而惶駭。悉從西門散去。由是定州倉穀僅全。而龍川宣川鐵山等邑。劫倉者亦絕。定州判官金榮一。武人也。自平壤奔還。置其妻子於海邊。偷出倉穀欲送之。余聞而數之曰。汝爲武將。敗軍不死。其罪可誅。又敢偷出官穀耶。

此穀將餉。天兵非汝所得私者。杖之六十。既而尹左相金元帥武將李贊等。自平壤皆至定州。上出定州。時有命左相若來。亦留駐定州。及尹至。余傳上命。尹不答。直向行在。余亦留金命元李贊等守定州。追及乘輿於龍川。時郡邑人民聞平壤陷。意賊隨後至。盡竄山谷。路上不見一人。聞江邊列邑如江界等地皆然。余行至郭山山城下。見有岐路。問下卒曰。此向何處路。曰。此走龜城路也。余駐馬呼從事官洪宗祿曰。沿途倉儲一空。天兵雖來。何以接濟。此間惟龜城一邑。儲峙頗優。而亦聞吏民盡散。輸運無策。君久在龜城。其處人如聞君至。雖隱山谷中。必有來見。欲聞賊勢者。君從此急去。龜城論之曰。賊入平壤。尙不出。天兵方大至。收復不遠。所患一路糧糶不足耳。爾輩無論品官人吏。悉一境之力。輸運軍糧。不乏軍興。則後日必有重賞。若此則庶幾同心協力。輸到定州嘉山。可以濟事。宗祿慨然應諾。分路而去。余自向龍川。蓋宗祿坐己丑獄。謫在龜城。車駕至平壤後。始收叙爲司饗正。爲人忠實。有忘身徇國不避夷險之志。

車駕至義州。天將參將戴某。遊擊將軍史儒。各領一枝兵。向平壤至林畔驛。聞平壤已陷。亦還駐義州。天朝賜犒軍銀二萬兩。唐官領到義州。先是遼東聞我國有賊變。卽奏聞而朝議多異同。甚或疑我爲賊向導。獨兵部尙書石星。銳意救援。時我使申點在玉河館。尙書呼至庭。出遼東報變文書示之。點卽號

慟與一行朝夕大臨。先請援兵。尙書奏發二枝兵往衛國王。及請賜銀點。回至通州。而告急使鄭崑壽繼至。尙書引入火房。親問事狀。或至流涕云。至是連遣使至遼東。告急請援。且乞內附。蓋賊已陷平壤。則勢如建瓴。意謂朝夕當至。鴨綠江。事之危急如此。故至欲內附。幸賊既入平壤。歛跡城中。延至數月。雖順安永柔。去平壤咫尺。而猶不來犯。以此人心稍定。收拾餘燼。導迎天兵。終致恢復之功。此實天也。非人力之所及也。

七月遼東副總兵祖承訓。率兵五千來援。報先至。時余病瘳甚。臥不能起。上令左相。出治沿道軍食。余使從事辛慶晉啓曰。行在時任大臣。只有斗壽一人。不可出。臣已受接待。唐將之命。雖病。猶可自力一行。上許之。初七日。力疾詣行宮拜辭。蒙引對。匍匐以入。啓曰。一路自所串以南。至定州嘉山。則五千兵經過時。一。二日食可辦。安州肅川順安三邑。蕩無所儲。天兵過此。宜先持三日糧。以備安州以南之食。若兵至平壤。卽日收復。則城中粟多。可以接濟。雖圍城累日。平壤西三縣穀。亦可竭力輸到軍前。不至闕乏。此等曲折。請令在此諸臣。與唐將相議。濶狹相濟。便宜施行。上曰。然。既出。內賜熊膽臘藥。內醫院僕龍雲者。送余于城門外五里。痛哭。余登箭門嶺。哭聲猶聞。夕至所串驛。吏卒逃散。不見形影。使軍官往探村落。間得數人而至。余勉諭曰。國家平日撫養汝輩。用在今日。何忍逃避。且天兵方至。國事正急。此乃汝輩效

勞立功之秋也。因出空冊子一卷，先書來見者姓名示之曰：後日當以此等第功勞。啓聞論賞，其不在此錄者，事定一一查覈行罰，不可免也。旣而來者相續，皆曰：小人因事暫出，豈敢避役。願書名于冊，余知人心可合。卽移文各處，使例置考功冊，書功勞多少，以憑轉報施行。於是聞令者爭出，搬運柴草，架造房屋，排設釜鼎，數日之間，凡事稍集。余以爲亂離之民，不可用急，但至誠曉諭，未嘗鞭撻一人。進至定州，洪宗祿盡起龜城人，輸運馬豆及小米，到定州嘉山者已二千餘石矣。余猶以安州以後爲憂，適忠清道牙山倉稅米全一千二百石，載船將向行，在到泊於定州立崑，余喜甚，卽馳啓曰：遠穀適至如期，似是天贊中興之運，請并取以補軍餉。令守門將姜士雄馳去立崑，分運二百石定州，二百石嘉山，八百石於安州。安州則以近賊，姑令停船水中以待之。宣沙浦僉使張佑成造大定江浮橋，老江僉使閔繼仲造晴川江浮橋，擬渡天兵。余前往安州調度，時賊入平壤久不出，巡察使李元翼與兵使李養駐順安，都元帥金命元在肅川，余在安州。

十九日，祖總兵軍攻平壤不利而退。史遊擊戰死。先是祖承訓至義州，史儒以其軍爲先鋒，祖乃遼左勇將，累與北虜戰有功是行，謂倭必可取。至嘉山，問我人曰：平壤賊無乃已走耶？曰：不退。承訓舉酒仰天祝之曰：賊猶在必，天使我成大功也。是日自順安三更發軍，進攻平壤，適大雨，城上無賊守兵。天兵從七

星門入。城內路狹多委巷。馬足不可展。賊依險阨。亂發鳥銃。史遊擊中丸。卽斃。軍馬多死。祖遂退軍。賊不急追。後軍陷泥濘中。不能自拔者。悉爲賊所害。承訓引餘兵。還過順安肅川。夜中至安州。城外立馬。呼譯官朴義儉曰。吾軍今日多殺賊。不幸史遊擊傷死。天時又不利。大雨泥濘。不能殲賊。當添兵更進耳。語汝宰相毋動。浮橋亦不可撤。言畢。馳渡兩江。駐軍於控江亭。蓋承訓戰敗膽懼。恐賊追躡。欲前阻二江。故疾急如此。余使辛從事往慰。且載送糧饌。承訓留控江亭二日。連日夜大雨。諸軍露處野中。衣甲盡濕。皆怨承訓已而退還遼東。余恐人心動搖。啓請仍留安州。以待後軍之至。

全羅水軍節度使李舜臣。與慶尙右水使元均。全羅右水使李億禛等。大破賊兵于巨濟洋中。初賊旣登陸。均見賊勢大。不敢出擊。悉沉其戰船百餘艘。及火炮軍器於海中。獨與手下裨將李英男。李雲龍等。乘四船奔至昆陽海口。欲下陸避賊。於是水軍萬餘人皆潰。英男諫曰。公受命爲水軍節度。今棄軍下陸。後日朝廷按罪。何以自解。不如請兵於全羅道。與賊一戰。不勝然後逃。未晚也。均然之。使英男往舜臣請援。舜臣辭以各有分界。非朝廷之命。豈宜擅自越境。均又使英男往請。凡往返至五六不已。每英男回。均坐船頭。望見痛哭。旣而舜臣率板屋船四十艘。并約億禛到巨濟。與均合兵。進與賊船遇。於見乃梁。舜臣曰。此地海狹水淺。難於回旋。不如佯退誘賊。至海關處相戰也。均乘憤欲直

前搏戰。舜臣曰：公不知兵，如此必敗。遂以旗揮其船退。賊大喜，爭乘之。旣出隘口，舜臣鳴鼓一聲，諸船一齊回棹，擺列於海中。正與賊船撞着，相距數十步。先是舜臣創造龜船，以板鋪其上，其形穹窿如龜，戰士擢夫皆在其內。左右前後多載火炮，縱橫出入如梭。遇賊船，連以大炮碎之。諸船一時合攻，烟焰漲天。焚賊船無數。有賊將在樓船，高數丈，上施樓櫓，以紅段彩氈圍其外，亦爲大炮所破。賊悉赴水死。其後賊連戰皆敗，遂遁入釜山巨濟，不復出。一日方督戰，流丸中舜臣左肩，血流至踵。舜臣不言，戰罷始以刀割肉出丸，深入數寸。觀者色墨而舜臣談笑自若。捷聞，朝廷大喜。上欲加舜臣以一品，言者以爲大濫。陞正憲，億祺均陞嘉善。先是賊將平行長到平壤，投書曰：日本舟師十餘萬，又從西海來，未知大王龍御自此何之。蓋賊本欲水陸合勢西下，賴此一戰，遂斷賊一臂，行長雖得平壤，而勢孤不敢更進。國家得保，全羅忠清以及黃海平安沿海一帶，調度軍食，傳通號令，以濟中興，而遼東金復海，蓋與天津等地，不被震驚。使天兵從陸路來援，以致卻賊者，皆此一戰之功。嗚呼！豈非天哉。舜臣因率三道舟師，留屯于閑山島，以遏賊西犯之路。

前義禁府都事曹好益募兵江東討賊，好益昌原人，有志行，爲人所誣，全家徙江東，貧困，教授生徒，以得食。幾二十餘年，厲操愈堅。車駕至平壤，赦其罪，召拜義禁府都事。及平壤被圍，好益往江東募兵，欲救平壤。旣而平壤陷，軍民皆

潰好益還赴行在。余遇於良策驛，語之曰：「天兵將至，子毋往義州，可還江東，仍行召募，與天兵會平壤，以助軍勢。」好益從之。余遂狀啓其由，爲起兵文移，授好益且助以軍器。好益去，聚兵得數百人，出陣祥原，邀賊多斬獲。好益書生，不閑弓馬，徒以忠義激厲士心。冬至日，率其士卒望行在四拜，終夜痛哭，一軍爲之流涕。

賊兵犯全羅道，金堤郡守鄭湛，海南縣監邊應井，力戰死之。時賊從慶尙右道入全州界，湛應井等禦之於熊嶺，爲木柵橫斷山路，督將士終日大戰，射殺賊兵無算。賊欲退，會日暮矢盡，賊更進攻之，二人俱死。軍遂潰，明日賊至全州，官吏欲走，州人前典籍李廷鸞入城，倡吏民固守。時賊精銳多死於熊嶺，氣已索，監司李洸又設疑兵於城外，晝則多張旗幟，夜則列炬滿山，賊到城下，環視數周，不敢攻而去，悉聚熊嶺，戰死者屍埋路邊，作數大塚，立木其上。書曰：「弔朝鮮國忠肝義膽，蓋嘉其力戰也。」由是全羅一道獨全。

八月初一日，巡察使李元翼巡邊使李贊等率兵進攻平壤，不利而退。時元翼與贊將數千人往順安，別將金應瑞等率龍岡三和甌山江西四邑之軍，作二十餘屯，在平壤之西。金億秋率水軍在大同江下流，以爲掎角之勢。是日，元翼等從平壤城北進兵，遇賊先鋒，射中二十餘賊，旣而賊大至，軍士驚潰。江邊勇力之士多折傷，遂還屯順安。

九月。天朝遊擊將軍沈惟敬來。初祖承訓既敗。賊愈驕。投書我軍。有羣羊攻一虎之語。羊喻天兵。虎以自誇。聲言朝夕將西下。義州人皆荷擔而立。惟敬本浙民。石尙書以爲素諳倭情。假遊擊將軍號出送。既至順安。馳書倭將。以聖旨。責問朝鮮有何虧負於日本。日本如何擅興師旅。時倭變猝發。且殘毒甚。人人惴恐。莫敢有窺其營者。惟敬以黃袱裹書。使家丁一人背負。騎馬直馳。由普通門而入。倭將行長見其書。卽回報求面見議事。惟敬將往。人皆危之。多勸止者。惟敬笑曰。彼焉能害我也。從三四家丁赴之。行長平義智立蘇等。盛陳兵威。出會于城北十里外。降福山下。我軍登大興山頭。望見倭軍甚多。劒戟如雪。惟敬下馬入倭陣中。群倭四面圍繞。疑被拘執。日暮。惟敬還。倭衆送之甚恭。翌日。行長遣書馳問。且曰。大人在白刃中。顏色不變。雖日本人。無以加也。惟敬答之曰。爾不聞唐朝有郭令公者乎。單騎入回紇萬軍中。曾不畏懼。吾何畏爾也。因與倭約曰。吾歸報聖皇。當有處分。以五十日爲期。倭衆無得出平壤西北十里外搶掠。朝鮮人毋入十里內與倭鬪。乃於地界立木爲禁標。而我國人皆莫測。

京畿監司沈岱爲賊所襲。死於朔寧。岱爲人慷慨。自變後。常憤憤。奉使出入。不避夷險。是年秋。代權徵爲京畿監司。從行朝赴任。所路出安州。見余于百祥樓上。語國難慨然。觀其意直欲親犯矢石。以角賊。余戒之曰。古人不云乎。耕當

問奴。君書生。臨陣終非所能。其處有楊州牧使高彥伯者。勇力善鬪。君但收拾軍兵。使彥伯將之。可有功。慎勿自將也。岱唯唯而不甚然之。余又見其孤行入賊中。分軍官善射者。義州人張某與俱。岱既去。數月間。每有京畿人啓事行朝。經過安州者。未嘗不致書問余也。余輒親問其人。京畿賊勢及監司何爲。對曰。畿甸創殘甚他道。賊日出焚掠。無乾淨地。前監司及守令以下。悉從深僻處躲避。減去儀從。微服潛行。或屢遷徙。不定厥居。以防賊患。今監司殊不畏賊。每巡行。先文知委。如平日。建旗鳴角而行。余聞而甚憂之。申書戒勅如前。岱不變。既乃聚集軍兵。悉以自隨。聲言欲復京城。日遣人入城中。召募約爲內應。城中人恐事定後。以附賊獲罪。連名結狀。出赴監司。自言能內應者。日以千百數。名曰聽約束。曰輸軍器。曰報賊情。人人往來無阻。其間亦有爲賊耳目。來察動靜者多。出沒相雜。而岱信之不疑。至是岱在朔寧郡。賊訶知之。潛渡大灘。夜襲之。岱驚起披衣走出。賊追害之。軍官張姓者亦同死。賊去。京畿人權殯于朔寧郡中。數日。賊復取出其首。懸於鍾樓街上。積五六十日。面色如生。京城人哀其忠義。相與率財物。賂守倭贖出之。函送于江華。賊退後。與尸身還葬故山。岱青松人。字公望。子大復。朝廷以岱故官之。至縣監。

江原道助防將元豪。擊賊于龜尾浦。殲之。又戰于春川。兵敗而死。時賊大陣在忠州及原州。連營達于京都。其在忠州者。取路竹山。陽智龍仁往來。其在原州

者欲從砥平楊根廣州抵京。元豪擊殲于驪州龜尾浦。利川府使邊應星又船載射手乘霧邀賊於驪州之馬灘。殺賊頗多。由是原州賊路遂斷。悉由忠州之路。而利川驪州楊根砥平等邑之民見遺於賊鋒者。人以爲豪之功也。巡察使柳永吉又催豪擊春川賊。豪旣勝。頗有輕敵之意。賊知豪將至。設伏以待。豪不知而進。伏發。遂爲所殺。於是江原一道無禦賊者。

訓鍊副奉事權應銖鄭大任等以鄉兵擊永川賊破之。遂復永川。應銖永川人有膽勇。與大任率鄉兵千餘人圍賊于永川。軍士畏賊不進。應銖斬數人。士卒爭奮。踰城而入。與賊巷擊。賊不勝。奔入倉中。或上明遠樓。我軍以火攻之。悉燒死。臭聞數里。餘賊數十遁歸慶州。自是新寧義興義城安東等處賊皆聚一路。而左道郡邑得保。永川一戰之功也。

左兵使朴晉收復慶州。晉初自密陽奔入山中。朝廷以前兵使李珪棄城逃走。卽其所在誅之。以晉代爲兵使。時賊兵充滿。行朝聲聞不通南方已久。人心搖動。不知所出。及聞晉爲兵使。於是散民稍集。而守令往往從山谷中復出。莅事。始知有朝廷矣。及權應銖復永川。晉率左道兵萬餘進薄慶州城下。賊潛出北門掩軍後。晉奔還安康。夜又使人潛伏城下。發飛擊震天雷入城中。墮於客舍庭中。賊不曉其制。爭聚觀之。相與推轉而諦視之。俄而炮自中而發。聲震天地。鐵片星碎。中仆卽斃者三十餘人。未中者亦顛仆。良久而起。莫不驚懼。

不測其制。皆以爲神。明日。遂舉衆。棄城遁歸西生浦。晉遂入慶州。得餘穀萬餘石。事聞。陞晉嘉善。應銖通政。大任禮泉郡守。震天雷。飛擊。古無其制。有軍器寺。火炮匠李長孫者。創出。取震天雷。以大碗口發之。能飛至五六百步。墜地良久。火自內發。賊最畏此物。

時各道起義兵討賊者甚衆。在全羅道者。前判決事金千鎰。僉知高敬命。前寧海府使崔慶會。千鎰字士重。率兵先至京畿。朝廷嘉之。賜其軍號曰倡義。已而不能軍入江華。敬命字而順。孟英之子。有文才。亦率鄉兵。移檄郡縣討賊。與賊戰敗死。其子從厚。代領其衆。名曰復讎軍。慶會後爲慶尙右兵使。死於晉州。其在慶尙道者。玄風人郭再祐。高靈人前佐郎金沔。陝川人前掌令鄭仁弘。禮安人前翰林金垓。校書正字柳宗介。草溪人李大期。軍威校生張士珍。再祐越之子。頗有才略。累與賊戰。賊憚之。固守鼎津。使賊不得入宜寧界。人以爲再祐之功。沔。故武將世文之子。禦賊于居昌牛脊峴。累卻賊。事聞。擢爲右兵使。病卒於軍中。宗介起兵未久。遇賊而死。朝廷嘉其志。贈禮曹參議。士珍前後射殺賊兵甚多。賊稱爲張將軍。不敢入軍威界。一日。賊設伏誘之。士珍竄追。陷伏中。猶大呼力戰。矢盡。賊擊斷士珍一臂。士珍獨以一臂。奮擊未已。遂死。事聞。贈水軍節度使。其在忠清道者。僧人靈圭。前提督官趙憲。前清州牧使金弘敏。庶孽李山謙。士人朴春茂。忠州人趙德恭。內禁衛趙雄。清州人李逢靈。圭。勇力。

善鬪。與憲復清州。後爲賊所敗。皆死。雄尤勇敢。能馬上立馳。殺賊頗多。戰死。其
在京畿者。前司諫禹性傳。前正鄭叔夏。水原人崔屹。高陽人進士李魯。李山輝。
前牧使南彥經。幼學金琢。前正郎俞大進。忠義衛李軼。庶孽洪季男。士人王玉。
季男最驍勇。其餘各聚鄉里。或百餘人。或數十餘人。以義爲名者。不可勝數。而
無可紀之績。皆遷徙日闕而已。又有僧人惟政。在金剛山表訓寺。賊入山中。寺
僧皆走。惟政不動。賊不敢逼。或合掌致敬而去。余在安州。移文四方。使各起兵。
赴難。文至山中。惟政展佛卓上。呼諸僧讀之流涕。遂起僧軍。西赴勤王。比至
平壤。衆千餘人。屯平壤城東。與順安軍作爲形勢。又有宗室湖城監。率百餘人
赴。行在。朝廷陞秩爲湖城都正。使屯順安。與大軍合勢。其在北道者。評事鄭
文孚。訓戎僉使高敬民。功最多云。
以李鎰爲巡邊使。召李蕢還。行在。鎰初守江灘。平壤旣陷。渡江而南。入黃
海道。從安岳至海州。又自海州至江原道伊川。從世子募得兵數百。聞賊入
平壤久不出。而天兵將至。遂還平壤。結陣于林原坪。在平壤東北十餘里。與
義兵將高忠卿等連勢。頗有斬獲。而李蕢在順安。每進兵輒北。撫軍司從官。皆
欲以鎰代蕢。元帥金命元獨主。李蕢與撫軍司論議不協。頗有相激之端。朝
廷使余往順安軍中。使之鎮定調輯。旣而朝議皆言鎰勝蕢。又聞天兵將出。
恐蕢不勝任。遂以鎰代之。朴名賢代領鎰軍。而蕢還行在。

獲賊諜金順良。余自安州遣軍官成男持傳令密約進取事于水軍將金億秋。時十二月初二日也。戒曰：六日內回繳。過期不繳，追成男詰之。成男云：已使江西軍人金順良還納，又捕順良來，問傳令安在。其人故作迷罔狀，言辭流遁。成男曰：此人持傳令出數日，還軍中牽一牛來，與同伴屠食。人問牛何來，順良答曰：吾牛而寄養於族人，故還取耳。今聞其言，蹤跡可疑。余始令拷掠而嚴鞠之，乃吐實曰：小人爲賊間，其日受傳令及秘密公文，直入平壤示賊。賊將置傳令案上，公文則見卽扯裂，賞一牛。同爲間者徐漢龍賞紬五疋，約更探外事。期十五日來報，故聽出矣。余問爲間者獨汝乎？更有幾人？對曰：凡四十餘輩。每散出順安江西諸陣，以至肅川安州義州，無不貫穿行走。隨事輒報。余大駭，卽狀啓。又按名急通諸陣捕之，或得或逸，斬順良於城外不久。天兵至而賊不知，蓋其類駭散故耳。茲亦事機之偶然者，莫非天也。

懲忿錄卷之一 終

懲寇錄卷之二

十二月。天朝大發兵。以兵部右侍郎宋應昌爲經略。兵部員外郎劉黃裳。主事袁黃。爲贊畫軍務。駐遼東。提督李如松。爲大將。率三營將李如柏。張世爵。楊元。及南將賂尙志。吳惟忠。王必廸。等渡江。兵數四萬餘。先是沈惟敬既去。倭果歛兵不動。既而過五十日。惟敬不至。倭疑之。聲言歲時將飲馬鴨綠江。自賊中逃回者。皆言賊大修攻城之具。人以益懼。十二月初。惟敬又至。再入城中。留數日。更相約誓而去。所言不聞。至是。兵至安州。下營於城南。旌旗器械。整肅如神。余請見提督白事。提督在東軒許入。乃頽然丈夫也。設椅相對。余袖出平壤地圖。指示形勢。兵所從入之路。提督傾聽。輒以朱筆點其處。且曰。倭但恃鳥銃耳。我用大炮。皆過五六里。賊何可當也。余既退。提督於扇面題詩寄余云。提兵星夜渡江干。爲說三韓國未安。明主日懸旌節報。徽臣夜釋酒杯歡。春來殺氣心猶壯。此去妖氛骨已寒。談笑敢言非勝算。夢中常憶跨征鞍。時城中漢兵皆滿。余在百祥樓。夜半。忽有唐人持軍中密約三條來示。問其姓名。不告而去。提督使副總兵查大受。先往順安。給倭奴曰。天朝已許和。沈遊擊且至。倭喜。立蘇獻詩曰。扶桑息戰服中華。四海九州同一家。喜氣忽消寰外雪。乾坤春早太平花。時癸巳春正月初吉也。使其小將平好官。領二十餘倭。出迎沈遊擊于順

安查總兵誘與飲酒。伏起縱擊之。擒平好官。斬戮從倭幾盡。三人逸馳去。賊中始知兵至。大擾。時大軍已到肅川。日暮。方下營。做飯。報至。提督彎弓鳴弦。卽以數騎馳赴順安。諸營陸續進發。翌日朝。進圍平壤。攻普通門。七星門。賊登城上。列豎紅白旗拒戰。天兵以大砲火箭攻之。炮聲震地。數十里間。山岳皆動。火箭布空。如織烟氣蔽天。箭入城中。處處火起。林木皆焚。駱尙志。吳惟忠等。率親兵蟻附登城。前者墜後者升。莫有退者。賊刀架下垂。城堞如蝟毛。天兵戰益力。賊不能支。退入內城。斬戮焚燒死者甚衆。天兵入城攻內城。賊於城上爲土壁。多穿孔穴。望之如蜂窠。從穴中銃丸亂發。天兵多傷。提督慮竊寇致死。收軍城外。以開走路。其夜賊乘冰過江遁去。先是余在安州。聞大兵將出。密報黃海道防禦使李時言。金敬老使邀其歸路。戒之曰。兩軍沿道設伏。俟賊過躡其後。賊飢困遁走。無心戀戰。可盡就縛。時言卽至中和。敬老辭以他事。余又遣軍官姜德寬督之。敬老不得已。亦來中和。賊退前一日。因黃海道巡察使柳永慶。關還走載寧。時永慶在海州。欲自衛。而敬老憚與賊戰。避去。賊將平行長平。義智立蘇平調信等。率餘衆連夜遁還。氣乏足。躑躅而行。或匍匐田間。指口乞食。我國無一人出擊。天兵又不追之。獨李時言。尾其後不敢逼。但斬飢病落後者六十餘級。是時倭將之在都城者。平秀嘉。乃關白姪。或言婿也。年幼不能主事。軍務制在行長。而清正。在咸鏡道未還。若行長義智立蘇等就擒。則京

城之賊自潰。京城潰則清正歸路斷絕。軍心汹懼。必沿道遁走。不能自拔。漢江以南賊屯。次第瓦解。天兵鳴鼓徐行。直至釜山。痛飲而已。俄頃之間。海岱肅清。安有數年之紛紛哉。一夫不如意。事關天下。良可痛惜。余狀。啓請斬金敬老。蓋余爲平安道體察使。敬老非管下。故先請之。朝廷遣宣傳官李純一。持標信至開城府。欲誅之。先告于提督。提督曰。其罪應死。然賊未滅。一武士可惜。姑令白衣從軍。使之立功贖罪可也。爲咨文授純一而送。

遞李鎰巡邊使。更以李贊代之。平壤之戰。天兵從普通門而入。李鎰及金應瑞等。從含毬門而入。及收兵。皆退屯城外。夜賊遁去。明朝始覺之。李提督咎我軍不警守。使賊遁去而不知。於是天將之曾往來順安。與李贊相熟者。爭言鎰非將才。獨李贊可。提督移咨言狀。朝廷使右相尹斗壽。至平壤問鎰罪。欲行軍法。良久釋之。更以贊代鎰。選兵三千騎。從提督而南。

李提督進兵坡州。與賊戰於碧蹄。南不利。還屯開城。初平壤既復。大同以南沿道賊屯。皆遁去。提督欲追賊。謂余曰。大軍方前進。而聞前路無糧草。議政旣爲大臣。當念國事。不可憚勞。宜行準備軍糧。勿致疎誤。余辭出。時天兵先鋒已過大同江而南。箕搶塞路不可行。余委曲疾行出軍前。夜入中和至黃州。已三鼓矣。時賊兵新退。一路荒虛。人民未集。計無所出。急移文于黃海監司柳永慶。使之催運。又移文于平安監司李元翼。調發金應瑞等所率軍人之不堪戰

陣者自平壤負戴追隨。送至黃州。又令船運平安道三縣之穀。從青龍浦輸運於黃海道。事非預辦。臨時猝急。而大軍隨至。恐乏軍興。爲之勞心焦思。永慶頗有儲峙。畏賊散置山谷。間督民輸至。沿途不至闕乏。旣而大軍入開城府。正月二十四日。賊疑我民爲之內應。且忿平壤之敗。盡殺京城。中民庶焚燒。公私閭舍殆盡。而西路列屯之賊。皆會京城。謀拒王師。余連請提督速進。提督遲回者累日。進至坡州。翌日副總兵查大受。與我將高彥伯領兵數百。先行偵探。與賊相遇於碧蹄驛南礪石嶺。斬獲百餘級。提督聞之。留大軍。獨與家丁騎馬者千餘。馳赴之。過惠陰嶺。馬蹶墮地。其下共扶起之。時賊匿大衆於礪石嶺後。只數百人在嶺上。提督望見。揮其兵爲兩翼而前。賊亦自嶺而下。漸相逼。後賊從山後遽上山陣。幾萬餘。天兵望之。心懼而已。接刃不可解。時提督所領皆北騎。無火器。只持短劍鈍劣。賊用步兵。刃皆三四尺。精利無比。與之突鬪。左右揮擊。人馬皆靡。無敢當其鋒者。提督見勢危急。徵後軍未至。而先軍已敗。死傷甚多。賊亦收兵不急追。日暮。提督還坡州。雖隱其敗。而神氣沮甚。夜以家丁親信者戰死痛哭。明日欲退軍東坡。余與右議政俞泓都元帥金命元。帥李贊等至帳下。提督出立帳外。諸將左右立。余力爭曰。勝負兵家常事。當觀勢更進。奈何輕動。提督曰。吾軍昨日多殺賊。無不利事。但此地經雨泥濘。不便駐軍。所以欲還東坡。休兵進取耳。余及諸人爭之固。提督出示已奏本草。其中有曰。賊兵在都

城者二十餘萬衆寡不敵。未又言。臣病甚。請以他人代其任。余駭而以手指點曰。賊兵甚少。何得有二十萬。提督曰。我豈能知之。乃汝國人所言也。蓋託辭也。諸將中張世爵尤勸都督退兵。以余等固爭不退。以足蹴巡邊使李贊叱退。聲色俱厲。是時大雨連日。且賊燒道邊諸山。皆兀兀無蒿草。重以馬疫。數日間倒隕者殆將萬匹。是日三營還渡臨津。陣于東坡驛前。明日自東坡。又欲還開城府。余又力爭曰。大軍一退。則賊氣愈驕。遠近驚懼。臨津以北。亦不可保。願少住觀釁。以動提督佯許之。余既退。而提督跨馬遂還開城府。諸營悉退開城。獨副總兵查大受遊擊毋承宣軍數百守臨津。余猶留東坡。日遣人更請進兵。提督謾應之曰。天晴路乾。則當進。然實無進意。大軍到開城府日久。軍糧已盡。惟從水路括粟及菱草於江華。又船運忠清全羅道稅糧。稍稍而至。隨到隨盡。其勢愈急。一日諸將以糧盡爲辭。請提督旋師。提督怒呼余及戶曹判書李誠中京畿左監司李廷馨。跪庭下大聲詰責。欲加以軍法。余摧謝不已。因念國事至此。不覺流涕。提督愍然。更怒諸將曰。汝等昔從我征西夏時。軍不食累日。猶不敢言歸。卒成大功。今朝鮮偶數日不支糧。何敢遽言旋師耶。汝輩欲去則去。我非滅賊不還。惟當以馬革裹尸耳。諸將皆頓首謝。余出門以放糧不時。杖開城經歷沈禮謙。繼而糧船數十隻。自江華泊後西江。僅得無事。是夕。提督使總兵張世爵召余慰之。且論軍事。提督還平壤。時賊將清正。尙在咸鏡道。有人傳言。清

正將自咸興踰陽德孟山襲平壤。時提督有北還意。未得其機。因此聲言平壤乃根本。若不守。大軍無歸路。不可不救。遂回軍還平壤。留王必迪守開城。謂接伴使李德馨曰。朝鮮之軍。勢孤無援。宜悉還江北。是時全羅巡察使權慄。在高陽幸州。巡邊使李養在坡州。高彥伯李時言等。在嶻踰嶺。元帥金命元在臨津南。余在東坡。提督恐爲賊所乘。故云。然余使從事官辛慶晉。馳見提督。陳不可退軍者五。先王墳墓皆在畿甸。淪於賊藪。神人望切。不忍棄去一也。京畿以南南遺民。日望王師。忽聞退去。無復固志。相率而歸。賊二也。我國境土尺寸。不可容易棄之三也。將士雖力弱。方欲倚仗天兵。共圖進取。一聞撤退之令。必皆怨憤離散四也。一退而賊乘其後。則雖臨津以北。亦不可保五也。提督默然而去。

全羅道巡察使權慄。敗賊于幸州。移軍坡州。先是慄以光州牧使。代李洸爲巡察使。率兵勤王。懲李洸等野戰而敗。至水原。據禿城山城。賊不敢攻。及聞天兵將入京城。渡江陣于幸州山城。至是賊從京城大出攻之。軍中洵懼欲散。而江水在後。無走路。不得已。還入城力戰。矢雨下。賊分爲三陣。迭進皆敗。會日暮。賊還入京城。慄令軍士取賊屍。磔裂肢體。散掛林木。以泄其憤。旣而聞賊欲更出。期必報。甚懼。毀營柵。率軍至臨津。從都元帥金命元。余聞之。單騎馳去。登坡州山城。觀形勢以爲當大路之衝。而地形斗絕。可據。卽令權慄與巡邊使李

糞合軍據守。以遏賊兵西下。防禦使高彥伯李時言。助防將鄭希立朴名賢等。爲遊兵遮躡嶺。義兵將朴惟仁尹先正李山輝等。從右路伏於昌敬陵之間。各以其兵出沒抄擊。賊多出則避而不戰。少出則隨處邀擊。自是賊不得出城樵採。馬死者甚多。又令倡義使金千鎰京畿水使李蘋。忠清水使丁傑等。乘舟從龍山西江。以分賊勢。忠清道巡察使許頊。在陽城令還護本道。以備賊南衝之勢。移文京畿忠清慶尙官義兵。使各在其處。從左右邀截賊路。楊根郡守李汝讓守龍津。凡諸將所斬賊首。皆懸掛於開城府南門之外。提督參軍呂應鍾見之喜曰。朝鮮人。今則取賊首如割毳矣。一日賊從東門大出。搜山自楊州積城至大灘。無所得。查大受恐賊來襲。報余曰。有體探人來言。賊欲得查總兵柳體察云。姑避開城如何。余答之曰。體探人所言。恐無此理。賊方疑大軍住近。豈敢輕易渡江。我等一動。則民心必搖。不如靜以待之。查笑曰。此言甚是。假令有賊。吾與體察。死生同之。豈敢獨去。遂分所率勇士數十餘人來護余。雖雨甚。達夜警守不暫怠。至聞賊入城乃罷。其後賊探知權慄在坡州。欲報怨。率大軍從西路而出。至廣灘。去山城數里。住兵不進。自午至未。不攻還退。後不復出。蓋賊知地形。見慄所據險絕。故耳。余移書王必廸言。賊方據險。固未易攻。大兵當進住東坡坡州躡其尾。以牽綴之。選南兵一萬。從江華出於漢南。乘賊不意。擊破諸屯。則京城之賊。歸路斷絕。必向龍津而走。因以後兵覆諸江津。可一舉掃

滅。必迪擊節稱奇策。發偵探軍三十六名。馳往忠清道義兵將李山謙陣。察賊形勢。時賊精兵皆在京城。而後屯皆羸疲寡弱。偵卒踴躍還報云。不須一萬。只得二三千可破。李提督北將也。是役也。痛抑南軍。恐其成功不許。請發軍糧餘粟。賑救飢民。許之。時賊據京城已二年。鋒焰所被。千里蕭然。百姓不得耕種。餓死殆盡。城中餘民。聞余在東坡。扶攜擔負而至者。不計其數。查總兵於馬山路中。見小兒匍匐飲死母乳。哀而收之。育於軍中。謂余曰。倭賊未退。而人民如此。將奈何。乃歎息曰。天愁地慘矣。余聞之不覺流涕。時大兵將再至。糧船之自南方來者。皆列泊江岸。不敢他用。適全羅道招募官安敏學。募得皮穀千石。船運而至。余喜甚。卽狀啓請。以此賑救飢民。以前郡守南宮悌。爲監賑官。取松葉爲屑。每松屑十分。合米屑一合。投水以飲之。人多穀少。所活無幾。唐將亦哀之。自分所食軍糧三十石。賑給。百不能及一。一日夜大雨。飢民在余左右。哀吟呻。不可忍聞。朝起視之。狼藉而死者甚多。慶尙右道監司金誠一。亦遣前典籍李魯。告急于余曰。欲糶全羅左道之穀。賑濟飢民。且爲春耕種子。而全羅都事崔鐵堅。不肯賑貸。時知事金瓚。爲體察副使。在湖西。余卽移文于瓚。令馳下全羅。自發南原等倉。移一萬石于嶺南。以救之。大抵自京都至南邊。賊兵橫貫。時方四月。人民皆登山入谷。無一種麥之處。使賊更數月不退。則生類盡矣。

沈遊擊惟敬再入京城，誘賊退兵。四月初七日，提督率兵自平壤還開城府。先是金千鎰陣中，有李蓋忠者，自請入京探候賊情，得見二王子及長溪君黃廷彧等，還言賊有講和意。既而賊投書於龍山舟師，乞和。千鎰送其書於余。余念提督已無戰意，或欲假此而卻賊，則未必不更還開城。庶幾了事。以其書示查大受。查即使家丁李慶馳報平壤。於是提督又使惟敬來。金命元見惟敬曰：賊忿平壤見欺，必有不善意，何可更入。惟敬曰：賊自不速退，故敗。何預我也。遂入。在賊中所言，雖不聞，大槩責還。王子陪臣還軍釜山，然後許和。賊請奉約束，提督遂還開城。余呈文提督，極言和好非計，不如擊之。提督批示曰：此先得我心之所同然者。無聽用意。又使遊擊將軍周弘謨往賊營，余與金元帥適在權慄陣中。遇於坡州，弘謨使余等入參旗牌。余曰：此是入倭營旗牌，我何爲參拜。且有宋侍郎禁殺賊牌文，尤不可承受。弘謨強之三四，余不答。騎馬還東坡。弘謨使人于提督言狀。提督大怒，曰：旗牌乃皇命，雖獃子見輒拜之，何爲不拜。我行軍法，然後回軍。接伴使李德馨急報於余，曰：朝日不可不來謝。明日余與金元帥往開城，詣門通名。提督怒不見。金元帥欲退，余曰：提督應試，余姑待之。時小雨，余二人拱立門外。有頃，提督之人出門覘視而入者，再俄而許入。提督立于堂上，余就前行禮，仍謝曰：小的雖甚愚劣，豈不知旗牌爲可敬，但旗牌傍有牌文，不許我國人殺賊，私心竊痛之，不敢參拜，罪無所逃。提督有慚色，乃

曰。此言甚是。牌文乃宋侍郎令。不關吾事。因曰。此間流言甚多。侍郎若聞陪臣不參旗牌。我容而不問。則必并責我。須爲呈文。略辨事情來。脫侍郎有問。我以此解之。不問則置之。余二人拜辭而退。依所言呈文。自是提督遣人往來倭陣相續。一日余與元帥往候提督。還東坡到天壽亭前。遇查將家丁李慶。自東坡入開城。馬上相揖而過。至招賢里。有漢人三騎自後馳來。喝問體察使安在。余應之曰。我是也。叱回馬。一人手持鐵鎖。以長鞭亂捶余馬曰。走走。余不知何事。只得回馬向開城而走。其人從馬後鞭之不已。從者皆落後。獨軍官金霽從事。辛慶晉。盡力追隨。過青郊驛。將至土城隅。又有一騎自城內走馬而至。謂三騎曰。云云。於是三騎揖余曰。可去矣。余恍然不測而回。翌日因李德馨通示。始知之。提督信任家丁。自外入謂提督曰。柳體察不欲講和。悉去臨津船隻。勿令通使於倭營。提督遽發怒。欲拿余捆打四十。當余之未至也。提督瞋目奮臂。或坐或起。左右皆慄。有頃。李慶至。提督問臨津有船否。慶曰。有船。往來無阻。提督卽使人止追余者。謂家丁妄言。痛打數百。氣絕曳出。悔其怒余。謂人曰。若體察使來到。吾當何以處之。蓋提督常謂余不肯和議。素有不平心。故纔聞人言。不復省察。暴怒如此。人皆爲余危之。後數日。提督又使遊擊戚金錢世禎二人。以旗牌至東坡。招余及金元帥。李觀察廷馨同坐。因從容言賊請出。王子陪臣。退還京城而去。今當從其所請。給賊出城。然後行計追勦。乃提督使之來探余意。

肯否也。余猶執前議。往復不已。世禎性躁。發怒大罵曰。然則爾國王。何以棄城逃避耶。余徐曰。遷國圖存。亦或一道。是時戚金。但數數視余。與世禎微笑而無言。世禎等遂回。四月十九日。提督領大軍至東坡。宿于查總兵幕。蓋賊已約退兵。故將入京城也。余詣提督下處候問。提督不見。謂譯者曰。體察使不快於予。亦來問耶。

四月二十日。京城復。天兵入城。李提督館於小公主宅。後稱南別宮前一日。賊已

出城矣。余隨入城。見城中遺民。百不一存。其存者皆飢羸疲困。面色如鬼。時日氣烘熱。人死及馬死者。處處暴露。臭穢滿城。行者揜鼻方過。公私廬舍一空。獨自崇禮門以東。循南山下一帶。賊所止舍處稍存。宗廟三闕及鍾樓各司館

學在大街以北者。蕩然惟餘灰燼而已。小公主宅亦倭將秀嘉所止。故見遺。余先詣宗廟痛哭。次至提督下處。見伺候諸臣。號慟良久。明朝更詣提督門下。問起居。且言賊兵纔退。去此應不遠。願發軍急追。提督曰。吾意固然。所以不急追者。以漢江無船故耳。余曰。如老爺欲追賊。卑職當先出江面。整備舟艦。提督曰。甚善。余出漢江。先是余行文京畿右監司成泳。水使李蘋令賊去。急收江中大小船。毋失俱會漢江。是時船已到者八十隻。余使人報提督船已辦。食頃。營將李如柏率萬餘兵出江上。軍士半渡。日已向暮。如柏忽稱足疾。乃曰。當還城中。醫疾可進。乘輜而回。已在漢南軍。皆還渡入城。余痛心而無如之何。蓋提督

實無意追賊。但以謾辭給應而已。二十三日。余遂病臥。五月。李提督追賊至聞慶而回。宋侍郎始發牌文於提督。使之追賊。時賊去已數十日。侍郎恐人議已縱賊不追。故作如此舉止以示之。其實畏賊不敢進而回。賊在途緩緩而去。或留或行。我軍之在沿途者。皆左右屏跡。無敢出擊者。賊退分屯於海邊。自蔚山西生浦。至東萊金海熊川巨濟。首尾相連。凡十六屯。皆依山憑海。築城掘塹。爲久留計。不肯渡海。天朝又使泗川總兵劉綎。率福建西蜀南蠻等處召募兵五千。繼出屯星州八莒。南將吳惟忠屯善山鳳溪。李寧祖承訓葛逢夏屯居昌。駱尙志王必廸屯慶州。環四面而相持不進。糧餉取之兩湖。踰越險阻。散給諸陣。民力益困。提督又使沈惟敬往諭倭令渡海。又使徐一貫謝用梓入耶古耶見關白。六月。賊始還兩。王子臨海君順和君及宰臣黃廷或黃赫等。遣沈惟敬歸報。而一面進圍晉州。聲言報前年戰敗之怨。蓋賊於壬辰圍晉州。牧使金始敏禦之。不克而退。故云然也。八日而城陷。牧使徐禮元判官成守瓌。倡義使金千鎰。本道兵使崔慶會。忠清兵使黃進義。兵復讎將高從厚等皆死。軍民死者六萬餘人。牛馬雞犬不遺。賊皆夷城壕。壕堙井刊木。以快前憤。時六月二十八日也。初。朝廷聞賊南下。連下旨督諸將追賊。都元帥金命元。巡察使權慄以下官義兵。皆聚於宜寧。慄狃於幸州之捷。欲渡岐江前進。郭再祐高彥伯曰。賊勢方盛。我軍多烏合。堪戰者少。前頭又無糧餉。不可

輕進。他人依違而已。李贛從事成好善。駮不曉事。奮臂責諸將逗遛。與權慄議合。遂過江進至咸安。城空無所得。諸軍乏食。摘青柿實以食。無復鬪心矣。明日。諜報賊從金海大至。衆或言當守咸安。或言退守鼎津。紛紛不決而已。聞賊炮響。人人涵懼。爭出城墮。吊橋死者甚多。還渡鼎津。望見賊兵從水陸來。蔽野塞川。諸將各自散去。權慄命元李贛崔遠等。先向全羅道。惟金千鎰崔慶會黃進等。入晉州。賊隨至圍之。牧使徐禮元。判官成守環。以唐將支待差使員。久在尙州。聞賊向本州。狼狽而還。纔二日矣。州城本四面據險。壬辰移東面下就平地。至是賊立飛樓八座。俯瞰城中。刈城外竹林。作大東環列自蔽。以防矢石。從其內發鳥銃如雨。城中人不敢出頭。又千鎰所率。皆京城市井召募之徒。千鎰又不。知兵事。而自用太甚。且素惡徐禮元。主客相猜。號令乖違。是以甚敗。惟黃進守東城。戰數日。爲飛丸所中死。軍人奪氣。而外援不至。適天雨城壞。賊蟻附而入。城內人方束荆投石。極力禦之。賊幾卻。千鎰軍守北門。意城已陷。先潰。賊在山上。望見軍潰。一擁而登。諸軍大亂。千鎰在蠱石樓。與崔慶會攜手痛哭。赴江死。軍民得脫者數人而已。自有倭變以來。人死未有如此戰之甚者。朝廷以千鎰死義。贈以崇秩。議政府右贊成。又以權慄敢戰不畏賊。代命元爲元帥。劉總兵綏。聞晉陷。自八莒馳至陝川。吳惟忠。自鳳溪至草溪。以護右道。賊亦既破晉州。還釜山。聲言待天朝許和。乃渡海云。

十月。車駕還都。十二月。天使行人司行人司憲來。先是沈惟敬挾倭將小西飛持關白降表而歸。天朝疑降表非出於關酋。行長等詐爲之。又惟敬纔至。而晉州見陷。納款之意不誠。留小西飛於遼東。久不報。時提督及諸將皆還去。惟劉綎吳惟忠王必廸等萬餘兵駐箭八莒。而中外飢甚。且困於饋運。老弱顛溝壑。壯者爲盜賊。重以癘疫。死亡殆盡。至父子夫婦相食。暴骨如莽。未幾劉軍自八莒移南原。又自南原還都城。留十餘日。遂巡西去。而賊猶在海上。人心益恐。於是經略宋應昌被劾去。新經略顧養謙代。至遼東。遣參將胡澤以筭付來。諭我群臣。其略曰。倭奴無端侵爾。勢如破竹。據王京開城三都會。有爾土地人民十八九。虜爾王子陪臣。皇上赫怒興師。一戰而破平壤。再進而得開城。倭奴竟遁王京。送還王子陪臣。復地二千餘里。所費帑金不貲。士馬物故亦不少。朝廷之待屬國。恩義止此。皇上罔極之恩。亦已過矣。今餉已不可再運矣。兵已不可再用矣。而倭奴亦畏威請降。且乞封貢矣。天朝正宜許之封貢。容之爲外臣。驅倭盡數渡海。不復侵爾。解勞息兵。所以爲爾國久遠計也。今爾國糧盡。人民相食。又何恃而請兵耶。旣不與兵。餉於爾國。又絕封貢於倭奴。倭奴必發怒於爾國。而爾國必亡。安可不早自爲計耶。昔句踐之困於會稽也。豈不欲食夫差之肉乎。而姑忍恥含垢。以有待也。身且爲臣也。妻且爲妾也。况爲倭奴請爲臣妾於中國。以自寬而徐爲之圖。是愈

於句踐君臣之謀也。此而不能忍，是倖倖小丈夫之見耳。非復讎雪恥之英雄也。爾爲倭請封貢，若果得請，則倭必益惑中國，而且德朝鮮，必罷兵而去。倭去而爾國君臣，遂苦心焦思，臥薪嘗膽，以修句踐之業。天道好還，安知無報倭日也。其言縷縷千百，大意如此。胡澤在館三月餘，朝議不決。聖意愈難之。臣時以病在告。啓曰：請封義固不可，惟當詳具近日事情。奏聞以聽。中朝處置，屢啓乃允。於是陳奏使許瑱去。時顧經略又以人言辭去。新經略孫鑛來代。兵部奏請收小西飛入京，詰以三事：一但求封不求貢，二一倭不留釜山，三永不侵朝鮮，如約卽封，不如約不可。小西飛指天爲誓，請遵約束。遂令沈惟敬更帶小西飛入倭營宣諭。又差李宗誠、楊方亨爲上副使，往封平秀吉。日本國王而使宗誠等留我都城，候倭盡撤方行。乙未四月，宗誠等至漢城，連遣使促倭渡海，項背相望。於是倭先撤熊川數陣，及巨濟、塲門、蘇津浦等諸屯，以示信。且曰：恐如平壤見欺，願天使速入倭營，當悉如約。八月，楊方亨因兵部劄付，先到釜山，而倭遷延不卽盡撤，更請上使人多疑之。兵部尙書石星信沈惟敬言：意倭無異情，又急於退兵，屢促宗誠前去。雖朝議多異，而星奮然以身當之。九月，宗誠繼至釜山，平行長不卽來見，又言將往復關白定奪。然後迎天使，行長入日本。丙申正月始回，猶不明言撤兵事。沈惟敬留二使，又獨與行長先行渡海，託言將講定迎使禮節。人莫能測，惟敬錦衣登舟，旗上大書調戡兩國。

四字立船頭而去。既去久無回報。李宗誠乃開國功臣文忠之後。以功襲爵。統
稔子弟。性頗恇懦。或言於宗誠曰。倭酋實無受封意。將誘致宗誠等。拘囚而困
辱之。宗誠懼甚。夜半以微服出營。盡棄僕從。輜重印節而逃。翌朝倭始覺。分道
追之。至梁山石橋。不得而回。楊方亨獨留倭營。撫戢群倭。且移文我國。令勿驚
動。宗誠不敢由大路竄入山谷中。數日不食。從慶州來西去。既而沈惟敬行長
始回。又撤西生浦竹島等屯。其未撤者。只釜山四屯。乃挾楊副使過海。沈惟敬
又要我使同行。遣其姪沈懋時催發。朝廷不肯。懋時必欲與偕。不得已以武
臣李逢春等稱跟隨。陪臣以應之。或謂武人往彼中。多失誤。宜使文官識事理
者往。昔黃慎以沈接伴使在倭營。就令慎隨行。

天使楊方亨沈惟敬回自日本。先是方亨等至日本。關白盛飾館宇。欲迎接會。
一夜地大震。擗倒幾盡。遂迎候於他舍。與兩使一再會。初若受封者然。忽大怒
曰。我放還朝鮮。王子朝鮮當使。王子來謝而使臣秩卑。是慢我也。黃慎等
不得傳命。并促楊方亨沈惟敬等同回。亦無謝恩。天朝之禮。賊將平行長。
回釜山浦。清正復率兵繼屯西生浦。聲言要王子來謝。始解兵。蓋關酋所求
甚大。不止封貢。中朝但許封不許貢。惟敬與平行長相熟。欲臨事繙縫。苟且
成事。而不以實情聞諸天朝。與我國事竟不諧。本國即遣使馳奏其事。於是
石星沈惟敬皆得罪。而天兵再出矣。

速水軍統制使李舜臣下獄。初元均德舜臣來救。相得甚歡。既而爭功。漸不相能。均性險詖。且多連結於中外。搆誣舜臣。不遺餘力。每言舜臣。初不欲來。因我固請。乃至。勝敵我爲首功。時朝論分歧。各有所主。薦舜臣初爲余。不悅。余者。與元均合。攻舜臣甚力。惟右相李元翼。明其不然。且曰。舜臣與元均。各有分守之地。初不卽進。未足深非。先是賊將平行長。使卒倭要時羅。往來慶尙右兵使金應瑞陣。致慫慙。方清正欲再出也。時羅密言於應瑞曰。我將行長言。今此和事不成。由於清正。吾甚疾之。某日。清正當渡海。朝鮮善水戰。若要諸海中。可以敗殺。慎毋失也。應瑞上其事。朝議信之。海平君尹根壽。尤踊躍以爲機會。難失。屢啓之。連催舜臣前進。舜臣疑賊有詐。遲徊者累日。至是要時羅。又至曰。清正今已下陸。朝鮮何不要截。佯致恨惜之意。事聞。廷議皆咎舜臣。臺諫請拿鞠。玄風人前縣監朴惺者。亦承望時論。上疏極言舜臣可斬。遂遣義禁府都事拿來。元均代爲統制使。上猶疑所聞不盡實。特遣成均司成南以信。下閑山廉察。以信旣入全羅道。軍民遮道訟舜臣冤者。不可勝數。以信不以實聞。乃曰。清正留海島七日。我軍若往。可縛來。而舜臣逗遛失機。舜臣至獄。命大臣議罪。獨判中樞府事鄭琢言。舜臣名將。不可殺。軍機利害。難可遙度。其不進。未必無意。請寬恕以責後效。拷問一次。減死削職充軍。舜臣老母在牙山。聞舜臣下獄。憂悸而死。舜臣出獄。道過牙山。成服卽往。權慄帳下從軍。人聞而悲之。

天朝以兵部尙書邢玠爲總督軍門。遼東布政司楊鎬爲經理朝鮮軍務。麻貴爲大將。楊元劉綈董一元等相繼而出。丁酉五月。楊元領三千兵先至。留京城數日。下全羅道駐守南原。蓋南原據湖嶺之衝。城頗堅完。往時駱尙志又增築可守故也。城外有蛟龍山城。衆議欲守山城。楊元以爲本城可守。增埤浚濠。濠內又設羊馬牆。晝夜董役。月餘粗完。

八月初七日。閑山舟師潰。統制使元均。全羅右水使李億祺死。慶尙右水使裴楔走免。初元均旣至閑山。盡變舜臣約束。凡褊裨士卒。稍爲舜臣所任使者。皆斥去。以李英男詳知己前日奔敗狀。尤惡之。軍心怨憤。舜臣在閑山時。作堂名曰運籌。日夜處其中。與諸將共論兵事。雖下卒欲言軍事者。許來告。以通軍情。每將戰。悉招褊裨問計。謀定而後戰。故無敗事。均挈愛妾居其堂。以重籬隔內外。諸將罕見其面。又嗜酒。日事酗怒。刑罰無度。軍中竊語曰。若遇賊。惟有走耳。諸將私相譏笑。亦不復稟畏。故號令不行。時賊將再入寇。平行長又遣要時羅。給金應瑞曰。倭船某日當添至。朝鮮舟師猶可邀擊。都元帥權慄。尤信其說。且以李舜臣以逗遛已得罪。日促元均進兵。均亦常言舜臣見賊不進。以此陷舜臣。而已得代其任。至是雖知其勢難。而慙無以爲辭。只得盡率舟艦進前。倭營之在岸上者。俯視船行。互相傳報。均至絕影島。風作浪起。日已昏。船無止泊處。望見倭船出沒海中。均督諸軍進前。舟中人自閑山終日搖櫓。不得休息。又困

飢渴疲不能運船。諸船縱橫進退。乍前乍卻。倭欲疲之。與我船相近。輒偷伴引避而去。不與交鋒。夜深風盛。我船四散分漂。不知去向。均艱收餘船。還至加德島。軍士渴甚。爭下船取水。倭兵從島中突出揜之。失將士四百餘人。均又引退。至巨濟。叅川島。權慄在固城。以均無所得。檄召均杖之。督令更進。均還到軍中。益忿懣。飲酒醉臥。諸將欲見均言事不得。夜半。倭船來襲之。軍大潰。均走至海邊。棄舟登岸欲走。而體肥鈍。坐松樹下。左右皆散。或言爲賊所害。或言走免。終不得其實。李億祺從船上投水。裴楔先是屢諫。均必敗。是日又言叅川島淺窄。不利行船。宜移陣他處。均皆不聽。楔私約所領船。戒嚴待變。見賊來犯。奪港先走。故其軍獨全。楔還至閑山島。縱火焚廬舍糧穀軍器。徙餘民之留在島中者。使避賊而去。閑山旣敗。賊乘勝西向。南海順天。次第陷沒。賊船至豆恥津下陸。進圍南原。兩湖大震。蓋賊自壬辰入我境。惟見敗於舟師。平秀吉憤之。責行長必取舟師。行長佯輸款於金應瑞。使李舜臣得罪。又誘元均出海中。盡得其虛實。因行掩襲。其計至巧。而我悉墮其計中。哀哉。

倭兵陷黃石山城。安陰縣監郭趁前咸安郡守趙宗道死之。初體察使李元翼。元帥權慄議。修道內山城禦賊。築公山金烏龍紀富山等城。而公山金烏。用民力尤多。悉收旁郡器械糧餉實其中。督守令盡率老弱男婦入守。遠近騷然。及賊再動。清正自西生浦。西向全羅。將與行長水路兵會攻南原。元帥以下皆望。

風引去。傳令各處山城入守者。各散去避兵。惟義兵將郭再祐。入昌寧。火王山城。期死守。賊到山下。仰見形勢斗絕。而城內人靜帖不動。不攻而去。安陰縣監郭趨。入黃石山城。前金海府使白士霖。亦入城中。士霖武人。衆心倚以爲重。賊兵攻城一日。士霖先遁。諸軍皆潰。賊入城。趨與子履祥。履厚皆死。趨女嫁柳文虎。文虎爲倭所擄。郭氏已出城聞之。謂其婢曰。父死而不死。爲有夫在耳。今夫又執。吾何生爲。自經死。趙宗道嘗曰。吾嘗從大夫之後。不可與奔竄之徒同死。草間死。則當明白死耳。率妻子入城中。作詩曰。崆峒山外生猶喜。巡遠城中死亦榮。遂與趨同被害。

復起李舜臣。爲三道水軍統制使。閑山敗報至。朝野震駭。上引見備邊諸臣。問之。群臣惶惑。不知所對。慶林君金命元。兵曹判書李恒福。從容啓曰。此元均之罪。惟當起李舜臣爲統制使耳。從之。時權慄聞元均敗。已使李舜臣往收餘兵。賊方衝斥。舜臣與軍官一人。自慶尙道入全羅道。晝夜潛行。間關達珍島。欲收兵禦賊。

倭兵陷南原府。天將楊元走還。全羅兵使李福男。南原府使任鉉。助防將金敬老。光陽縣監李春元。唐將接伴使鄭期遠等皆死。有軍器寺破陣軍十二人。隨楊元入南原。皆被兵死。獨有金孝義者得脫。爲余道城陷事甚詳。楊總兵旣至南原。增築城一丈許。城外羊馬牆多穿炮穴。城門安大炮數三坐。鑿深濠塹。

一二丈。閉山既敗。賊從水陸而至。報甚急。城中洶洶。人民逃散。獨總兵所領遼東馬軍三千。在城內。總兵檄召全羅兵使李福男同守。福男遷延不至。連發夜不收。催之不得已。乃至。而所率纔數百。光陽縣監李春元。助防將金敬老等。繼至。八月十三日。倭先鋒百餘。到城下。放鳥銃。頃刻而止。皆散伏田畝間。三五五作隊。既去。復來。城上人以勝字小炮。應之。倭大陣在遠。出遊兵交戰。疎行迭出。故炮發不能中。而守城卒往往中賊。丸斃。既而倭到城下。叫城上人求與語。總兵使家丁一人。挾通事往倭營。以倭書來。乃約戰書也。十四日。倭環城三面結陣。以銃炮迭攻如前日。先是城南門外民家稠密。賊臨至。總兵使焚之。而石牆土壁猶在。賊來依牆壁間自蔽。放丸多中城上人。十五日。望見倭衆刈城外雜草及水田中稻禾。作大束。無數。積牆壁間。城中不測。時遊擊將軍陳愚衷。領三千兵在全州。南原軍日望來援。而久不至。軍心益懼。是日晚。守堞軍往往交頭耳語。準備馬鞍。有欲遁色。夜一更。聞倭陣中。響聲大起。略相應和。有運物狀。而一面衆炮向城亂放。飛丸集城上。如雨雹。城上人縮頸不敢外窺。經一二時。響聲止。草束已平濠。又推積羊馬牆內外。頃刻與城齊。衆倭蹂躪登城。已聞城中大亂云。倭入城矣。孝義初撥守南門外羊馬牆。慌忙入城。城上已無人。但見城內處處火起。走至北門。唐軍悉騎馬欲出門。門堅閉不可易開。馬足如束。街路填塞。既而門開。軍馬爭門而出。倭兵在城外圍匝數三重。各守要路。奮長刀。

亂斫之。唐軍俛首受刃。適月明得脫者無幾。總兵與家丁數人。馳馬突出。僅以身免。或云倭知爲總兵。故使逸去也。孝義與同伴一人出門。一人遇賊死。孝義跳入水田伏草中。待倭收兵乃逸云。蓋楊乃遼將。徒知禦虜。不知禦倭。以至於敗。亦知平地之城守之甚難。詳記孝義之言。使後之守禦者。知所戒云。南原既陷。而全州以北瓦解。不可爲矣。楊元竟以此伏罪。傳首徇示。

統制使李舜臣。倭破兵于珍島碧波亭下。殺其將馬多時。舜臣至珍島。收拾兵船得十餘隻。時沿海人乘船避亂者無數。聞舜臣至。莫不喜悅。舜臣分道招呼。遠近雲集。使在軍後。以助形勢。賊將馬多時。號善水戰。率其船二百餘艘。欲犯西海。相遇於碧波亭下。舜臣以十二船載大炮。乘潮至。順流攻之。賊敗走。軍聲大振。是時舜臣已有軍八千餘人。進駐古今島。患乏糧。作海路通行帖。令曰。三道沿海公私船無帖者。以奸細論。毋得通行。於是凡避亂乘船者。皆來受帖。舜臣以船大小。差次使納米受帖。大船三石。中船二石。小船一石。避亂之人。盡載財穀入海。故不以納米爲難。而以通行無禁爲喜。旬日。得軍糧萬餘石。又募民輸銅鐵鑄大炮。伐木造船。事事皆辦。遠近避兵者。往依舜臣。結廬造幕。販賣爲生。島中不能容。旣而天朝水兵都督陳璘出來。南下古今島。與舜臣合兵。璘性暴猛。與人多忤。人多畏之。

上餞送于青坡野。余見璘軍人。歐辱守令無忌。以繩繫察訪李尙規頸曳之。流

血滿面。令譯官勸解不得。余謂同坐宰臣曰。可惜。李舜臣軍。又將敗矣。與璘同在軍中。掣肘矛盾。必侵奪將權。縱暴軍士。逆之則增怒。順之則無厭。軍何由不敗。衆曰。然。相與嗟歎而已。舜臣聞璘將至。令軍人大畋漁。得鹿豕海物甚多。盛備酒醪而待之。璘船入海。舜臣備軍儀遠迎。既到。大享其軍。諸將以下無不沾醉。士卒傳相告語曰。果良將也。璘亦心喜。不久。賊船犯近島。舜臣遣兵敗之。獲賊首四十級。悉以與璘爲功。璘益喜過望。自是凡事一咨於舜臣。出則與舜臣并轎。不敢先行。舜臣遂約束唐軍。與己軍無間。有奪民一縷者。皆拿致摑打。無敢違令者。島中肅然。璘上書於上。言統制使有經天緯地之才。補天浴日之功。蓋心服也。

賊兵退。時賊蹂躪三道。所過皆焚燒廬舍。殺戮人民。凡得我國人。悉割其鼻。以示威。兵至稷山。都城人皆奔散。九月初九日。內殿避兵西下。經理楊鎬。提督麻貴。在京城。而平安道軍五千餘人。黃海京畿軍數千。徵至。分守江灘。警守倉庫。賊從京畿界還退。清正再屯蔚山。行長屯順天。沈安頓吾屯泗川。首尾七八百里。是時都城幾不守。朝臣爭獻出避之策。知事申礫進言曰。車駕應幸寧邊。臣曾爲兵使。備諸寧邊事。其最可憂者。乃無醬也。若不預辦。何以繼用。聞者傳笑曰。辛不合醬。一大臣言於朝堂曰。此賊何足憂。久當自息。惟當奉乘輿往安便處耳。元帥權慄。走至京。上引見問之。慄曰。當初車駕不合。遽還都

城當留駐西方。以觀賊勢如何。既而聞賊退。慄又下慶尙道。臺諫論慄無謀。恇不可爲元師。不聽。

十二月。楊經理麻提督。領騎步兵數萬。下慶尙道。進攻蔚山賊營。時賊將清正。築城於蔚山郡東海邊。斗絕處。經理提督。乘其不意。掩之以鐵騎。馳擊賊。披靡不能支。天兵奪賊外柵。賊奔入內城。天兵貪擄獲之利。不卽進攻。賊閉門固守。攻之不克。諸營分屯城下。圍守十三日。賊不出。二十九日。余自慶州。往見經理提督。望見賊壘甚靜。寂無人聲。城上不設女牆。環四面爲長廊。守兵悉在其內。外兵若至城下。則銃丸亂發如雨。每日交鋒。天兵與我軍。死城下。成積。賊船從西生浦來。援列泊水中。如鳧雁。島山無水。賊每夜出沒城外。經理令金應瑞率勇士伏城外泉傍。連夜擒百餘人。皆飢羸。僅屬聲氣。諸將言城內糧絕。久圍將自潰。時天甚寒。陰雨。士卒手足瘡痍。已而賊又從陸路來。援。經理恐爲所乘。遽旋師。正月。天將悉回京師。謀再舉。

戊戌七月。經理楊鎬罷。新經理萬世德代之。時邢軍門參謀官兵部主事丁應泰。劾奏楊鎬欺罔。償事二十餘罪。鎬遂罷去。上以鎬於諸經理中。銳意討賊。卽遣左議政李元翼。賚仲救奏。馳赴京師。八月。鎬西去。上送至弘濟院東。流涕而別。萬世德將出未至。

九月。邢玠又分調麻貴主蔚山。董一元主泗川。劉緝主順天。陳隣主水路。同時

進攻皆不利。董軍爲賊所敗。死者尤多。

十月。劉提督再攻順天賊營。統制使李舜臣。以舟師大敗其救兵於海中。舜臣死之。賊將平行長棄城而遁。釜山蔚山河東沿海賊屯悉退。時行長築城于順天。芮橋堅守。劉純以大兵進攻不利。還順天。旣而復進攻之。李舜臣與唐將陳璘。扼海口以逼之。行長求援於泗川賊沈安頓。吾頓。吾從水路來援。舜臣進擊大破之。焚賊船二百餘艘。殺獲無算。追至南海界。舜臣親犯矢石力戰。有飛丸中其胷。出背後。左右扶入帳中。舜臣曰。戰方急。慎勿言我死。言訖而絕。舜臣兄子莞。素有膽量。秘其死。以舜臣令督戰益急。軍中不知也。陳璘所乘舟爲賊所圍。莞望見揮其兵救之。賊散去。璘使人于舜臣。謝救已。始聞其死。從椅上自投於地曰。吾意老爺生來救我。何故亡耶。拊膺大慟。一軍皆哭。聲震海中。行長乘舟師追賊過其營。自後逸去。先是七月。倭酋平秀吉已死。故沿海賊屯悉退。我軍與唐軍。聞舜臣死。連營慟哭。如哭私親。柩行所至。人民處處設祭。挽車而哭曰。公實生我。今公棄我何之。道路擁塞。車不得進。行路之人。無不流涕。贈議政府右議政。邢軍門謂當立祠海上。以獎忠魂。事竟不行。於是海邊之人。相率爲祠。號曰愍忠。以時致祭。商賈漁船往來過其下者。人人祭之云。

李舜臣字汝諧。德水人。其先曰邊。官至判府事。有直名。曾祖曰瑠。事成宗。燕山在東宮。瑠爲講官。以嚴見憚。嘗爲掌令。彈劾不避。百僚憚之。有虎掌令之稱。

祖百祿以門蔭仕。父貞不仕。舜臣少時。英爽不羈。與群兒戲。削木爲弓矢。遊里閭中。遇不如意者。欲射其目。長老或憚之。不敢過門。及長。善射。從武舉。發身。李氏世業儒。至舜臣始得武科。補權知訓練院奉事。兵曹判書金貴榮有孽女。欲與舜臣爲妾。舜臣不肯。人問之。舜臣曰。吾初出仕路。豈敢托迹權門。媒進耶。兵曹正郎徐益有所親在訓練院。欲越次薦報。舜臣以院中掌務官。執不可。益牌招舜臣。詣庭下詰之。舜臣辭色不變。直辨無撓。益大怒。盛氣臨之。舜臣從容酬答。終不少沮。益本多氣傲人。雖同僚亦憚之。難與爭辨。是日下吏在階下。皆相顧吐舌曰。此官敢與本曹抗。獨不顧前路耶。日暮。益愧屈令去。識者以此往往知舜臣焉。方在獄時。事不可測。有獄吏密語舜臣。兄子芬有賄則可免。舜臣聞之。怒芬曰。死則死耳。安可違道求生。其有操執如此。舜臣爲人。寡言笑。容貌雅飭。如修謹之士。而中有膽氣。忘身徇國。乃其素所蓄積也。兄羲臣。堯臣。皆先死。舜臣撫其遺孤如己子。凡嫁娶。必先兄子而後及己子。有才無命。百不一施而死。嗚呼惜哉。

統制在軍。晝夜戒嚴。未嘗解甲。在見乃梁。與賊相持。諸船已下碇。夜月色明甚。統制帶甲枕鼓而臥。忽起坐呼左右。取燒酒來飲一杯。悉呼諸將至前。語之曰。今夜月甚明。賊多詐謀。無月時固當襲我。月明亦應來襲。警備不可不嚴。遂吹令角。令諸船皆舉碇。又傳令斥埃船候卒方熟睡。喚起待變。久之。斥埃奔告賊。

來時月掛西山。山影倒海。半邊微陰。賊船無數從陰黑中來。將近我船。於是中軍放大炮。吶喊。諸船皆應之。賊知有備。一時放鳥銃。聲震海中。飛丸落於水中者如雨。遂不敢犯。退走。諸將以爲神。

懲誌錄卷之二終

懲毖錄卷之三

芹曝集

筭

論遼東咨兼陳事宜筭壬辰六月在義州

見本集

陳時務筭壬辰九月

伏以今日之勢日益危迫。前者每望賊兵之自退。今秋盡冬來。自退之事已無望矣。四方郡縣相對縮首。誠可痛心。且不久江水當合。大同晴川博川等江。盡爲平地。賊兵之散漫渡江者。將不可禦。中朝若果出於用兵之計。則當到已久。而至今無消息。臣竊觀沈遊擊處置。其大意恐不可僥倖息兵而已。倭人狡詐百端。脫使陽爲講解。遲留過冬。明年又多聚醜類。休兵鍊器。捲地而來。則其可以約信制其猖獗乎。兇賊十年窺覷。以有此事。今未嘗一挫其鋒。豈有自還之理乎。唐將之失計。卽我國之尤大不幸。臣不勝扣心拊膺。夜不能寐也。今宜速以此等曲折。明白陳告。更請速來。庶或得濟於萬一也。且竊聞建州衛獐子。亦有請救之言。可爲寒心。唐時不能平安史。乞兵於回紇。吐蕃世被其禍。此則又非此比也。然北虜素以近年捕斬採蓼胡之故。怨我頗甚。今猶以善言來試。

在我亦當以善言待之。不當嚴辭斥絕。以益其怒。惟使邊將語之曰。我國與爾世爲隣土。今聞倭奴作亂。欲爲來救。其意甚美。朝廷若聞。所當嘉獎賞給。但倭患今已向平。不至於勞爾輩遠來云云。至於請止。中朝亦不必大爲自絕之語。待如世讎。當以微辭嚴拒。而密告以貽害非輕之憂。勿使彰著於其耳。以增一敵。蓋我勢方急。不能以制其進退之命。脫或多起士馬。隔江來駐。名爲救援。而其意難測。將何以待之。此事。朝廷必以酬應得宜。而臣在此不得詳聞。不堪過計之憂。敢此濫陳。且臣在此。時接四方往來人。略聞諸道形勢。江華之事亦甚可虞。蓋兵多而無所統一。號令雜糅。且無能將。近聞又不利於華藏浦。而船隻亦被賊奪云。今稍可依仗者。江華之兵。而且通南方信息。不幸而江華有賊。則大事去矣。今令金千鎰。崔遠邊良俊。多集舟師。堅守其地。相時而動。毋墮賊術中。以成萬全之圖。且京畿本方諸將。惟高彥伯最爲可任。而委任不專。所率之軍。只楊州一境之民。無以成事。臣意宜令楊州抱川積城加平永平等邑之軍。盡屬於彥伯。遮蔽東道。勦捕賊兵。京城以西高陽交河江華喬桐之軍。又屬於一將。廣州果川水原安山稔川等邑之軍。又統於一將。三面合勢。以爲恢復京城之計。而仍使有計慮忠勇重臣。總爲節制。若是則事有端緒。約束號令。皆有歸宿。而事可得濟矣。自古國家之敗。非一日之積。一事之失。大槩自士夫心術敗壞始。他不暇論。今於危難之際。其患尤大。以此方伯守令。盡以奔竄自

免爲心。賊未至則率其眷屬。巡遊列邑。責辦厨傳。貽弊吏民。賊至則望風先遁。甚者。盡抄精勇之士。自衛其身。深藏遠避。惟恐見賊。故前日在其本邑。射捕零賊。以隸鄉里之類。今皆爲幕下閒遊之輩。人皆憤歎。不能己已。朝廷特未之知耳。至於江原道。山林深阻。道路艱險。往往有百二之勢。誠使當初。抄發山尺獵射之人。購以重賞。處處設伏。以其所得賊物。盡與其人。使有勸慕。則一道猶可支吾。而今則已爲賊土。與北道之賊。據爲窟穴。其勢日熾。將彌漫於慶尙左右道。未知國家更有何地耶。言之痛哭。今宜有所處置。急急收拾。然後庶可爲也。且一道之中。有名號者甚多。而一無捕賊之處。徒爲紛紛貽郡邑之弊。此亦不可以少省乎。且忠清全羅道。爲我國之根本。賊方熾盛。而二道監司。皆以勤王。離其道內。則必有彼此無及之憂。萬一兩湖敗。則嶺南難保。而八道更無乾淨之地矣。此亦當使一將。抄率精兵。以赴難。而監司則留捍本道之賊。恐或便當。臣又有一憂。觀此賊勢。其平定不卜遲速。假使賊兵幸而退。遠近郡邑。蓄積蕩然。明年種子。亦無出處。而生靈盡爲填壑。其誰救之。此非少憂。今賊兵猶在軍糧之外。多積皮穀於郡邑。恐有意外之慮。臣聞宣川身彌島。地勢廣闊。與江華等地無異。特以西道不爲海防。故未爲設鎮耳。臣意宣川定州嘉山以下。以至郭山龍川鐵山諸邑皮穀。以海船移置於其處。而仍使武將一人。率水軍守之。多作草家。以爲過冬之謀。賊平則輸出陸路。以爲明年之種。實係遠念。至於

黃海道豐川椒島及他海島無不如此。既不見失於賊。又以備明年之用。事極便利。而江華以西船路相通。亦必無礙。臣敢此并達。謬妄之見。未知適用。而區區之忱。不敢不盡。取進止。

陳時務劄壬辰十月

陳時務劄癸巳十月

陳時務劄甲午

措置沿江屯堡劄乙未

陳措置防守事宜兼辭職劄丁酉

已上五篇并見本集

啓辭

請遣申砮守京城及曉諭四方合力勦賊啓五壬辰

條陳時事啓六壬辰

條陳時事啓

并見本集

臣自途中得病。數日來轉劇。初惟泄瀉耳。更成血痢。腹痛痔腫。雜證乘虛交發。得病請姑使他大臣料理。接待天將事。啓八壬辰六月十日在義州。

夜不交睫者數日。食飲俱廢。委頓無力。不能起坐。當此危難之際。無以少效筋力。而將溢先朝露。誠自痛傷。不能自己。目今國家所恃者惟唐兵。而緣我國不能協力接濟。師老江上。未進一步。使賊得以窟穴西都。養其氣力。以爲無窮之禍。事機緊急。臣當日見唐將料理兵事。且道路饋餉等事。亦須親自驅馳。目見虛實。極意措辦。然後庶可及期。而不幸病勢如此。恐誤大事。不得不達。伏乞聖慈留念。臣差病間。使他大臣料理。可無緩不及事之悔。臣若幸得存活。筋力所及。不敢辭難。惶恐敢達。

請不爲還任守令徙邊 啓同

臣與調度使洪世恭相議某處穀移于某邑。某處船進泊于某江事。一一分付。而世恭極慮處處下人離散。無可使令。事未易辦爲言。且雖有粟。無人轉輸。如嘉山安州肅川順安。皆爲空官。不得已別樣處置。然後朝令可施。近日不爲還任守令。一切全家徙邊事。洪世恭處亦爲分付行移。此意敢啓。

嚮道 天將 啓

見本集

定州糧穀添備 啓

定州距龜城最近。唐兵所經一路。亦惟此處爲留駐之所。而本州倉穀甚少。今不得已。先添定州之穀。然後可以支應唐兵。定州之穀既足。則又當分輸于宣

川郭山等處。此則自可觀勢爲之矣。各官百姓。今頗還集云。令其守令。設爲方便。稍稍輸運事。知委于調度使。且從事官洪宗祿。時在昌城。亦令馳到龜城。與調度使同力。刻日輸運。後具數啓。聞事。急急下書何如。

龜城糧穀形止及請褒獎自願從軍人

啓壬辰三日

臣近見從事官洪宗祿牒報昌城倉穀。合白米田造米都數萬餘石。皆可不春而食。其數最優。朔州倉穀。田米四千九百餘石。白造米各七百五十餘石。蒸米一百二十餘石。都合七千餘石。兩邑馬豆合七千餘石。以此兩邑之穀。足可支待萬兵數月之糧。只是道里鴛遠。人馬不俱。輸運爲難耳。然昌城之穀。可以從船路順流而下。數日可達義州。朔州則必運輸於龜城。又自龜城輸到定州。其勢似便。但龜城之穀。其數自多。今姑置朔州之穀。先輸龜城倉穀於定州。博川則可以支持唐兵。請以此意。令備邊司急急知委于調度使等處。使之隨勢。及時措置何如。且洪宗祿召募自願哨探及從軍者。起送于都元帥處。前後十七人。其中朔州別侍衛韓克斗。金起壽二人。直來此處。克斗自言於平壤之戰。射賊頗多。今又自願從軍。起壽斬得賊首。獻於軍中。而褒賞不及。頗爲缺望。且其一家兄弟三人。皆力戰以死。云甚可矜惻。此二人。臣意當卽照例論賞。使不踰時。其戰死者家口。亦令所在優恤。以勸來者可也。朔州一邑。頃者爲訛言所動。人吏逃竄。倉庫幾不能守。有本邑座首李天始者。盡心據守。得以保全。其功不

小云。如此之人。亦令該司。各別褒獎。然後人心庶有興起。故敢此并 啓。

糧餉漕運船隻措置 啓

伏見都元帥金命元等狀 啓。祖摠兵言平壤餘賊。過江當追擊。并勦中路及在京之賊云。在我極爲喜幸。但前途糧餉船隻等事。措置無路。黃海道則三縣軍糧輪轉宣傳官。今朝下去時。已爲有 旨于黃海監司矣。京畿監司。則一向不知去處。聞江華喬桐兩邑。時得完全云。又以宣傳官一人。給馬發送。以兩邑守令。差使員定體。本邑及他邑軍糧。極力措置。船運于臨津。又以下流船隻。多般搜得。整齊格軍。亦於臨津待候。而一邊京城所用軍糧。與隣近如金浦通津。仁川富平南陽安山等邑。通議急運于龍山等處。使及於前頭之用何如。今此之舉。天實啓之。人不得繼之。極爲憫望。敢 啓。

請遣從事官整齊一路菟糧 啓

臣病勢日漸沉劇。當此之際。僵仆累日。無以少效微勞。罪當萬死。數日前因有 召命。力疾詣賓廳。其後病益添加。當其痛作之時。一身如解。流汗滿身。不能自定。一二月間。差歇無望。而唐兵一路糧餉調度等事。日急一日。雖已累次移文申勅。而人心渙散。守令之盡心者亦少。恐臨時多致齟齬。以誤大事。不勝憂悶。他餘措置。自賓廳備邊司。已皆詳盡區處矣。大概沿道各官。見儲軍糧。惟義州最優。定州則雖名大邑。而時存二百餘石。龜城之穀。若及期輸運。則似可接

濟。臣意唐兵發行時。自義州齎三日糧。初日宿良策。而龍川添給一日糧。則三日糧猶在。第二日宿林畔。宣川又添給一日糧。如良策。則三日糧猶在。到定州嘉山亦如之。安州則以船隻輸運龍岡三縣之穀五六百石。泊于老江下流。唐兵臨到之時。又分給于安州。則是沿道自義州至安州。皆以其處之穀支給。而義州所賚三日之糧。則依舊猶存。是可及到於平壤。賊若望大軍之來。棄城南逃。則平壤餘穀。可以接濟。假使不然。唐兵既到城下。三縣之穀。人負馬載。不患難運。計實無便於此者。伏見遼東咨文。亦以我國糧餉不敷。至於賫持乾糧。其委曲便易。欲濟大事之意。至矣。以此明言曲折於唐將。通情爲之。則似無不從之理矣。但馬料則持去似重。當於各站備待。請以此意議處。何如。前日康士雄之去。臣卽令船運三縣白米六百石。到定州。若定州已輸運龜城之穀。則雖非三縣之穀。可以支給。三縣之穀。則姑令移泊于安州近處。以待。事甚便當。議于大臣。則其意亦然。但必須別遣一人。如宣傳官之類。專掌爲之。然後可以及時矣。臣病歇。則自當驅馳道路。親自檢勅。而不幸病勢如此。從事官辛慶晉。使之先期馳去。整齊爲當。故敢啓。

請自行措置糧餉

啓
壬辰月六日

臣伏覩傳教。以唐兵糧餉支待事急。緣臣有病。欲令左相尹斗壽出去措置。而沿道糧料。臣自前次知爲之。且龜城及諸處輸運之事。皆已移文知委。別遣

從事官等整理。必無不及之理。且臣雖有病未死之前。自當限力驅馳。而在所駐。凡接應緊關之事。不但糧料一事。三公之中。只有左相一人。豈可出外。臣今日先遣辛慶。晉明曉力疾隨行。不至遲緩。故惶恐敢啓。

進紀効新書

啓

癸巳四月二十
九日在海州

臣前在京都。嘗因李德馨得見唐將戚金所借紀効新書。德馨又傳金之言曰。爾國欲禦倭。非先太傅法不可。所謂先太傅。卽金之父繼光。嘉靖年間。爲東南名將。至今浙兵之強。皆繼光所訓練。臣略窺其書一二。宏闊微密。倉卒未能遍究端緒。而要爲萬世不刊之書。第以索還之急。令吏輩數人。分卷贍出。携歸嶺南。欲以活字印之。而未及焉。只又傳一本付監司韓孝純。使留道內。其初本。仍在臣行橐中。書畫未精。且未粧績。不足以上備睿覽。而書中所載。皆今所講求而未得其方者。若前此未經上達。則秘而不布。亦甚可惜。故敢此投進。但當初讎校未畢。間有錯字缺句。而其論器械製造文字。亦頗有難解處。如蒙賜覽。卽下備局。更爲精校。而其未曉處。又使聰敏之人。及此南將未還之前。論難辨質。至於布置營陣。束伍分部之法。尤我國將士所未料理。亦當按此書而親承口受。以開迷昧。且仍令隨行於天將營下。目驗其指揮約束之狀。了然無疑。然後庶可擬倣摹效。以求實用矣。

請厚待唐人

啓

癸巳十月

訓鍊節目。其載紀効新書者。至詳至密。今方一切依倣爲之。但其文字及器械名物。有難曉處。趁此天將未遷之前。令聰敏之人。多般辨質。洞然無疑。然後可以訓習。此意前已啓達。今朝使郎聽李自海。往質于駱參將留營之人。駱尙志稱云者。尙志乃參將親屬。又有宋侍郎所送金文盛七人。同在一處。見自海。自言以侍郎之命。將就劉摠兵之營。訓練我國之軍。來此數日。而糧料支持疎闊。多有怨恨之色。至欲還去。以此未得發言而退。大抵我國接待唐人。所當極致懇懃。然後可以得其懽心。而近因多事。該掌之官。其於支給供頓之際。甚多稽緩。臣聞高麗時。有宋商李元者。來寓於宰相崔茂先奴家。茂先待之甚厚。因學焰焔火藥。煮取之法。我國之有火藥。實自此始。今則南方之人。多聚于此。其間諳鍊軍機者。何限。必須待之以禮。結之以恩。使之傾倒。所有傳授於我。則其爲後日之利。庸有既乎。且質疑時。當有事。知譯官可以解聽。譯官一人。與自海同爲質。正疑處。今來唐人金文盛。最曉陣法。人物亦甚蘊藉云。亦令接待都監堂上。問其來由。使之訓誨爲當。

與戚摠兵問答書 啓癸巳冬

條陳時事 啓

并見本集

請裁省民役以紓民力

啓癸巳十一月一日

兵亂之後。重以飢饉疾疫。千里之內。無復人烟。不過數月。生類殆盡。事之痛迫。莫過於此。其中畿甸尤甚。凡便民之政。所當勿論大小。急急舉行。如救焚拯溺。然後庶可有一分之效。常時各官民戶貢物進上名目多端。今於草創之際。凡百祭享。以至供上等事。一切從簡。比舊只存十分之二三。戶曹急急通融商量實用之數。樽節裁定。又於郡邑。察其焚蕩最甚及其稍完處。可減者減之。可存者存之。明白知委。使人民曉然知之。然後貪官猾吏及各司下人等。不敢刀蹬作弊。子遺之民得蒙一分之惠。此事最急。一刻不可遲緩。前在海州。至於教書下諭。而今既歲暮。民間尙未知蠲減仍存之數。剝膚推髓。慘不忍言。而公家亦無所益。極爲寒心。請令戶曹數日內急速磨鍊。如京畿全成。少紓民力。其他道則參商緊歇。量宜裁減。使公私兼濟。宜當此非常時。貢物詳定之比。只取今年所納。損其應用之外而已。捧承 傳施行何如。

陳屯田事宜

啓癸巳十一月十二日

屯田一事。言者甚多。而揆之時勢。亦不可不爲。但屯田之事有三。一則屯兵邊地。於不戰之暇。以其所留之兵。合力耕種。以省內地輸運之弊。卽古之趙忠國諸葛武侯是也。其一。兵亂之後。田野荒廢。而流民甚多。招集一處。分田授種。且資農糧。田器牛隻。又得人而任之。如曹操使棗祗屯田許下。得粟數萬斛。竟以此并吞天下是也。其一。相原隰之宜。令民自耕。而收其稅。如近日訴民耕作之

例此三事外。他無善策。上二條必有農糧。然後可以聚民聚兵。下一條雖無農糧。民自耕而利益亦多。此在有司相勢度力爲之。早爲區處。無失其時而已。此乃戶部之任。令戶曹兼取衆策。得其可行者。急速處置。如前日所達海島可耕處。亦并料理。作爲事目。然後更與臣等參商定奪。何如。

陳陳奏形止便否 啓

伏承 聖批。不勝惶恐之至。當此國事危急。非不欲殫心竭慮。而精神才識。終是有有限。近日之事。多有失誤。屢勸 下教。罪無所逃。但臣等愚意所在。則自古告急之事。不過慎擇使臣。冠蓋相望。血誠陳懇。雖遇險難。而不計死生。以身當之。期於道達而已。今經略多般攔阻。使賊情不得上達。固爲痛甚。我國告急之使。亦朝夕繼進。拊心號哭於經略之門。使遼左之聞見。曉然知之。然後可也。今雖有黃璉一番進去。而亦中路彷徨。未見經略之面。是在我告急之道。亦自未盡。將何據而遽以告急奏文。爲經略攔阻。訟冤於 天朝乎。竊觀宋之爲人。機械隱秘。其黨布列。萬一因此。而反以傾陷誣罔。歸罪於我國。而我國不能自明。則他日禍端。因此而更重。或未知故今日之事。只當陳本國危急之狀。而應昌誣罔之罪。則令 天朝自覺。乃是善策。今黃璉既去。金晬繼往。其得達與否。皆不可知。此後又有尺糧使。或偕持告急之奏。或自爲呈文。皆在使臣盡心與否。此外如通情於周基之還。移咨於巡按等處。皆可爲也。其餘出於他選。涉於

未安者。則非徒於事無益。反恐以此爲口實。而益陷於經略術中也。臣等私憂過計。不得不致謹於此。至於請冕一節。上教極爲允當。臣等亦因政院啓辭。欲假他事。因達賊情之言。而并爲歷舉。未及致詳。實出慮事疎脫。尤切惶恐。如此大事。所當參互衆論。以取其長。非臣等所能料得無欠。機會一失。後悔無及。若令二品以上。各自獻議。恐無不可採者。

請訓鍊軍兵

啓甲午春

見本集

請諸將號令出一 啓

被擄逃還。女人所言。雖不可盡信。亦當有一二近似者。所謂仇法谷賊屯。前此諸將之報。皆無所載。今始因女人知之。是皆體探之不密。賊情之不察。極爲駭愕。今雖欲往圖。所當先爲詳盡哨探。悉得其形勢險夷。軍士所從入處。然後密約諸將。乘機疾趨。如狄青之夜渡崑崙關。乃可有功。此在都元帥臨時處置。不必預稟於千里之外。軍令不嚴。人心縱恣之弊。誠有如應瑞所言者。然軍令不嚴。實出於體統不一。令出多門之致。今以慶尙諸將言之。則既有元帥總領諸軍。則諸將凡有進取之事。皆當密稟於元帥。聽其可否。元帥亦當出令於諸將。指揮方略。進退遲速之間。動合事機。而如有聞令不行。逗留誤事。或輕動取敗者。必以軍法繩之。如身之使臂。臂之使指。毋得違越參差。則體統自然相維。而

軍令肅然矣。近觀諸將所報，參以南方之事，軍中大體不立，而各自行令，防禦使兵使巡邊使等官，皆擁主斷之權，所謂助防將守令以下，彼此相牽，不知道從，更生怠慢，翫愒之念，欲進則進，欲退則退，因以不及期會，則必以他將爲解，如往日金應瑞高彥伯，爭一鄭希立，互相紛拏，是其驗也。今此應瑞所請之事，誠合事機，則都元帥卽參酌事勢，畫授方略，傳令各陣，約束進退，如此而不違號令者，則惟有劔耳。至如倉卒遇賊，不及申由於元帥者，則亦於其處，見在主將，聽其號令，如助防將別將以下，聽防禦使兵使節制，而違令者，亦爲行法，不必更稟於朝廷，而求其處置，以此意下諭于都元帥，權慄申勅諸將，一體施行，何如。

請開鹽鐵之路以足國用 啓

兵興三載，財穀殫盡，生財之道，不可不極力措置。前者設立鹽鐵使，使管鹽鐵之利，苟能善爲區畫，則不擾一民，而利益必多。議者但以近來檢察使等官，多以無賴之人，稱爲煮鹽官，列邑苦之，遂并與鹽鐵使而廢之，誠可恨也。夫人不能一日無鹽，其切於生人之需，與五穀相等，而出於海水者，無有窮極。昔齊桓公，問爲國於管仲，而仲以鹽筴對，其後自漢唐宋以及皇朝，無不以此爲理財足食之源。特我國之人，狃於尋常，不知要領，而泛規爲等閒無益之事，乍興乍廢，有同戲劇，實爲未便。今則以鹽鐵之任，歸於度支，此則果爲得體。蓋戶曹

盡管財利之政。如善爲之。不必別出一使也。但爲之亦當得其要領。蓋沿海處處。本有鹽戶。可以興煮無窮。第緣徭役煩重。苛政相侵。故鹽戶日漸流散。鹽戶流散。故鹽盆數少。而鹽貴如金。公私交病。今盡除許多紛紜張設之事。惟減其鹽戶之役。使之安集。而逐日所煮。與之相約。以幾石爲公鹽。其餘使之自食。一年公鹽。其數不可勝紀。於是戶曹通計各處。見在之數。從時直許民和賣。又以舟船。連次輸運。散布於山谷稀鹽之處。隨時平價。務在便民。則穀物流行。公私兩便。生財之道。無過於此。竊見中原遼東志。載鹽盆幾處。鹽軍幾名。今亦只知某邑鹽戶幾何。鹽盆多少而已。其事豈不簡省而易行哉。至於鐵則亦儘有可行之方。雖不必一時并舉。而近日中江開市。唐人多求水鐵。故以此買穀。其利亦多。此亦在有司詳參利害。如鹽戶安集之規。使鐵物興產。則似亦有通行之路。右兩條。令戶曹堂上一員。專管責成如何。

措置忠州上流。且於烏嶺設關屯田。
啓甲午二月

見本集

因傳教陳其事體非便

啓甲午二月

伏承下教。反覆商量。沈之形跡。固多可疑。然其云之說。猶是流聞之語。虛實尙爲難知。我國不可以此失待。天朝將官。此事宋應昌主張。而沈爲其喉。使表文先爲經略旗牌取去。或有近似者。若使中路郡邑。故阻其行。如拘執者。

然萬一知其出於朝廷所命。則其事無益。而其致忿恨。不但今日而已。且在此雖或少遲其行。而渡鴨水。則誰能挽留。許箴之行雖急。必不得同時并到。北京無疑。大抵危難之際。酬應之道。有萬不同。好我者未必加親。惡我者未必加疎。要之牢籠含蓄。泯其形跡。勿令奸巧之徒。窺我淺深。而益以爲計。此亦一道。臣之愚見如此。敢啓。

請遣徐渚審察賊情乘機行計啓

清正往來書信。乃是大段機關。應之不可不審。伏見劉總兵所答之辭。雖曲折未詳。而所謂康玉湖者。似是中原之人。被擄於倭中。而言清正不見信於關白之事。賊情所在。固難測知。果若有是。茲乃可乘之機也。昔回紇與吐蕃相結入寇。而郭子儀諜知二虜爭長不睦。使之離間。而并擊吐蕃。軍機所係。甚不可忽。而權慄諸人。撫機縮蓄。不能與劉總兵極意相謀。以爲策應行計之圖。而但曰何忍與此賊相通。此實守株之見。非通變之論也。夫行長之與清正相爭不和。自前已有其說。惟敬亦言之。今之投書於劉總兵。安知不出於自中爭狠而然耶。今其計不施。而劉總兵又離八莒。撤回全羅道。清正亦畏其言之漏洩。而圖爲自明之計。則反欲以戰鬪立功。自蓋其迹。而爲免罪之地。慶州之事益危矣。在我之勢。兵少食缺。天兵已撤。已無可爲。而如此機會。又復差過。臣等之意。徐渚不可不送。雖不以監軍下去。而急下與劉總兵相見。細問其意。爲從長善。

處之策。且觀賊情如何。元帥處置疎密。而十分論議。停當計畫。便宜施行。則庶有一分之益矣。

請修舉鎮管之制 啓月同

見本集

因備忘記論鍊兵節目 啓月同

備忘記近觀兵曹勤於訓練。深感爲國盡職。非人所及。第鍊兵雖勤。揀兵當精。今以冗雜無用者。擇之不精。苟充行伍。只習安坐放丸試劍。恐非所謂鍊兵之道也。古人鍊兵。惟務精而不務多。岳飛之兵。能以少擊衆者。只是精擇而加訓之耳。其法。射必左右。被重鎧超濠。日以爲習。此非勇力之人不能也。古人又教士足囊以沙。漸漸加之。戚繼光曰。兵須學砲。新書有鍊手足鍊身之法。教兵亦多術矣。今之教兵。或似未盡。予意大加簡閱。汰其身殘力弱體鈍足重年多之人。只取精壯。又必習跑習步。且前日所教毒火毒矢之法。若曰無用則已。不然。不可不傳習。而其後似無所聞。此意言于訓練都監事。傳教矣。鍊兵曲折甚多。大概以意料之。則鍊兵如鍊金。金非百鍊不可用。鍊兵亦必極致其精。然後可以投之。矢石爭死之地。而不亂矣。夫金鼓旗幟。所以鍊其耳目也。弩銃劍戟。所以鍊其手足也。號令約束。所以鍊其心膽也。進退前卻。所以鍊其實戰也。其他營壘器械。瞭望哨探。節節無不鍊習精熟。如手持而足行。然後始可爲可。

用之兵。故其初人各致其精。其終也能使合萬人爲一心。此節制之兵。所以無敵於天下也。蓋愈精則愈一。此如儒家所謂析之極其精而不亂。合之盡其大而無餘。天下之理無二致也。故紀效新書亦云。合衆之操。頃刻完事。目力不能遍及。不如小操爲親切。假使只有五人。而當以五人操鍊。有十人而以十人操鍊。以此推類。雖至於百千之多。而其規一也。今訓練之軍。以哨統隊。以隊統伍。一伍長所率。則只是四人也。一隊所統。則只是六伍也。一哨所統。則只是三隊也。如使哨官責隊長。隊長責伍長。則所操既約。而所及自廣。此軍政之大綱也。惟其如是。故新書又有申連坐之法。一伍中軍士未精。器械鈍弊。號令不行。則併與軍卒伍長而治之。一哨中如此。則并與哨官隊長而治之。其道也。如目之隸綱。如枝葉之附幹。所謂哨官隊長伍長等。各盡其心。各操所屬。晝夜刻意。其庸劣者汰之。未習者熟之。如恐不及。而時月之間。兵無有不精者矣。當初訓練廳事日。亦倣此意。視各哨軍士成材多寡之數。而行其賞罰。近者以習陣多事。頗爲無暇於此等事。今後更加申勅施行。在兵曹與將官。盡心舉行而已。大抵我國自前專不知鍊軍規模。今幸得唐人遺法。兵曹又極致意。漸次成就。頗有可觀。待其一藝成。然後又教一藝。推類廣之。淘汰不已。則古人左右射重鎧超壕注坡等技。次第可學。但當爲經遠悠久之計。勿使乍作而乍輟。朝耕而暮穫也。聖教大加簡閱。只取精壯。誠得務精不務多之意。極爲允當。但古人云。兵

家亦棄弱而不用。其中最精之兵。所謂選鋒。用之於摧堅陷陣。非此不可。至於雜類如旗鼓手火長等軍。亦於弱卒取之。要當使之各得其任而已。然此但言鍊兵梗概而已。此外鍊將。尤重於鍊兵。比之象戲。則鍊兵其列子也。鍊將其當局者也。故有岳武穆。然後方成岳家之軍。有戚繼光。然後方成戚家之軍。今兵雖頗爲訓練。而用兵者無其人。則如列碁子於局上。雖甚整齊。而使凡手着之。則依舊未勝也。今宜於京外武士中。搜訪將來可堪統兵者。爲訓練部曲之任。學習陣法。自大將以下。以及哨官旗隊。皆於平日。自鍊其兵。臨戰自用其軍。然後庶幾所養卽所用。所用卽所養。此新書所以旣言鍊兵。而必以鍊將終之者也。毒火之法。已爲傳習於唐人。他餘材料。已爲聚合。但無巴豆。故頃者以內醫院餘在巴豆一兩。送于都監。使之依法合聚。待其製成。然後試用於畜物。以觀可用與否。而仍爲行用於諸陣。不無效驗矣。

請令都元帥戡和諸將 啓

見本集

陳慶尙道賊勢請以金應瑞爲別將留駐大丘又請促忠清兵使李時言
往慶尙道與諸將同力捕賊 啓

臣頃在慶尙道。目見本道事勢。十分危迫。而右道之勢尤急。謹以一二愚見。妄爲狀啓。此外未盡之意。欲於復 命時 啓達。而臣病劇疲困。未卽書啓。近日

伏見都元帥權慄及防禦使權應銖等狀啓。右道之賊已踰洛東江下流。自靈山昌寧立風密陽清道。晝夜散掠。已及大丘慶山之境。都元帥亦不能駐在大丘。是其中道皆爲賊藪。幸而蔚山之賊觀望未動。若一時俱動。則左右道淪陷之勢將不遠。臣竊料本道乃國之門戶府庫。如使烏嶺以南盡爲賊有。則江原忠清全羅。次第瓦解。而大事去矣。臣念及此事。爲之夜不能寐。臨食忘食。臣觀右道出沒之賊。與前日賊勢不同。前則賊兵必大張旗幟。多數出來。故我國之民。或隱匿山谷。以避鋒刃。賊去則還爲聚集。略事耕作。以度朝夕。今則賊或什伍成群。或數百爲運。變着我國人衣服。使被擄之人。前導橫行。晝伏夜行。潛相掩襲。故雖幽深山谷。無處不到。人民不能躲避。盡罹於鋒刃。不然則皆爲被擄而去。安有如此寒心之事乎。我國將官等不能瞭望體探。賊來而不知。賊去而不知。從前如此。而今則道內空虛尤甚。左右道相距數百里間。只有成允文鄭起龍以些少軍兵。把截兩道中間一帶。空虛尤甚。但有防禦使權應銖在慶山。東奔西馳。難望策應。前日請於大丘置陣。以通左右道氣脈者。爲是故也。見在諸將中。惟郭再祐金應瑞。可堪此任。今聞再祐一陣不起云。如此遷延。而賊勢日熾。則事無及矣。金應瑞雖在白衣從軍之中。而近日蔚山之役。略有微勞。且其所率降倭。皆是力戰之卒。若令金應瑞專當大丘。而與權應銖連勢。且令密陽府使李英等。收拾密陽靈山清道立風昌寧等處之兵。略成軍形。以爲討賊。

收拾地方之計。則事雖已晚。猶可及圖也。臣來時。金應瑞牒呈于臣云。在此別無所爲事。且其率領降倭。亦無得食資活之路。願以軍官。隨行於臣處云。蓋其意。自以客將。寄寓道內。事勢難便。故如此云云。此人既以罪。令從軍責效。雖不可遽授將任。但以中路別將之名。使之留在其處。添其軍數。又除出大丘所在。糧餉以爲軍糧。使降倭等。不至缺望。而力於戰鬪。似爲宜當。且蔚山之戰。降倭等多有立功者。而久不行賞。此屬皆不能無怨。并令軍功廳。查覈論賞。慰諭分給。激勵其心。亦係權時之宜也。且忠清兵使李時言。遷延時日。尙未下去云。極爲不便。臣在慶尙道時。忠清監司金信元。移牒於臣云。調兵勢難。且本道亦不可無主將。李時言不當更赴南方云云。臣答以慶尙右道賊勢如此。若右道不保。則次第將及於忠清道。速爲下送云云。今見都元帥權慄狀啓。則李時言以軍糧不辦。尙未前進云。軍糧鳥嶺等處。亦不無餘儲。尙州星州大丘。皆有軍糧。軍到其處。自可就食。救急之兵。當倍道并行。今乃遲延引日。以失事機。甚可惜也。此亦當自朝廷。嚴辭峻責。使之刻日馳赴。先下大丘。與金應瑞權應銖等。合勢驅逐。其處賊勢稍退。則金應瑞權應銖。雖留在信地。而李時言則移軍右道。更與鄭起龍。勤捕右道之賊。勢不可已。大抵春節已深。而賊勢如此。人民盡散。地方空虛之後。雖欲築城屯田。以爲經遠之圖。誰與爲之。此賊兇計萬端。其連營屯結之處。自蔚山至順天九百餘里。更有巨濟南海爲其巢穴。土地膏腴。

甲於南方。今使零賊出沒分掠於數百里之間。盡驅我國遺在之民。使不得耕種其處。而海邊一帶。招集被擄之徒。蜂屯蟻聚。肆意屯耕。仍於要害處。據險築城。首尾連絡。他日雖欲以數萬兵甲取之。其勢極難。故今日之事。當在於早決。不在於持久。臣病中精神昏耗。未能細陳曲折。而大概如此。伏乞 下備邊司。商度施行如何。

九日 召募邊郡慣戰之士。省內地民兵。使兵農兼舉。且處置降倭。

啓甲午二十

軍卒不爲精抄。而冗食者居多。軍糧盡皆乏絕。而繼餉無策。此今日切急之憂。故前此累累移文。知委不一而足。然不知施行與否。今因慶尙道軍官聞之。則各官民兵調發之弊。猶在。故農民幾盡失業。在陣之軍。亦以無食。僵仆相望云。此自前知其失計。而至今因循未改。良可痛歎。大抵內地民兵。不能當邊郡慣戰之士。今慶州蔚山長馨密陽機張清道梁山之間。遺民之散處山谷。而經年戰鬪。心膽已堅者。其數不下千萬。苟有軍糧。而招募爲兵。授以弓矢器械。以爲戰用。則旬日之間。應募者雲集。而此輩皆本處之人。詳知形勢曲折。其與客軍之疲弊遠來者。相去萬萬矣。既用募軍。則內地民兵。可漸省之。而量數定。納糧米。使之隨其所備。或麥或豆。或大小米。平量收之。以爲軍食。則軍無冗雜之患。民有息肩之暇。兵農兼舉。戰守有賴。今日之計。無出於此矣。且聞防禦使

金應瑞用降倭。引出他倭頗多云。此兵家善策。如知其誠心歸附。則待之不可不厚。以結其心。請成司猛司直告身下送。而并給衣次藍青布十餘匹。使應瑞觀其所爲。特爲分給。以慰其心。而毋使有失意逃還之患。此等辭緣。并下諭於都元帥及慶尙道監兵使防禦使何如。

陳遼東回咨措辭 啓

伏見遼東都司咨文。我國欲復不共戴天之讎。天朝亦非不諒其情。而亦以如此者。不過宋經略當初已失機會。今則留兵已撤。再舉勢難。以是姑出於下策。欲以封貢之說。羈縻賊勢。庶幾賊退於萬一。而中朝科道之議。據正爭論。故於此無以處之。欲使我國靜而俟之。當初猶不分明說破。而今則直說兵糧不能應封貢。又不許朝鮮之事去矣。不知彼國之人。何其愚也。云云。其意可見矣。大抵我國之請於天朝。自始至今。有三大節。皆機關所係。初則平壤既破。大兵長驅。堅請勦滅。而不容他議一節也。其後提督之軍雖回。而南兵萬餘留往南邊。我國糧餉亦未蕩竭。當此之時。急請添兵一舉掃蕩。又一節也。今則糧也兵也。必須皆賴於天朝。而觀天朝之事。似無應副之理。事勢危急。日甚一日。賊若未退。則國有必亡之勢。到此雖請之勤勤。終無所益也。惟當姑爲款待。任其所爲。更觀事勢如何。又一節也。今此回答但云。天朝雖欲以封貢退賊。而小邦則以爲恐無退歸之理。以是爲慮。惟願深思長策。使小邦期於保全。

云云。而勿爲一定之言。浪觸彼怒。而無益於事。似爲便當。

邊方事宜分付都元帥從事官黃汝一啓

都元帥從事官黃汝一。今將下去。凡朝廷分付之事。前後非一。時未知舉行與否。令元帥急速相考。行未行。別爲開錄啓聞。且聞各官抄軍之事。猶無頭緒。控弦之士。或多托故。免防疲殘。無用之兵。逐日徵發。不堪其苦。逃散相繼。文移督促。一族鄰保。并被其毒。民間騷然。而軍中實無數百精卒。極爲可憂。前者令各官抄擇精軍。以赴戰所。其餘皆令備糧。以充軍餉。軍餉稍足。則招募邊邑慣戰之士。充補隊伍。此最爲急務。故屢屢知委。今未知舉行如何。此事更爲申勅施行。且慶州宜寧。相距隔遠。勢不相接。而中間數百里。蕩然空虛。賊若以零兵出沒於慶州宜寧。牽掣我軍。而以他兵出於空虛之地。直擣內地。無人呵禁。言之可爲寒心。聞鄭希立。獨在密陽。而希立既非可倚之將。所率又至少。何能爲有無。且觀宣傳官郭崑所言。希立募得密陽等處之軍二百餘名。中間糧乏。散去。今又得糧數十餘石。散卒還爲來集者百餘名云。以此見之。苟能措備軍餉。以聚散卒。則軍未嘗無也。大抵慶尙一道。人民渙散。三年之內。不復收拾。獸驚鳥散。飢餓輾轉。而死者不可勝數。往往流入賊中。以爲資生之計。故東萊金海之間。我民充滿耕漁。而我國將官守令。則視之如草芥。任其去來。是真爲賊驅民處事如此。其何以回已散之人心。而圖收復之長策乎。今之爲將者。拱手優

遊於無事之地。朝廷使之戰守。則必曰無軍。將何能爲乎。遇賊則必曰衆寡不敵。且戰且退。以此數語。爲免罪塞責之文具。略無勞心焦思。死中求生之意。誠使紀律素明。此輩寧能免於鈇鉞乎。卽目秋成已過。蕩敗蓬荻之地。固所不論。如幸而有子遺之民。往往依接耕作於海邊者。盡爲賊所掠。誠可痛心。慶尙道粗完處。如晉州。昆陽。陝川。咸陽。高靈。居昌。安陰。山陰。三嘉草溪。宜寧。丹城。河東等地。今年官穀收糴多少。從實數急速相考。除出明年種子農糧。其餘盡以軍糧磨鍊。計其各陣軍數。詳細接濟。俾無濫費。乏絕之弊。若民間稍有貯粟之人。則亦以至誠開諭。不愛官爵免賤。輕定石數。零碎收合。又令僧軍等。於山深處。多收橡實。以備穀絕之時。其他屯田所出。及寺社位田。與前日行移上番軍士價米。公賤作米。今年田稅。一一摠數。及時收拾。以爲出納。無使貪官猾將。有所欺隱。乾沒。而密陽。東萊。金海。各處失所之民。多般撫恤。壯者充爲軍伍。其餘使之安接。此亦急務之當行者。尙州牧使鄭起龍。驍勇善戰。故陞堂上。討捕將稱號者。非但爲土賊一事也。蓋以直路空虛。而尙州爲嶺外鎮營大邑。故使起龍。因此召募。以備緩急。此意更令都元帥。十分知委。申勅。與忠州節制使金命胤。預爲約束。凡有意外之事。登時轉報。把截直路。譏察非常。爲當他餘事。前此已曾分明知會。已上諸條。更加着實施行事。黃汝一處。言送何如。

請褒獎忠義

啓甲午
四月

見本集

勸課種耕查覈守令勤慢

啓甲午月四日五

今年雨水適中。若各道守令盡心勸課。使之耕墾。則子遺之民。庶有資生之路。此係至切至急之事。不可頃刻少緩。故自前冬及今年開春以後。啓請知委於各道監司。文移重複。已爲詳盡。而守令之奉行。者十無一二。安有如此痛心之事乎。近來凡人之自外方上來者。臣等見輒問之。雖其所言未可盡信。而據其大概言之。則黃海道惟海州白川。頗爲耕種云。白川則蕩敗甚於道內。而郡守南宮悌。盡心職事。聚民爲屯田。已種三百石云。極爲可嘉。其他雖無所聞。而延安平山。最以不謹聞。田野荒廢。人民流亡。京畿則通津長湍。安城數邑。稍爲開墾。南陽以大邑。耕墾之處絕無。而海邊鹽戶。亦困於虐政。流散殆盡。以此鹽貴如金。忠清道則天安德山丹陽等邑。亦爲耕種。而清安縣監全有亨。招集流亡。措置種子。奔走境內。勸課農作。清安一邑。幾無陳廢之處。四隣如清州等處之民。相率而歸之。此但據臣等所聞而言耳。由此觀之。邑無殘完無貧富。只在於守令盡心與否而已。朝廷遠於千里。雖有仁民之令。惠鮮之政。必須待人乃行。而監司者。乃守令之綱。朝廷專責監司。而監司責守令。黜陟分明。勸懲大行。然後民生庶蒙實惠矣。古之爲政者。必以循名責實。虛僞不齒。善無微而不錄。惡無纖而必誅。爲急務者。良以此也。今此所陳守令之情。慢不職如此。監司

坐視而不正其罪。雖有零碎移轉分給之種。而皆不入土。盡歸於胥吏之手。則朝廷雖朝發一令。夕發一號。其亦徒勞而已。何益於事哉。近者自安集廳。分給畿甸種子亦多。請令京畿監司。各官各面耕種幾何。人民之數幾何。逐一查考。啓聞。如常時雨澤之報。忠清黃海道。以及全羅慶尙江原咸鏡平安等道。一體遵奉施行。急速勸課耕種。而啓其多寡之數。守令之盡心與不盡心者。亦舉其尤甚者。并啓以行賞罰。而朝廷不時遣使臣。抽柎嫡奸。以驗其實。何如。

鳥嶺把守事宜

啓月同

前日所遣鳥嶺把守官辛忠元。使人來報云。已於延豐水回村。擇肥饒處。落種十餘石。又召集遺民百七十餘人。擇其丁壯者。教以火炮。自他方欲爲來集者。亦相續不絕。願得穀種鹽石。載船上去。以爲安集之資。又言鳥嶺把截形止云。嶺下十餘里。兩峽斗斷。中間僅容數疋長。若聚石橫築。作城十丈。建樓其上。而下爲虹門。以通往來。譏察非常。賊來閉門守險。則儼然成一關口。而鳥嶺之守。自固。願於麥熟之時。於清風堤川永春丹陽及槐山陰竹等地。隨便以鹽買麥。自以已聚之軍。漸次築之云。計之成否。未可知。鳥嶺設關之事。從前講求。而不得者。今果能爲之。則忠州之襟抱自堅矣。待其措置成緒。朝廷別遣一使。馳下觀之。而且以此意。先爲移文于本道監司尹承勳。使之踏勘以定。且延豐既

已殘破不能成縣邑模樣。而居民盡散。及聞忠元以穀種招集耕種。且喜其不被侵於官役。稍稍來集。而延豐有縣監。往往有徵發之事。未免掣肘云。還集之民。悉皆復除。十年。延豐一縣。置之於等棄之地而忘之。凡百徭役。皆勿侵。只專委屯田把守等事。待其民力稍完。流亡還集。然後復設邑居。似合時宜。此事并問於監司處之。鹽五十餘石。令該司及時題給。載船上送。鹽鐵所管之鹽。待其到泊。連續付水站判官。輸送分給。青藍布十疋。亦并下送。軍士之學習火炮而成才者。略爲分給。以勸其心如何。

請接待胡參將聽其所言 啓甲午五月

見本集

請因謝 恩之行并爲陳奏 啓甲午五月十日

伏承 聖教。臣不勝流涕。自古國之遇屯運。如人身之有重厄。必須百分周防。過爲之慮。然後可望保全。今日國運艱危萬端。勢如累卵。不知意外之禍。又發於何事。故臣之愚意。凡事不得不曲爲之防也。顧之爲人。當事敢作似無顧藉。所謂漁人之功一語。臣病未諦看。今承 下教。不覺寒心。以此等言觀之。彼乘其憤氣。做出不測之言。更生事變於我國。特一轉手間耳。臣以此常念我國今日所患。惟在於倭賊。恐日後禍變。不但在於倭賊也。上 奏固未安。然彼欲上奏。則此亦不必爭也。伏聞 欽賜賑飢糧二萬餘石。不可不謝 恩。因此謝

恩之行，并爲陳奏，單騎馳去，恐或無妨。此皆臣病中錯念，惟在下朝廷，百分善處而已。

懲毖錄卷之三終

懲毖錄三

懲錄卷之四

芹曝集

請破格廣取人才以爲守令邊將 啓

慶尙道海邊自西生浦釜山浦等處雖爲賊窟而其餘梁山密陽以北皆爲我土遺民往往保聚山谷苟延時月其數亦多若能登時選擇守令招集流散防護盜賊漸次安集而察其地形分據要害以爲且耕且守之圖則賊旣有所畏憚而不敢恣意出沒民之離散於他境者又將日益來集而將來守備之策漸可講矣今此狀啓辭緣實有遠慮而所謂安以命者徐渚旣視其可用且爲本土之人其於民情土俗亦必諳委當此危難之際所當破格收才以求實效依狀啓施行無妨諸陣軍官可用武士不患乏人而未得展其所懷膽力懲於飢寒才氣挫於沉滯者誠是至當之論夫人人才雖有大小而皆有所長短苟能隨才甄拔使各奮勵則莫非可用之才所患求之不廣用之失宜耳慶尙道方對賊壘策應撫摩之責尤重於他道而朝廷每於千里之外循常差送得人者無幾如使本處有可用之人則擇而任之何不可之有徐渚旣在薦舉守令邊將之秩更爲從實搜訪勿限多少論薦其才亦令都元帥巡察使一體薦舉以廣用人之路事并爲行移何如。

賁勵金應瑞高彥伯協心成事 啓

近日國事方急。而各處諸將。不以誓心討賊爲重。因爭少嫌。頗有不睦之漸。累形於狀啓之中。尋常恠歎。伏見徐涪所啓別錄。則高彥伯金應瑞等。當初惹起爭端。不過因坐次高下而然。誠不滿一哂。彥伯應瑞等。効力於行陣之間。皆有功勞。國家之所同倚仗。今則因前日下諭。已爲釋然相驩。似無可慮。但徐涪所論坐次事。則朝廷所當處置。以止後日之爭端也。我朝京外官相會坐次。自有大典。所宜遵行。不可以他議有所移易。高下於其間也。法典內凡官會坐。一從品秩。而節度使防禦使。同是奉命使臣。高彥伯旣爲嘉義。金應瑞爲嘉善。則會坐次序。甚爲分明。豈可以節度使爲藩臣。視同守令。而以嘉義下於嘉善哉。此爭端之所由起也。至於洪季男爲永川郡守。鄭希玄爲義城縣令。皆兼助防將。本職兼職。皆下於兵水使。無相抗之理。都元帥以季男希玄爲自己衛將。使之與兵使防禦使抗禮通關。此則尤無所據。豈有舍官職尊卑之序。而從一時軍中分部之令。與專閫之臣。列爲等夷哉。此其處置號令之間。未能合宜。而致令人心不服。無事而生事者也。大抵輯和諸將。鎮定裁抑。消其忿爭之氣。而使之同心勦力。以濟王事者。乃是元帥之任。昔者楊儀魏延交爭。而孔明爲元帥。則終身不敢有乖戾之色。各盡其才。以立戰功。良由處置之得宜也。以此意下書于權慄及徐涪處。使之遵奉施行。其在各陣諸將。亦一體曉諭。激以

忠義期於協心成事何如。

請諭忠清全羅道兵使申勅守禦 啓

李鎰在全羅道。而忠清道。則只有兵使邊良俊。凡道內要害控扼之處。及留兵待變。定將約束之事。必須閒暇之時。預爲區畫。有成算。然後可無倉卒之患。不知邊良俊措置方略。果無疎漏否也。近者專閫之將。多以自己所爲事。推調於他人。拱手無爲。以爲朝廷當別遣將。非我所自處置。雖賊犯地方。而不爲以身捍禦之計。極爲寒心。請下書于邊良俊。問其道內措置幾何。及要害控扼。便否。使之逐一陳啓。又申勅守令。整齊約束。抄鍊軍兵。繕治器械。俾無疎虞。何如。

條列措置糧餉 啓

糧糶竭乏。最爲今日切迫之患。此若不爲措置。則他無可爲之策。今內則經費浩多。而太倉所儲。不足以支數月之用。外則官儲罄盡。私蓄亦無許多。天兵支供。我國諸軍調度之事。皆無辦出之地。盡有潰散之憂。其爲憫迫。莫此爲甚。然其措置糧穀。不過數條。一曰作米。二曰收稅。三曰募粟。四曰買粟。此四條。若料理得宜。著實行之。則庶有繼粟之路。謹以應行事宜。條列于後。

一京城上番軍士騎步兵戶奉足。定別甲戶奉足。通融均鋪。皆令納米。每一人納大小米中五斗。各司奴婢諸員匠人樂生樂工奉足。皆納米五斗。則

其數將至於十餘萬石矣。但忠清京畿黃海江原道軍士。則時方上番于京師。若遽罷上番。而令納米其官。則中間處置未及之前。無守衛之軍。今年則姑爲先試於全羅道。從其見在軍數。輕便捧納。各置于其官。或以漕船輸運於京師。或補南方軍糧事。爲事目施行。

一 京中常時所用各處散料。一月二千七百餘石。別例經費。不在此數。戶曹先計一年十二月用度。若一月該用三千石。則一年共三萬六千石。此外如天兵往來支給之數。亦必有一二萬石。然後可以擬用。今年田稅元數總會計。除經費及別例上下之數。其餘盡數別儲。專擬軍餉。勿得他用。以待軍興。然如慶尙道。則常時納稅。每於明年四月。納于可興倉。今年則既不爲上納。當於秋冬穀賤之時。卽爲捧納于各其官。以爲軍餉事。

一 募粟事。民間不無願納之人。特以定數太多。中人之產。不能辦納。又恐國家失信。皆深藏不出。以其如此。而抑勒括出。則民怨騰起。所得不多。近日募粟之弊。徒爲病民。而無益於事者。職此故也。令戶曹更爲勘定石數。使之輕便易納。又隨其所納多少。登時行賞。無使如前失信於民。使民樂從事。

一 買粟所得。終是不優。不足以補一隅之用。似爲無益。然義州中江。方爲開市。遼東之穀。頗有轉輸之路。量發銀兩。乘秋來穀賤時。多數買得。積置州

倉事。

已上諸條。令兵曹及戶曹詳定節目。急速舉行。使有實效何如。

申明外方鎮管之制 啓

外方鎮管之法。乃是軍政之大者。近日此制久廢。渙散無統。終止於土崩瓦解。不可收拾。已可痛恨。前者因本司啓請。特爲下書。知委于各官。而積年弊習。猶痼於人之心目。不能改舊圖新。爲鎮管守令者。亦憚於作爲。安於姑息。凡檢勅屬邑。修舉軍政等事。尙皆置之尋常。監司又不聞董責之事。悠悠度日。事無可爲者。姑以忠清一道言之。則忠州鎮管之法。修舉。則鳥嶺竹嶺之門戶固矣。清州鎮管之法。修舉。則黃澗永同秋風等處把截之勢。可以成形。公州鎮管之法。修舉。則錦江一帶。可以無虞。洪州鎮管之法。修舉。則內浦沿海等地。皆爲可守。此其事簡而功多。不言而可知矣。奈何人之所見。滯於近規。終不能恢拓建置。以振頹靡之勢。此臣等之所以深憂永歎。而不能自己者也。今公州牧使鄭文孚已下去。文孚才器。可以任此。請以此意。別爲下諭于本道監司。使以前啓下辭緣。申勅諸鎮。而且令鄭文孚專治所屬軍政。整頓頹圯。使有成緒。令列邑取效行之何如。

處置全羅道沿海郡邑 啓

昨日登對時。臣伏承傳教。全羅道海邊郡邑守令。棄其官守。皆在舟師。久而

未還。以此官家百事虛疎。至於村民。欲訴疾苦。而無可訴之處。耕種而無勸課之人。還上出納。皆失其時。種種弊端。不可勝言。若慮其此弊。而使守令還官。他人代領軍卒赴陣。則亦不如守令親往之時。軍中之事。反致虛疎。二者均爲難處之弊。不可不隨時變通。以救弊端。臣等今以下教之意。反覆商議。則衆議以爲。往時兩湖各官之疲弊者。多由於差定假官。今若自京差送。則雖云極擇。而未必皆得其人。赴任治官之際。儼然一守令模樣。而其人等不能庇其妻子。則必眷率下去。坐食官家。亦非今日殘弊官力所能支吾。不如令本道監司。於其邑士子。或前衙朝官中。擇其識事理廉謹不爲非義者。從公論差定。縣則稱爲留縣官。郡則稱爲留郡官。府則稱爲留府官。限事定間使之姑代守令之任。凡邑中民人呈訴。還上分給催納等事。皆令勾管。而其所食糧料。則毋得擅用官家之儲。只依常時鄉校訓導之例。月朔給料。會計報監司。申勅戶曹施行。其中如有善於其職。使民心喜悅。糴糶以時。勸課耕耘者。則此乃可用於守令之人。監司。御史。各別覈實。啓聞。以通仕路。如有泛濫作弊。不治民瘼。糴糶失宜。擅用官穀者。各以輕重治罪事。各別下書于本道監司。急速舉行。而差定之人。爲先列名。啓聞。毋得循情容護。以增官民之弊事。并爲知委施行何如。

陳爲東征將士陳奏救解 啓

臣病役潮熱往來。午前則稍醒。午後則昏甚。昨日午後。備邊司郎廳。以秘密

啓草來示。臣見其大槩。蓋欲爲東征諸將。解釋人言。而慰解其意。與臣之近日所慮無異同。今承下教。更爲詳審。則經略之事。雖與提督有異。自此有言。以一爲一。否爲難。其意亦是。然臣意不必歷舉姓名。但以東征諸臣。承皇上之命。拯濟小邦。爲辭。恐無不可。第此事當別爲一奏。抑并載於賊情。奏本乎。此等曲折。未知如何。而可以前日金暉狀啓諸條。臣病昏不能仔細看過。思慮所及。未能精細。更令備局熟議處之。俾無未盡之事。幸甚。

條列戰守機宜 啓

見本集

陳鍊軍解弛請令兵曹統領責成因辭訓練都監都提調 啓

臣昨日病未趨仕。今始來詣賓廳。伏覩答兵曹判書沈忠謙聖批。臣不勝感激惶恐之至。臣於上年冬。暫管訓練都監事。其後因他職務。無暇兼察。自四月以後。又連月大病。今纔起頭。又未能一見教閱等事。其解弛與否。臣不得詳知也。然軍心之勸勵。頗不如前。而所習技藝行陣之法。反益生疎。人多憂其廢墮而無效。此則臣亦聞之。而未知其何由也。今此唐人所言。固所不較。但鍊軍大事也。如不日進而乃日退。則亦終於廢墮而已。此臣之所以日夜憂念者也。且臣有愚見。不得而言。治軍有大要。號令出一。一也。分數分明。二也。賞罰必行。三也。不然而日月已久。怠惰繼之。弊端滋生。氣象陵替。則無恠於日懈而不振。

也。故臣於前日啓辭。暫及此意。而請以軍事。責成於兵曹。誠欲號令出一。而體統相維也。至於唐人。雖爵秩卑微。然既以鍊兵之事。求之於彼。則待之不可不厚。而得其懽心。易曰。以貴下賤。大得民也。聖教云云。實出於此。此亦有司之臣。所當敬謹而奉行者也。臣積病之餘。精力不逮。勢不暇更。察都監之事。而凡國家軍政。兵曹自當專力爲之。不必又使大臣攙錯。請遞臣訓練都監都提調。而專委該曹。以正朝家人之體。則庶或便益。惶恐敢啓。

令兵曹專委鍊兵 啓

請廣取人才 啓甲午

請措置糧餉 啓

并見本集

慶尙道應行事宜 啓乙未

一自古兵亂之際。必先設營柵。以爲據險之地。使軍民有所憑恃。老弱有所投藏。以其公私積蓄。盡在其中。賊至則依險據守。賊去則下山耕種。一處如此。他處皆然。近者十餘里。遠者數十里。複屯相望。形勢連絡。則非徒可以保民。亦可以禦賊。此至切至緊之務。故雖將帥守令。不知出此。而鄉村有識之人。往往聚合村民。措置方略。猶可以保全鄉曲。今者中外人情。皆以倭賊勢大。不可支撐。其於設策防守之事。一無經意。故小民之無知者。亦傳相效。做窺

伏草間。流移轉徙。以求偷活於朝夕。而其於耕種之務。尤不致意。以此賊未至而南方之蕩敗日甚。更無收拾之望。良可痛心。今之議者。言及山城據險等事。則以爲無食無兵。不可遽爲。此知其一而不知其二者也。如欲大舉築城。多用人力。非今日之所可成也。若於山村要險之處。招集流民。自以其力。略設營柵。而資以種子牛隻。以爲且耕且守之計。則固人民之所欲爲者。特患爲官員者。不爲指揮經理。而號令不出於上。故民不肯爲耳。今以慶尙道言之。金海熊川。則方爲賊藪。已不可言團聚之事。昌原去賊藪甚近。故亦爲空虛之地。此外咸安。在鼎津之南。而東距昌原五十餘里。南距固城三十里。而雖屢經倭賊焚蕩。然其西面遺民。尙多有之。苟能於賊退之初。趁時招集。擇其要險之處。而設爲數屯。則非徒咸安一郡。因此可完。而亦可爲宜寧晉州之藩蔽。且固城尙云粗完。若咸安又爲稍稍安集。而與固城形勢相倚。則海邊郡邑。因此稍稍得成。亦可期矣。奈何諸將之慮。皆不及遠相聚宜寧。只以鼎津爲限界。其外則皆爲棄地。民之來去不問。賊之肆行自如。往時成允文爲兵使時。猶能分遣伏兵於鎮海地境及巖險之間。賊自昌原巨濟出來者。猶不敢恣意。而民得少有賴焉。允文罷去。繼其後者。一切置之相忘之域。故遺民日就散亡。且爲零賊所擄掠。莫能禁止。良可痛心。倭賊善用鳥銃槍刀。輕生突戰。我軍欲角力於原野之中。則誠難制勝。若或擇於形勢險固。四

無林木巖石之地。或雖土山。而絕無攀緣俯瞰之處。設爲柵壘。四隅多載石車而待之。賊雖千萬。難以陷敗。蓋地勢如此。而以逸待勞。則賊之長技。皆不得施。而我可以專力制之。何者。烏銃雖及遠。而從山下向天直放。豈能傷人。至於槍刀突戰之技。亦不得施於山下。如前日幸州之戰。是也。如是而野無所掠。其勢不數日。將疲困自退。乘其情歸之際。出勁兵設伏林薄之間。處處邀截。或擊其尾。或攻其腰。則賊勢自衰。而我勢自張。趙充國所謂。羌易以計破。難用兵碎者。此之謂也。咸安郡守安沃。頗善於其任。人心不至厭苦云。且此人在北道。素以善戰名。令元帥各別以前項所陳辭緣。分明指授。令於咸安要害處。如防禦山餘航山等地。團聚一境之民。諄諄曉諭。或一處或二三處。設爲木柵。以爲入保之地。平時多設瞭望。以知賊來。而及此春節。於山下。率人民大開屯田。必須身操耒耜。與民同苦。咸安土地肥饒。甲於一道。每水田一斗地。秋收四五石。其利不可勝言。如使誠心爲此。不獨咸安之民也。四方之民。聞風來會。不久將成大陣。農隙依此操鍊。有事則與大軍協力掎角。其爲防備之策。實無大於此者。若安沃善於此任。而顯有成效。則不次超擢。以爲諸人之勸。亦無不可。然此但舉咸安一郡而言耳。他如固城鎮海昆陽泗川河東一帶郡邑守令。皆當責以此事。必期成效。而今年招集人民多少。耕墾廣狹。措置防守方略能否。一一考課。無得悠悠泛泛。如前日之爲。其有

成效者。顯然陞擢。其情慢不事者。律外行罰。疲軟不能勝任者。一一汰去事。都元帥及巡按御史巡察使處。下諭何如。

一 洛東江下流。自金海入海以上。歷叅原靈山昌寧玄風星州仁同善山。以達於尙州。又一岐。自宜寧達於晉州。卽所謂岐江。稍西則鼎津。而皆舟所通行之路也。壬辰癸巳。賊兵皆以江船運糧餉軍器。往來無礙。而人不知沿江設險。惟郭再祐於江中馬首院等處。設木杖。賊船流下之時。爲杖所礙。因從岸上設伏。急擊多捕賊船四十餘隻。其後賊船又礙於江中。岸上之軍圍立相持。凡八日。而賊之在他處者。舉衆來援。故不能盡捕。當時若有大砲及火箭。從岸上亂放。則賊必盡殲於水中。其不能者。特以器械不備故耳。今賊中體探之人。往往來說賊多備江船。以爲行江之計。是其兇謀所在。不徒然也。而我軍如聞虛語。不知爲備可乎。鼎津以下及洛東江下流。與諸淺灘渡涉處。若爲木杖。則可防水來之賊。然人必以人力不足爲諉。而沿江有山處。如鼎津以上月那山。橡木參天。直臨江上。若發軍數百餘人。或用僧軍斫伐。流下設杖於要害之處。以塞江路。不但拒從下流上來賊船。亦可以禦左道賊兵之乘淺灘渡來者矣。亦知委諸將。相機施行事。

一 僧將惟政。方欲修葺龍起山城。而患其私力不足。令本道巡察使。隨便助力。且覓給種子。使惟政率其軍百餘屯田山下。以爲積粟之計事。

一 巡邊使李贇前年以其軍人多爲屯田所得頗優云。今李贇罷去。若以罷去之故而散失殆盡。則今年種子。又將別求於他處。極爲可慮。李贇前年屯田所出幾石。用度幾何。目今所餘幾何。一一句檢詳覈。使兵使金應瑞次知。以爲今年農作之用。而馳啓實數事。下諭于巡按御史何如。

一 平時守令之善於其職。及不能者。監司必待殿最。然後有所處置。而所謂殿最者。亦虛實相蒙。毀譽亂實。故人無所勸懲。而敗官苟免者爲多。今此慶尙道下邑。皆是殘敗賊在之地。守令若視同平時。悠悠泛泛。則難以濟事。况尙州善山金山開寧仁同大丘星州清道昌寧靈山玄風高靈恭原密陽彥陽迎日長鬐。以及咸安鎭海固城泗川河東昆陽三嘉丹城等邑守令。尤重於他處。其勸課陞黜檢勅之政。監司不可少緩。以朝廷所聞言之。昌寧縣監李英。星州牧使曹好益。有能治之名。昆陽郡守李光岳。亦聞勤幹。而未知虛實。此外則全未知如何。善山府使李箕賓亦自朝廷論遞。而又聞清道郡守李聖任。多率衙眷。貽弊吏民云。傳聞之事。亦難保其必信。實有如此之事。則監司尤不當任置而不言也。大抵今日守令。別無簿書期會決獄供辦之事。只能身操耒耨。至誠愛民。使流亡還集。田野漸闢。又能隨其力之所及。設爲禦賊之具。其所治績。不過如此而已。能此者爲善。不能此者當去。上項各邑守令。以見在實迹。一一題品。不待殿最。別錄啓聞。以憑處置事。行移于

巡察使何如。

一 巨濟方爲賊藪。然其遺民散出者。別令縣令安衛。十分招募。姑聚於南海空閒之地。今年則別爲耕種。使有生理。幸而賊退。則爲還保邑居之計。然巨濟在海中。與上道監司所在處絕遠。縣令措置能否。監司勢未及聞知。此則專委左水使裴楔。使之自當檢勅。而待其成效。與監司啓聞事。

一 海邊各鎮堡。如東萊西生浦。以及金海熊川。賊所方留之處。姑置勿論。自固城唐浦所乙非浦蛇梁以西。各項諸鎮。時在與否。及各處鎮將某某人。今在何處。及海邊鮑作干常時能櫓之人。尙有因居其處。漁采爲生者。則令其邊將。各自招募。使之安集。而亦以其招撫多少。知其稱職與否。而覈實。啓聞。以行賞罰事。

一 都元帥以事理言之。則當留陣於一道中央。兼制左右道軍機之事。而自劉總兵撤還之後。大丘不便於留住。移在右道。故與慶州諸將所在。形勢絕遠。凡事不爲料理約束。極爲可慮。元帥雖不能身巡各營。而分遣從事官。常行檢勅。點閱軍兵器械。措置糧餉。慰撫軍卒。勿使有隔絕疎虞之弊事。

一 巡邊使李贊。已爲罷去。右道但有兵使金應瑞。脫有衝突之患。極爲孤弱。自朝廷欲遣領軍一將。使之合力添防於春訊之節。而第恐糧餉不繼。元帥急速商量事勢。及時存糧料。可堪幾人幾日之食。又自湖南運去者幾何。不

分晝夜馳 啓事并下諭于元帥。

一軍律不嚴。故人心解弛。而事無可爲者。往年賊兵不意長驅突入。列邑望風。瓦解。雖有守城守土之臣。及領兵把截之將。皆奔竄避賊。一無防塞之處。習以爲常。故今日邊將之意。若賊來則只有奔北之計。無捐生殉國。以死禦賊之意。極爲痛心。今後苟有如此者。朝廷勿論大小。斷不容貸。此意。元帥預爲申勅約束。使毋致後悔事。并 諭何如。

柳祖認上疏回 啓

見本集

請令諸將曉諭人民勿爲入耕賊陣 啓

近觀邊將處置。皆狃於目前姑息之安。而都無遠慮。極爲寒心。倭賊與我人。非其同類。前則我民之視此賊。如狼虎蛇蝎。聞之慄然。況敢與之同處乎。是以倭賊當初入境之時。雖分遣醜類。雄據郡邑。勢力甚盛。而我國之民。除被脅勒留者外。其餘皆提挈老幼。分散山谷。未有甘心投入者。故賊勢雖熾。而民心則不至於陷溺。此乃國家收復之根本也。今賊久居邊境。歲月既多。而殺戮稍戢。又佯爲煦濡之狀。不相侵暴。資以飲食。則愚民之失其常性。困於飢餓者。已紛然相率而歸之。不可禁抑。爲之耕田納租。以供其役而不耻。日往月來。幾與之化而相忘。傳聞東萊釜山金海等處。耕犁滿野。三分之二。皆爲我國之民。而往往

有荆髮染齒。以從其俗者。又有遠處買賣之人。各持其物。往來互市於賊陣。略無防範界限。事之寒心。無過於此。而賊之所以盤桓累年。歛兵畜力者。其奸計所在。亦或可占。今賊雖聲言退兵。其言豈可信乎。諸將不此之慮。而欲於賊陣近處遣民入耕。此何理也。此聲一出。而左右道之賊。卽以巧計中之。廣布牢籠之術。而元帥似亦不悟。至令蔚山老民。往受約束於賊。酋觀喜入通書。則種子農食。并欲隨望借之。彼以海道千里輸運之糧。無故而欲貸我民者。是愛我耶。救我耶。其情不難知也。兵興四載。我國之民。困於徵發徭役。赤立遑遑。苟有可食之處。雖赴水火而不辭。賊之此言。豈可令愚民聞之乎。聞湖南等處之民。近日流入於密陽等地者。襁負相屬。賊使要時羅。來于金應瑞陣中者。見其如此。語之曰。好爲耕種。和若不成。則當爲我食云。其計可見。况又爲之驅入乎。今慶尙道土廣人稀。不患無可耕之地。何必驅民入賊陣。然後始可耕哉。倭性兇狡。難測悍毒。得於天性。其於同類。斬刈屠戮。有同草芥。於我民。獨有恩意。萬無此理。往時京城之民。初不知被禍。而入與同處。一夜之間。滿城爲其魚肉。此乃已然之明驗也。將官常以此意。曉諭人民。勿使自投於狼虎之口。而又爲之嚴立界限。絕其交通之路。且廣招撫陷賊之人。勿使賊之奸計。終始得行。其他處置曲折。不能盡煩於辭說之中。惟在當事之人。默念善處而已。以此辭緣。各別密諭于都元帥及左右道巡察使。兵使何如。

措置防守事宜 啓未乙
請申明訓練鍊都監勸課之規 啓未乙

并見本集

請遣趙光翼金時若等于忠清道招募把截 啓三月未乙

伏念國事日急。臣雖在病中。不得頃刻弛念。蓋賊之所以謀我者。以夜繼日。而我之所以備賊者。無一事可言。默觀中外人心。只有潰散之計。殊不知今日之事勢。與前頓異。潰散亦無所之也。惟當收拾措置。刻期無怠。庶幾死中求生而已。伏見趙仁得 啓辭。請遣朴名賢李思命等于忠清道。以備緩急。固不爲無見。而備邊司以勢難回 啓。此固然矣。但忠清道爲京師門戶。防守捍禦之策。不可以不講也。今外方武士之不爲從軍者。及曾經戰陣而力戰可用者。不爲不多。特患各邑調發。不得其要。奸吏因緣舞弊。使壯軍隱漏。而老弱居先。以此徒爲民弊。而無益於實用耳。臣竊見鏡源判官趙光翼。乃清州人。自亂初。多有戰勇敢之效。近日久爲備邊司郎廳。故屢與相接。其才頗爲可用。光翼自言。曾與權仁龍金時若相約。欲召集道內前日戰陣中表表勇力之人。分統若干。南下戰所。自當一隊云。所謂權仁龍者。以庶孽。今爲守門將居喪。論者皆以勇力絕倫。金時若。乃故兵使時敏之弟。晉州戰勝時。時若與時敏同在其處。宣力最多。其才氣智慮。皆爲可用云。此人等。皆是忠清道人。道內士卒之勇怯長短。

無所不知。若差除職名。并下送于忠清道。聽巡察使指揮。而與助防將全有亨。合勢爲把截要害之計。其招募之軍。令其自擇帶率。毋得搖奪。旣爲招募之後。若本道事勢不至緊急。則或令直下于南方戰陣之所。使之赴戰。俟其成效。別爲陞擢。使人心興起。則必有利益。光翼今爲鏡源判官。北事固重。然不若南方之尤急。而鏡源判官。他人自可爲之。大概今日之事。非拔擢難以得人。非得人難以濟事。故臣從前每請不拘常規。廣收人才者。其意實非偶然也。今光翼仁龍時若等。爲先試可。而此外又聞前羽林衛韓絢者。亦爲可用者云。臣頃者招見。聽其所言。果非碌碌。此人亦除授一職。使與光翼等。同行招募。則亦可備一隅之用矣。今之議者。每患人才乏少。然求之苟得其道。不棄寒素。則一世之士。自足供一世之用。何患乎無才哉。今則不然。求之於高顯。則志欲已滿。無意於報效。求之於聲望。則毀譽競進。名實背馳。求之於資格。則齷齪因循。而卓犖奇偉之才。未嘗一進。此所以人才常患於乏絕。世事日至於難爲者也。臣之妄意如此。而病中雜言。無復倫理。惟望 聖明。諒其憂國之誠。而 下備邊司。採擇施行何如。

陳平安道沿江防守節目便宜

啓

未二十一日

臣病勢沉劇。精神昏塞。思慮所得。率多顛錯。西邊之事。日夜關心。伏見接伴使沈喜壽狀啓。則義州等處。人心亦頗騷擾。凡人心先怯。則智勇俱竭。雖有策應。

之事多失機會。未能濟事。此可慮之大者也。沿江一帶。自江界至義州數百里之間。水上則有虞候朴名賢。水下則有助防將李時言。而兵使留鎮昌州。兩頭繼援。又有別將金應緘。金宗得等。今將下去。朝廷指授。則不過如此。若其總計一道軍兵之數。因其防禦緊歇。而或添或減。預爲約束。先定戰守之計。臨機處置。則當專責於本道當事之人。政不可從中遙制也。至於義州。則以接連上國之故。而意其防歇。未免抽出其處之兵。分防水上。故喜壽目見空虛之狀。而有此狀啓。此亦遠慮也。高麗時西方防守。既有兵馬使。又有分道將軍。蓋以鴨江一帶上下。形勢遼遠。賊之所發。未知在於何處。故設爲分道之將。使之各領所屬。以爲犄角馳援之策。今之別將。與此相同。獨義州無此。則當有以處之。道內閒散武臣中。稍爲可用者。有李福男。方在寧邊云。此人雖在罪廢之中。而其才則稍可倚任。若稱爲助防將。使之馳赴義州。協同州官及鎮管所屬龍川。鐵山。砲手。限解。冰留。守義州。似爲無妨。義州城子濶遠。中隔高阜。不能通望。守之似難。果如喜壽狀啓矣。但地勢亦多據險處。惟北門外及西門至南門東門。頗在平地。此處若相其城勢。設爲砲樓。而多備火砲器械。則可以守之矣。夫砲樓之制。乃守城妙法。事急則不必用石。又不必起樓。只以大木爲柱。而三面以板障之。似防牌之制。中穿孔穴。則亦可以制敵。而救一時之急矣。北虜攻城。與南賊有異。北虜則每於馬上。人持一壼土。一時俱進。積於城下。頃刻與城平。而人馬

踐踏踰越。且兵皆鐵甲。馬亦被甲。故弓箭不能傷。如非火炮。則不可制。義州所在天地宇。火炮往年攻平壤時。多數輸來。今未知還爲輸去。此亦急速收拾。計其城堞而均分排設。預令事知火炮匠習放。以壯聲威。且使遠近知其有備。則亦足以鎮定民心。警服虜情也。滿浦僉使柳濂。自初固有不稱之議。而緣胡人宴享臨迫。姑爲仍留。近日頗聞老乙可赤二將宴享開論時。有恇怯之容。江界府使許瑱。以爲憂云。此言未知信否。以人器料之。則應或有此。僉使可堪人。得之甚難。以臣意料之。則李慶濬似可堪此。當此機關緊急之時。得人最關。故李福男李慶濬。雖在罪錮之中。而臣不敢不達愚見也。大抵軍機之事。勿論戰與守。皆當以部伍整治爲主。我國爲將者。於守城一事。尤甚疎濶。其於分配堞與簡別精壯之規。皆不料理。頭緒紛亂。臨時顛倒。有同趨市之人。故軍數多而城不能守。變後各處陷城之患。政坐如此。江邊有城處。預爲申勅。如紀效新書所言。每五梁爲一伍。五十梁爲一隊。隊各有將。梁各有預定之軍。平時依法操鍊。臨急如行熟路。衆力合一。又必靜暇不撓。城中寂無人聲。然後可無償敗之患。此等事。雖在將帥所自爲。而亦不可不爲申勅也。臣既受西方之任。所當早爲發行。勉竭駑材。故欲力疾就途。而朝議難之。不幸宿疾重發。危喘如縷。呻吟私室。公私憂慮。焦煎于心。而不知所出。昏瞶之中。招臣從事。口占爲文。辭不達意。然亦係一時一得之愚。下備邊司議處何如。

諱具賊情奏聞 天藪且請防守濟州南原等邑及凡防春預備 啓
臣久在病中。沉綿昏塞。殘喘如縷。些少精神。亦已減半。其於軍國之事。固難容
議。但念國勢危如一髮。而日月逾邁。事機漸遠。思之不覺寒心。人皆以南北之
事爲憂。然北虜之憂。憂在邊境。南賊之憂。憂在社稷。不早圖之。則後無及矣。今
歲律已盡。而賊情狡詐百出。尙無渡海之計。已到春風。脫有再動之變。將何以
處之。伏見金睟狀啓。則所載玄蘇之言極悖。此不但要我以難從之請。其於
中國亦必如此。以爲敗約起釁之端。臣從前慮其如此。而今不幸。事勢浸浸近
是。其爲可憂。庸有極乎。竊料沈懋敬所言形色可疑者非一。然以臣愚料。則似
是自知不能了事。而欲歸過於他人。以爲己地。如所謂 天使早入倭營。故倭
不捲回。此則歸咎於 天使也。今使沈懋時來請我國之使。必知我國不肯。而
執以爲辭。以封事不成。歸咎於我。其實賊之去不去。不關於我使之許否。而自
有兇謀也。懋時若到。則措辭應對。所關甚重。請令備邊司預爲磨琢。酬應爲當。
天使出來後。凡百邊報。一不馳報於 中朝。蓋緣前頭事勢。未可預度。故未
得指一言之而然也。今則 天使已入賊營。而賊情反覆如此。我國似當直以
此等情形。依常時傳報邊情之例。移咨於遼東。使轉報按撫衙門。亦一事也。賊
兵時在釜山一隅。故我國水陸諸將。徒以此處爲急。而不念他路。以臣所料。則
濟州甚可憂。往日賊使要時羅。明言欲犯濟州。可知此賊。垂涎於此也。蓋濟州

當我國西南海。且與中原地方相近。萬一此地爲賊所據。則雖欲以天下之力取之。不可。而西海一帶。以及黃海平安之境。皆無保守之勢。此賊最知形勢。計未必不出於此。聞濟州甚爲孤單。兵食竭乏。癘疫飢饉。甚於他處。云。添兵固守之策。必須十分講究。急速施行。民間可蠲進上等物。亦限年一切蠲減。以紓民力。使得專意於防備。爲當湖嶺之間。無可控扼之處。只有南原一府。而邑宰久曠。至今未赴。其於儲粟鍊兵守城之事。全無措置。此處若失。則他無可恃。臣竊憂焉。此亦催促新府使。星馳往赴。必期死守可也。慶尙道則因蕩敗創殘之甚。鍊兵等事。未及料理。其次則獨有忠清道爲京師藩蔽。而道內軍兵。已經訓練者數千餘人。此亦有將而分付主之。預爲察其形勢所在而用之。則緩急猶可倚仗。朝廷當初發遣御史李時發。專掌訓練。然臨戰則時發不能用之。而他將代用。不無變置部伍。更改約束之弊。所謂所養非所用。所用非所養。兵家之深忌也。此亦下諭都體察使。使總合道內已鍊砲手幾何。射手幾何。殺手幾何。各統於一將。而大將出其節制。然後軍心有定。而臨時無渙散紊亂之弊也。且聞各邑之軍。在道內之官。皆各分占一邑之軍。有巡察使之軍。兵水使之軍。防禦使之軍。御史之軍。守令之軍。號令多門。文移眩亂。莫適所從。此我國從前積弊。軍政之紊。其源每出於此。而忠清道等處。尙仍舊習。云。此亦速爲變更。然後可也。權仁龍趙光翼韓絢金時若所募之軍。未知幾何。然各隨其所得多少。

而校閱精否。備給弓矢衣甲。以聽主將約束。則亦可以當一隅之用也。此皆今日防春預備之不可已者。臣病裏之言。必多疎漏。然區區憂國微忱。不能自己。故撥昏書。啓辭無倫次。請下備邊司。參酌施行何如。

因備忘記論平安道措置事宜 啓丙申
分付黃海監司李廷毓道內防守事宜 啓丙申

并見本集

請鎮定人心 啓丙申

國家之所以維持者。人心而已。雖危亂之際。人心凝固。則國安。人心離散。則國危。已然之事。莫不皆然。如前史所載。百官接踵宵遁。人心至此。則不待敵兵之至。而可知國勢之不可爲矣。往在壬辰之變。侍從扈衛之人。率多中路逃走。當時之事。已極寒心。不可歸罪於小民之無知者也。近日上使出營之報。纔至。曲折未及詳知也。倭之變動。未聞太急也。副天使尙在倭營。處置有所未聞也。假使賊兵將動。豈至於一二日之間。徑造都城哉。而人心洶洶。如鷺濤駭浪。不可止息。數日之內。去者太半。閭閻傳聞。雖未知端的與否。而皆云宰相臺侍朝士之中。亦有先出家屬卜物者。人心如此。紀綱解弛。惟知保身之計。略無殉國之意。彼四方將士。其何以責其奮勵向敵。村巷愚民。亦何以責其安集不散乎。此而不治。則雖有金城湯池。堅甲利兵。皆無可爲。其爲痛心。可勝言哉。朝臣之

先出家屬以搖人心者，令法官覺察以聞坊里之間。先爲出去者，令漢城府五部書其某某人姓名，藏諸備邊司，以待後日處置。且往日壬辰之事，出於倉卒，朝廷多有未及區處之悔。今則懲創前事，必不令小民狼狽失所。各宜安心田宅，治其所業，毋得妄自輕動。自陷於顛沛之域，令出而不爲聽從者，當從重律治罪，決不輕恕。以此意掛榜曉諭，何如。

弘文館筭子回

啓丙申四月

弘文館筭論中，請留正使京城一款，已爲啓請發落矣。其餘所謂京師八方之根本，廟社在此，臣民在此，何可每委而去之云云者，尤爲切要於救時之策。昔汴京淪於賊藪，胡騎四面充斥，而宗澤三呼過河，張浚請進駐建康，以繫中原之望。古之忠臣義士，其所以爲國謀者，不過如此。良以天下之勢，不進則退，三軍萬姓之心，繫於一人之進退。若以根本爲不守之計，則枝葉何所庇覆。至於遷國圖存之說，出於一時之倉卒，非可遵行而爲例。儒臣所陳，深得古人獻忠之義。自上更可體念，而策勵群臣，以起四方之心，以振中興之業，不勝幸甚。

通信使差遣便否

啓

通信使差遣事更議事。筵中啓之矣。此乃時急之事，今日則已晚，雖不可爲來日使之更議事。傳教矣。臣等會議，則皆以爲事已至此。冊使跟隨之事。

則不可不許。故前者回咨，已微示其意。今副使以此屢爲揭帖，至於委遣通事，使之面達。今若不從，則後日處置，恐益難於今日。故以跟隨陪臣許送事回咨，而差出其人。隨後發送宜當，但以信使爲名，則難處之端益多。又必有國書禮物等事。今但依副使前後所言，只謂跟隨以送。此後雖有他言，一切堅拒，不可聽從也。第兵部咨文，有行檄拒之之語。今當答之曰：小邦之人，足躡倭國，義所不可。且兵部分付又如此，實難施行。只以冊使爲小邦遠涉滄海，而求陪臣與之同行，禮不可辭。故謹當依命。但沈遊擊尙未回來，清正雖撤，而竹島加德安骨等處，猶有留倭，前頭賊情，尙亦難保。倭兵如果盡撤，而旌節過海有期，則卽當發遣，不敢稽遲。以此意回答，先令朴義儉還報，且出可去之人，裝束以待。觀勢前進，則庶或宜當。但此乃大事，臣等所見如此，敢啓。

因傳教論跟隨陪臣事

啓七月二日

今此陪臣一事，三司之意同然。論之不已，如無大段之益，則似不須強爲。予痼疾昏耗，近益尤甚，尋常機務，決不能堪，徒自痛悶。度日如年，此等事，何能有定。惟望諸卿，僉議善處事。言于備邊司事。傳教矣。此事初因天使懇迫不已，欲托於問安，而兼爲探審賊情。故差出武臣，繼而有黃慎前後狀啓，疑其到彼之後，有難處之事。則武臣不能以周旋，故有差遣文官之議，皆出於事勢之不得已也。事之難平久矣，成敗之機，明者所難逆覩。天使已爲渡海，跟隨之言。

亦似後時。以此果能完事。臣等亦何可必也。但黃慎已言於賊中。而宣傳官出去已久。今雖欲爲停止。恐不可及。且旣停止。則亦當以嚴辭斥絕。雖至於激怒。速毀。有不暇顧。臣等亦未知今日我國之力。可以辦此否乎。此皆非臣等愚見。所可定也。大抵論事易處事難。自古有是言矣。臺諫在論事之任。故惟務直截。而不顧他事。臣等在處事之地。故千思百度。而未免委曲。所論雖異。而其欲圖國事則同也。但臣等本以無狀暗劣。居備邊之地。不能出一策。以紓神人之憤。其不欲遣人讎國之心。與臺諫何異。徒以事勢之難。而有此持循之議。此乃臣等之罪。當死有餘愧。今承再三更議之命。而不知所以爲言。惟在聖斷。

懲毖錄卷之四 終

懲毖錄卷之五

芹曝集

因忠清監司書狀論鳥竹兩嶺防守事宜

啓此下備邊

忠清監司書狀據司啓目帖連啓下云。鳥嶺竹嶺阻隔於忠清慶尙之間。把截之策固當十分嚴密。但觀兩嶺形勢。非但一條大路。傍出細逕甚多。若不缺備。而但防一路。則於事似爲無益。且把截嶺路之術。不在於設柵屯兵。只於樹木險阻之處。多設伏兵。要遮前後。使賊不測多少。而首尾斷絕。將有自退之理。要在爲將者。臨時處變。或爲疑兵。使山谷應聲。或爲弓弩。乘時發射。尤當預發詳知道路哨探動靜之人。賊鋒所向。我輒先知。隨其所至而備之。則雖寡可以敵衆。不然而賊先據險。引入腹內。則遮截極難。往日忠州之敗。可以爲鑑矣。鳥嶺則延豐忠州槐山陰城等處之軍。可專委防禦。而此等州郡蕩敗已甚。無以爲計。竹嶺則雖有丹陽清風永春堤川四邑在嶺下。而亦皆凋殘。把截之事。恐難專責於此邑也。且於賊兵未來之前。發民數十餘。守直山頭。如常時盜直之例。非徒飢餓之卒。無望於禦賊。而因其闕到。輒爲徵督。其弊不賞。預爲分付定將。多抄山尺能射之人。申明約束。臨有賊變。卽時隨其所向。合力把截。似爲便當。寧越平昌原州等官。亦一體施行事。忠清監司及江原監司處。行移何

如。

因忠清監司狀 啓論抄軍勸農勿使民心騷擾 啓

忠清監司書狀據司 啓目帖連 啓下云云。凡事不論難易。皆當以措置得宜。順便民情。不至騷動。而能致集事爲貴。若使民心驚擾。互爲逃避。則雖盡發民丁爲兵。而何補於實用哉。況今百役叢集。民困已甚。雖有不得已調發之舉。所當多般區處。先聚控弦可用之士。不務其多。惟取其精。而老弱疲民之不堪戰鬪者。趁此農耕之月。無失農業。然後方可爲戰守良圖。若囚繫太多。怨號徹天。則事未集。而邦本先搖。殊非要遣巡邊之意。更察事日本意。緩急適中。施行事。巡邊使李鎰處。下諭何如。

慶尙道把守事宜指授 啓

都元帥從事官崔尙重巡邊使從事官邊以中。今將下去。凡所指授之事。別爲開錄以送何如。

天兵分駐慶州大丘三嘉。以防三路之賊。今慶州三嘉二處兵已撤。而只有劉總兵大丘之軍。亦將不久并撤。其勢極爲危急。昨見劉總兵送金命元箭付。令我軍代守三處營壘。其欲撤回可知。三嘉則既有山城。及唐將所駐營柵。擇其形勢可守處。當使宜寧留駐諸將守之。八莒則都元帥率防禦使金應瑞駐劄慶州。則高彥伯權應銖洪季男鄭希立朴毅長金太虛等守之。三

處連絡形勢。招集精勇之軍。悉詣陣中。且措置糧餉。接濟無乏。以爲必守之計。若賊勢有所指向。則都元帥隨其急處策應事。

因崔彥邦上疏措置忠州屯田 啓

忠州居幼學。崔彥邦等上疏據司 啓目帖連 啓下云云。忠州居國上游。列邑之中。惟此邑最重。今當蕩敗之際。撫輯蘇復之策。所當十分講究。其要先自慎擇守令始。故往日銓曹。別以金鞅差遺。今見民情。則金鞅已著居官之效。似爲可嘉。當久任責成。以慰一邑民心。移粟賑救之事。不可不急。朝廷亦無善處之策。監司所當通融一道錢穀之數。以其所餘。彼此推移。庶幾趁此農作之節。使之耕種。無失其時。而往日所陳。移右道鹽石千餘。從水路輸到。可興等事。亦係救民之急務。亦在監司盡力舉行。江原道耳。麩唐黍。若自原州等處。移轉忠州。則道里相近。但原州亦是蕩敗之邑。自救不暇。恐無以更掇他邑之民。然江原監司。勿視彼此。雖少。若可移轉。則使之從便。分給爲當。忠州達川之野。土地沃饒。得粟倍多。若有願爲屯田者。使之聚會一處。勸課耕墾。而近邑未甚焚蕩處。如有富民願納種子及牛隻於忠州者。則別爲破格論賞。除授實職。此意亦令監司。十分登時曉諭。抄名 啓聞事。并行移于忠清監司何如。

請措置忠清一路防守 啓

賊勢口急。而在我策應防備之事。一不措置。萬一衝突北上。更如前日之變。則

漢江以南更無遮蔽之處。寒心之事不一而足。全羅道則已送巡邊使李鎰爲慶尙道諸軍之後援。而忠清道竹嶺鳥嶺秋風嶺黃澗永同一帶防備之事。則尙無可倚。前者賊兵分道上來時。一運由鳥嶺直犯忠州。一運由金山出於黃澗永同之路。此等各處措置待變等事。不可少忽。但今處處無糧乏兵。雖有可行之策。而不得措手。然不可任置而不爲之計也。往時韓明胤爲永同縣監時。得精勇之軍。設伏勦擊。多有斬獲。自明胤死後。其軍雖離散。而亦有遺存者。若能招募收拾。猶可得數百人云。今清安縣監全有亨。報恩縣監金好恬。永同縣監鄭霽。黃澗縣監柳大春。皆在賊路所經要害地頭。此四邑守令。凡刷馬支供等事。勿令侵責。以休民力。責令招募軍兵。撫輯山尺勇力之人。詳探賊路所由。措置遮截之事。而因令全有亨。助防將稱號。指揮措置。四邑合爲一心。預爲操鍊軍卒。措備軍器。以待不虞之變事。忠清監司及兵使處。行移何如。

分付全羅道兵農及把截險要 啓

全羅監司書狀據司 啓目貼連 啓下云云。湖南右道。接連慶尙道一帶。把截要害之處。必有緊歇。朝廷難以遙制。當任本道處置。俾無疎虞。而方此耕作方急之時。若不趁時播種。則賊雖未至。而人民之生路斷絕。極爲可慮。故今日之計。當使戰守與農作。一樣區處。不可偏廢。賊兵時無西犯之狀。宜寧等處。且有駐軍。雖其前頭利鈍。有不可預料。而六十峙等處。許多把截軍兵。坐而相

望失其農時，殊非得計。惟當定將分付，堅授約束，暫許歸農。聞變卽時，刻期聚待。違者勿論將卒，一以軍令從事。三令五申，知委施行。險阨把截，亦有其策。如不得堅築城堡，多設器械，以禦奔衝。則於林藪茂密崖谷隱僻之處，挾道設計，伺其賊來，處處發射，而又爲疑兵。山谷應聲，不測多少。則賊雖衆，必不敢容易踰越。所謂步兵入林，則不可制者是也。往時劉克良把截竹嶺，盡伐山頭之木，使之兀兀，而以其木役民，排設短柵，有同防水之狀。見者皆笑其齟齬，而竹嶺形勢因此不如前月之深昧不測，以克良之曉事而計慮未及如此。況於他將乎。今此設險處，亦不可不知此意，并爲枚舉。移文于忠清道監司尹承勳，全羅道監司李廷龜處，何如。

請措置糧餉

啓此下軍門

都體察使意從事官 啓曰：今日戰守之計，不過糧餉軍兵城池器械數事而已。然必須先備糧餉，然後他事次第可舉。京畿軍糧，則與本道監司相議，時方爲先措置矣。今年田稅，依常時例，以米豆收捧，分置于水原廣州山城及驪州婆娑城等處，以爲兵糧。而災傷收贖，亦依民情所願，從該曹所定，作米豆捧納。其餘皂隸番米各司奴婢身貢作米，亦於穀賤之際，趁時收納，分置各處，以備軍餉何如。

請往見南漢山城 啓四十一日

廣州南漢山城乃溫王舊都。形勢壯固。在京師數十里之地。若積粟屯兵。修葺城子。以爲重鎮。則京師之勢自固。臣等近日與本道監司柳根同議。隨便先設倉廩于其中。始役有日。屢遣軍官等往見基址。而傳聞之言。終與日見有異。始事之初。必須得其善地。乃可。明日臣與副使李德馨。單騎馳去。指授形勢而來。敢啓。

往見南漢山城後。仍請權應元除授實職。使之勾管山城事。

啓八十一月

臣等往見南漢山城。地勢甚好。衆山束聳。城在半空之上。外面不知有城。而中有平野土田。人居亦有之。城皆以礮石築之。今則頽圯處甚多。登最高處。則京畿禿城以下。及江華摩利山。皆在眼底。更無遮障處。上有烽燧。與南山相應。若隨便修葺。爲積粟屯守之計。則可爲永久之利。壬辰年。州人權應元等。率鄉兵在廣州。賊來多數射殺。至七月。邊彥璣來集其兵。結陣於平地。應元勸令入保山城。而彥璣恐其不便於遁走。未久爲賊所掩。全軍覆敗。而廣州不能守。一州之人。至今言及彥璣。無不歎息痛恨也。權應元。今以山倉監造事在其處。臣招見問其變初之事。其人頗勇健無懼。曾以單身遇賊射殺甚多。賊不敢近。廣州之人。亦多言者。其時軍功。啓本。或多道梗不達。僅爲加設軍資。正而廢棄於鄉。當此之時。如此力戰之士。所當收拾。以備驅策。臣令爲山城別將。使之仍居城內。招集舊日義兵餘在者若干名。漸次訓練矣。如除授六品以上實職。以獎

舊功別責新效。而勾管山城之事。募民入聚。明年於山下定金坪沃饒之地。稍設屯田。則數年之間。可以經營。漸成貌樣。爲益必多。但官爵之事。不敢擅便。敢稟。

送從事官于各道申勅軍兵

啓丙申正月四日

前日因臣啓辭。待各道軍務稍有頭緒。從事官爲先發送。申勅檢察事。已爲允下矣。從事官韓浚謙。今將發送于黃海平安等道。使之申勅軍兵。點閱糧餉。考其官吏能否。訪問道內民瘼。及他利病之當爲罷行者。有時暗行。聞見一。一申報。以憑轉啓施行。印信一顆。給送道內堂下守令。依下四道都體察使狀。啓。杖六十以下自斷。堂上守令。申報施行。宜當。敢啓。

請出京畿右防禦使 啓

見本集

請平安道煮鹽屯田以補軍餉

啓二月

平安道他餘事。則時方欲爲隨力措置矣。但各官糧穀。一樣蕩竭。以本道上送成册觀之。則平壤一府。只有米八百餘石。豆二千七百餘石。平壤如此。他邑可知。古之爲大計者。必先足食而足兵。不得已則寧去兵。而不能去食。今食乏如此。何事可爲。此乃切迫之虞也。理財之策。固當無所不舉。三縣產鹽之處。隨便煮鹽。由大同江以上。販穀於成川江東等處山谷之民。使公私兩便。則歲可得

數千石矣。且永柔德物箇廢堰。土地沃饒。可以墾田得粟。其縣居奉事金璽。士人之有志於國事者。自願主管屯田之任。多方經理。得粟補官云。其意可尙。此人差定屯田官下送。收募道內牛隻。及時耕種。秋收之後。令藏置於永柔山城。以爲軍餉。似爲便益。敢啓。

請以安集都監農牛分給鎮江壺串入耕人 啓

京畿鍊兵之事。近日多方申勅。抄得丁壯。幾至九千。而器械蕩然。資糧不備。生穀之策。必須急時講究。鎮江壺串兩塲。旣爲訓練都監屯田之所。以土地廣濶。人力不及。不得遍爲開墾。如得農牛百餘隻。且出上年屯田所出之穀。分給自願并作之人。許令入耕其內。則陳地可以漸墾。而所得亦多矣。黃海道各官散置安集都監農牛及時取來分給。何如。

經理西方事務 啓

月四

近觀西方事勢。日益可虞。必須於合冰之前。多般經理。以爲防秋之計。然後庶可備其緩急。他餘事則臣自爲移文。分付於本道。且令從事官韓浚謙。往來檢察矣。其中數事。當待朝廷處分。平安道出身之類。當初榮幸科舉。頗有喜悅之心。近日南北赴防之役。專責於此輩。行齎居送。盡失農業。又以守令不加存撫。侵虐之事。有同平民。少有徵督。輒囚其妻。故出身之人。無不怨苦。更以登科爲悔。群心如此。其何以望其致力於有事之日哉。議者以爲。此屬皆爲訓練院

權知奉事口傳。而江邊入防之時。計仕遷轉。一如本院之例。且令邊將。每於朔望試射。計其畫數。申報監兵使。啓聞。其中優等者。別爲擢用。則人心必有興起。而無怨苦防戍之歎。請令該曹商議舉行。以慰塞上軍士之心。且江邊土兵。有馬者絕少。北虜長技。在於馳騁。專用步卒。則不可抵當。本道及黃海道牧場。馬量數捉出。使臣從事官。巡閱試射。分給優等者。亦慰悅將士之一道也。江邊土兵中。勇悍善戰者。及有計慮可用者。詳知虜中形勢。而出入偵探者。令兵使監司。各別訪問。得實。歲舉其最優者一二人。啓下兵曹。於鎮堡邊將。有闕處差送。則塞下之士。必益勸募興起矣。近日江邊鎮堡。往往造設炮樓。近聞前碧潼郡守李時言之言。則碧潼亦已設炮樓。降倭等見之。亦皆以爲守城妙具。但炮樓雖設。而火器未具。則亦一無用之物而已。火藥大炮。多多益善。江邊所儲。不足以支一戰之用。猝然遇賊。則將以何物制之。極爲寒心。火藥雖令各官煮取。而或不知煮法。或惰慢不勤。徒用民力。而所得不敷。此亦當有主掌者。而責其辦出。然後可也。評事閔有慶。頗爲致意於職事云。焔焔煮取火炮器械事。令評事勾管措置。於道內有鹹土處。聚合匠人。分付煮取。課其所出多少精麤。而行其賞罰。逐月知數。啓聞。且總計江邊及道內火炮器械。而試其可用不可用。可用者留儲。不可用者改之。或隨便新造。如一城有炮樓幾坐。一樓當用大小炮幾箇。必使準備應用。使無臨時窘迫難備之患。至如大炮之放。非人人所

可爲必於上兵及諸色人中擇其性近可習者多方傳習。蠲除雜役。別加優恤。然後可用於戰守之際。此意啓下後移文監兵使。知委施行何如。

請以鍾樓破鍾鑄大砲 啓

戰守之具。火器爲最。至於守城防灘。則又必以大砲爲之。近日外方。往往有造設砲樓之處。江華亦於臨海岸上。設爲砲墻。但火砲未能猝備。每每求索於京中。而軍器寺所造不敷。不能分送。若無器械。則砲樓亦皆無用之具。京外鑄鐵絕乏。雖欲鑄成而無路。前日鍾樓破鍾。埋在上中。留之無用。且以事勢輕重。緩急言之。鑄砲急於鑄鍾。請以此破鐵及時鑄成大砲。分送諸處。何如。

請修葺石城山城仍添補牛糧屯田 啓

水原禿城。則城堞已修。器械粗完。故一府之民。皆有定志。時方以私力。蓋造廬舍。欲爲入處者甚多。以此知民心有所恃。則自無潰散之慮也。營將趙撥。勤於所事。晝夜不怠。稍得成效。頗爲可嘉。如有事變。則當使水原府使及此人守之。但趙撥以前虞候。時無職名。似難統攝軍卒。請付實職。使有激勵之心。龍仁陽智之間。有古城當路。名曰石城。地形險要。勝於禿城。且在直路之衝。若於此地。又爲修葺。積粟鍊兵。右控禿城。左連南漢山城。爲鼎峙之勢。則京都之門戶固矣。臣已令龍仁縣令尹粹然。募入僧人。蓋造房屋。又令良才察訪崔屹。兼前營將。并爲經紀。但役巨力微。難可易就。其近處安集都監屯田農牛穀糧。可以推

移添補合力成就當初屯田之設。正欲爲據險聚民之計。而京城直路經理尤急。請令安集都監通融物力。期於有成何如。

請出糧料判官措置糧餉 啓

軍興之際。措置緊急之事。莫先於糧餉一事。糧餉不足。則百事皆不可爲。當於今年秋成後。隨便措備。多數貯峙。然後旣可以爲我軍調度之需。有餘則推移接濟。天兵亦無不可。臣旣兼管四道體察之事。方欲措置器械旗幟衣甲等事。而糧餉辦出甚難。事未易舉。前雖 啓請空名告身。鳩粟於諸道。而勾管者如未得人。則徒爲貽弊。而無益於事。事變前備邊司啓請各道出糧料判官一人。使之勾管糧餉之事。未及有效而罷。今亦於臣幕下。極擇有心計幹辦之人。稱爲糧料判官。容臣自舉帶率。以專其任。苟善措置。則各別 啓聞論賞事。奉承傳施行何如。

因鴻山賊報請邊應星仍任防禦使進駐婆娑等處以察警備

啓七月九日

伏見忠清道御史李時發狀 啓鴻山盜賊屯聚之事。極爲駭愕。此恐或過實之傳。但近來事變未息。民心易搖。自古嘯聚之徒。必起於如此之時。鎮定措置之事。不可以微小忽之也。京畿初出左右防禦使。欲其分兩路策應也。右防禦使吳應鼎。則托以鍊兵。明日使之出巡於水原竹山等地。以察直路形止矣。左防禦使邊良俊。時無上來之期。驪州以下龍津等處。譏察警守之事。時無檢勅。

之人似爲虛疎。前防禦使邊應星。雖以巡察使宋言慎相避見遞。而別非同任之比。且方在廣州。請邊應星仍任使之。割卽前駐婆娑龍津等處。以察警備之事。何如。

請徵兵把守各處

啓七月十日

都監砲殺軍亦已過半出去。都中留軍數小。楊州蘆原等處束伍軍及樓院別營軍。合百五十人。入番于乾川洞近處。新設左營。高陽坡州交河束伍軍一百五六十人。把守於漢江別營。以爲緩急之用。何如。

請徵黃海道束伍軍入衛京師

啓

觀此賊勢。漸似鷗張。黃海道武士。延安白川海州近處三四百名。上送事。已爲行移。而本道列邑。留在武士及延安海州白川束伍軍。不可不多數調發。入衛京師。以備不虞。事機頗緊。不分晝夜。定將上送。監司亦來白川近處。以聽朝廷分付事。急速。下諭何如。

請澄汰不治守令以蘇殘邑

啓

臣在京中所管四道守令賢否。未得聞知。前日從事官韓浚謙下去時。令出入民間。詳細訪聞。參以實績。尤甚不治者一二人。使之牒報。今據韓浚謙牒呈。黃海道康翎縣監呂應周。人微望賤。年少手生。邑事不能成形。平安道江西一縣。凋弊最甚。倉穀蕩盡。將爲棄邑。縣令趙孝男。以年少武夫。因一時軍功。驟當是

任人器不稱。蘇殘起弊。決非所望云。此二邑皆是殘弊之地。守令又不得人。則不久將爲棄地。韓浚謙目見牒報。與流聞有異。請呂應周趙孝男罷黜。勿論文武南行。極擇慈詳廉謹之人。差送何如。

請以文官之有才計者爲南兵使。啓

西北方近日形勢。皆爲可虞。然北方之憂。尤劇於西方。蓋西方則地連上國。老胡雖發。必無空其巢穴而深入之理。若威鏡南道。則從三水甲山直抵咸興。其間道里甚近。虜若窺覘虛實。竊發乘虛。則南北兩道。將至隔絕。而首尾不得相救。此乃腹心之憂。近者老乙可赤。必要於惠山越邊。屯聚設險。又欲於政丞坡。吾達。整居耕種。若其勢旣成之後。則北方一帶。藩胡皆將相率而歸之。必爲後日難圖之患。極爲可慮。今之處此急之不可。緩之亦不可。唯當先固在我之勢。而觀彼釁之淺深。臨機善應。不使滋蔓而已。當此之時。萬般計度。不如擇一賢閫帥。南道兵使邊良俊。自初固有不堪之虞。下去之後。別無布置規畫之事。且聞有輕率躁擾之病。不得本處人心云。安可望其撫輯民夷。以舒朝廷北顧之憂哉。邊良俊似當遞差。第其代求之於武將。則極難得人。雖文官而有弓馬之才。且有籌度邊務之慮者。則其措置規畫。未必下於武將。道內守令中。似不無其人。請問於備邊司諸臣。急急處之。責以完復南道之事。則或可以收拾於萬一。臣之計慮。未知合宜與否。然邊事至重。故敢此上稟。

右防禦使吳應鼎遞差 啓

吳應鼎遞差當否。問于都體察使事。傳教矣。吳應鼎之爲防禦使。當初固有
不勝其任之慮。但以乏人。故備邊司 啓差矣。頃日賊報卒至。臣發遣應鼎。使
合京畿前營右營之軍。把截要害。且分付云。兵分則勢弱。當於禿城。厚集其陣。
屯留重兵。而多發體探之人。遠遠瞭哨。視賊兵所向。與左防禦使。相爲掎角。其
後聞應鼎舉措煩擾。分軍約束。頗有違錯。禿城守城之軍。盡數調用於他處。且
分兵拒守。許多路頭。形勢孤弱。縱有緩急。似難相顧。事人多言之。臣猶未知其
間曲折。昨已行文。問其策應形止。欲待其回報而 啓請處置矣。伏見諫院之
啓。亦必有所聞。而然。吳應鼎遞差。而使他人之可堪者代之。甚當。

論平安道出身防守之弊 啓

從事官韓浚謙牒報內。平安道江邊出身。前日爲兵之時。各有保率。備給糧餉。
且常留在本堡。不見防守之苦。一自登第之後。盡去保率。名之曰出身。分防之
役。前後相望。旣無元定番次。疏數出於一時之意。昌城以下出身。則合冰之際。
分防於境內諸堡。解冰之後。又令分防於水上諸堡。秋冬之交。又使移防於滿
浦諸鎮。一握之米一尺之布。皆無出處。而親負戎器。自備糧餉。長立戍所。在家
無日。若此事不早變通。則萬無支保之勢云。臣前此亦聞平安道出身。怨苦之
弊。已爲 啓請處置矣。其後又聞平壤等處出身之人。或有自縊者。或有掛其

紅牌於官門而脫身逃去者。所聞駭愕。今據韓浚謙牒報。則其致此無足恠者。大抵道內出身之人。皆平日取才軍士也。前則各有奉足。以備資糧。又有番次往來有時。一自出身之後。無保率可以相資。無番次可以遞休。一年之內。長在於道路防守之役。不遑暇食。揆之情理。極爲矜惻。臣求所以處置之策。而未見便宜。不過仍前日更給戶奉足。又使徵發之際。定其疏數。如前日立番次第。以休其力。則庶可小愒矣。如此然後赴防之時。爲之計仕。以爲去官之階。已出六品。而爲實職者。始免其防戍。而收其保率。以給他人。則民情稍似便宜。今日之所以處此者。唯此而已。請令兵曹急速商議舉行。而舒邊民倒懸之苦何如。

措置龍津事 啓

訓鍊都監所屬平安黃海江原等道僧軍移送龍津。令防禦使邊應星領率教鍊。料米依都監軍人例。受食于京倉。至今數年矣。今則別將許售代守龍津。方築城壘。以爲後日設鎮根基。築城既畢之後。當以此軍定爲土兵。折給鎮傍閒曠之地。資其衣食之路。而分番入守。以爲可久之規。第其所食料米。當此經費匱急之日。不可每受於京倉。欲自鎮中措置饋餉。來十一月爲始。該曹散料。勿爲題給宜當。且鎮軍士今年耕作屯田。所出雜穀。并二百七十餘石。方在本鎮。請以此穀。因留本鎮。以助餉軍之費何如。

請金壽男婆婆守城將差定事 啓

婆娑城已爲畢築。時方措備軍糧器械。以爲上流保守之地。但驪州牧使臨時雖當入守。而常時則在於本官。城機修設等事。未得專意顧見。必須使武將一人。稱爲守城將。如禿城趙撥之例。晝夜留在其處。凡事急急措置。可無疎虞。且驪州境內人民。於城守之事。志意尙未堅固。當以本土武將。爲士民所知者。爲守城將。率其家屬先入。而曉諭他人入城守禦。然後可無渙散難合之憂。護軍金壽男。居在驪州。壽男曾在平壤。經歷戰陣。不至恇怯。云請金壽男。婆娑守城將。差定下送。聽防禦使邊應星節制。與本州牧使協同防守何如。答曰。旣委義嚴守。又使金壽男守之。未解其間曲折事。傳教矣。上流重地。有城子處。只有婆娑守城之事。不可疎漏。義嚴雖或居守。而不可專委其事。且所率軍。皆是遠處山谷間無根之輩。臨時調發。或來或否。用以築城。則猶可。若於急難之際。只以此輩。欲爲守城。恐難得力。呂州品官士人以下。皆當清野入城。而本邑東伍之軍。亦當分半入城。亦非義嚴所能號令節制。臣初欲使邊應星入守。而江灘地面濶遠。防禦使當往來檢勅。不可但在一城之內。故已令呂州牧使尹國馨。臨時城守。而若無武將之預在其處。措設守備。則亦恐未及於守禦。故議于備邊司。請以本處武將金壽男差送。非偶然計而然也。敢此更稟。

請差送助防將與防禦使協守江灘 啓

京畿呂州以下上流警備事。防禦使邊應星處。大概已爲分付。其守灘將卒。亦

令分部畫界分守。各責軍令狀。使之盡心防禦矣。但江面濶遠。上下百餘里。防禦使在一處。而賊勢散布。一時俱至。則勢難相顧。請助防將二人。以堂下有武才人差出。使聽防禦使節制。協同守禦。何如。

懲毖錄卷之五 終

懲毖錄卷之六

辰巳錄

馳

啓賊兵形止及請抄發軍卒馳救平壤狀

壬辰六月

賊兵形勢及唐人接待發送事。昨已馳啓矣。倭賊自昨卯時連續出來。其數不在千餘人。分運迭出。馳驚往來。若將渡江之狀。多放鐵丸。終日相持。我軍乘船相戰。射中數人。臣與斗壽命元等。同在一處。詳觀賊形。其長技只是鐵丸。用劍而已。我軍若射矢。則輒奔走遠避。以此觀之。若得紀律之軍。與之相角。則恐亦不至於難制。唐兵出來。一刻爲急。以夜不收所言觀之。唐將似已入我境。自前唐官之來。雖平時皆有迎慰接待之禮。況今則大將總兵來救。事體嚴重。義州江上迎接之事。使尹根壽爲之。中路亦當使大臣奉國命以謝遠來之意。因陳事急望救之情。然後事體爲穩。而救援卻賊之事。庶或及時。臣旣受命接待。不可坐待其來。玆與斗壽相議。欲馳迎于中道。若相遇。則所當少設茶果。於始見之處。而到處官府。下人盡散。不成體貌。極爲悶慮。且賊兵逼城已數日。而水上下淺灘把截。軍兵單弱太甚。安危之幾。僅存呼吸。唐兵來到。尙遲數日。此處添兵之舉。尤當急急措置。不可少緩。臣路遇散卒數人。隨卽入送。因欲廣行招集以赴。而一路無人。難以如意。肅川安州以下諸邑。潰散軍士。無遺抄發。

急時馳救事。朝廷宜別遣宰臣一人，急急處置。唐官處告急文字，亦連續馳報，使無稽延後時之悔。

馳

啓見唐人問答緣由因奔問

起居狀

壬辰六月十三日

今月十二日夜，追來唐人八名，自平壤馳到肅川。十三日發向義州。臣招致摠騎一人，問賊兵形止，則答云：賊兵數本不多，其中亦多假設疑似之兵，以惑人見。如持旗幟之類，皆是不中用之兵。若我兵來集，乘夜掩擊，則可以一舉蕩滅云。臣對曰：爾言正是，正是倭賊當初原不敢與我軍相敵，只緣民不知兵，已二百年，猝然遇之，不能抵當，望風奔潰，以至於此。今兵迫城下，已累日，城中望救一刻甚急，未知天兵當於何日到此。摠騎答云：十日十一日間應已越江，因言援兵之來，本不當遲緩，而義州節制使多般搪塞，哨探之人，我地方官甚以爲非云。奮臂扼腕，言之不已。臣答云：本官不識事體，有此違悞，國家欲拿鞠論罪，而以兵事方殷，不能易置邊將，姑待事定後論罪云。則答曰：何至於拿打，因卽辭去。臣又聞唐人於一紙圖畫，平壤地形及賊陣形，止持去云。昨日夕時，林世祿又率唐人十五名，馳到安州，更擬哨探於平壤。今朝始見所賚咨文，則有題請擬議之語。兵期遲速，似難料度。臣不勝悶迫，問世祿曰：平壤受兵已久，留陣將官，方極力把截，但水上下淺灘甚多，賊狡計百出，萬一偷渡，繞出城北，則勢甚危迫，未知天兵幾日當到此。答曰：前去夜不收已探賊情而去，軍馬當

卽越江。俺回路當遇於定州等處。臣因致往來勞苦。慰謝之意而退。大概竊看唐人辭色。自初雖聞我國被倭賊來侵。而不知虛的。其後南邊郡邑。以及都城。連陷於旬日之間。頗致恠訝。且又事勢則甚急。而告變請兵之事。率多稽緩。義州又復多費辭說。搪塞來探之人。別無泣血奔走倉黃迫切之狀。故雖云發兵相救。而終以事情爲疑。致此遷延。此事理之所固然者。且唐人累問國王。何以又爲遷避。臣令譯官對以賊兵迫城。群臣請少出避。而將官率兵督守。保無疎虞云。答曰。知道矣。惟是一路郡縣人吏頑甚。且逃去殆盡。唐人飲食及飼馬草料。多不接濟。唐人時有慙色。發於言語。此於事機體貌。極爲關重。臣戒勅守令。使之十分盡心。而猶未如意。前頭大兵之來。調度支供。益難成形。臣尤爲闕慮。且臣之愚昧。何知兵事。但連日在城中。詳觀賊兵形勢。極有可乘之機。若得援兵來到。合力齊舉。則可無不勝之勢。而大駕移蹕之後。民心不甚擾動。軍士各自致力。此亦恐是天意。江邊潰散還歸之卒。及他未發之士。勿論多少。節次添入爲當。傳聞黃海道海邊居民。亦多相聚剽掠。別無統屬。其數甚多云。亦須別遣一人。急速招集。以添軍數。或以海州牧使李泰亨。爲其道節度使。俾令收集散亡。鎮守列邑。如白川延安岳文化海州許多海邊之邑。賊兵皆所未到。朝廷嚴勅守令。毋得如前奔避。以待賊退時。合勢追截之計。亦爲今時之急務矣。謹遣從事官辛慶晉。奉狀馳聞。且奔問起居。

遣從事官辛慶晉起居 行在狀十四日六月

臣今日在安州謹具狀 啓一道并唐官林世祿所傳遼東咨文令從事官辛慶晉馳赴 行在于寧邊同日申時慶晉還言 大駕已離寧邊道路傳說未定處所不得已還來云臣北向痛泣五內震裂即當隨赴 行在但遼東咨文必須劃即回答付送于唐人還去之時事甚急迫不可遲緩更令辛慶晉尋問進去前封書狀并爲上送因以候問 起居

馳 啓平壤賊勢狀六月十六日久在嘉山控

臣到控江亭路逢潰散之卒絡繹於道問其緣由則昨日夕時賊自王城灘偷渡兵使李潤德先走江上諸陣兵皆潰散云極爲驚駭平壤城中若被圍則外無援兵事甚危迫且土兵可用之士如皆散去唐兵雖來形勢不接難以成功義州宣川等處逃散之卒臣令軍官時方招集他路散出之兵願分定朝官急期收召悉赴於唐人來到之處而 行在所駐處亦從長計議急速處置庶無迫逼之患

林畔驛唐將分付李寶事及路逢忠清道書狀陪持人上送發遣從事官洪宗祿看守龜城倉穀狀六月

臣昨日留金命元李元翼兵使李潤德守定州與防禦使李寶同行到雲興斥候唐人皆已還去日沒時到林畔初欲請見唐將伏聞 車駕已親臨面議臣

追到言辭曲折。恐致重複。還有未安之意。故令譯官。只通李贛姓名。以爲平壤留陣將帥。欲親陳賊勢。且聽老翁約束。故來。兩將答云。賊勢吾已詳聞。將帥離陣出來。則軍士將解散。無留見我。卽還去。整軍以待可也。旣而史遊擊。招通事密語云。吾不議於戴叅將。獨通于總兵官。請簡精兵三百。直到賊所。若報可則吾當馳進。汝國將帥亦極擇精銳。以待吾行嚮導可也。李贛終不得見。今曉還赴定州。而他餘諸將之分散者。如李鑑。李薦。邈。無形影。監司宋言。愼。以本道總率之官。亦由他路以去。時在定州者。手下無一軍卒。拱手相視。計無所出。自大駕西行。漸深。道路流民十五爲群。如失家之狗。無所係心。強者搶掠。弱者奔迸。數日之內。將盡爲亂民。所見悲慘。臣之昧慮。只有叩心推膺。求死不得已。臣路逢沔川鄉吏。自言持忠清監司。啓本欲達。行在。而間關水陸。足腫難行。臣令帶率下人有馬者。率去。馳送狀啓之事。雖未的知。而漢江以南。忠清全羅郡邑。尙皆完全。慶尙左右道郡邑。除賊所經過者外。皆爲我土。黃海道海州等邑。亦未蕩敗。北道關東依舊。而今幸。天兵來救。若將士協心。與之合力。似不至於無可奈何。但國綱蕩然。寇賊未至之處。守令爭先逃去。散失倉穀。傳聞江邊近處。如龜城等邑。亦已如此。唐兵雖來。事無可爲。臣從事官洪宗祿。曾在龜城。詳知其處之事。故事急未及。啓稟。從中路發送。使之馳去。曉諭人吏。堅守倉穀。以待調發云云。

所串驛陳運糧便宜及請咸從校生崔忠國等褒賞聳勸狀七月八日

臣昨日病甚不能遠行。艱到所串。今日待病勢少歇。將向良策。道路應行之事。已爲移文。再三知委。且令從事官辛慶晉先去料理。臣隨後點視計料。大抵自義州至定州糧料。雖百計措置。僅可支給四五千兵馬之食。萬一天兵多數。越江而盡出此路。則支持之事。極爲可慮。臣路中因下人。聞由義州至朔州。徑龜城泰川。出於博川。亦通行大路。而朔州龜城軍糧最優。如唐將必欲分路。則此一路可以指導。但山谷之民。猝聞唐兵至。不無驚懼逃散之弊。朝廷各別詳審利害。處置爲宜也。臣路逢咸從校生崔忠國鄭彥龍郭基崔繼漢等。以本處民情願聚軍討賊。爲此欲陳疏進。行在其意。可嘉。聞三縣等處已合之兵。數過萬餘云。人心如此。賊滅可期。但天衆已集。而節制無人。則恐難成功。甚爲可惜。亦須急急區處。忠國等亦當略施褒賞。以聳動人心云云。

請遣宰臣一人收拾平壤以東軍兵狀

平壤以東。成川祥原江東慈山順川殷山价川寧邊熙川雲山寧遠德川孟山等地。號令不通。守宰逃散。收拾之事。一刻爲急。使有智慮宰臣一人。不分晝夜馳去。召集軍兵。出於平壤之東。而大兵從北面蹙之。因及時傳諭于黃海江原京畿以南。使其隨處設伏。要截賊路。此最爲今日之大計。故敢此再達。

一路軍糧措置緣由及留定州調病前進狀七月十三日

七月初九日。同副承旨成貼有旨書狀。臣在定州。祇受唐兵支待糧料。自義州良策車輦林畔。各備五千人一日之糧。假家釜鼎柴草等物。略已措辦。定州則白米五十石。造米五十石。田米五百三十六石。從事官洪宗祿與府使尹承吉。從龜城同力措置。亦已輸到。此乃五千兵六日之糧。嘉山郡倉穀散失殆盡。軍糧則以定州所有。可推移資持。而馬豆則本州見在之數。僅千餘石。恐有不足之憂。安州糧穀多少。尙無來報。尤爲可慮。臣見近日陰雨連綿。處處川渠漲溢。萬一未易開霽。而許多兵馬。久留一處。則數少糧餉。繼備無路。極爲悶迫。三縣穀輪運於安州事。亦連續遣宣傳官及軍官督促。而時未知來泊與否。兩江船隻事。宣沙浦僉使張祐成。在大定江。粗合公私船。方造浮橋。老江僉使閔繼中。亦以公私船五十餘隻。造浮橋於晴川江。各已牒報來到。臣賤疾猶未少差。艱到定州。不得已留一二日。待歇前進于嘉山安州等處。檢察凡事計料。

馳

啓牙山糧船到泊緣由及發遣曹好益召募江東等處軍兵且請洪

世恭勿遞調度使仍舊察任狀

同

臣旣爲祇受書狀。後卽因忠清道進上陪去人所言。聞牙山倉白米一千二百石。已泊于定州立巖地。距定州三十里許。若乘潮回泊于安州。則一日可到。臣方以安州以後糧餉接濟爲憂。遠道許多糧船。如期適到。必是天贊國家中興之運。不勝喜幸。卽時發遣守門將康士雍及臣帶率軍官。使之馳去。令於明日

內到泊于安州。此船既到安州。則軍糧自爲可繼。而順安縣亦有馬豆一千餘石。人馬所需。皆無匱乏之憂。今大兵既集。賊勢宜蹙。正須多發軍兵。各處并進。以成掎角之勢。臣路中逢義禁府都事曹好益。自言前以朝廷之命。召募於江東等處。而平壤失守之後。人多渙散。且無上司公文。雖有願從者。未易聚會。臣卽爲文移。曉諭江東成川等處守令人民。使之具興應募。以赴國家之急。仍使曹好益。更去招集。若江東等地之兵。又頗收集。與三縣之兵。東西夾持。而分遣精卒。抄擊中和往來之賊。且與黃海道。形勢相連。則平壤之賊。如籠中之鳥。不難殲滅也。臣卽聞調度使洪世恭。以罪罷職云。世恭固不無稽緩失誤之罪。但今方在此察任。遞易之後。他人未及來到。恐事益稽緩。似當姑仍其任。事定後論罪。合於時宜。敢此煩稟。惶恐無地。

有

旨祇受及使洪世恭往安州催運糧餉狀

壬辰七月十日在定州

本月十一日。右副承旨成貼有旨書狀。臣在定州祇受江邊土兵及各官起送精兵。觀察使李元翼。兵使李養。太半領率。已在安州。惟元帥金命元。在此等候唐將。天兵今日已時。自林畔已到此處。明曉欲發向嘉山矣。兩江浮橋。十分嚴督。今已畢造。惟三縣倉穀。回泊安州之事。尙無回報。海道之事。慮難及期。適調度使洪世恭。始於昨日來到。因使洪世恭。先去安州。催促其餘。干係軍機事。則與金命元相議。區處計料。臣所患痔瘡。數日來加重。不能運身。欲待少歇。

進去嘉山而難可預期恐誤大事不勝憂悶。

天兵過安州事及預備牛酒犒餉 天兵狀七月十日

天兵本月十五日自嘉山曉發到安州不入城從晴川江直向肅川一路糧餉支供之事自安州以南尤甚蕩敗恐無以成形適宜傳官愼德容調發甌山咸從之穀八百二十石及調度使洪世恭調發熙川雲山博川寧邊价川等處之穀五百六十九石俱到安州唐兵過去後盡發州內見在民夫及除出戰用不關老殘軍及時負戴追及於肅川俵給軍糧後今方輸送順安者三百四十餘石足以支數日之糧其未足者陸續輸送牙山倉米三百石移載甌山船隻令回泊于三和廣梁龍岡三和等官米豆八百餘石并令回泊廣梁幸若 天兵收復平壤而渡江追躡則將以此穀接之第念 天兵出來後因事力窘竭尙未一舉犒軍之禮其於國體極爲未安萬一得成大功蕩平兇賊而還則宴慰犒賞之事當從優厚以答其勤臣與調度使等相議欲於平壤安州定州義州四處爲之所入雜物大槩參商則一處各酒千餘盆牛二十餘頭猪羊鷄狗從其所得措備各以近處郡邑并定預辦其中又定差使員使之次知檢察行移知委此事於國家事體關重且 天兵旣已救活我國百萬生靈之命則其所以報答者不容不盡雖有小弊有不暇顧况酒千餘盆不過米三十石以此計之則并定各官一處所出僅五六石而足可辦出惟牛隻則本道頗稀貴故慮

或難辦。令民間自願備納者。限年復戶免役。或他論賞。如此湊合。可以成禮。但義州則大駕所駐。其禮似當盛於他邑。宴餉。後唐將以下贈給禮幣。亦令該曹預爲磨鍊準備。使無臨時窘乏之患。

天兵進攻平壤不利。史遊擊戰死狀十八

昨日唐兵進勦倭賊。終日佇待吉語。忽聞先鋒史遊擊爲鐵丸所傷以死。唐兵連續退來。極爲驚駭之際。夜半祖總兵王參將立馬城外。招通事朴義儉語之曰。今日我軍入城。多殺倭寇。而不意史遊擊身死。我軍亦多死亡。俺等欲仍留更爲勦捕。而矢盡火炮亦盡。故不得已退軍。當與楊總兵更調兵馬。多數出來。傳語宰相撫定人心。勿爲搖動。津頭浮橋亦勿少動以待之。俺等遲不過三四日。當更來。本欲入城留宿。而此處糧餉不敷。故不爲入宿。今日當到定州。因馳去云。他餘事當隨後狀。啓此甚緊急消息。故敢此先爲馳啓。

處置青龍浦軍糧狀九月十日

唐兵退去緣由。臣已爲狀。啓勝敗兵家常事。况唐將不無輕敵之心。以至於此。極爲痛惋。三縣之穀。輸到青龍浦事。當初意唐兵直進過江。恐前途糧餉難繼。故有此處置。今則事勢如此。師期遲速。難可預期。故臣通文於金信元。使之量勢處之。以唐人所言觀之。則楊總兵之軍似當繼爲來到。自義州以南。糧料之需。亦應再加料理。然後可以支給。臣亦留此無益。更觀事勢。爲之進退計料。

天兵退駐控江亭緣由狀

今此天兵又不利於小醜。其爲痛憤。莫此爲甚。蓋緣我國近日之報。皆以倭賊欲退遁爲言。祖總兵以下。逐利輕進。倍道疾馳。馬病人疲。加以天時不齊。大雨泥濘。冒夜行師。頓之堅城之下。以其所短。乘其所長。其致敗衄。固不足恠。既退之後。又不與我國之人商議處置。而乘夜以行。過州府皆不入。雜於亂軍之中。徹曉不止。臣聞昨日。住控江亭。使從事官辛慶晉。馳去問安。則答以若知宰相在安州。可入見。而爲護史遊擊喪事過去云。因爲留宿於亭上。軍糧十餘駄。及支待饌物。顛倒追及。今日又因韓應寅所報。聞唐將欲退駐嘉山。而應寅令譯官語之。以當駐安州。則唐將持疑未決。揀閱軍士之有病者云。自昨日至今。大雨如注。控江亭乃是草野空濶之地。無一依庇。而許多兵馬。枕藉風雨。以至二日。極爲矜慘。唐將之意。欲更閱軍兵。且招楊總兵。多發兵馬而來。臣竊念卽今雨潦方深。開霽遲速。未可預期。而一路軍糧所儲。定州有龜城移米三四百石。牙山倉田稅米五百石。安州有牙山稅米七百餘石。此外郡邑所儲。大抵僅支一。二日。今唐兵所駐之處。非定州則安州。而安州自亂民作亂之後。器具蕩然。假家等事。雖方督令。而亦難如意。造作觀此事勢。祖總兵則當少駐定州。休息軍馬。而其病不堪用者。皆爲還送。楊總兵則或在江沿堡。或進駐義州。以俟雨霽。然後以次徐徐進發。使馬力不乏。軍鋒不疲。計出萬全可也。不然而輕

動不已。千萬之兵，遠復前來，處處留連，而雨不時霽，川渠漲溢，則進退狼狽。在我亦將何力。繼餉坐食之軍，至於多日乎。臣參詳事勢，計不知所出。爲之達曉吁嗟，謹此具由馳啓。朝廷各別從長處置，史遊擊之喪，在我當極優護，而送臣聞其將至，卽令州官備棺材祭物以待，而夜中過去，人不及知。棺則追送於途中，其他千總以下身死者，亦有數人。因我國之事，天朝將士，至於死亡，傷痛尤極，護喪路費銀兩及祭奠事，各別致厚施行。庶幾盡繾綣之意。祖總兵之言於辛慶晉者，亦如此。臣留此，別無所事。第念唐兵敗退之後，人心恐或搖動，姑爲仍留觀勢進退計料。

安州留住唐把總二人還歸狀

七月二日

昨日二更，唐人二名自嘉山來到，今曉留館把總孫榮、姜安等，率其所屬軍人百餘名，盡爲還去，莫知其由。臨去，出示總兵傳諭節度使李贇處小帖，故傳書輪上所云檢牌似無益於戰用，恐被責怒，令安州措辦四十餘箇，以示孫榮等。今此帖文內，又乞多造，處置極難。唐將舉止，不可料度，大抵恥其無功，而歸罪我人，以爲自護之計。傳聞之說，極多駭愕。國事不幸，每每如此，徒切悶歎。卽今潦雨已霽，道路方通，正當乘時勦賊之期，而聲援不接，衆心疑懼，前頭之事，有難期必。痛陳事情，更請援兵事。望朝廷商量處置。

措置軍糧以待 天兵再舉及發遣體探人分往黃海咸鏡道與移文雲

山郡守成大業等招集武士狀

近日唐兵出來與否漠然未聞。極爲悶鬱。臣時留安州。輸運各處之穀。定州安州已到者。米各二千石。馬豆各千餘石。足可支五六千兵旬月之糧。雖至於萬兵。數日之內。不至匱乏。若過此數。則誠有難支之憂。請兵多寡。出來遲速。預爲詳知。可無窘迫難辦之患。十七日接戰時。被傷唐兵。裹瘡曳足。自平壤出來者。連續不絕。令一路各官。盡心救療。其失馬徒行者。使之出牛馬載送。臣聞黃海道瑞興山城。多有各邑倉穀。且據險絕。若有數三人守之。則賊必不敢進攻。保守與否。未能的知。募得自願哨探者。義州驛子金克謨。咸從鄉吏金應龍。官奴丁守等。從問道往探。又移文于其處各官。授以邀截賊路之策。使之倡率吏卒。盡力殺賊。又募得安州僧二名。從孟山陽德山路。往探北道消息。而時未還。北路之賊。萬一與此處之賊相合。散出於陽孟之間。則勢甚可憂。臣連續移文于宋言慎。令申勅各官。極力把截。惟道內無一武士。可以定將者。前聞熙川等地。諸山避亂者多歸之。其中或多武士出身之人。故令雲山郡守成大業。評事李尙哲。魚川察訪邊以中等。分道招集。克期來會。并爲星火知委。今日李元翼。李贊等。方以大軍進戰。而三縣之兵。從西面同時并舉。人心齊憤。適又雨勢快晴。行師便利。幸以天意悔禍。殘寇掃蕩。平壤以南。可以鼓行無阻。秋禾方熟。糧餉之事。亦可隨處取辦。不勝佇望之至。

馳

啓順安軍進攻平壤狀

二日

當日舉事緣由。昨已馳啓。午初。李元翼自釜山院。馳送小錄內。平明進兵降福院。以先鋒挑戰。賊三十餘人。先出普通門。其餘列立城上。張旗幟云。俄到再通內。降福院。慈山路等處。引賊出來百餘名。其中一賊騎馬獨先馳去之際。我軍斥候遇賊發射。時方交戰云。申時又到三通內。引出倭賊入我軍伏兵中。殊死戰。倭先鋒精軍五十餘名中箭。二十餘名即僵仆而死。還爲奔北之際。有追來倭。分運直衝大陣中。大陣軍驚散退來。今方結陣于釜山院之西矣。將有大勝之勢。而竟至於此。痛甚。我軍今方點閱時。未知幾名死傷。其間曲折。自有本處狀啓。而大概先鋒突戰之賊。幾盡射卻。猝見直衝追來之賊。不能抵敵。驚散出來。而不至於潰退。將點軍更圖。緣由爲先馳啓。

查報軍糧見在數狀

天兵經過一路。各官糧儲。大抵皆蕩敗之餘。當初意其不能成形。近來諸處之穀。連續輸運。艱難湊合。足可支給。自義州賚糧。可到定州。自定州賚糧。可到安州。義州則本倉之穀。頗優。不足則昌朔二邑之穀。可以連續添補。定州安州。則悉以他處之穀輸運。前後唐兵已曾散給之外。總計今日見在之數。白造米田米并二千五百石。豆二千六百五十餘石。唐兵支給一日之糧。必用三升。以此計之。萬兵一日之糧。爲二百石。二千五百石。則當爲萬兵半月之糧。若五千兵。

則可支一月。豆一馬支給一斗。則二千六百餘石。亦萬馬三四日之料。此雖似不足。而龜城所儲亦當添補。安州站見在穀數。雜米并二千六百八十餘石。豆一千七百七十石。米數比定州稍優。而豆則似爲不足。然若未留連。則猶可支給。臣之愚意。賊勢方熾。而我軍形勢孤弱。人多懈戰。雖時時抄擊。少有所獲。而我軍死者過當。至於人民。逐日被死掠者。不計其數。萬一賊悉合醜類。散漫西下。則事之寒心。非可以一二計。前日天兵之敗。乃將帥失策。輕敵之致。非兵之罪也。卽今秋氣已高。馬足方健。若請數千精兵。與我軍先定約束。誘引出來。與之掎角。馳驅於平原曠野之中。則些少殘寇。可以立盡。此是何等大事。何等機會。雖有小弊。有不暇計。况見儲糧穀之數。不至於蕩然無計。朝廷各別處置。圖惟萬全長策。不勝懇望之至。

探報黃海道各處人民起兵討賊緣由狀

八月三日

臣前日所遣體探黃海道人金克謹等。昨夜始爲還來。備言黃海一道事情。且持遼安郡守韓守眞牒呈。及各處人民文狀以來。自車駕西巡。平壤陷沒之後。遠近民情。無所係屬。弱者從賊求生。强者乘時盜竊者。不知其數。而其中能私自招集。奮意殺賊者。間或有之。至爲可嘉。至於黃州之民。則欲尋覓閔仁伯去處。累度往來於祥原等處。而不得還去。及聞臣文移。悲感傳觀。各爲文狀。欲效勦賊之功。民情如此。滅賊無日。所患守令將帥之類。一皆抱頭鼠竄。無一人

倡率興起者。此輩之罪。可謂上通於天。極爲痛甚。傳聞閔仁伯。逃避于德泉等處。而近來始欲還官。已向成川判官鄭曄等。亦從三縣向去云。果登時到官。收集散亡。則猶可濟事。朝廷別爲區處。右人等。量加褒異。使有興起之心。其中崔銀老。則以年少出身之人。先倡聚軍。欲勦賊倭。號令頗行於其類。將來不無可望。臣所賚來空名告身。欲爲先付送黃州等處之民。聞天兵欲渡江。而朝廷憂糧餉之不繼。皆云新穀已出。若天兵果渡江。則處處衆民。家出戶輸。願爲接濟。惟望早爲蕩平。以活民生。到處涕泣言之云。極爲矜惻。前月二十八日。平壤接戰時。我軍死亡者。其數不少。今日所用精銳。惟是江邊健兒。而日漸銷耗。賊氣猶盛。未曾一挫。尤切痛憤。臣移文于江界。陣亡諸人家屬。并令恤典舉行。

急請

天兵討賊狀

月八

天兵支待糧穀。各處見在之數。已曾狀啓。請兵與否。及兵馬出來遲速。其他凡百動靜。漠然未得聞知。極爲悶鬱。安州密邇賊巢。意外之虞。不可不慮。各處輸到之穀。尙皆載船留泊。未得輸入官庫。其中如牙山稅米輸來之人。遠處漕運。在海累月。到此又留滯多時。日日呼訴。臣多般曉諭。每令姑待。或給糧料。使免飢餓。而秋氣漸高。薄衣之人。勢難強留。處置實難。卽見觀察使李元翼傳報。賊中形止。極爲叵測。而大概此賊。千里遠鬪。一未大挫。其鋒自入平壤。盤桓不進。其間必有奸計。兼且天兵與我兵。連次退北。江邊土兵。死傷日多。三縣之兵。

又復潰散。順安大將所統，不過數千。而無用者太半。至於元帥所住，則只有民軍一二百。他無繼援之兵。可助聲勢。脫或賊兵多集，分道散出。左右支撐。其勢極難。臣日夜憂念。不勝寒心。今此倭賊書契。臣意不可不速爲申報於中朝。又痛陳賊謀兇慘。須及其未集之前。而爲協力掃蕩之計。然後可無後虞。若是則唐將亦必聽許。而庶無緩不及事之悔。

料理軍糧狀

八月九日

本月十九日。左承旨成貼有旨書狀。臣在安州祇受。各處郡邑倉穀板蕩之餘。大兵遽出調度之事。百計無策。前於五千兵馬支給之需。破東補西。移彼就此。僅得成形。固已殫竭心思。不遺餘力。而天兵退還。再調兵馬。直出於萬萬意外。罔知所措。一路糧穀。見在之數。大概略具於昨日狀啓。定州用餘時留在者。龜城來田米三百餘石。牙山田稅全五百石。以平石通計。則合爲一千五百餘石。乃是萬兵五日之糧。安州則時存牙山稅米七百石。移轉米用餘二百石。三和龍岡田造米并一千餘石。載船已久。而中間令回泊于廣梁。唐兵退來之後。又令移泊于安州。故時未來到。方爲催促。若無事到泊。則此所儲。幾至二千餘石。雖萬兵出來。足可支十餘日。此外如嘉山宣川龍川鐵山所儲。僅可支三四千名一日之糧。而更無措辦之路。以此參酌。後運出來之軍。若至於一萬之多。則誠無可繼之策。至於馬料。則每一匹支給一斗。所入十倍於人糧。辦出尤

爲無策。雖欲以唐黍粟稷雜物充給。而唐人例不喜受。且雜穀亦所難繼。尤爲
閔迫。安州時留在馬豆一千石。定州有一千石。宣川亦有千石。義州則本倉及
所串定遠倉所儲。最優於他邑。幾至萬六七千石。此外傍邑見在之數。龜城龍
岡。皆有一萬餘石。三和江西。皆有六七千石。如可登時取用。則可以接濟。而龜
城距定州雖一日程。山路險遠。近日各官散輸之數。合米豆已過千石。人力已
盡。今欲連續繼輸。而恐難如意。惟三和龍岡船路相通。似可優輸。而海潮風汛。
順逆不齊。難定期限。至爲閔慮。且軍糧每人當用二升。而當初過於優厚。日支
三升。傳聞唐兵不能盡食。多以餘米。換買他物。云亦當舉實裁損。以爲可繼之
路。臣當此大事。計拙心耗。恐乏軍興。晝夜憂悶。自該司凡生財足食之策。別爲
講究。急速施行。

請以李賢爲召募官。送于黃海道狀

八月九日

賊勢益熾。傳聞黃海沿路。處處皆作土城木柵。屯兵以守。招集人民。以爲久留
之計。而守令則逃竄山谷。將帥則玩寇不戰。望其自退。臣誠痛心。猶有一分可
望者。民心頗奮。往往各自團聚。爲勦捕之計。云。苟能激勵興發。并起齊舉。如報
私讎。則滅賊庶幾有期。臣觀近日之事。民兵愛護鄉里。隨處勦賊者。稍有所獲。
名爲將帥。而屯兵結陣。則賊至皆成奔潰。如廣州之民。初相結約。設伏射賊。賊
不近境。及邊彥瑋爲將屯兵。少遇零賊。一時皆散。而廣州因以不守。加平之人。

亦頗團結捍賊。而趙儼邊應星申彭壽等合軍二千餘人。不發一矢。又皆潰散。加平亦不守。蓋將不得人。而兵皆烏合。賊至無意鏖戰。引軍逃走。其間雖有勇悍之士。不能獨戰。相率俱去。如此而望其平賊。不亦難乎。臣又伏念。古人云。羗易以計破。難用兵碎。今此賊亦然。當因勢乘便。設奇取之。菱鐵最關於戰用。其於夜擊尤便。患無用之者耳。臣於安州。打造二千餘箇。又令近邑。方造萬餘箇。欲分送於各道。只慮無可使者。適白川人宣傳官李賢。來此自言。已與傍邑武士。結約勤賊。已合數百餘人。且哨探開城興義平山江陰等地。賊之動靜。頗詳知。而以復命事。將向行。在云。臣親與言說。其志可取。敢望朝廷。借此人以召募之。號急。速還送于本處。使成其計。甚爲便當。并下諭于觀察使。如此人等。別加獎勵。俾令同心戮力。各自奮起。勤滅醜賊。其有捕斬而得其財物者。勿論多少。輒與其人。又卽論賞。使有興起之心。

馳

啓我軍與賊接戰事狀

壬辰八月十一日

昨日辰末。李元翼傳通內。左遊擊朴錫命。馳人進告內。倭賊或云二十餘名。或云四十餘名。後運則不得的知。釜山院向來出送伏兵等接戰云云。故繼援軍。鱗次入送。再通內。左斥候將金應城。馳報內。諸將等。并爲追逐。至咸福院。碧潼土兵孔玉柱進告內。彼賊先鋒三十餘名。投劍又捨銃。箭曰。我輩欲向我地。汝等亦捨弓矢。來聽我言云。而我軍無數發射。直進賊所。則賊兵次次遁背云。故

繼援軍全數入送。大軍亦前進計料。三通內。三領伏兵將李元馳告內。我軍搏擊。則彼賊退屯種松處。四通內。右部將馳人進告內。倭賊等遁還入城。未及追捕云云。故其辭緣。爲先馳啓。昨日斬馘二級。并爲監封上送。

馳

啓我軍進戰得捷軍物輸送狀

八月十日

昨日狀啓後。續承所通。皆是接戰節次。而賊倭兩路突出。無數放砲之由。已悉於李元翼狀啓矣。其後更通內。終日酣戰。日暮時罷戰。明日又進。是計倭奴多數死傷。我軍中丸及死者。當隨後抄報。姑以所見記之。中丸不至重傷者。二十七名。死者數名云云。臣軍官權混等馳告內。酉時罷戰。我軍還到釜山院結陣。而自始戰以來。我軍力戰得捷。莫若今日云云。彼我所傷。雖未及細知。而大概得捷分明。姑爲慰幸。臣所領軍物。三更初一運。未明時一運輸送。

馳

啓黃州牧使金進壽捕賊緣由及速請天兵狀

當日曉狀啓大概。沈遊擊往來釜山院。與倭人接話辭緣。及黃州牧使金進壽。二十三日。自鳳山來。賊六百餘名內。捕斬倭將二卒。倭一。奪馬五十餘匹。卜物亦爲數多之由矣。平行長答書及遊擊問答小錄。親監後還送次。監封輸送同決尾云。遊擊自釜山下。來曲折及問答之語。更問得實。緣由不爲并錄云云。似是唐人再送後。未見其報而還。今觀李元翼所通。則尙無速進之意。講解倭兵。難保必成。金進壽斬殺如此。雖可慰喜。生入之賊。亦必數多。考其日時。則似是

中和已報之賊。而前頭之事。亦爲可慮。天兵速請之舉。朝廷更加措置。賊倭則連日如前出現。卽爲還入。

有旨。祗受糧穀分付處。置後發還狀。壬辰八月

今月初九日。右承旨成貼有旨書狀。十一日。都承旨成貼有旨書狀。臣在安州。祗受臣來此。已近一月。糧餉一事。檢舉輪轉之外。別無旬當緊關之務。自前月唐兵退去之後。卽欲還赴行在。而或慮人心騷動。且諸處輸來米豆數千餘石。不敢輸入官庫。皆留泊江中。萬一有意外倉卒之虞。欲爲臨時處置。遲留至今。安州以北各邑。則臣所親往檢勅。諸事粗各整辦。而惟他處輸來之米。或久陳。或羶惡。不敢支給唐兵。從事官洪宗祿。時方往來看點。使之吹正。精春肅川順安。則初以近賊所之故。不欲預聚糧穀。至今未得多運。今聞唐兵出來之後。始令於三和龍岡等邑。急輸米豆一千六百石。分置于肅川順安。但此等之邑。民丁盡在行陣。老弱多竄山谷。許多之穀。恐未得及時齊到。而從事官辛慶晉。自十餘日來。重得痼疾。專未運身奔走檢勅。無人可使。不得已遣臣軍官往督。且以大將從事官金信元。時在三縣。故使之檢察各邑。及時輸運。可無稽緩不及之弊。臣更爲移文諸處。措授後明日發還計料。

懲毖錄卷之六終

懲毖錄卷之七

辰巳錄

馳 啓北道聲息且請取來南方箭竹以備戰用狀

臣欲詳知北道聲息而患無哨探之人以山谷道路僧人所熟知募得僧人十二名分六運次發送今日先去僧靈俊及軍官數人自北還來略言北道事情云橫城倉則黃燦聚軍一百五十餘名有旅首金無敵者導僧同行至咸興白土峴路阻不達而回有定平品官及衙前都訓導等十餘人露聚山谷之間見僧所持公文爭問車駕所在皆爲涕泣自言定平無府使若新府使來到則遺民多欲相聚討賊又言近日賊乘小船向永興爲村民所邀殺幾二十餘名高原人遇賊三名射殺二賊一賊脫去招引其類來殺村民七十餘人以故民皆畏懼深藏弓矢不敢發射賊令村民每戶納白米一斗田米則一斗五升既納則與佩賊牌不佩之民遇賊輒死故民之佩持賊牌者比比有之監司柳永立隱匿於咸興白雲山其女壻及判官則并其家屬散伏諸處我民潛引賊兵圍抱皆被陷沒囚在倉中賊之在咸興者二百餘名有賊籠鷹子八連載馬向鐵嶺還來留在之賊見其賊聞其言相與呼哭有村民之納米者問其由賊不答但云近日吾輩劒鐔生澁此不祥之兆我輩恐死又於城中屯聚處皆

作土室木柵云。此則僧非親見。其得於村民者如此。賊兵所到之處。無人傳說。或云已到利城端川。或云已入北道。而三水甲山。亦皆爲賊所陷云云。大略如此。其詳當待後運體探人可知。而巡察使宋言慎。必已狀啓矣。臣竊念賊勢滔天。日益熾張。此當以計取之。若以烏合之卒。浪戰不已。取敗無疑。今日爲將者。率多庸才。全無計策。今賊兵怠惰已甚。我民出入無間。此其可乘之機。不一而足。苟能暫設方略。詎知動靜。內外相應。如疾雷不及掩耳。則一夜之間。殲賊必多。一挫之後。隨處抄擊。破竹之勢。迎刃自解。今之爲將者。徒觀目前。全不念及於遠圖。如北道之賊。無人呵禁。已踰數月。窟穴漸成。歸附日衆。不及今早爲之計。恐有難圖之患。且聞頃日北道來報。賊變人金順乞。金世武。姜克成等。臣卽送空名告身。使之傳給。以勸其後。今聞黃璨。以不告於己。而擅自來報。以得賞職爲非。皆爲決杖。順乞等退縮不出。而欲來者還止云。璨之處置。乖刺如此。不勝恠歎。臣又有所慮。不敢不達。觀此事勢。賊雖平復。難在時月之內。而遠近諸處。弓箭蕩然。此處則收合江邊遺在者。雖時未乏絕。而有難繼之憂。至如黃海江原咸鏡道。則兵民皆持空拳。何事可爲。臣初到此。聞寧邊有箭竹散失之餘。只有三百餘部。令評事李尙哲。督造長片箭。又逢全羅道體察使鄭澈之行。相議俾於到界之初。卽載送箭竹。猶恐其稽緩。又行移于金信元。令發三縣之船。數隻。往忠清道海島箭竹所產處。刈取滿載。以來此乃急切之務。措備不可不

急若自朝廷別遣一人登時取來分送諸邑多造數萬餘部散于各道以爲禦賊之用尤爲便益。

馳 啓見沈遊擊論事狀

沈遊擊昨日夕時自嘉山來宿于此今早發向肅川臣預送軍官問安于中路到館後卽親詣候之則答以多謝且云路中只著行衣不便相見臣令譯官更通曰我以國命檢勅一路糧餉老翁無乃有分付之事乎答云雖行衣未安相見無妨臣入行禮後遊擊令設交椅自移其椅來就臣所坐幾於接膝云吾武人不閑禮貌勿咎因辟左右細問軍兵幾何糧料儲備幾何臣答以軍兵有管領之員非所管然大概則可知遂言順安及三縣暨李鎰軍數又言諸道處處起軍勦賊之事糧料則粗備萬餘兵十餘日之糧今秋穀已熟方百計措辦答曰此處之軍恆怯善走吾當往彼親見其可用與否臣對以向來天兵亦非不足而適天雨失利今若天兵更出則蕩平非難此小邦日夜之望不然遲緩時日賊若集諸道之散出者合勢西來則恐有難支之患遊擊曰前日將官之罪不可勝言臣曰乃天時不齊而非將官之罪遊擊曰旣誤軍機且誣言朝鮮與倭同反安有如此之事乎其將二人皆當死臣答曰小邦之事天日在上不須多說蒙老翁軫念如此不勝感激此外所說煩多而不能盡達同來譯官言遊擊來時小駐控江亭有一擺撥兒自順安來遊擊問我軍形止其人對

云以朝鮮兵力無平賊之望其屯住順安不爲退北者亦爲多幸云云大概我軍今日之勢極爲孤弱每日惟向釜山院往來而已更無他策賊安居飽食以逸待勞寧有自退之理乎臣日夜憂悶不知所出適湖城監之軍自遠來到頗慰軍情與之掎角稍可濟急而湖城監以肅拜事留軍三和獨向行在朝廷急速發還使統其軍前進平壤之賊專備西北不備東南在我不無可乘之便而近日我軍每出一道不爲設奇乍進乍退終無望於挫其大勢極爲可慮其他糧料等事隨勢措置從後馳啓計料但賊兵未退警報相續郡縣人民皆無固志事事渙散難集尤爲憂悶

沈遊擊過去後有旨祇受狀

沈遊擊過去緣由臣已爲狀啓未及發送伏承具歲賚來有旨具審下諭之意今日馳還肅川與都元帥金命元相議處置計料兵無多寡精鍊則可用戰無常勢乘機則可勝我兵與賊相持已五月餘兵猶未鍊機又屢失至於器械諸具一皆未備今日之事寒心者非一然惟坐而待亡孰與伐之故邇來將士頗願一戰而唐將之來適當此時處置之間妨碍牽制恐不得自由極爲悶慮

馳啓沈遊擊馮相所言狀

譯官秦孝男言內沈遊擊到釜山院與倭通事張大膳相話後到順安語孝男

曰。倭將欲與國王相見。後講和之事。張通事言之。此則決不可爲也。孝男曰。老爺之言。正當正當。且老爺入城。賊若攔住老爺。使我國兵馬不得下手。天兵亦不進攻。則何以處之。遊擊曰。我奉朝廷之命。入去虎穴。死生有命。且大朝豈以我一身之故。不加兵乎。遊擊且招馮謝兩相公問曰。我入城後。賊將以欲見國王。講和爲辭。則將何以答之。馮公默然良久曰。朝鮮雖臣。伏於大朝。而彼國各有君臣。此事我豈敢開口乎。且雖開口。朝鮮君臣。其肯來見爾乎。此則爾以難事爲辭。實不欲與。天朝講和也。以此答之。何難云。臣聞此言。不勝驚駭。要見謝相公語及此事。謝曰。遊擊入城。當以彼國各有君臣。我豈得主張。且爾欲見國王。做甚麼等語。折之。臣以進兵勦滅之外。更無他策之意。反覆陳說。謝曰。天朝豈有與賊講和之理。各處兵馬調發之際。自致遲緩。今當來矣。勿疑勿疑云云。二十五日。沈遊擊拜見時。欲反覆開陳。而遊擊只說數句語。更不相接。逐日乘昏要見。而遊擊不肯相見。至爲悶鬱。當日午時。遊擊欲入平壤云矣。

乞東宮移駐江華以通南方形勢狀壬辰

見本集

有旨祇受後馳報賊情及北道賊勢狀壬辰八月

本月十一日都承旨成貼有旨書狀。天兵近當更爲前進。非但接應事重。

亦慮粗定人心。更或搖動。卿其姑留鎮定。更加措置事有旨。臣到嘉山。祗受。臣留此一二日。檢勅定州。以北接應之事。欲還向安州。臣受命。措備糧餉。他餘利害。非臣所管。而憂慮之極。未免妄陳所懷。卽今賊勢猖獗益甚。本道之事十分危迫。平壤之賊。旣無退歸之期。而我軍敢戰之士。死亡日多。至於三縣。乃一道根本。軍糧所資。且通於黃海。京畿及下三道者。皆由此路。若三縣不保。則順安雖有十萬之師。而不可仍駐。賊之散渙。西出者。將不可禦矣。側聞三縣之軍前後死傷者。不知其數。僵屍如麻。民心震懼。而昨日有鳳山校生姜遇獵。見臣于安州。言賊兵自他處更聚于黃州者。其數甚多云。不無合勢之憂。十六日之戰。我軍進迫平壤。而賊兵之數。多於前日云。且傳者言大同江。賊新造船隻頗多。纔聞我軍將進。必招集醜類于遠近。爲添兵拒戰之計。萬一分道并出。乘我困怠。直擣空虛。則將何以支吾。其爲寒心。不可勝言。今日之勢。平壤未復。則中興之望。邈無其期矣。加以各處軍器蕩然。當初艱運江邊弓箭。輸到於順安。肅川者亦多。而數番之戰。幾盡散射。安州留在長片箭。只各一千餘部。又漸取去。將不日匱竭。更何以繼之耶。此皆切迫之憂矣。唐兵雖有先聲。而尙不前來。往來擺撥兒者。臣觀其氣色。多有畏怯縮忸之狀。沿途徐行。到處遲滯。凡兵以氣用以勢勝。若此者。殊甚可慮。大概近日遠近民心頗奮。將土用命。所患者無一將才。極爲痛悶。軍糧則見儲之數外。知委各官。使之漸收秋租。而今年道內

各色貢物及內需司各司奴婢身貢皆令作米稍減其數使公私兩便庶幾軍儲不竭并令該司早爲量處北道體探僧人覺慧等又以高原郡守邊潤牒呈及定平人燕應國等五人永興貢生李汝諒等文狀來到因言其道之事云高原郡守邊潤隱匿郡地賊尋來圍抱潤僅以身免有一民以木弓射賊三人即死餘賊叩頭求哀之際又欲射之而弓折賊因突進搜索山中避亂之人盡皆屠戮死者數千其他處處男女枕籍而死者不知其數賊分處設伏見人輒殺人民皆隱避深谷不能出野餓死者亦多其遺民逢此僧見公文無不涕泣皆言苦待官軍來活我輩云而民之壯健者雖往往欲射賊而無一人持弓矢者計無所出云又言賊兵已到鏡城爲北兵使所敗王子時住會寧事村民傳說而未能力其虛實矣

馳

啓沈遊擊行止及糧穀分付狀

九月二日
在安州

沈遊擊近日在順安與倭相見問答之事都元帥狀啓必已詳盡矣當初遊擊到此所言則欲往筍於肅川安州之間今見先文直指義順未知何故大概遊擊之意似出於講解息兵之計夷狄無信兇狡萬端苟其兵勢未挫豈能以片言單辭戢其凶鋒况我軍疲頓單弱日望天兵之來救而遷延時月屢退師期前頭之事極爲寒心朝廷急速深思善處俾無緩不及事之悔一路支持糧餉則前日措置之數外移文各官使之隨便稍稍收合秋租各儲本官而威

從縣民則自願納米以補軍需其數至於二百石臣卽給空名告身以勸其餘而惟賊兵未退人無固志故公私蓄積未得悉意經理安州江船所載諸處運米未能收入官庫泊在江面許多格軍等離家累月乞糧度日呼訴不已極爲難處今見黃海道觀察使柳永慶牒報內忠清道田稅米二千二百四十九石黃豆四千九十八石分載二十船來到康翎地唐兵出來之數未能的知幾石留置本道幾石送于平安道事牒呈唐兵出來日期軍數多寡時未得知而黃海沿海賊倭出沒無常萬一留泊淺浦未易運船之際賊兵來泊則亦恐有意外闕失之虞并令該司參商事勢急速區處或分半留泊于遠賊之處分半輸到于行朝似爲便當。

馳報沈遊擊與倭問答狀

見本集

呈稟沈遊擊指意後分付各陣狀壬辰九月

昨日天將釜山院去來之由當日曉馳啓後平明時進去遊擊下處問安仍呈小書書中大略以老翁約定地界寬立五十日之限者無非虛設故緩行計之地而悶迫之情亦未免有所疑焉自今五十日乃十一月二十日對壘殘卒能堪露處而逃竄之民亦免凍死乎凶狡之賊爲謀百出刈草之外兼刈禾穀其可束手坐視而已耶論以焚蕩之例雖在界內提兵馳逐何如謀聚散在

之賊合勢于城中。則凶鋒所措。不可不策應。若至斬殺。亦加違約之責乎。此等曲折。十分商量。便賜一言之決。仍并令秦孝男。詳細措辭。而臣則先出戰所。以待本府人民等。又如昨日入府時。遮道號訴。則遊擊似爲慙惻。以言慰諭。而過及到臣所在處。馳去不入。只遣孝男回答曰。今日當到嘉山。行忙路遠。茲負厚意。所示曲折。足知懇迫之情。俺之處此。更無他意。五十日之限。已定難動。其間若無大段之事。雖刈禾穀。不必強爲捕斬。而知已知彼。乃兵家上策。如有可乘之機。力或有餘。則雖致大捷。有何不可。俺計已在掃蕩云云之意。保無可疑。惟在量勢。母或時刻忘戰。俺還當在二十一二日間云。當初措意。固已如此。而傍觀之人。未及詳知。或疑其見賣於講和。彼此相疑矣。今聞此言。尤有所據。可破遠近之疑慮。設使不卽來援。無碍在我之進退。卽將此意。移文于戰所。及左右防禦使處。使之更與相議。量界進陣。以試賊情。且俟其便。而黃海京畿等道。則已於李德淳之還。別爲密關。使之遍諭諸將。毋撓於講和之言。益勵勤王之志。各自奮勇。次第前進事。丁寧分付以送矣。

馳 啓賊形勢狀

唐兵出來時。無定報。傳聞二十日間。或晦間出來。擺撥兒數十名。以探候賊形事。方在順安。往來報變。賊倭近日。連出平壤城外。四散搶掠。見我軍來。輒奔避入城。其氣頓衰。而黃州中和之賊。亦聞盡捲還歸。雖其賊謀難測。而大概似欲

還尋歸路。若能處處設伏。邀遮勦捕。則中興之期。似亦不遠。

請差出朝臣一人。句管江華糧穀狀。

壬辰九月

臣前因朴忠侃聞忠清等處田稅米豆七千餘石。留泊江華。忠侃來時。言于掌令鄭姬藩。使之看護。臣今到肅川。適姬藩自江華來到。言其船尚在江華。不少軍糧。若無句當管攝之人。恐或有闕失飄散之憂。臣聞宰相朝官。時方留在江華者甚多。而前頭調度之任。亦甚關重。朝廷別差一人。急急下諭。使之管理。且以措置糧餉之事。尤爲便益。

請收學田寺位海澤田稅。以補軍餉。且多造火車。以備戰用。狀。

壬辰九月十四日

臣觀今日之勢。一向危迫。所恃者惟唐兵。而唐兵之來。又無期限。看其唐將處置。未必不出於講解之計。狡猾倭奴。非可以約誓戢其凶鋒。且天時已寒。士卒暴露凍餒。銳氣先衰。萬一賊聚類西下。事極寒心。朝廷請兵之後。及沈遊擊渡江後。未知消息如何。日夜憂慮。糧餉則前日所備。粗可以支給萬兵。若三四萬出來。則亦不可以此繼餉。似當別樣措置。更備二三萬兵之食。然後可無匱乏之憂。而郡邑倉庫。一樣蕩竭。無計推移。道內學田書院諸寺位田及諸宮折受海澤田等。今年姑令各官推尋收入。可得數千餘石。可補一隅之用。亦令該司急速商量施行。且兵家之要。莫先於精利器械。我國惟恃弓矢。數百步之外。不能禦鐵丸。數步之內。不能敵短兵。以故動輒敗北。其勢然也。近日唐將往來。

時亦言我軍全無器械。爲之恠歎云。其實我國非無器械。持有之而不用耳。臣竊觀火車之制。極爲便利。誠制勝之妙器。而安州所在。只二十兩。寧邊則但二兩。而古制頗不適宜。臣略加增損。修繕運轉。甚易。每車載勝字銃箭十五箇。試令合放。則亂丸如雨。聲振山野。所當之處。人不得立。若加造百餘兩。四面排陣。間以射手。徐行直進。則賊兵雖多。似難來犯。此意。臣已通於都元帥巡察使。其意亦欲用之。故臣時方聚會匠人。修造。而但車數不足。聞義州所儲火車。其數最多。急時收出。一依新樣造作。勝字銃箭。如不足。則以宙吳字皮翎箭。相間編之。亦可用也。臣聞有蘇忠漢者。頗解此術。而時在義州。又火炮匠金繼守等。以京破陣軍。亦在義州云。急速發送軍前。以備戰用。允爲便益。臣職事之外。不當瀆陳。而事係闕迫。敢此妄發。惶恐無地。

馳

啓驛路之弊。且請修葺山城。以爲保守狀。壬辰九月十四日

臣於一路之事。雖非職掌。而利害所關。不得不達。近日各驛凋弊已甚。事變以後。尤極板蕩。驛卒幾盡逃亡。驛馬之時存者。每驛多不過數匹。而一應邊報。及將士往來。進上使命。聯絡晝夜不絕。鞭捶督責。人不堪命。至於朝士之避亂出入。亦必依托公行。無不乘駟。責出驛騎。不足則加以刷馬。越站馳驅。動經時日。或因若己物。累日不還。今則驛路日益蕩敗。無路支持。雖有緊急聲息。將不得趁時傳報。極爲寒心。常時畿甸一路。少遇凶歉。朝廷亦爲軫慮。區處一禁乘

騶以蘇驛路今八方之役俱聚於一路而事勢緊急百倍於凶歎令該司急速處置臣嘗觀東國史凡有兵亂必修葺山城聚民入保積粟其中以爲據守之計故雖寇賊充斥而一道之中尙多完全之邑近日則全不致意於此等事雖有天險之地皆棄而不守盡以倉穀軍器與賊而民皆奔竄山谷束手被其屠戮良可於悒今平壤之賊近在一二息之外而各官方督捧秋糶脫有意外之虞又將有齎盜之患竊聞道內山城如永柔龍岡慈山皆險絕可守而安州以北各官如郭山龜城等處皆有山城若令其邑還上姑捧於山城以存遠慮有急則率民入保亦爲便宜并令朝廷商量急急區處不特此道如黃海道瑞興等地及他道可守處一體知委施行實爲今日之急務

請修葺山城清野入保且移置海邊列邑之穀於宣川木彌島以備不虞
狀壬辰九月

臣前於狀啓略達山城之事蓋出於不得已蓋賊兵千里遠來已經半年豈能自爲齎糧其實皆因糧於我耳設使平壤無積粟雖有百丈之城賊安得以堅據乎今賊兵久不出自秋深始有合類西下之狀安知其兇計又欲待我秋穀已收公私蓄積粗實然後更爲鼓行之謀乎兵家禦賊之策必以清野爲上而我國不知出此傳聞京畿等地滿野禾穀盡輸於賊處處皆然而平壤四面數十里內已熟之穀皆未收穫賊逐日掠取者不知其幾肆意滿載而去設使

村民離散。不時收入。而軍民猶可設伏於賊路。合力刈取。則其爲齋盜。不至如是之甚。誠可痛惜。然此猶其小小者耳。各官距平壤至近之地。如順安。肅川。及三縣。安州以北。時方督捧還上。稍稍皆入於官庫。而求其捍禦保守之具。則無一處可恃。萬一不幸。而又有意外之變。如前日之爲。則是使賊氣愈飽。而長驅之勢。更不可止。極爲寒心。臣之愚意。急擇道內山城堅固處。聚本邑及近邑之穀。與其人民。別定驍將。爲堅守之計。其無城子處。亦當移穀近海。或於海島可藏處。姑作假庫儲穀。而臨時取用。既備不虞之患。且困賊勢。此今日至急之務也。臣聞宣川木彌島。距陸不甚遠。島內廣濶。且有山寺云。若使此島在南方。則當設鎮守之。而特西方不備海道。故但爲牧場。如海邊各處之穀。亦當移置此處。有急則使民入保。賊退則以舟輸出。可以兩便。竊念今日事勢危迫如此。苟有一端可行之策。皆當急急行之。不可以事勢已急。而莫爲之所。故不憚煩複。至於屢瀆。惶恐無地。

馳 啓糧餉措置狀九月

唐兵出來日期。時未的知。一路支持糧餉。定州安州輪運。措備米豆。及其餘郡邑。僅備萬餘兵馬。一二日之糧。脫或天兵數萬。多數出來。則必有不足之憂。但今秋穀方熟。零碎收合。似不至於難繼。平壤之賊。必須速爲蕩平。然後黃海以南。可以鼓行驅逐。傳聞賊兵。大半還歸黃州等地。亦無留兵云。而但近日倭

賊於順安近處永柔等境。日日焚蕩。閭閻賊謀難測。殊甚可憂。然此賊孤軍深入。已經累月。散出探掠。其氣亦老。苟能糾率軍兵。隨處設伏。乘機抄擊。其勢自衰。而各處將帥守令。一向畏縮。不敢向前。尙使殘寇肆毒。生靈塗地。誠可痛心。今秋風漸高。弓力方勁。馬足亦健。日望天兵之來。以見蕩平之期。

條陳四方形止處置失宜狀月十

天未悔禍。賊勢猶熾。臣誠痛心。近日因往來之言。時聞四方形止。其間人謀不臧。處置失宜者。亦多有之。不得不達。伏望留神焉。

一曰聚兵自衛之弊。昔唐時監軍。悉聚軍中。精勇之士。名爲牙兵。臨陣不戰。而軍敗則先遁。河朔終以不振。今聞京畿等處。巡察使及守令等。盡聚道內精軍。自隨其身。或令分衛家屬。平時出入各官。貽弊多端。而避賊潛行。未嘗一戰。纔聞賊報。不問多少。輒棄軍先遁。如廣州水原加平高陽等地之民。初猶團結。設伏捕賊。而今則盡皆散赴各處。不能禦賊。官舍閭閻。次第殘破。誠可痛心。今宜下書警策。毋使更踵前失。且京畿一道。諸將之中。惟楊州牧使高彥伯。稍可倚仗。自楊州永平加平抱川之軍。皆使彥伯統之。俾令督捕京城以東之賊。又令全羅兵及兩湖義兵。糾合高陽交河等處之兵。勤輔京城以西之賊。以成掎角之勢。又使果川廣州金浦通津仁川富平南陽水原等邑之軍。統於一將。皆各精抄射。各於其地分屯。設

伏嚴加瞭望。賊至則互相通報。登時勦擊。且以遮遏南面。使不得南下。仍使忠清全羅道爲繼援。若是則京城之賊其勢日縮。而恢復之形已成矣。且江原一道山林險阻。樹木深昧。往往有百二之險。道內雖云軍丁鮮少。而山谷之間。以射獵爲生。名爲山尺者甚多。苟能以重賞購之。授以方略。哨探賊兵去來。處處要擊射殺。則賊必斂縮。不敢恣意橫行。而今乃畏避先逃。如恐不及。使之如蹈無人之地。亦以此意。下書于監司施行。民間如有殺賊者。其所得財物。悉以與之。官不得推。人不得奪。則人人必力於殺賊矣。

一 修築山城。督民入保。此最爲急務。近日遠近避亂之人。率皆奔竄山谷。無所棲泊。糜粉寇手者。日以千萬數。安有如此慘痛之事乎。若使之入處山城。而聚軍守之。則賊兵雖散漫四出。而人情有所憑恃。不至崩潰。且一道之中。多有完城。賊來則據險力戰。賊退則乘勢追躡。賊必不敢肆意攻剽矣。蓋自東萊釜山陷城之後。人以守城爲必死之道。莫肯守之。故賊如蹈無人之地。今則全州延安。皆以據守得全。故人頗知守城之利。若乘此際。有所區處。則人必信從。而事可有濟矣。况秋候日寒。而賊兵未退。林藪木落之後。何處藏避。宜令該司。急速知委。舉行以救萬一。

一 今日八道之中。尤甚板蕩處。北道江原京畿黃海道。而京畿黃海道。則猶

有倡義討賊之人。至於北道江原道。則民心敗毀。幾不知有國。極爲駭愕。今宜急急收拾。大抵江原道山林最爲深險。往往人所不能通行。道內軍卒雖少。而山谷之間。擊殺猛獸。名爲山尺者。其類甚多。若處處購募。設伏於要害。隨見輒射。則賊必不敢近境。而監司守令。只以遇賊奔避爲心。一不規畫。使之崩潰。令北道江原道全爲賊藪。而與京畿之賊連勢。且與慶尙道海邊。只隔一嶺。若諸處皆無追捕之人。則一朴晉雖在慶尙道。其能禦之乎。如不能禦。則八方無地爲我國矣。事之危迫。至於如此。可爲痛心。北道則賊勢彌漫。固不可趁時收取。江原京畿道之事。所當及時區處。臣請言京畿形勢。自楊州積城抱川永平加平等邑之軍。統於一將。遮蔽京城以東。江華喬桐高陽交河長湍坡州等邑之軍。統於一將。遮遏京城以西。廣州果川衿川安山水原南陽等邑之軍。又統於一將。遮遏南方。三面合勢。約束相通。號令歸一。氣勢聯絡。且與諸處義兵同心戮力。以圖濟事。臣觀今日京畿諸將中。惟高彥伯最爲可任。東邊之軍。一委於彥伯。其在西南之將。亦惟朝廷所擇耳。如是然後。江原道之軍。與京畿東道之軍。合勢。崔遠金千鎰之軍。與西道之軍。合勢。忠清道軍及義兵洪季男等軍。與廣州等邑之軍。合勢。三面掎角。相機進取。先抄精軍。分道出奇。散出之。賊次第勤盡。則賊之在城中者。氣勢日縮。而京城我民。必有內應相圖者。

矣。京畿巡察使權徵處事乖當，人情憤鬱。朝廷更寄以巡察之任，徵不思討賊，專收道內丁壯，稱爲牙兵軍官，自衛其身及其家屬，賊退則出入官邑，責辦厨傳，以爲民弊。賊至則數十里之外，散軍逃去。且如高彥伯等，雖欲盡力捕賊，而不肯分與精勇。至於委邊彥琇以大軍，而廣州陷沒。委趙儼以衆兵，而加平失守。臣不知國家今日之勢，能堪幾敗耶。朝廷所以激發人心，有勸有懲者，全在賞罰。平時尙然，況於危難乎。如黃海前監司趙仁得，自臨津失守以後，在相望之地，未嘗遣一卒勤王。且以海州爲金城鐵關，乘船逃避於賊兵未至之前，而旣遞監司，而旋爲巡察。海州牧使李泰亨，棄城逃走，留軍危地，離陣獨宿，使康翎瓮津之民，血肉狼籍。罪狀如此，而猶保官爵，四方聞之，有以議。朝廷賞罰之無章，臣甚惜焉。此等事，臣本不敢妄言，但國事危迫如此，而臣冒居大臣之後，旣知利害所關，不得不達，惶恐無已。江原監司姜紳，亦非統禦之才，亦當以他人改差。

一賊兵屯據京城已久，民情狃安，且迫於飢饉，太平入處，幾與相忘。極爲寒心，然賊敗去之時，則必盡爲芟刈，以泄其毒。假使不爲芟刈，而亦必虜掠卷去，百工伎藝，舉爲倭人。如火炮水戰弓矢等事，無不教之。其爲後日之憂，庸有紀乎。此亦急設方略，諭以禍福，使之登時自拔而出，以免死亡。且

有心於內應者亦當以優賞勸之。以動其心。此亦今日之最急者也。

一各道將官不可不省。蓋將官太多。而號令雜出。守令人民莫適所從。徒爲貽弊。無益於事。今宜急省其不能者。如召募官等。亦徒爲紛紛。其無顯效者。姑且罷遣爲當。

一當今急務惟在激勵人心。使之興起。如公私賤之捕殺賊倭者。皆卽許免賤。不可吝惜。以失人心。古語云。重賞之下。必有死士。且聞江原道等處。凡民射殺賊倭。所奪之物。皆以平時賊贓爲例。本官報監司置簿推尋。若失之。則或以民間牛馬充納。而監司認爲己物。私與所知之人。民皆怨苦。莫肯以射賊爲心云。其爲無謂甚矣。今宜廣加知委。凡捕賊而所得之物。悉與其人。官不得推。人不得奪。則村民皆知殺賊之利。處處蜂起。而賊勢少衰矣。

一今日之所恃者人心。古人以單膠感士。楚王撫慰戰士。三軍如挾纊。蓋怨不在大。惠不在小。所貴推赤心。置人腹而已。今凡在戰陣之士。當加撫恤。而南軍義兵之在江華及他處者。因往來之使。別以教旨宣慰。以慰其勞。訪問村落間私自捕賊之人。令所在官吏。一一具錄。啓聞而施賞。使有激勵之心。

一近日賊兵漸加。其實我民投入者太半。傳聞錦山之戰。賊陣射矢如雨。此

皆我民耳。極爲可駭。蓋賊獲我民之壯健者。皆卽削髮。變爲倭形。而驅使。故民往往雖欲逃出。畏見殺於官軍。甘心附賊。以助其勢。誠可痛也。今宜別爲事目。處處張榜。知委。如自賊中來投者。毋得斬殺。使之各還其居。其有能殺賊。或以賊情來告者。厚加賞賜。以廣歸順之路。

一 倭奴短於水戰。而當初淺慮之人。妄言水戰非便。使賊任意登陸。人謀不臧。亦天之爲。尙何言哉。今全羅道舟師甚盛。而慶尙道則蕩敗幾盡。明年備患。亦是數月間事耳。此賊雖幸而得勝。而慶尙舟船。若不登時措置。明年與今年等耳。臣意當此。國家危急之際。所當不計他事。專力爲防備。如以下三道奴婢身貢。及他所出之物。盡爲軍備。預爲知委于當事之臣。於春冬之間。隨其賊退之處。造得板屋戰船百餘隻。且以善於水戰者。爲水使。又以常時慶尙道倭料米價布。盡餉戰士。待變於海口。然後可以有濟。今內賊未退。固難議此。然凡事不預則不立。受任方面之臣。不可以不知也。

懲毖錄卷之七終

懲毖錄卷之八

辰巳錄

條陳討賊機務狀壬辰十月

今日事勢日向危迫。在我束手無策。只望天兵之來救。萬一天兵不時來到。而賊勢猖獗。則將何以待之。況天時已寒。糧穀將盡。四方奔竄山谷之民。日就屠戮。幾無子遺。誠可哀痛。臣竊觀倭奴。非真有必不可敵之勢。只是我國將帥乏人。士卒恇怯。臨陣不能力戰。望風先遁。以至於此耳。臣謹以鄙見條列事宜于後。

一平壤之賊。若合兵西下。則誠爲可憂。然李鎰方統兵在平壤之東。三縣兵在平壤之西。金億秋等率舟師在其西南。順安之師。則又在北面。當預定約束。乘賊兵西下。三面兵合攻巢穴。而分遣銳卒。尾擊其後。使賊有所牽掣。不敢肆意直下。順安之師。抄擇精勇。從旁勦擊。乘夜掩襲。又多設疑兵。進退合散。迭出左右。則可以勝賊。若不然。而聞賊西來。散軍奔避。如前日之爲。則大事去矣。賊兵據平壤已數月餘。前月間。聞在城中者甚少。有可乘之機。且平壤一城。西北依山。而我軍每往來於釜山感福之野。故賊亦專備西北。其時若從舟師。乘夜潛入于大同江中。多載火箭器械。出其不

意而攻之。則亦一奇策。而惜乎我軍遲疑顧望。坐失機會。今雖晚備舟船。而賊已覺知。且守唐將約束。按甲不前。凡用兵之道。寧拙速。不可巧遲。遲則彼得爲計。而我氣已衰。故難以有功。然以此知委諸將使之相機進取。庶可收之桑榆。

一 兵家之要。莫若先利器械。我國與倭奴交戰。較其長短。倭奴之長技三。鐵丸也用。劍也。突進也。我國之長技一。弓矢而已。然弓矢可用於數十步間。而鐵丸則數百步之外。中必穿透。固不相敵。至於短兵相接。則我軍尤不能支。奔潰不暇。何以得勝。近日唐將往來。見我軍全無器械。未嘗不恠歎。以急備器械。諄諄告戒。而我軍計不知所出。空手待賊。誠可寒心。臣竊觀火車之制。極爲便利。誠制勝之妙器。而自變生以來。一未用之。良可恨惜。臣於安州寧邊。搜出二十二兩。而制度不便處。略加增損修繕。每車載勝字銃箭十五介。若依此造作百餘兩。四面結陣。間以射手。按部徐進。高低左右。一視賊兵之所向。而一時俱發。如風雨驟至。賊兵雖千萬。不敢當前。射手亦依車自蔽。以避鐵丸。大勝於防。請義州等處所儲火車。急時收出一。依安州新樣修補。勝字銃箭。如不足。則以字字宙字箭代之。令軍官押領。送于軍前。以備戰用。

一 賊兵屯據京城已久。人情狃安。太半入處。幾與相忘。極爲寒心。臣竊念京

畿恢復之勢。當自三面。蓋楊州積城抱川永平加平楊根等邑之軍。當統於一將。指授方略。蔽遮京城以東。江華喬桐交河高陽等邑之軍。又統於一將。以捕京城以西散出之賊。廣州果川衿川水原陽川龍仁安城等邑之軍。又當統於一將。遮遏南方以擊南下之賊。然後江原之軍。與楊州等邑之軍合勢。忠清之軍。與廣州以南之軍合勢。江華喬桐之軍。則與全羅兵及義兵合。凡有動止。互相報知。氣勢聯絡。約束相通。則進可以掃蕩京寇。退可以式遏標掠。軍聲自倍。而無渙散孤弱之患矣。臣近因往來之人。聞楊州牧使高彥伯。頗有膽量。善於其任。此人可當一面。其餘在朝廷所擇耳。且諸道既有巡察使。又有監司。又有召募等官。號令不一。莫適所主。列邑疲於供頓。人心益離。其間或有多聚道內勇士。深居山谷。自衛其身。及其家屬。貽弊郡邑。賊至則望風先遁。散遣軍卒。既散之後。又復徵聚。以此前日鄉里團結捕賊之人。亦皆離散云。此極爲今日之大憂。惟望朝廷。申勅明示賞罰。使有懲戒。且凡所差除。務在得人。而號令出一。然後庶可有爲矣。如黃海道亦有監司巡察使。招討使。召募等官。此亦當省其不急者。如海州牧使李泰亨。棄城喪師。浮遊海上。而罰不及身。人情憤怨。恐無以整肅軍令。

乞速行軍賞以慰將士之心。且平壤判官李應灝仍任狀。壬辰月二十日。

臣令從事官辛慶晉往視左防禦使金應瑞結陣處及列邑諸陣。撫慰軍情各處軍士皆言。前日累次接戰時。軍功等第。都元帥已爲狀啓。而未知發落。至有列狀呈訴者。許多軍功磨鍊。非造次間事。該司必應次第施行。而軍情如此。不無慙然苦待之意。朝廷各別從速施行。以示賞不踰時之意。以勸士心。前平壤判官李應獬。以罪白衣從軍。領率一陣。其後累有軍功。頗有力戰之名。退北之時。獨留捍後軍卒。多因此全活。前月間。有平壤府民等。來訴於臣。請以應獬爲其府判官。以察軍務。其時被罪未久。且未知應獬之爲人。不敢輕易狀啓。今則民情如此。而所立之效。亦頗可紀。從民願施行。似或無妨。而事係恩典。只以所聞陳達。

馳

啓分付諸將乘機邀截事及往探唐兵消息請輸送軍器狀

壬辰十月九日

臣前此固疑限日將迫。則賊必多合醜類。以爲逞凶之計。卽遣黃海防禦使金敬老馳報。十五日。倭賊多數入鳳山。有向西之狀。云當初沈遊擊。定限五十日。若從九月初一日計之。則今只隔十一日。假使天兵果到於限內。而賊衆已多。則勦滅似難。而況至今邈然往來。唐人人人異說。不可憑信。自古遠慮者少。姑息者多。中國豈無論議異同。而爲之掣肘者乎。今日之勢。極爲可慮。適巡察使李元翼。以議事來安州。臣與之相議。卽通報於防禦使李鎰。及祥原中和守令黃海左右道防禦使。使邀截賊來路。或於大同江渡涉之際。乘其半渡。尾

擊其後。蹙諸江中。又令舟師將金億秋。從水路哨探。大同門外。乘機協擊。但賊勢若近。則諸將之散在者。恐難趁時邀擊。五十日後。賊兵既多。而聲言失信。舉衆西下。則其利鈍。恐難預期。且臣之所慮者。自賊入我境。全資我國糧餉。今因調度。天兵收括諸邑之穀。積置一路。而在野禾穀。皆未收入。脫有意外之憂。將何收拾。大抵此賊。若於今冬。未及蕩平。則明春財力益竭。軍卒疲頓。恐無恢復之期。臣未嘗不摧心拊膺。繼以泣血。謹遣臣軍官一人。馳候唐兵消息。朝廷急速探知。出來遲速。密諭軍中。使之毋失策應之機。且矢盡一事。尤爲今日切迫之憂。前此臣啓請別遣一人。取竹于下三道。未知已到與否。令該司急速措置。出送震天雷。最關於戰用。而諸邑所儲。皆失其制度。且無碗口。不可用之。義州及麟山等鎮。所藏十餘量。并碗口。不分晝夜出送。火藥亦依數輸到。

京城之賊。添到平壤狀。

壬辰十月十九日

左防禦使李鎰。馳報內。前日接戰時。被擄逃還人彥陽等。供稱城中留賊。有大旗之陣七。無旗之陣十九。向者暴雨之夕。一陣又自京來。并前大旗之陣八矣。無旗之陣。則軍數多。不過五十。或僅二十餘名。大旗陣。則少。不下三四百。多者不可勝計。而陣各有旗四十竿云。昨夜黃海道。遂安人持啓本者。過此言。黃海一路。安城龍泉等處。自京下來之賊。近日多數充滿。有向西之狀云。臣前者自順安。粗陳賊勢。請急探唐兵遲速。密報軍中。當初沈將。定限五十日。若從九

月初一日計之。則今只隔一日。假使天兵果到於限內。而賊衆已多。則其勦滅。似當費力。況至今邈然。往來唐人。人人異說。不可憑信。自古遠慮者少。姑息者多。中國亦豈無論議異同。而爲之掣肘者乎。卽沈惟敬之志。未知必行與否。五十日之後。賊以爲失信。而舉衆西來。則其誰止之。唐兵雖來。恐亦已晚。且賊自入我境。全資我國糧餉。今因調度。天兵預收民間之穀。皆積於一路。脫有意外之憂。將何收拾。臣私憂過計。無任憫迫。莫知所爲。弓箭。臣累次狀。啓。至於請輸下三道箭竹。今則諸處各陣。舉皆垂乏。僅存數百餘部。不足以備一日之用。雖有百萬兵。拱手而無爲。事益危急。朝廷凡事。急急區處。使無難追之悔。

天兵進取平壤分道便宜狀

壬辰十月

調度使尹承勳。牒呈內云。備邊司分路關字。臣亦未聞知。據此參詳。唐兵若果分路。以取平壤。當自安州肅川。達於慈山江東。以出於大同江之東。而大軍直趨順安。可成犄角之勢。若价川寧邊順川殷山成川三登。則果爲迂道。非行軍所經道。內各邑倉穀。時方艱難。輸運於直路。所餘無幾。价川以東。自初專餉防禦。使李鎰軍。及順安之軍。連續輸運。尤甚蕩敗。不成模樣。今於倉卒之際。遽欲辦出。勢所難及。朝廷更加詳審指揮。大抵冬節已迫。唐兵出來。日期斯速。聞見急急。密諭使得措置凡事。而前日狀。啓馬豆一日。分給升數。亦登時報。

稟于唐將。并爲知委。使得遵行。進兵道路。畫成一圖。輸送備邊司。以備參考。」

乞措置海島狀

安州請遣助防將狀

并見本集

黃海道一路軍糧措備狀

壬辰十月

天兵糧餉支待之事。本道則時方措辦。平壤以南。黃海京畿。則各官無處完保。民力亦皆蕩竭。萬一此道賊退之後。諸軍鱗次過大同江而南。則許多軍糧。更無辦出之勢。必誤大事。極爲憫慮。事須預立。可無臨時之患。臣已曾通關於黃海道觀察使。巡邊使處。令各官所收軍糧。分置於道內山城。與瑞興文化堅固之處。且儲且守。以擬軍興之用。但聞江華軍糧。自忠清道載來者六千餘石。而朴忠侃罷去後。掌令鄭姬藩。留彼旬當。今則姬藩。又爲入來。已向行在許多軍糧。無人管領。恐有虛疎。漂失之弊。朝廷別爲急急處置。或令江華留在朝。臣之有心計者一人。專掌次知。措置轉輸之事。使無調度窘竭之憂。尤爲便當。」

馳 啓 糧餉措置事宜及請唐兵糧料減省且定朝臣一人以管支給之

任調度使洪宗祿在喪其代差送狀

調度使白惟咸賚來事目。即時知委各官。前日咸從之民。自願收合白米二百石。以補軍需。臣卽給首倡者空名告身。其餘使本官雜役完護。今白惟咸沿途

曉諭富民使之納穀免賤免役。其數合五百餘石。其他諸條。時方措置。而惟是今年海邊之邑。往往僅免凶歉。而山邑則全數失農。許多征役之需。先不取辦於民。今於還上田稅之外。其他諸徭。皆以米穀督納。民力恐不能支。極爲憂慮。先爲知委。觀勢更稟計料。前日唐兵料米。每人日給三升。馬豆則一斗。其數太多。尤不能辦。今日暑已短。一人一日之食。只給二升。未爲不足。而馬豆亦減半。給生豆五升。則可爲熟豆一斗。如此支計。逐日餘剩。自可推移。此意於義州發行之時。令解事譯官。詳告於唐將。預定規式。通知一路。使之一體施行。則允爲便益。臣通計道內各邑倉穀之數。雖竭力措辦。而若至於六七萬兵。則誠有難支之患。竊見沈遊擊 中朝報稟文字。有羔米及朝鮮大米參給之語。臆書文字。不能詳細。雖未知何語。然其大意。似是憂我國糧餉之難繼。欲以中原米食等物。相補支給。此等辭緣。并爲預先明白稟呈。使無臨時狼狽之患。唐兵出來時。旬當糧料。計口散給之任。亦爲重大。萬一不能詳察。不無處處疊受之弊。朝廷各別擇出有心計官員。使幹其任。聞調度使洪宗祿。遭母喪。其代亦當急急。差出與白惟咸。分道措置。可無遲緩之弊。晴川大定兩江浮橋。若值天氣漸寒。江水成冰。潮漲流澌。亦難依舊結泊。此意亦不可不使唐將知之。并令該司詳議處置。

往視順安軍還到永柔馳 啓狀

見本集

沈遊擊過去辭緣及分付諸陣將爲進勦大兵出來與否速爲探問指揮

昨日沈遊擊自林畔來宿定州。今日向安州。臣仍進去問安云。聞老爺之行將到。且聞大兵不遠亦來。欲點檢一路芻糧。且欲迎候老爺來此云。則答云。兵馬近將出來。一路芻糧須多備。閣老雖不得親去點檢。別遣管下之員點檢云。而不爲相見。臣又令通事告之曰。小邦人民渴望老爺之來久矣。糧草當盡力措辦。豈敢怠慢。但老爺凡百之事。明白分付軍馬之數。及來到日期。願詳示之。遊擊答云。馬草必須三百萬束。可給俺同行徐相公。當隨後來到。專爲點視糧草。願令此處官員。眼同點檢云。臣卽移文于調度使白惟威。使之進去良策等處。若果徐相公稱號人來到。卽便同爲點閱。以副其言。臣之愚昧。固難察微。知著然自前每疑唐將處置。有不可知。今見沈遊擊舉措。亦甚可疑。大抵自古救人與望。揀於人。其情不同。中國之欲討倭賊。不過爲中國求息兵而已。豈諒其憫迫如此乎。臣近觀各陣將士。皆有一戰之心。且以冬節向盡。事勢益蹙。不可等待遷延。故約束將士。整理器械。爲進取之計。已分遣精卒。勦擊於大同越邊。且聞平壤之賊。夏間所入室廬。盡撤牆壁。今則以糖禾藁草。編排障遮。正好火攻。數日前巡察使李元翼。親巡三縣諸陣。約誓將士而回矣。今又沈遊擊將又

入城中。若累日遷延。而其間事變。或出於意慮之外。則將士之心。未必不怠。軍機重事。亦不無漏泄之患。不勝憂慮。伏聞禮曹判書尹根壽。已爲出來。大兵出來與否。亦必親見可知。朝廷以此等悶迫。不容遷延辭緣。明白說與主。管唐將如宋侍郎之類。聽其決語。速有指揮。毋令益失機會。前頭之事。庶有稅駕之所。

論報賊勢狀壬辰十月

臣前者聞賊將有添兵之報。卽發遣臣軍官金善義於黃海道。傳通巡察使及防禦使等處。使之與左防禦使。合兵邀截。且急通於江華。乘賊下來。以舟師橫截津渡。以止其西下之勢。且又通於防禦使李鎰。使之糾合諸陣之兵。乘機勦擊。且聞大同江等處賊兵。無備往來自如。又令金億秋。率舟師乘夜直上。焚毀賊船。且以神機箭火炮等。多數發射。衝火於大同門。而預令一人。潛布菱鐵於門外。乘其亂出之際。從船上亂射。各處諸將。憚於賊衆。皆按甲不前。使賊千里橫行。一無呵禁。坐令平壤。兇徒多聚。前頭之事。極爲可憂。平壤地形。西北險固。而東南平易。舟師一事。固當早施。掩其不意。可以有功。而當初遲疑不進。久失機會。十八日始爲進去。而無及於已聚之賊。更違節制。徒令賊兵覺知。而少無力戰之心。賊氣日盛。而我勢日弱。許多戰陣所用器械。皆不整辦。徒持弓矢。以

爲禦賊之具。夫弓矢固爲利器，而百步之外不能當鐵丸數步之內，無以制短兵。軍士旣無所恃，則其致奔敗亦不足怪。今因慶尙道狀啓陪持人聞兵使朴晉擊破諸處賊陣時，用連弩震天雷，此最爲敵人所畏云。今雖已晚，猶可措備。而各官所有震天雷皆失其制度，不可以飛擊，欲更鑄成則必費時日。江邊列邑所有急令該司，輸到軍前以備戰用爲當。天兵出來日期，全未聞知。雖稱軍事尙密，而期日已盡，賊謀難測。朝夕之間，憂慮萬端，而環顧在我之勢，無一可恃，痛悶罔極。朝廷各別多般聞見，計議亭當急急通諭，俾無狼狽之虞。江冰若合，則北虜之事亦甚可慮。臣意北虜貪而無計，易以利誘，如有更以來救之狀言說，則姑爲鎮撫賞給，以息其狼噬之患。如唐時欲圖恢復，不得不與回紇連和，蓋其勢然也。臣言似迂，而實關大計，不勝區區悶迫之忱。累次陳達，極爲惶恐。

馳

啓北道賊勢請巡察使宋言慎姑爲仍任以鎮人心狀壬辰十一月十

臣卽見咸鏡道巡察使宋言慎狀，啓陪持人嚴祿聞定平咸興等處之人羣起捕賊云。北道之賊熾張已甚，而一道人心幾盡歸附，恢復之勢比他道益難。今幸天誘民衷，處處奮起，此正收復北方之一大機會，但恐外兵不至，形勢孤弱，無以接濟救援，則已聚之軍將至渙散，更無可爲之望。兵有先聲而後實者，急令孟山陽德等地聲言，天兵大至，已蕩平此處之賊，而關西之兵不日踰

嶺云云。以堅民心。又令江界判官金大畜等。率兵稍近咸興之境。以作聲援。若是則北道義兵。必益乘勢。而愚民之已曾附賊者。亦必畏懼分散。或爲之內應。旬月之間。庶有破賊之勢矣。傳聞宋言慎。因事罷職。言慎雖有所失。但旣已往入其處。收集人民。而監司尹卓然。時在別害堡。距咸興絕遠。恐難號令。不如姑留言慎。以責後效。而北道有軍功者。及啓本陪持人。亦當別加論賞。速爲發還。使有聳動之心。北道之事。臣常憂念。今聞此言。稍可慰幸。妄陳所見。

論李鎰代李賓事未便宜狀

法守正全勝所言 天兵出來形止可疑狀

并見本集

有 旨祇受狀六十二日

去月二十四日。同副承旨成貼有 旨書狀。及二十五日。同副承旨成貼有 旨書狀。臣在安州。一時祇受。其中商量規畫。毋失機會事。臣當與元師議處。近日中和黃州等處。馳報。皆言賊兵連續下來。兇謀所在。必非徒然。而中和西陣新被陷沒。賊氣益驕。今之事勢。一日危於一日。所當早爲決計。死中求生。不可淹留引日。坐待狼狽。此不待智者而知。前月間。諸將頗有進取之意。而適值將帥遞代。又有唐將出入講解之事。更成遷延。今李鎰及鄭希賢等。各赴其陣。已數日。方有措置。申布約束。約束稍定。相機之舉。似不可無。第臣之所憂者。自秋

及今諸處軍民日望唐兵既久不至衆心未免少懈且遊擊還歸之日恐與舉事之際相值再成掣肘憫慮萬端

祇受體察之命兼陳賊勢狀

見本集

獲賊諜金順良囚安州狀_{月十二}

臣於前月十八日送傳令于舟師大將有指揮事日久而不爲還繳臣怪之移文推詰則已於二十二日從右防禦使處具公文送還云而中間無去處因次次推問則公文捧受出來之人乃三和水軍金順良自言公文及傳令納于肅川元帥處又受祕密關子而去路中逢一人偕入平壤城中賊將見公文裂破留二日持牛隻刈草於城外因爲逃還云其說荒唐臣捉致眼前令嚴杖數度而問之順良供招云順良七月被擄入城因爲往來城中與三和官奴莫同及平壤私奴徐漢龍苟叱福交結其類四十餘人皆爲賊所使自初出入調察我國事情凡列陣中無不往來周流順安尤多往來安州義州等處亦有往來之人順良初自右防禦使處受傳令及公文直入平壤倭將見公文裂破傳令則受置其處因賞給徐漢龍等紬五疋順良牛一隻更令入來徐漢龍約於初十日間出來探事云云邇來凡我國動靜賊無不先知至於山川形勢道里迆直行軍日期亦無不知固疑奸民爲之耳目今聞順良之言賊間無遠不布極可

寒心。今幸因事發露。招辭現出之人。方秘密設策。期於購捕。所謂芻叱福者。亦於數日前。被捉於右防禦使伏兵處。與順良對辨。則以爲此是往來之人。與順良。姑爲堅囚於安州。以待追後捕捉之人。憑詰得情計料。因卽密通諸陣。使之嚴加譏察。事係關重。先爲馳啓。

數日後。斬順良於安州城外。梟首示衆。自是其黨驚散。未久。天兵渡江。而賊不知兵至。使平好官出迎沈遊擊。爲查大受所擒。翌日進圍平壤。得以成功。如賊間尙在。而預爲之備。則事未可知。間諜之有關於兵機如此。

請留金良瑞措置安州守城狀

臣前達安州守城事。蓋以平壤以北。義州以南。惟此爲控扼之地。若失此不守。事無可爲者。此城固甚虛濶。守亦不易。但有積粟。而大軍在其前。不幸而前頭不利。軍不潰散。退守此城。則猶可支撐。而守城器械。蕩然未備。欲得武臣稍知其事者。以備意外之患。故至於妄陳。而久無黑白。當此危急之際。事事稽緩如此。臣竊未安。必以見在武臣無可送者。故該司久未舉行耳。適漢城判尹金晔。自慶尙道來。所率軍官金良瑞。乃前任守令之人。頗似可任。請以此人守城。助防將稱號。使之尙當守城之事。爲當。良瑞所率。焔焔煮取人二名。則送于備邊司。大抵自生變以後。諸色軍人潰散之餘。火炮匠下來此道者無幾。臨戰器械不備。聞京畿巡察使權徵處。有京火炮匠四十餘人。聚於海中。而無所用之云。

請極擇事知匠人十餘名。急急起送事。下書何如。

論沈遊擊與賊講解狀

見本集

進取軍機遲速狀

壬辰二月

今月初九日。成貼有旨。近見獻議。皆以進討爲急。每每促之。有似潼關之戰。徐以待之。反類河上之老。此間情勢。卿有定見。卿其搜括隱丁。糾合義旅。臨陣節制。進討勦滅事。又於十四日。有旨。審其曲折。量其進退。見可爲之事。臣與元帥及巡察使。反覆詳度。今日之勢。戰旣不可。不戰亦不可。若使在我有堂堂之勢。而明知可勝。則早已爲之。豈等待天兵。留時費日。至於數月之久乎。惟其軍勢孤弱。器械未備。而一舉蹉跌。則存亡乃決。故欲與天兵協力而後進。及兵久不來。而寒節向盡。則寧欲決死一戰。而聽成敗之數于天。蓋出於不得已。臣前此累陳憫迫之情。請聞唐將決語而處之者。以此故也。今天兵已爲渡江。方約束諸軍。多運糧餉。爲必討之計。則在我旣已持久。姑且待之。以冀十全之舉。不當難忍於數日之間。而違時輕舉。況賊兵前少而後多。攻取之形。昔易而今難乎。且沈惟敬家人。方在賊中。必聞此消息。賊知沈計不售。大軍臨境。乘其已聚之勢。欲爲先發之謀。事極危迫。以臣所料。沈初雖失計。業已爲之。姑令還報。以緩賊心。而大兵疾進。使賊畏之。而不敢動。亦便於乘機進擊。似爲得

計矣。數日來賊兵已集，形色可虞。天兵若不急進，恐有難及之悔。朝廷百分周旋，俾令急時前進。

大軍到安州，見李提督議軍事狀。癸巳日

前月二十九日，天兵始到安州，遊擊參將葛逢夏先來。初二日，左翼都督李如柏率諸將繼至，結陣于城外，軍容甚盛。翌日發向肅川，臣條列軍中事宜數事，并畫平壤地圖以呈。都督出大廳，招臣相見，細問倭奴多少道路，遠近糧草有無及他軍事。臣隨問對之而退。右翼都督張世爵又到暫留，即向肅川。已時大將提督李如松、中衛楊元等諸將又至。臣出迎于城外。日暮，提督出坐東軒，招臣相見。臣袖持地圖以進，提督命設椅近坐，展地圖于卓子上，以手指點道路，悉陳進兵勦賊方略。縷縷不已，且言明日同往肅川，與其處領兵將官共會詳議。臣今日隨往肅川，提督所言甚多，難以盡記。大概指地圖降福山曰：天兵當設伏此地，令本國軍馬誘賊出來，合擊勦滅。不爾則又使一枝兵從東路合圍大同門四面攻之。倭賊鳥銃數百步外，雖中不能傷人。我軍之炮則可及數里，以此攻城，賊必不支。平壤既破，然後又使一枝兵往北道，其餘當向黃海道云。各官所儲糧草時得僅僅支給，若多日留屯，萬無接濟之理。伏聞唐糧在道而運到無期云。臣意令各官守令親自盡率境內牛畜人丁，負戴輸運。次次到境，各具輸運日時，其中尤甚稽留者，逐一從重治罪。庶幾輸到軍前，可免窘

乏之患。請令該司急速處置。天兵雖到。而我兵當因此際。亦自致力。然後可以有濟。臣觀各陣諸將。可任統領者絕少。而雖在褊裨。亦無勇銳敢戰之士。傳聞水原居金瑩。乃遇秋之子。勇力絕人。而爲都事鄭曄所率。久在閒地。殊爲可惜。前月中移文于京畿。使之起送軍前。今聞來在義州。當此臨戰之際。勇士一人有關。金瑩不分晝夜。給戰馬出送。

馳 啓天兵過安州分付黃海道糧餉狀

臣在安州。親聞提督所言。既取平壤。則大軍卽時渡江前進云。黃海道軍糧。極爲可慮。數日前黃海觀察使柳永慶。報穀數于臣。其在道內郡縣及廣崑許沙。吾又浦龍媒梁者。造米七千三百九十餘石。田米一萬五千二百六十七石。馬豆三萬六千八百六十四石。糯米一千九百八十五石。若使積在沿途各邑。則稍可支待。而一路方有賊兵。恐爲所奪。皆散置隱僻之處。趁時輸運亦難。臣卽移文本道。令就其便近。整齊民夫。聚合牛馬。聞大軍先聲。卽時男負女戴。輸到軍前。俾無後時稽緩之弊。但當此民心潰散之餘。恐難及期。以乏軍興。朝廷亦須預爲措置。指揮使得遵行。臣今日因人傳聞。海州牧使。以泰川縣監韓述爲之。未知虛實。海州爲黃海一道根本。時方新復。百事蕩敗之餘。任人得失。成敗所關。韓述爲泰川縣監。猶不能治數月之間。一境嗷嗷。流散相繼。況於海州乎。朝廷差除之事。臣不當妄言。但海州不能收拾。則延安等地。亦難得保。利

害非輕。不勝區區之慮。因論本道之事。而并及之。極爲惶恐。

馳 啓天兵過肅川形止狀

昨日 天朝大將。來到肅川。諸軍列陣野中。以唐兵一人。侵撓閭家。踏死小兒。卽時梟首示衆。且給被侵人銀一兩。又給梟首人同伴銀二兩。使之歸葬。方欲親自巡營之際。擺撥兒二名。自順安疾馳而來。有急報。大將先送左翼都督。又自率家丁十人。佩弓箭急急馳出。諸軍陸續進發。臣等不知何故。卽刻巡邊使李鎰馳報。當初查遊擊。先到順安。往來平壤者三度。今日誘率倭二十三名。直到順安。倭人見我軍登城設備。疑不進。查遊擊手揮我軍。使之退散。再三揖讓引路。然後乃進。設酒相對。出其不意。遊擊親自擊斬首倭二人。其餘倭亦皆斬首。一倭逃竄。追捕并斬。初未舉事時。唐將一人。又持與倭書。還入平壤。今日必欲又爲誘出擊斬之計。大軍已到。保無他虞。但軍器火炮諸具。在中途者。尙未盡到。極爲闕慮。

馳 啓天兵進攻平壤形止及請罷安州牧使李民覺代以林仲樛狀

日七

昨日 天兵與我軍進屯平壤城外十里。日晚進兵城下。初昏賊從密德出兵來戰。天兵多發火炮。賊不支。退入城中。天兵欲於今曉入城。取我軍前日所造長梯于順安而去。利鈍之形。時未詳知。若曠日持久。則糧草接濟之事。極

爲閔迫。唐糧輸運事。依前日狀。啓急速措置。俾令及期。當此事急之際。沿道守令。多不得人。以此百事皆不措置。安州牧使李民覺。本以疎懦昏殘。且緣多病。不能治官。號令不行於下人。臣從前每欲啓罷。而多事之際。不欲遞易新舊。且慮代者亦不得人。留連至今。今則決不可留。請別擇文武中有計慮勤幹。可任之人。不分晝夜馳送。臣昨招林仲樑探問中和事。觀其爲人。足可任事。姑以此人爲之。兼治守城之事。恐爲便當。

請分遣鄭希立朴名賢等軍以防北路狀

平壤之賊。數日內速爲蕩平。則卽當分兵以防北道之賊。但兵家之事。所難預知。萬一曠日持久。而北賊乘虛踰嶺。出於腹內。則此甚危急。近日連見洪世恭馳報。賊兵皆有西來之狀。方此雪消。嶺路通行之時。以數少殘卒。萬無把截之理。臣意天兵旣已到此。此處之兵。不患不足。若分鄭希立朴名賢等所屬軍千餘名。扮作唐兵模樣。送于南道防戍之處。則庶可無虞。大抵北道事勢。當初收復之形。十八九成。賊之精兵。盡聚咸興。以防北來之兵。高原文川德源永興等地。只留殘卒百餘。且我民相雜出入。略不設備。若自其處。掩其不意。使賊首尾斷絕。則咸興之賊必回。而北方鄭文孚之兵。與之合勢夾擊。則旬日之間。鐵嶺以北。可以無賊。此乃不可失之機。而旣不更遣巡察使。如助防將等官。率皆庸劣之人。拱手坐視。使賊勢愈熾。今日之勢。雖有唐兵。北賊腹心之憂。方大。臣

爲之寒心。請朝廷更加運籌區畫，使無後時難圖之患。

懲毖錄卷之八

終

懲毖錄八

懲志錄卷之九

辰巳錄

馳 啓天兵已入平壤狀正月八日

從事官金信元馳報內。當日巳時。到降福院後站。唐將已爲接戰。四面攻城。放炮之聲。如雷如震。巳未。體探軍官李繼命馳報內。唐兵破七星門而入。我軍自含毬門而入。時方廝殺云云。平壤一城似已收復。不勝慶幸之至。謹先馳啓。臣方進去順安。檢勅軍糧等事。接濟計料。唐糧運轉等事。更乞急速措置。

平壤已復馳 啓東宮狀

見本集

平壤賊遁形止狀

卽見都元帥金命元傳通。平壤入窟之賊。全數逃遁。兵使及天兵次第進去。都巡察使李元翼馳報內。夜中倭人自土窟全數逃去。天將曉來始覺。甚怒我軍不爲候望。而亦未卽發軍追逐。午初始爲發軍出去。當初我軍在城下。兵使則結陣於牡丹峯之北。左防禦使之軍在林原坪。右防禦使之軍在含毬門外。而中和祥原諸陣及曹好益之軍。結陣於大同江越邊。四面合勢。中間李鎰因唐將之令。與左右防禦使。俱在含毬門外。八日之戰。先自含毬門入。與賊相

戰。賊奔北。我軍進至立福站。唐兵自七星門密德而下。驅出我軍。使不得在於城中。李鎰之軍。則有唐將一人。率軍士四人。監制進退。而既無譯官。語言不得相通。進退之際。少違其意。輒以劒背歐打。使不得任意。故我軍凡有所獲。亦爲被奪云云。但軍中之事。制在主將。不可全聽。唐將號令。而不爲指揮。李鎰雖退陣於普通門外。而若留防禦。使一軍在詠歸樓近處。遮遏南下之賊。則不至於全然無獲。而處置未。免踈濶。使籠中之兔。得尋生路。其爲痛心。莫此爲甚。黃海一路糧餉接濟事。臣已屢爲移文本道。且令傳通於京畿江原道官軍義兵。使之糾合兵馬。合勢勦捕。而別無體察他道之命。未敢擅便指揮。只待 朝廷處置。

隨 天兵到開城府及臨津浮橋狀

臣先到開城府。卽爲奉審于 穆清殿。殿宇皆被賊兵毀撤。只存瓦礫。 辟容所在。倉卒亦未知何處。不勝流涕痛憤之至。京畿糧料。自江華船泊于後西江。因民力不齊。未得趁時輸運。提督到此留一日。聞京賊有遁去之形。欲畧三日糧以進。而計無所出。大概京畿之事。比他道尤爲踈濶。若大軍入京城。而人馬糧餉不繼。則狼狽之狀。不可形言。臣雖文移督促。項背相望。而人心解弛。各處義兵官軍。一無來會者。事事如此。極爲寒心。臨津浮橋。臣與判尹李德馨。馳去監督。僅得成形。但江面大濶。馬軍似難俱渡。故提督欲使騎兵。由淺灘步兵及

車子由浮橋以濟。臣隨大軍將向京城。他餘事追後馳。啓計料。

處置金敬老稟 旨狀

本月二十四日戌時。宣傳官李純一。賚奉 標信來到。且祇受承政院書狀。金敬老罪狀極爲駭愕。并遣宣傳官持 標信馳往軍中。先告 天將處斷事有旨。臣以有 旨辭緣。告于提督。則提督使人傳言曰。金敬老之罪。本當處死。但京城未復。將官一人有關。吾將移咨 國王請貸。且下牌文于陪臣。須令敬老來此叩頭立功贖罪。臣又告曰。軍律不可不嚴。敬老之罪。本當處死。特以將官故不敢不先告於老爺耳。其罪則難可貸。提督笑曰。雖然。今姑貸死。使之立功。今曉。臣與元帥等。問安于提督。則出送牌文。且示咨文草。其意亦如牌文之辭。伏念敬老之罪。死不足惜。今又散軍獨來。令與高彥伯李時言等。追截京城之賊。則托以無軍徘徊不前。臣已曾決杖督令前進。今在坡州等處。已馳遣軍官使之捉來。但 天將牌文如此。似難遽爲處斷。而 標信已下。不知何以處之。大抵既告於 天將。則第從其令。觀後處斷。而李純一賚奉 標信。姑留於此。亦似未安。更此馳 稟牌文。謄書上送。

馳

啓京畿以後糧料難辦緣由及提督自欲賑救飢民狀

癸巳正月二十五日

天將聞京城倭賊多聚。且軍器未及齊到。今曉出令。先送精兵三千名。馳據龍山。吾將起程。親到京城。觀其形勢云。而深以糧草未備爲憂。臣欲先往前路。親

爲檢舉。則提督許之。右張總兵在傍云。大軍方在此處。議政先去。則凡事恐益難辦。不如姑使留此。提督曰。然。臣以此姑爲仍留。而京畿之事。板蕩尤甚。船到後西江者。亦難趁時輸入。故昨日提督令軍兵往受于其處。而馬豆草料。尤爲乏絕。雖將官之馬。不給芻草。已累日。提督爲人嚴而不苛。且於我國之事。多所寬護。而事勢閼迫。日甚一日。當初賊兵雖未退。而江華等處軍人及避亂之人。其數過萬。若能先爲知委。分部整頓。賊退之後。卽以其衆。一齊收入。則事之難處。不至於如此之甚。而此道號令多門。人心渙散。平日官家使喚之民。盡入於義兵。不事官役。其餘則巡察使以下。各有所率。名爲牙兵。不卽調發。奔走船泊之穀。近在三十里之地。而無計輸入。雖焦心竭力。而事未易集。臣實罔措。南陽水原等處倉穀。輸入京城事。亦累爲移文。項背相望。而全羅監司權慄。京畿左監司成泳。尙不使一介之人。來到軍前。稟定約束。探候師期。亦未知何故。如使大軍入城。而糧草不繼。則如臣者。雖萬死。不足以贖誤事之罪。日夜痛憫。提督於黃海一路。見百姓供頓困苦。深加憐愍。昨日與鄭同知趙知縣等私語云。此邦之民。赤立待死。其無賑濟之事否。譯官對以常時。則春初必舉賑恤。揀民之政。而今則官家無穀。兵亂未定。故計無所出耳。提督憮然曰。吾行有三升布千餘疋。欲以此買穀。賑恤飢民。其可爲乎。譯官對曰。民間豈有可買之穀乎。提督深加歎愍。且曰。吾昔在寧夏。問民有賣妻者。召而責問。其民云。貧不能畜妻。故

也。吾以私銀贖還其妻。且給粟二十石。使之完保。大抵民惟邦本。本固邦寧。陪臣等其知此意乎。凡人要須濟活人命。得天陰騭。然後福作長遠。趙知縣因謂此國刑杖太重。路見拷掠人者。必於膝腳。此人身要緊之處。少杖必死。與中國之法異矣。提督因謂通事曰。中國被獃子搶掠處。則人民久不還集。今汝國賊退之後。民皆來。供官役。至於兒女皆負戴。且無官員一人從賊去者。云。汝國人心忠厚可嘉。且縷縷言民生可憐之意。云。臣觀黃海一路之民。久爲賊所侵害。聞天兵之至。率多盡力供頓。或有以壺漿斗餅迎候者。提督以下將官。深加憐愍。而其言愛民保國之道。綽有古名將之風。非但爲摧堅陷陣之類。故敢此陳達。而方春賑貸等事。雖未暇舉行。而慰撫遺民。勞來還集之術。朝廷預爲講求十分。措置爲當。守令多取不經事武臣。雖因一時應敵之計。而民生以此益困。賊退地方。必先考其能否。有所澄汰。然後民政庶幾可舉。

馳報李提督進軍碧蹄不利。還駐東坡。及請輸運唐糧以濟大事。狀正月十九日

二十六日。提督由開城府過東坡。水渡臨津淺灘。駐兵于坡州。二十七日。提督及李都督。率家丁百餘名。馳向碧蹄。將欲自體探于京城。諸軍皆不動。是日曉頭。查總兵與防禦使高彥伯。馳到昌陵近處。賊多設伏兵于山谷間。先出數百餘人誘引。總兵揮軍掩擊。賊披靡散走。斬獲殆盡。欲引退之際。賊後隊大兵繼

至提督行到惠陰嶺。聞有賊兵。馳馬突進。路中馬蹶。墮落頰微傷。良久而起。因前突賊陣。賊衆多於天兵。先鋒數倍。而天兵之繼進者。未及到。天兵因爲賊所逐。提督殿後而退。大軍鱗次退來。還駐坡州。天兵死傷者數百餘人。提督家丁親信者一人亦死。提督馬上痛哭到坡州。夜間亦哭。臣等卽爲問安。提督答云。將官見敵先退。故以此還來云。因令諸軍嚴設警守。二十八日早朝。欲退駐東坡。臣與都元帥金命元接待使李德馨。戶曹判書李誠中。都巡察使權徵等同進。極陳不可退軍之事。反覆懇陳。提督出立庭中。諸將環列左右。招臣等語之曰。吾軍昨日勝捷。別無敗北之事。今之欲駐東坡。非有他意。只緣此處馬草絕乏。後有江水。火炮器械。南方義兵。亦未齊到。以此欲還駐東坡。休兵數日。更爲整齊以進。臣等齊跪。極陳不可。大要以爲。大兵已進。若退一步。賊氣乘勝。民心動搖。此機甚關。且南方義兵及各處將官。聞大兵之到。皆至漢江。軍糧連續輸到。老翁豈可不念此。而遽卽退軍乎。此處遺民。聞王師之來。各自扶攜。來尋舊基。今又棄去。必盡爲賊所害。何可忍此。提督云。吾之初意。本欲體探而來。今之還駐。非有他計。只欲休兵更來。臣等力爭不已。提督手持報兵奏文以示。大要以爲。賊兵之在京城者。幾二十萬。而唐兵只數萬。且多死傷。因請添兵運糧。末端又言。身有病患之事。臣以手指點告曰。倭賊之在城中者。多不過萬餘。緣何得至二十萬。提督曰。爾國文書中所言如此矣。臣又曰。賊兵豈有二

十萬之理。本國文書中。安有此語。提督曰。文書有之。不然吾豈知之。臣又曰。此大事。願老爺更加三思。節度使李贊又直前跪請。將官以下皆揮斥。而其中張總兵世爵尤主退駐之說。至於聲色俱厲。使之速退。而提督溫言譬曉。反覆不已。臣不得已還退。既而三道體察使俞泓繼至。令譯官傳告不可退歸之意。則以爲已定云。卽爲行軍。還駐東坡。京畿糧餉。當初輸運遲緩。艱困萬狀。至於馬草。則乏絕不繼。且路傍原野。賊皆焚蕩。四山焚盡。寸草不遺。坡州一境尤甚。百里之內。無復村落。所見慘酷。天兵所過。馬死者相望於道。其餘亦皆瘦瘠。不堪馳驅。種種悶迫。非止一端。京畿巡察使權徵。監司李廷馨等。全委措置。體察使俞泓。又爲檢舉。非不盡力。而事多未集。大軍在道。而糧草俱竭。臣雖扣心。而無可措之勢。蓋緣此道久爲賊藪。致此狼狽。今到急迫。計無所出。唐糧未知今到何地。急速催促。不分晝夜。輸到軍前。以濟大事。

馳 啓天兵自東坡又退開城府狀

今日曉。臣與接待使李德馨等。俱詣提督下處問安。提督出令。軍馬分半欲送于開城府。使之休息。火箭器械。亦令送于開城府。臣甚怪其由。令譯官問之。則答云。此處無一房屋。天若下雨。軍器盡濕。則不可用。獨不見祖承訓之事乎。臣告曰。前日自坡州還駐東坡。遠近民情。莫不驚懼。今又分兵送于開城府。則雖老爺切於休兵更進。愚民豈知此意。且賊聞之。必乘勝西下。前功盡棄。願老爺

退軍還進曲折明白分付。陪臣亦當分道兼措。開城府糧料。提督怒曰。吾豈有退去之意。爾輩何以不曉事而多言耶。臣不得已退來。大概提督昨日不用南兵。與數十騎卒。遇賊兵不利而退。所當申勅軍馬。更爲進取之計。而遽爲退駐。今又欲退開城。勢甚可疑。而不肯明言。若聞退歸之言。則必發怒。若天兵因此而退。則賊氣愈驕。必乘勢長驅。恐大事因此不濟。不勝痛憤之至。且京畿馬草。全不接濟。自將官以下戰馬。一日倒殞者。無慮數百餘匹。其餘皆飢立待斃。欲刈取則軍人不來。欲輸運則江華通津等邑海島。往來必經數日。臣初非所管地方。事非預措。臨迫際計。無所出。

請急速輸運唐糧狀

癸巳二月一日

京畿糧草事。臣自前憂慮。必知狼狽如此。已曾累陳於狀。啓畿甸本是殘薄。兵火之餘。滿目灰燼。惟江華喬桐等邑。稍似完全。前年禾穀亦登。避亂之人及義兵等。充滿其中。公私船隻之聚泊者。其數不可勝記。若能先事措置。收聚蒿草於通津江華等處。細折五六萬石。分載船隻。又以島中之人。略有統屬。分運輸到。則可以接濟。至於軍糧。則先計見在元數。而知其軍馬幾日之食。不足則預爲輸運。忠清道內浦及全羅道海邊倉穀有裕之處。積置近境。臨時灌輸。亦可不至於窘竭。聞江華前日留泊之船。私相給與。所餘不多。又不約束人夫。登時輸運。事到目前。然後方欲取辦。文移往復。動經數日。雖百般督促。難可立辦。

今軍糧則稍有餘儲。可支數日。馬豆則竭乏已久。馬死者相繼於道。今日之勢。罔知攸措。昨日天將欲還駐開城府。臣與李德馨等多般哀乞。姑爲留駐。夕間招通事密語。更催後兵。欲爲進取云云。而惟賊兵屯據京城。我兵利鈍。似難預期。脫或曠日持久。則糧草俱竭。進退不得。任事之臣。雖萬死而不足贖誤國之罪。唐糧八萬餘石。若能及時追到。庶可支給。而尙無到近之報。臣不知一路所輸。今到何處。江冰已解。船路輸運之事。亦須急急措置。無失事機事。朝廷別樣善處。事係閩迫。屢次馳啓。

提督還軍開城府狀

二月三日

昨日提督欲還開城府。少休人馬。臣與李德馨等多般懇陳大兵一退。民心解散之意。反覆論辨。最後提督發怒曰。吾不過欲休兵更進。豈有退歸之意。爾等何不曉事。而煩說如此耶。仍爲停行。初昏。招通事辟左右。密語進取之計甚悉。且曰。正月吾本命對衝。不吉。故落馬。又不利于擊賊。必須於來月。可以進兵。傳語陪臣。但自知之。勿泄於人。今日朝。以戰馬多死。親自設祭。適天氣微陰。提督言天雨。則當退駐開城。臣更進請少駐。而終不聽。只留南兵炮手於江邊。馬軍則盡還開城府。極爲悶痛。大抵提督於二十七日。獨引家丁。輕進不利。因此退駐東坡。而諸將中如張世爵者。尤主退駐之說。今又自東坡更退開城府。雖云休兵更進。而其言亦難料其必然。糧料之事。臣前已狀。啓當初只備一路一

二日之需。今大兵留開城者四日。留坡州者二日。又留東坡者三日。顛倒追隨。彼此不及。罔知所措。賊兵尙留京城。若大兵從此遽退。大事將去。臣扣心號天。欲死無地。更欲極力懇乞。未知聽從與否。而提督攻城取勝。全用南軍。及其論功之際。北兵居上。以此軍情似爲乖張。若但以一勝爲功。無必進之意。則臣等區區才力。勢難挽回。尤爲痛悶。

請急運唐糧狀

二月九日

天兵入京畿界。今已十五日。糧料接濟。百計無策。前後船運後西江者。五千餘石。以黃海道金郊站所儲米豆二千餘石。更取於海州延安牛峯兔山等邑。添補而猶未能足。在東坡者。米豆并四千餘石。今方更爲流下。後西江以爲添補之計。提督初欲於今日進兵。不意天雨連日。道路泥濘。馬腹皆沒。勢難進兵。連留若此。而日氣猶未快晴。此後遲速。亦難預料。加以開城府人民渙散。尙未還集。凡事不成。頭緒三道。體察使俞泓因天將發牌來到。聞持平柳夢寅所言。已遞體察之任。卽發向江華。臣本以愚昧。且初非所管地方。凡運糧調軍等事。茫不知首末。而倉卒當此。罔知攸措。雖文移於全羅忠清監司。催督南方之穀。而遠水不救近火。何能及時調度。且京畿以及江原之界。兵火之餘。數百里內。無復人煙。軍民無不飢困。負戴運糧者。相繼道死。而平安節度使李養之軍。時在坡州。絕糧已久。死者甚多。更無推移接濟之路。尤爲痛悶。京城倭賊體探之

人皆言尙無出去之狀。昨日谷山郡守馳報內安邊賊將奉二王子向入德源云。賊謀兇譎難測。得無堅守窟穴。以待後兵乎。事事可慮。朝廷各別講求善策。唐糧輸到之事。星火措置。而北道防備等事。亦十分申勅待變。以防意外之患。

陳賑恤飢民狀

見本集

提督分送六千兵還守平壤狀

十月十日

天兵入留京畿境。今已十六日。悶迫之事。難以枚舉。且緣雨雪連日。道路泥濘。提督以此不肯進兵。昨昨。臣往東坡。監督臨津浮橋。催運糧料。有人傳言。天兵萬餘。發向金郊云。臣不勝驚駭。達夜馳還。問厥由于接待使等官。則云。谷山郡守馳報北賊自安邊向德源。李德馨傳示沈遊擊。沈即言于提督。提督即騷動以爲賊若從背後衝突。則我兵必危。即發六千兵還送平壤。使之守城。而猶無前進之意。稟其意向所在。則只言我豈有退還之理。今朝乃追還南兵。而亦未知畢竟如何。諉以路乾當發。而今日又爲下雨。路乾無期。極爲悶慮。

辭免兼察軍務狀

二月十日

臣前年七月受命。以檢勅一路糧餉事出來。其後九月間。伏承有旨。有兼察軍務鎮定之教。蓋緣其時有爲而然耳。今則別無可察之事。而臣前所云

元帥之任。不容有二。號令雜出。有損無益者。朝廷所宜更加詳察也。自古軍事。必須專任責效。若使一人。已任其事。而又使傍人參錯。無不敗之理。此易有輿尸之戒也。況臣性識昏劣。從前竊據。誤國誠甚。今於危急存亡之際。更犯古人所戒。以速僨敗。其罪益大。又臣自亂離以來。公私痛切。憂憤成疾。往往狂叫絕氣。思慮精神。日益顛倒。死亡無日。其勢已不能參理軍務。敢望 聖恩。還收兼察軍務之命。使之專力於所管糧料一事。

天將已定旋師。非緣糧餉乏絕狀。

今見提督咨文。緣各處運糧不繼。難於前進。至有還師之語。垂成大功。將虧一篲云。朝廷遠在。凡百措置。全委于卿。而莫重芻糧。不爲趁措。至於提督移咨。有此旋師之意。予心尤爲缺然。卿宜竭其心力。十分周旋。無使乏絕事。本月初三日。左副承旨成貼有 旨書狀。臣在開城府。祇受京畿人力殫竭。彼此輸運之間。不無淹留遲滯之事。至於近日。則南方運糧。連續來泊。時在江口者。米豆并一萬餘石。提督還師之計。不必在於糧餉乏絕。不幸自碧蹄輕進一跌之後。遽爲退縮。自碧蹄退坡州。自坡州退東坡。自東坡退開城。其意可知。今日已定旋師之計。臣呈文陳辭。前後懇乞。力已竭矣。自中已定之計。不以微言而有所移易。大事將去。莫非臣等無狀之罪。伏地痛泣。不知所達。

馳 啓賊兵犯全羅監司權慄陣敗退狀

他餘事前已狀。啓。天兵尙留開城府。臣以料理軍事。欲與元帥金命元相議處置。來到東坡。本月十二日午時。李贊馳報內。京中賊多出陽川。犯全羅巡察使權慄駐軍之處。時方接戰。云。臣前到臨津。令各陣及義兵。急速馳救。十三日曉頭。李贊馳報內。倭賊三衛出來。一衛持白旗。一衛持紅旗。一衛持黑旗。圍抱接戰良久。三衛皆爲我軍所敗。死者甚多。遁去。又據義兵將禹性傳馳報。賊兵來犯全羅陣。聞報卽時。分軍繼援。又自率舟師。水陸繼援。次發去云云。近日賊兵。自平壤敗歸之後。不敢出入已久。而天兵久不前進。賊又生心。連日出沒漢江以南。其數尤多。不勝痛心。天將之意。雖未詳知。當初碧蹄輕進不利。一向退縮。每諉以天晴路乾。則當進云。而懼賊在城中者甚多。近日體探之人。還自城中者。多言賊兵幾盡出去。天將欲於數日後進兵。適有譯官吳廷福者。十餘日前。自江華來謁。天將因請自爲體探。挾唐人一名同行。久未還來。昨日始爲來到。徑自入見天將。言賊兵之在城中者。無慮三四萬。且言陪臣等。使我言賊少。而今以實告。當得罪云。天將甚信其說。更停進兵之計。且留廷福在側。以防得罪。此輩情狀。極爲叵測。徐當觀勢處置。糧餉則南方船運。今始來到。東坡站下。到泊者。米八千餘石。豆三千餘石。足爲六七日之需。而今南方之穀。連續來到。糧餉粗繼。若能及時進兵。賊兵不無望風退北之理。而天將之意。亦無速前之計。臣與接待等官。苦口力陳。到此再三呈文。只言不滅倭

定無退歸之理。慎勿致疑云云。而觀其處置。則有退無進。百計乖張。罔知攸措。

有旨。祇受後馳報糧料措置緣由狀。

十一月二日

二月初九日。右副承旨成貼有旨書狀。臣在東坡祇受。凡糧料芻草。若非木處積在。則必須用力運轉。及其期限。然後可以接濟大軍。如使轉輸不時。則雖萬石之穀。在於相望之地。而軍行未免飢餓。當初自開城以上。非徒賊兵未退。而一年焚蕩之餘。公私殫竭。更無辦出之路。故自前年船運南方之穀置諸江華。以待軍興。其數至於數萬餘石。若能先期整齊船隻。收拾人夫。聞大軍臨到。以船輪泊于後西江。而又以所收人夫。登時運入。至於芻草。則一路亦無可辦之勢。若預爲收取於延安江華通津豐德等處。多聚公私船隻。趁時輪到。則似不至於狼狽。而事未預措。但於賊退一日之內。招呼開城一府。渙散之民。奔走轉輸。彼此不及。一日二日之間。軍已告飢。馬已疲頓。臨時雖竭心焦唇。亦無奈何。自平安道以來。各官之中。不能理事之狀。開城府爲最。其致天將之責。怒無足怪也。今則戶曹判書李誠中。與運糧使權徵。兼留守李廷馨。留在開城府。分戶曹判書朴忠侃。留東坡。檢察糧草。而東坡則時方遣在米六千九百餘石。豆二千一百六十餘石。其自忠清全羅道載船而來者。亦且數千餘石。而平賊之期。未知何日。坐食之軍。處處屯聚。事勢悶迫。罔知所措。唐糧八萬石。其數甚多。卽今水路冰解。船行無礙。而大同江下流。多有船隻。急時收合。別遣勤幹。

之人領來事。朝廷別爲善處。

馳

啓京城賊勢速請提督進剿狀

癸巳三月二日在東坡

近日京中賊勢體探來報之言終未的確。大概城中賊衆於十二日幸州之戰死亡甚多。此則逃還人所言如一矣。忠清水使丁傑馳報內十五日以舟師直抵龍山倉下。與倭賊相對放炮。賊之結陣江邊者殆將二萬云。而漢江以南自沙平院焚蕩之賊。比前益熾。以及竹山忠州陰竹之境。賊勢浩大。原州之賊來會忠州。多輸糧草。積置於彈琴臺。越邊云云。全羅巡察使權慄聞賊兵謀欲再犯。遽爲移陣。來到坡州。陽川以南之軍。忠清巡察使許頊之軍。全羅兵使宣居怡之軍。又復退守水原禿城。蓋以天兵退駐之後。衆心無所憑依。紛然俱退。臣欲更督權慄還守幸城。而木柵已焚。軍無所據。不得已使姑駐坡州。後山城與李養高彥伯等軍。鱗次連營。旣以固守臨津以南。又乘機勦擊京城東西。以爲進取之計。至於忠清湖南一路。則雖有義兵些少之軍。而官軍盡聚京都。其地空虛。脫或賊兵衝突南下。則兩湖郡縣。決無支撐之勢。殆非小憂。故臣令忠清巡察使分軍把守本道要害之處。更爲申勅各處義兵。使之極力邀截。而大概今日大患。惟在於糧餉乏絕。湖南之軍。則稍爲自給。李養所率之軍。皆是不安道遠處之人。經年戰鬪。疲困已極。又無糧食。逃亡者太半。餘存者率皆飢餓面黑。僅續聲氣。所見慘酷。其他如高彥伯等軍。絕食已久。公私各官。一樣蕩竭。

無計辦出不得已。除出軍糧數百餘石以救一時之急。而終非可久之道。此等悶迫。罔知所處。天將查總兵留在東坡。王必迪李寧以下。在開城府。臣與都元帥金命元。逐日陳懇。請速進兵。而每言稟請於大將。不肯決計。傳聞李提督時駐鳳山。頗有悔恨之意。欲還師南指。接待使傳通辭緣亦如此。萬一趁此諸賊未盡合勢之前。糧餉不甚乏絕之時。大軍更進。大功可成。朝廷別遣重臣。至誠懇請。以濟大事。

馳

啓北賊盡聚京城。我軍設伏截殺。緣由及糧餉乏絕狀。癸巳二月十三日

近日北賊自淮陽鐵原。連續上京。臣前日移文于李時言。及助防將鐵原府使金軼。使率平康伊川鐵原安峽之軍。沿途遮截。相機邀擊。又令京畿防禦使高彥伯。分兵設伏于楊州之境。以待賊至。出擊事約束矣。本月二十六日。高彥伯馳報內。軍官盧松。領軍設伏於典農峴。倭賊十餘騎。步倭二十餘名。出來橫行。我軍不意突出接戰。斬倭五級。又二十九日。高彥伯馳報內。伏兵將閔海。二十七日。沙彌里伏兵待變。未明時。北賊無數入京。已時至。流入軍官慎莽具忠卿等。并力合擊。射殺不知其數。又一時到付高彥伯。馳報內。祝石伏兵將俞鑽。馳報內。二十八日。賊始自抱川上京。自豆驗川至長水院。處處作陣。從後倭三十餘名上來。諸將一時突出尾擊。幾於盡殺。又據江原防禦使李時言。馳報內。賊兵二十二日。鐵原地長林廣野。二息程許。金化地。遍滿道路。數日留屯。防禦使

率兵設伏。二十五日，賊先鋒踰加乙嶺，後軍未到之前，突出掩擊，賊驚惶奔散。我軍乘勝追擊，斬首九級，又軍官李桓與金化縣監合兵勦擊，多數射中，斬頭二級。云云。據此諸報，參商事勢，北賊已爲盡入京城，間留在抱川等地。盤桓不進，必有奸謀，而積城朔寧遼川等地，蕩然空虛，無一卒把守，而京畿義兵官軍，自初托以天兵支待，已盡散去。今雖欲聚合，以爲把截江華，而軍糧乏絕，勢難措手。當初平壤戰勝之後，賊皆奪氣，其在京都者，大半南逃，若能乘此機會，及其北賊未來之前，鼓行勦滅，其勢甚易，不幸天將一跌於碧蹄，遽爲旋師，我軍則坐待天兵，遲留過時，使難得之機，容易蹉過，極爲痛心。今高彥伯只以飢疲殘卒數百，往來於坡州楊州之間，僅斬一二零賊，巡邊使李贊之軍，雖有千六百餘名，而饑羸困頓，難以進取。其他義兵等，徒有聚軍之名，而實無所用。忠清巡察使許瑱，當初來在陽川，亦以賊兵充斥於安城稷山之間，不得已退守其處，以護南方糧道，而惟全羅巡察使權慄，駐軍坡州山城，地形險絕，稍可自守。全羅兵使宣居怡，調度御史邊以中之軍，時留禿城，忠清水使丁傑，率舟師往來於龍山之下，欲以牽掣賊兵，使不得肆意西下。大概軍食不足，則雖有百萬之軍，無所用之。今艱收各處糧穀萬餘石，留泊江口，以爲天兵之需，不敢他用。此外京畿各官些少之穀，亦皆擬辦。唐糧不肯分餉我軍，而右道則無一處有餘穀，百計千思，誠不知何以爲計。

懲誌錄卷之九終

懲誌錄九

懲志錄卷之十

辰巳錄

有旨祇受後馳

啓賊勢及防禦形止狀

二月十日

二月十七日同副承旨成貼有旨書狀臣在東坡祇受自天兵退駐開城京都咫尺尙未克復痛憤欲死臣實欲憑仗天威督合諸陣以爲進取之計而適於幸州之戰我軍大捷賊氣愈衰此正可乘之機而不意權慄聞賊欲再犯之言遽爲移陣於坡州忠清監司許頊建議義副將曹大坤皆以本道空虛賊勢方急亦相繼駐兵於安城稷山之間其他義兵等皆因軍糧乏絕乍聚乍散諸處把截之事一樣虛疎事無可爲連日祈懇於在此天將而托言當出萬全不肯進兵尤爲痛悶賊氣大抵衰滅我軍若能連營漸逼大作形勢分遣銳卒處處攻勦使賊騷然不安則必爲棄城逃走而非徒軍律久解人各異心猝難驅策而大患尤在於無食罔知所處

料理軍餉狀

三月五日

前月十九日右副承旨成貼李提督雖已退駐而南方炮手數萬今方出來以此意曉諭人民使之鎮定其心第加措運糧草善待天兵毋致缺乏事有旨二十四日右副承旨成貼今見李德馨等書狀李提督今將前進前頭糧餉

馬草。剽其極意。措備。毋致缺乏。以待事有。旨書狀。臣并在東坡。祇受。當初
天兵乘破竹之勢。鼓行而進。遠近之民。咸謂京都指日可復。其未死亡者。稍稍
還集。不意大軍一退。人心失望。驚懼無復固意。臣亦爲此。留駐東坡。曉諭人民。
略以些少皮穀。分賑饑民。而心勞事拙。百計狼狽。目前慘酷之狀。則饑饉民生。
提挈老少。聞臣在此。庶望救活。日來集者。無慮千百。而無穀可濟。重以近日
風雨大作。枕藉而死者。日或八九。拊膺焦心。無可如何。春耕甃種。尙未入土。環
顧四方。蕩無儲穀之處。魚聚涸轍。不日將糜爛無餘。極爲痛迫。天兵支待糧
餉。則除已散給外。時方見在之數。米一萬九千九百四十三石。豆七千一百一
十三石。米則稍優。而豆甚不足。然大兵登時進到。猶可支吾。而今既曠日持久。
此處坐食之軍亦廣。如李贛所率及高彥伯曹好益之軍。皆爲仰給於此。今又
鄭希玄朴名賢之軍。來到澗川。亦告乏糧。臣欲令退去。則京城猶熾。欲令仍留。
則糧無可辦之路。事之難處。至於如此。臣之初意。則欲以忠清全羅船運之穀。
益以唐糧數萬餘石。支給天兵。至於京畿江原道零瑣。收合之穀。則不足以補
天兵一日之需。而竭取無餘。則軍糧民食。皆無所出。故欲稍留贏餘。以備本處
之需。不意天兵久留。戶曹及運糧之官。急於目前之窘。京畿各官所儲。及江
原道鐵原安峽伊川等邑所儲。幾盡取來。無復餘穀。今天兵未易前進。而我
兵舉皆飢困。不能成軍。此處楊州高陽交河等邑之民。經年與賊交戰。頗皆精

銳。近日高彥伯所率捕賊者，皆是此軍。若得萬餘石之穀，則數千精兵，可以立聚。其於討賊，必有其效。而頓無辦糧之策，其將奈何。傳聞宋經略已到義州等處，未知進兵之期，在何日。大抵唐糧三四萬石，來到此處，然後可無狼狽之患。

論京城賊勢且節制諸將各有統屬處處截邀仍乞請宋經略送南方精卒于忠清等道使先勦滅漢江以南屯守之賊以斷賊歸路狀癸巳三月五日

城中賊勢，則諸處體探之人，逐日來告，而所言不一。惟高彥伯之軍，皆是京城、楊州等處之人，故其所哨探之辭，頗得其實。又據逃回人供招，大概京中賊勢，近日多數聚會。當初天兵始到之日，賊兵甚少。自肅清門藏義門東小門，皆無守城之賊，北邊蕩然空虛。只有南邊一帶，以及山頭有賊，而甚爲稀疎。又於幸州之敗，死者太半。今則北賊盡入京城，原州之賊，亦爲來聚城中。如興德洞、柏子亭洞等處，賊兵皆屯守。自南大門以及慕華館近處，賊陣連絡。龍山倉則平壤敗歸之後，設城屯據。漢江亦有賊陣橫結浮橋，以相通行。而沙平院穿峴一路，賊兵亦多，出沒焚蕩。臣以此未嘗不痛恨於天將之一失機會，使至於難圖也。臣每念用兵制勝，惟當先得形勢而已。形勢既得，則雖弱可以制強。今賊既屯據京邑，憑恃險阻，而龍山等倉，尙有餘穀。主客勞逸之形，懸然不同。如非天兵大勢進勦，則我兵難以輕進也。但賊兵千里連屯，自漢江以南，直至

慶尙道孤軍深入。而左右皆有我軍。若能約束諸處官義之兵。先擊道路往來之賊。使首尾斷絕。則京城之賊。雖以鐵爲城。不得不動矣。伺其遁歸之際。從後追擊。可以全勝。而我國將士。一無致力之人。至於義兵。自京畿以及忠清道。無慮五十餘將。而不受節制於官軍。判渙乖離。日就散亡。勢難有爲。而官軍則其數亦少。率皆拱手旁觀。一不下手。人有問之。則必曰。姑待唐兵。極爲痛心。臣方頗爲節制。各以近處之軍。分屬武將。使有統屬。如楊州加平坡州長湍豐德高陽。交河抱川積城朔寧澶川永平之軍。則屬於高彥伯。使之勦截京城東北及碧蹄延曙等處之賊。利川驪州楊根砥平陰竹陽智等邑之軍。及召募使俞大進。義兵將李軼等軍。屬於助防將邊應星。使之勦捕竹山陽智金亮等處之賊。廣州龍仁果川及義兵將金琢等軍。屬於廣州牧使李箕賓。勦捕沙平院穿峴龍仁等處之賊。全羅兵使宣居怡。在禿城。故使之節制通津金浦陽川矜川安山水原南陽振威陽城安城之軍。分付別將。使與李箕賓邊應星等相對挾擊沙平院以下一路之賊。而忠清巡察使許頊。兵使李沃。駐軍於稷山安城之間。遮蔽東路。以護糧道。且以勦截竹山以下之賊。而各處義兵尤多。亦當有所統屬。如竹山義兵。則屬於洪季男。鎮川義兵。陰城義兵。忠州社倉義兵。槐山報恩等處義兵。亦皆擇其中可任者。分統責以勦擊其處之賊。而如有惰慢自便。逗遛不進。撓敗軍機者。一切以軍法從事。則旬日之間。人心齊奮。士氣頗振。賊平。

庶幾有望矣。聞忠清道義兵。則受制於建義大將沈守慶。故本道巡察使以下。不敢行其號令。而守慶遠在牙山。軍機之事。頃刻變遷。策應之急。瞬息難違。往來稟命於遠處。豈能保其不失機會。朝廷急速以此意。馳諭于建義大將。使行其節制。龍山倉火攻一策。臣亦料理已久。故忠清水使丁傑。近日率舟師。往來於龍山之下者有日。又令京畿水使李蘋。及倡義使金千鎰。各率舟師。以助聲勢。又借火箭數十千。天將送于丁傑。使之相機善處。但龍山地勢。江面有斷壠。倉在其內。我軍若容易下陸。爲賊所掩。則必至奔敗。故臣令丁傑等。逐日耀兵。使之牽掣賊兵。而別令陸軍。乘夜從後以進。以試火策。而將帥軍卒。必須精鍊。敢進素諳地形之人。然後乃可。故至今未試。從當百分詳審。處置計料矣。臣嘗觀兵書云。攻堅則瑕者堅。攻瑕則堅者瑕。故用兵之道。先自敵人瑕而攻之。則堅者自解。今賊之精兵。盡聚城中。法不可速攻。而漢江以南往來之寇。則皆是羸兵疲卒。輸運下馱之賊。擊之易勝。且水路自開城府到江華。自江華渡通津。道路無阻。而南方糧穀亦多。饋餉甚易。若以南方炮手數千。統於猛將。從水路繞出賊後。與我軍作爲形勢。乘其不意。直進勦擊。蜂屯蟻雜之寇。豈能支吾。漢江以南之賊。可一舉蕩盡。則忠州以北。賊路斷絕。京城之賊。將不攻自潰。如此然後大軍從後。鼓行以進。與前軍合勢。姑留其歸路。而追擊之。賊當隻騎不返。此甚今日之第一奇策。前日頗言於在此。天將而率皆武人。羸疎莫肯

念聽宋經略已到其處。急以此意傳告。幸而見聽。則非徒我國之幸。亦天下之幸也。鄭希立朴名賢等軍。亦聞來到楊州。令與高彥伯李時言等連營。以截東路。而軍糧不繼。京畿各邑及江原道伊川平康安峽等邑些少之穀。盡數括取以爲天兵之糧。更無可措之勢。惟此一事。計無所出。民間無斗粟之儲。而前日募粟事目太重。今經半年。尙無應募之人。中流失船。一壺千金。今豈可計其多少。亦乞朝廷急速講究得粟之策。如無食則雖有精兵萬數。許多計策。而皆無可用矣。此臣之日夜焦心。不知所出者也。

倭書上送狀癸巳三月七日

倭書呈禮曹一封。查將留置其處。只爲瞻示。故改書上送。又忠清水使丁傑了倭書一道。并爲上送。此乃事機之甚重者。朝廷急速詳議指揮。大概倭奴之爲此者。情狀有三。平壤見敗之後。又敗於幸州。精銳幾盡。今雖北道原州等賊來聚一城。而天兵在後。我國之軍。多在南方歸路。水使丁傑李蘋及金千鎰等。各以舟師橫截江口。高彥伯之軍。連日血戰於城東。我軍無所損失。而賊兵多死。所謂孤軍深入。難善其歸。點虜固已破膽一也。經年遠鬪。兵疲意沮。士卒思歸而兇酋不許。故欲藉此而歸報關白。得還其國二也。欲以講和之言。姑緩天兵。而留待其兵之後至者。添兵肆毒三也。臣竊觀天將處置言語。自前用兵之意未果。而雜出於講解退兵之計。今因此事。其計益行。故昨日臣與金

命元同進查將之處。欲見意思所在。查將以傷寒臥病。辭謝不見。夜間查將密遣家丁到臣所接處。傳查將之言云。病差則吾當親到倭所。哄他先爲圖出。王子其意欲令臣作答書與倭。臣答云。倭賊弱則詐和緩兵。例也。前於臨津及平壤之戰。亦皆如此。何可信聽。而陷於奸計乎。况老爺前於平壤。已入城見倭。而旋卽用兵。倭奴固已懷憤。今不可親見凶賊明矣。至於作書。本國於此賊。有窮天極地之讎。雖死豈有講和之理。以此謝遣。而今朝查將更招通事云。今日病歇。須通于元帥議政。與之議事云。未知所言如何。大概中國厭於用兵。欲許貢退兵。以息生靈之禍。而在我國。則大讎未復。而兵力寡弱。欲藉他兵以復。故有此難處之事。而延遷之間。糧食匱竭。軍民潰散。則雖有可乘之機。力戰之將。勇銳之卒。皆無可用之處。事勢之急。日甚一日。極爲痛迫。

馳

啓王參將欲送探漢南賊勢狀

日同

昨日王參將貽書於臣。欲遣南兵三十人。從海路往探漢江以南之賊。蓋緣忠清道義兵將李山謙。來到開城。於路上見唐人言。先擊南路之賊。則京城之寇自潰。唐人入告參將。參將卽招山謙問計。貽書於臣。臣答書極贊其計之妙。又定軍官率軍人十名。護送唐將。與山謙偕行。此計若行。則京中之賊。根本斷絕。勢必難久。大軍從後鼓進。而諸軍四面蹴之。則必能全勝。極爲喜幸。王書及臣答書。謄書上送。近觀天將所爲。只因南軍北軍未能和協。大功遷延。實在於

此伏聞宋經略已到平壤云。如蒙經略肯諾，則實爲今日恢復之第一策。近日各處軍兵頗有奮勵勤賊之效，而只以糧食不繼，未能有爲。如天兵不時前進，則以此軍糧除出餉士，以收一戰之效，勢不得不爾。

馳

啓兩湖事勢危迫，參酌處置狀。

癸巳三月十日 在東坡

此處天將糧料大概前已馳啓。今據戶曹判書李誠中分戶曹判書朴忠侃所報，米豆幾至四萬餘石。天兵糧餉稍可支吾，至於馬草，時方陸續輸運。當初提督退兵，非因糧乏一事，只緣碧蹄輕進，蹉跌轉輾至此，坐失機會，眞可痛心。臣又有所慮者，兩湖幸未盡經兵火，頗緩於他道，而自前年調度諸役，皆出於此。且李洸崔遠之軍，中道潰散，盡失糧資，督運未已。其他義兵官軍，作弊侵徵，割剝公私，無有紀極。民力殫竭，蓄儲蕩盡，尤甚於被兵之處。傳聞忠清道黃澗永同清州等地，四無人烟。但聞風水之聲，而自忠州以上之賊，殺掠甚於秋冬。大抵賊雖因大軍在西，不卽遽向，而雄據京邑，更事漢江以南，乘其空虛，衝突於兩湖之境，則將何以禦之。假使棄城還歸，而糧盡之賊，欲取郡邑餘穀，以爲行資，亂出搶掠，勢所宜有。今南方之勢，極爲危迫，而天兵支待軍糧，盡在於稷山之間。其他糧草輸運，來在路傍者，已多爲賊所掠，不徒此也。京畿郡縣初聞天兵之至，只以支供爲急，盡忘備賊之事。右道各官守令，如果川抱川仁川富平南陽通津，盡數分定差使員，棄其官守，盡率一境之人，奔走諸處。

至如義兵聚合之人。亦稱天兵支持。運糧負草。散軍獨處。不復以討賊爲心。臣竊深憂之。急速行移于京畿。左巡察使成泳。令約束左道軍兵。且傳通義兵。合勢把截。而往復遷延。已經旬朔。前月十七日以後。漢江以南。賊勢愈盛。抱川。旻川。果川。水原。近處。無不焚蕩。人民駭散。雖有全羅兵使宣居怡。居守禿城。僅僅自保。其他更無邀截之軍。加以軍食匱乏。京畿郡邑。些少之穀。已爲竭取。無餘。雖欲調兵禦賊。而飢羸困頓。朝夕將盡之民。何用於戰陣。臣之初意。曾已慮此。故天兵糧料。則只以南邊船運之穀。益以唐糧數萬餘石。庶幾支持。而至於江原道。京畿之穀。則姑未盡取。以爲我國軍需。此計未行。今到無可奈何之地。徒爲罔措。京畿左監司成泳。才器劣弱。識慮不長。不足以當事於危迫之際。近日處置。未免疎漏。左道之事。尤甚可慮。而顧難得人。以代。則亦不足以濟事。故臣姑未敢請遞。朝廷更加商量處置。忠清道牙山等處倉穀。則本道巡察使許頊。馳報內。御史姜籤。竭取轉輸。更無餘儲。極爲可悶云。臣意此處軍糧。略已措辦。兩湖之穀。雖不可不運。而亦當稍存贏餘。以備不虞之用。似爲便當。若兩湖板蕩。軍民潰散。而不可復收。賊兵乘虛。掩其無備。則國家根本之寄。更在何地。此等曲折。更令該司。十分商量處置。

論軍糧民食狀

天兵退駐平壤後條陳軍中事宜狀

賑救飢民狀

并見本集

有旨祇受後論碧蹄敗北緣由狀

今見李提督則深以我國軍兵善遁爲戒。碧蹄之戰。未知何將奔北。卿其詳覈啓聞事。本月初七日。同副承旨成貼有旨書狀。臣在東坡祇受。臣觀於前世危亂之時。必有一二將才。而今時則絕乏。雖統率軍兵。而部分不明。約束不定。紛然雜糅。有同趨市之人。及其遇賊之際。望風奔潰。不可收拾。國事之至此者。不過因此而然耳。加以軍不精鍊。而將無撫循之素。下多飢困。而上無吮疽之惠。將卒之心。不相合一。何能使之赴蹈湯火乎。近觀諸陣中。惟高彥伯所率楊州之軍。頗從彥伯指揮。出入戰陣。不避死生。蓋緣彥伯平時。頗得士心。與同甘苦。臨事約束堅明。故如此。只恨其軍數少。不能摧郤大敵耳。至於他將。則誅殺軍士。非不多。而士卒益不用命。以此知爲將之道。不專在於嚴酷也。其日碧蹄之戰。臣在坡州。見天將初無號令約束之事。早朝。高彥伯隨查將先進。碧蹄。斬殺倭賊甚多。李養率軍陣于前路十里餘。及提督不意挺身獨出。馳去。欲親自體探。不爲戰備。李養聞提督之去。從他路隨進。未及合勢。而天兵已爲退來。若於交戰之際。我軍精銳數千。從傍突出。橫擊賊陣。則似當不至於敗衄。而未能爲之。若論其罪。則李養當之矣。然此日之事。天將自無號令所致。不

但罪在我軍。其時臣猶在坡州。而元帥金命元隨天將在後。目見其事。更當詳問處之。聞碧蹄之役。各官出站下人及輸運糧草之人。爭先呼號奔走。擁塞前道。與軍兵相雜俱退。或多爲賊所害者云。大功不成。遷延至此者。實此日一戰爲崇。追思至今。徒切痛惋。

馳

啓我軍糧盡緣由且請寬恤遺民狀三月十日

忠清道助防將洪季男牒呈內。陣中自備軍糧百餘石。在新昌地山寺。督運御史以天兵支持。全數封閉。他無餉士之路。士皆潰散。陽竹之賊。倍前鷓鴣。而助防將處於賊兵要衝之地。散軍獨在。束手無策。不勝悶慮云云。義僧將惟政牒報內。於黃海道僧人處。募得軍糧若干石。而檢察使御史盡數封閉。軍人無路繼餉云云。天兵糧餉雖重。而若於未及進兵之前。我國軍兵。先爲潰散。使賊兵深入。墜突於後。則雖有大軍追到。而何及於事乎。凡事所當參詳。彼此輕重之勢。周遍處置。然後可無狼狽之事。而近日奉命及該掌之官。一諉於天兵之糧。遠近公私之穀。盡取錙銖。無復餘儲。他餘官家所用。及救民耕種之事。已無可言。至於本國軍糧。全無辦出之計。處處潰散。無可奈何。如江原道。伊川。平康。鐵原。安峽之穀。既無贏餘。故防禦使李時言。鄭希玄。助防將朴名賢。成川判官朴震男之軍。雖自北道出來。而逃散殆盡。餘存者飢餓困極。不可成軍。而京城以東。焚蕩殺掠之賊。不可遮截矣。李贊所率之軍。當初有三千六百餘

名而京畿亦不酬應軍糧。至於七八日。盡爲飢疲。幾盡散亡。死者三十餘人。馬之倒損六百餘匹。不復自立。不得已。附合於全羅巡察使之陣。晚雖除出唐糧。略略支給。皆已病困。面如藍鬼。而爲無用之軍矣。漢江以南。京畿左道之穀。不計種子。盡皆備數於天兵之糧。而軍無可食。舉皆潰散。故賊兵散出。攻怯於數百里之內。殺掠無數。而無一人出禦。左道不可爲矣。忠清道沿路一帶。必須嚴兵把截要害。且戰且守。然後可以禦賊。而如洪季男者。亦以無食散軍。則他何可望。今日事勢。潰裂百出。首尾心腹。不相顧護。可爲寒心切骨。傳聞黃海道以及江華等處。括粟之令。急於星火。軍官無識之輩。遍歷閭閻。雖無斗升之米。而勒定責出。呼哭盈路。不可忍聞。云此亦雖出於不得已。當此民心潰散之際。亦當少有斟酌。使公私兩濟。如其自願募納者外。飢民下戶。少加寬恤。以示國家愛民之意。則所失不多。而爲益甚大。敢乞朝廷十分參詳指揮。毋令有難處之患。

賊中出來書封上送狀

癸巳三月十六日在東坡

節到付倡義使金于鎰。水使丁傑。李蘋等。本月十四日。成貼馳報內。守門將李蓋忠。黃廷或。孽族安鐸。一時十三日。入送賊中。當日午時。持書還出來言內。與安鐸等。自大古介經藥田前路。至青坡石橋下。從橋下川邊之路。越川過十餘家。至一大家。乃賊將清正所在之處。見清正者。年可三十。與兩王子共坐堂。

中。蓋忠就拜。王子前俯伏而哭。王子亦哭。清正再三回顧。有不豫之色。王子卽止哭。問西關消息。清正使譯者問曰。遠來危地。無乃爲苦譯者。乃前曰。叛國沙火同之弟云。賊將指二。王子曰。公見。王子肌膚顏色如何。少無羸瘠。可知吾厚待也。且曰。講和之事。何以爲之。速示可否。則欲決行止。今欲向關西。而以講和一事。迄今遲滯。何以遷延無黑白乎。今者日本關白發諸島之兵。朝暮渡海。入驅朝鮮。直擣中原。則悔無所及。何不速爲之處。蓋忠答曰。目今天將率百萬之師。與本國報讎之兵。振旅而來。日本能戰則戰。非所知也。但講和之事。我國難擅。故稟於天將。天將稟於天子。往來稟命之際。動以旬月。豈能速決。賊將笑曰。然仍與蓋忠等對飯。行酒三杯。然後乃召黃廷彧父子及李瑛。各自異處而來。亦行酒三杯。曰。朝鮮上官。今來于此。公等相與傳言上官。告于大將前轉報。天將速定和議可也。俄而賊將曰。我有不得已入京事。公等共坐于此。以待吾還。遂出去。諸卒下之。倭縵立帳外而守之。王子及三人共坐燈下。各道辛苦之狀。慘不忍聞。王子身著毛段道袍。頭戴毛冠貂皮耳掩。曰。我常常著白衣。而今日則倭將逼令改著華服。固辭則怒曰。君欲著陋服。示我薄待之意。於來使乎云云。故著之矣。臨海君舉冠露額。指瘡痕曰。上來之時。中路賊將持棒亂打。傷破之處也。黃廷彧亦曰。路中以我爲知傳國寶所在之處。而不爲指示。無數毆打。幾死得生。李瑛則曰。吾罵賊不屈。再三欲殺而止。頑命。

不死辱國之耻。其可忍言云。兩 王子欲乘賊將之出。還入房中。備書私簡云。還入所寓處。卽是翼廊房也。夜深。賊將始歸。直入其房。故三人及蓋忠。與從倭宿于別處。翼日。平明。賊將使人問訊。朝食後。因授送 天將之書。及兩 王子答書。及諺書。而皆不復相見。因爲出來。自京江至賊在之處。十里之間。處處橫屍。人頭散亂。臭穢難近。而賊倭蹴踏而行云。其李蓋忠持來賊將送 天將書。適沈遊擊來到。求見。故納于遊擊。不得上使。又有行在所了無臣字。長紙封書。開見。則三擄臣聯名之書。而言多可駭。痛憤莫甚。所當卽投火中。而旣已開見。棄置不可并 王子答書。皆爲上使事牒呈云云。所謂 王子書一封。則上送三擄臣一書。則外書 行在所開圻。而內外皆無臣字。但云長溪君南兵使行護軍。各著署而筆畫。則似是黃赫所書。旣無臣字。而言多可駭。此則必是賊將脅勒使爲。極爲痛心。故元書則不敢上送。而其間事情。則 朝廷不容不知。故一依其樣。謄書上送。諺書則未來。故移文推問矣。臣等雖在此處。而 天將所爲。頓未聞知。雖問於查將。而亦未明言。大概以此舉止觀之。則明有講和之意。沈惟敬周弘謨。旣爲進去。十四日。臣以看審全羅營出火事。往在坡州。日暮時。唐人四五十騎馳來。問之。則以爲欲向京城云。昨日又有指揮吳宗男者。乃與黃應暘。前日往來之人。自寶山持宋經略牌文回來。見從事官辛慶晉語之曰。爾國糧草不敷。而春耕已迫。若過數十日。百姓當糜爛俱盡。賊若欲和退兵。則

不可不許其通貢。而與之講解云。因卽馳去。臣自前年以後。屢與唐人相接。察其言語。而得其情事。只欲講解退兵。以息兵禍爲心。雖知我國於此賊。有不共戴天之讐。痛心切骨。而不肯遽言其講解。其實用兵之意。未爲堅定。蓋自碧蹄退軍之後。無意於更進。臣爲之日夜焦心痛骨。而今此事勢又如此。我國雖欲竭力叫呼。其可得乎。尤可悶痛者。我國財殫於支給。力竭於轉輸。非徒京畿爲然。忠清全羅道。無復有可支之勢。且奉使督運之官。多是年少不經事之人。一諉於天兵支待之急。竭取公私之儲。無復餘力。而盡散官軍義兵。不復以把守爲心。故自漢江以南。以及忠州之界。一樣空虛。而賊兵方四出搶掠。逐日不已。南方事勢。日益危急。臣本以庸劣無狀。冒此重任。徒以文移擢督。而軍兵一散之後。難可復合。且到處倉穀無餘。其僅得收聚者。亦皆盡入於天兵之糧。啓聞其數。以示唐將。不敢他用。此外更無可措之策。若非朝廷深惟彼此之勢。早賜指揮。則如臣愚劣。雖萬被誅。難免誤事之罪。至於和戰二策。乃是國家存亡所係。假使事勢極難。實出於不得已之計。天將猶當與我國十分商確。臨機善處。而使我不得與聞端緒。尤爲悶鬱。李盡忠入送事。則金千鎰等。不稟於臣等。而徑自爲之。事涉率爾。而因此探知賊勢。不至於大害。故姑未深責。

附金千鎰書狀

今三月初九日。黃廷咳與倭賊出到江邊曲折段。已曾馳啓爲白置。其後

臨海君奴長世及黃赫孽族安鐸等賊倭一時逐日持書簡出來求和事。一馳報都體察使爲白在果十二日。臣與忠清水使丁傑。京畿水使李蘋。領率諸船乘潮直上。先使一紙書示不戰逍遙之意。然後自蚕頭嶺下。鼓笛振作。雜以螺簫。過西江抵黑石賊倭五六。列立相望之處爲白如乎。已時。長世等又與賊倭十餘名持書簡出來。臣等詳問賊中情狀。後略書回答付送爲白遣欲探賊情虛實及兩君居處。臣麾下守門將李盡忠。從自願入送爲有如乎。同李盡忠十四日還來進告內矣。身自大古介。經藥田前路至青坡石橋項。從橋下川邊之路。越邊過十餘家。至一有銀杏樹大家。乃賊將清正所在也。引入外廊二食頃許。方乃召入翼廊之內。金屏紅氈羅幃錦帳。極其盛飾。見倭將清正者。年可三十。與兩王子共坐堂中。盡忠就拜。王子前。王子問。主上寒暄訖。清正以譯者問答。而譯者。迺叛國賊人沙火同之弟。云。賊將指。王子曰。公見。王子肌膚顏色如何。少無羸瘠。可知吾厚待也。且曰。講和之事。何以爲之。速示可否。則欲決行止。何以遷延無黑白乎。日本關白發諸島之兵。朝暮渡海。入驅朝鮮。直擣中原。則悔無所及。何不速爲之處乎。答曰。目今。天將率百萬之衆。與本國報讎之兵。振旅而來。日本能戰則戰可也。至於講和之事。在於。天將非我國之所敢擅決也。又曰。冒險入來。無迺爲飢。聊具薄饌。於是童奴進食。先賊將次。王子次盡忠。相對而飯。

并行酒三杯而撤。然後廼召黃廷或父子及李瑛。皆自異處而來。亦行酒三杯。曰：朝鮮人來此。公等相與傳言于此人。使之告其大將。轉報江南之將。速定和議可也。俄而賊將曰：我有不得已入城中之事。公等共坐于此。以待吾還。遂出去。諸卒下之賊。縵立帳外而守之。王子及三人共坐燈下。各道辛苦之狀。慘不忍聞。王子身著毛段道袍。頭戴毛冠。具貂皮耳掩。曰：我常著白衣。自欲和以來。賊將措備衣冠。今日勸令著之。固辭則怒。曰：君欲著陋服。示我薄待之意。於來使乎。強令洗面改著云云。且臨海君舉冠露額。指瘡痕曰：上來時中路持棒亂打傷破處也。黃廷或亦云：以我爲知傳國實所在之處。而不爲指示。於路上無數毆打。幾死得生。李瑛則曰：吾以罵賊不屈。再三欲殺而止。頑命不死。辱國之恥。其何忍言。兩王子欲書私簡。先入房中。夫人亦同在此云。夜深。賊將始還。蓋忠與從倭宿于別處。翌日食後仍給附呈。天將之書及兩王子答書并黃廷或等行在所了無臣字。長紙書一封。仍與安鐸及從倭等還出來。同李蓋忠持來之書段。都體察使處。皆爲封送爲白齊。十五日巳時。前項長世等復持賊將之書及兩王子書簡出來。問答之際。天將沈遊擊周遊擊謝相公三將率其家丁二十三人乘船直來于臣等泊船處。賊倭等望見黃傘。知天將之至。李蓋忠亦答書傳給次下陸。時賊倭等蓋忠親自入歸面告。天將來由於其將亦爲白去乙。蓋忠

如其言入歸。申時。李蓋忠持倭書還出來。天將望見蓋忠之還。促令招見。問王子肥瘠何如。答曰。柴毀骨立。又問賊中芻糧何如。曰。糧之多少未可知。但見其衆頗有飢色。糧乏可知。而馬則只吃腐草。瘦骨崢嶸。死馬之棄路者。無處無之。無草可知。又問賊兵多少。曰。未能詳知。大概觀其出入之倭。皆疲殘無勇。摧挫可知矣。天將曰。知悉。令通事金善慶傳言于賊曰。俺等只聞有平行長。不聞有清正。今始知汝實獲得王子者也。然則可速通書于俺等。俺等受天子之命。爲大將軍。非如前日往安邊之馮淑絃職卑之比也。云云。開諭入送。天將仍宿舟中。當日辰時。天將令角行船。臣等領率舟師。一時隨行至西江。賊倭騎步者。如前列立觀望。爲白如乎。午時。賊將平行長玄蘇世俊等出來。天將則下陸。不冬爲白遣。使通事及家丁傳語。且以書辭往復。其間秘密之意。不能詳知。爲白齊又有清正所使之倭三十餘名。與前項安鐸等出來。天將又書答書。附送于清正。而皆以秘密爲之。不得參見。爲白齊。天將仍泊西江。臣與丁傑李蘋領舟師護衛。天將以宿云云。

懲愆錄卷之十 終

懲忿錄卷之十一

辰巳錄

有旨祇受後仍論行間以離賊黨事宜狀同日

本月初九日同副承旨成貼有旨書狀臣在東坡祇受昨日申時舟師將金千鎰等又送王子書二道及別錄一紙故監封上送別錄則似是黃赫所書而清平兩賊互相猜阻此亦行間以離其黨之時適沈遊擊於昨日午時自開城府馳來臣已略書多為之間以離其黨之意以送而沈略見查將于其幕忽忽過去故不得相見問其意思如何大抵自古夷狄最為無厭豈有和好得成之理況我與此賊有不共戴天之讎雖死而豈可與之講解臣又觀賊謀甚為難測數日來散出搶掠未已不無欲以此故緩我師與天兵而益逞兇毒之計臣日夜焦心而制在天將末如之何今此有旨辭緣詳審奉行後更為馳啓計料

軍人等軍功論賞狀癸巳三月十日

臣近觀京畿及各處官軍義兵九日在半潰散其幸未散者亦緣飢餓無食不能成軍故不復以捕賊為心極為可痛且以自前軍功或不趁時施行因多缺望之心臣悶其如此自近日凡有軍功者即時成給考功貼書某年某月某日某人

斬賊幾級。後日憑考論賞云云。而著署踏印給之。軍心頗爲喜悅。不無激勸之意矣。高陽有義兵將宣傳官李山輝者。所率之軍。亦以無食散去已久。臣招來少資軍糧數石。使之伏兵於龍山等處。連有斬獲。如山輝者。各別論賞。以勸其餘宜當。各處軍人所奪餽物。除不得已上送憑驗表表之物外。其餘牛馬衣服等物。則使之卽給其人。蓋軍食不敷。既不能散給官糧。則惟此一事。可以少慰其心。俾無潰散之患矣。高彥伯軍人盧松。前後捕斬賊首甚多。近日率軍百餘人。出入於京城內外。每戰先登。勇膽出人。臣成給空名奉事告身。其後戮功尤著。朝廷亦量宜行賞。使之激勸興起。恐或無妨。

沈遊擊自賊中出來狀

日同

昨日。金至貴及本國通事金善慶等。自龍山舟師到此。沈遊擊則取道江華。直向開城。又有吳宗道者。亦自龍山馳過。皆云向宋經略所在處。查總兵以沈遊擊不來見已而去。責怒不已。且謂譯官張翰等曰。沈遊擊所爲。我全不知之。此意須言於體察使云云。臣問善慶以遊擊所爲。則云到船招平行長與言。而清正亦欲相見。講和遊擊不肯。因以書字往來問答。而秘不得見。但聞遊擊欲取稟於宋爺而定。行長問還期。則遊擊以來月初八日爲限。而還云。又據京畿水使李蘋馳報。膺書周弘謨上提督書一紙。其爲講解。似非虛語。前日下送榜文。都元帥金命元。則欲卽入送于城中。而臣意。沈遊擊方在其處。萬一此書傳

於賊中。如清正者出示遊擊。責其與行長等私約。則恐天將大有愠怒。而事有難處。且此榜文。大書踏印。亦恐賊疑其行間。而不爲深信。則反致敗事。故姑未發送。觀勢處置計料。臣自天兵退去之後。與都元帥金命元相議。約束於諸將。使丁傑李蘋金千鎰等。以舟師橫截於江口。夜間乘潮。以各陣所造龜船。載火炮。攻破漢江浮橋。使不得恣意往來。而又令義兵將李山輝朴惟仁及秋義使禹性傳。精抄軍人。三江高陽等處。詳知地形之人。細探賊勢。然後欲圖龍山。先破倉穀屯守之賊。則餘賊自衰。雖未知果能成事與否。而諸陣則皆受指揮。方謀進取。適又有沈遊擊往來之事。軍心日解。極爲痛悶。且自今日。至來月初八日。中間更有二十日。其間各處軍馬坐食之費。亦無紀限。而春盡夏來。此後變故。又安可預料。臣晝夜憂慮。不勝悶迫之至。數日前得於道路。聞全羅水使李舜臣。邀擊出來倭船於釜山浦近處。又爲勝捷。多奪賊船軍糧云。公文未到時。未知虛實。而此言果實。則賊方運糧於其處。兇謀所在。實爲叵測。而我國舟師。適又撞破。以挫其勢。其幸實大。緣係軍機。先以所聞并達。

請各道經變郡邑。聖廟位版各定士人奉守以待事定狀。癸巳三月

亂離以後。各官鄉校。盡皆焚毀於兵火。聖廟鞠爲茂草。位版漂失。不知所在。處者甚多。水原府。聖廟位版。亂初避寓於府地雙阜縣民家。香火廢絕。守直無人。極爲傷痛。時方經費竭乏之際。訓導雖不能差出。而以本邑近處士人中。

有識者。假以教授訓導之名。專委守直。聖廟之事。率其邑中士子。時時瞻掃。以待事定。他邑有位版處。并令依此施行。則聖廟不至於無依。而一方人心。庶或可慰。請令該司。急速商議處置。

馳

啓賊勢狀

癸巳三月二十二日

近日賊勢。大概已具於各處。馳報。自今月初十日。賊兵散出於東邊。焚蕩殺戮。於楊州抱川。以及加平之境。李時言。鄭希立。朴名賢。高彥伯等。或接戰。或設伏。射斬邀擊。昨日。臣軍官金善義。都元帥軍官崔韻等。及防禦使軍人僧軍等。又爲邀擊於松橋近處。斬得十餘級。西邊則自碧蹄退兵之後。賊兵久不出入。惟於延曙等處。往來刈草。還入城中。而倡義將朴惟仁。秋義將尹先正。義兵將李山輝等。連日交戰。所斬亦多。首級之數。已載於前日狀。啓矣。賊兵雖似數多。而我國被虜者居半。官義諸軍。不無爭先賈勇之氣。頗勝於前日。所患者軍食不敷。僅得連命。人馬困乏。不堪馳突。擊刺。難以大捷。惟此一事。無善處之策。當日午時。巡邊使李養體探軍人。馳報內。賊兵已時。新院近處。先鋒及後軍。連續出來云。雖未必來犯坡州等處。而時方戒嚴待變。

見賊陣出來

王子書仍與查將論賊勢狀

癸巳三月二十四日

本月初七日。臣聞黃指揮自江華來到。將向坡州。臣與金命元。同在路傍。邀見問之。則以爲將往坡州。及王京城外。體探賊勢及道路而來云。午時。有琴連希

稱名人。持二。王子連名書。及賊將清正。與馮相公小紙書以來。推問則曰。賊酋清正云。在安邊時。唐將來到約和。期在今月初十日。欲通書問其來否。而無人可使。王子使連希及楊州被虜人某。同時出送云。見其書。則乃。王子與天將及我國將官書。近日賊勢日益可憂。自南邊上來者甚多。倡義使金干鎰。生擒倭一名。昨日送于此推問。則曰。日本大上官。今在明月屋。三月間。似有出來之報云云。雖其所言。未必盡實。亦不可謂無此理。當初。天兵既失機會。使凶賊益生奸計。而我國將士。亦以。天兵同進爲誘。遷延度日。至於京畿左右道守令。皆以。天兵支持之事。棄官奔走。盡散軍兵。專治輸運供給之事。至今未已。漢江以南之賊。日益熾盛。連日焚蕩於衿川水原南陽之境。還集之民。又被殺戮。南方之勢。危急甚於西北。而賊乃於此時求和。豈其實情。不過欲姑緩。天兵。而留待後軍。以逞兇計。極爲寒心。臣卽又見查將探其意向。則查將求。王子書以看。謂曰。見王子之書。不覺淚下。將何以救出耶。不如姑爲許和。出送。王子。然後徐爲之圖。未晚也。況天時向暖。此地多稻畦。不便進兵。奈何。臣答云。使賊直欲講和退去。其辱大矣。況此賊實欲以此緩師。而更逞凶計。恐天朝與我國俱陷於賊術。不可不察。查將曰。然則計將安出。臣答云。有一奇策。恐老爺不從耳。查將固問之。臣答曰。若大兵進駐開城東坡。以作形勢。而使奇兵。出於南方。先擊道路之賊。出其不意。攻其無備。則賊兵之在京城者。道路斷。

絕必從東邊向龍津等處而走。因使萬餘兵先陣於楊州蟹踰嶺間。從後追躡。則賊必殲盡。今日之計。無踰於此。查將擊節稱賞。以手畫地。指點形勢。曰。若然。則賊必乞降之不暇。而王子可還矣。假使不降。將餓死俱盡。且曰。如此奇計。何不早告。吾將即報于提督。宰相亦自作書。通於提督及經略。臣答云。前亦屢發其端。而未能悉意。昨日以此意。已爲狀啓。而今承老爺肯許。此乃天也。查將方始釋然。更不舉論講和之事。即將王子書。馳送于提督。而其所自通之言。則未知如何。清正與馮相公書。留置不遣。其意亦未知如何。大概觀唐將之意。南將北將。全不和協。昨日黃應暘之來。查將大不悅。令臣等不發人馬。亟止其行。而臣辭以不敢。今此不送清正與馮之書。亦恐同是一樣意思。惟此一事。極爲痛悶。爲我國不幸之甚。古者兵交。使在其間。王子之書如此。機關極重。何以處之。可以合宜與否。非臣愚劣。所敢料度。朝廷急速詳審善處。毋失事機。宋經略出來與否。急速傳諭。以定人心。

王遊擊答書上送。且使李山謙進去親論勦擊漢南賊屯形勢於提督狀。

癸巳三月二十六日

臣卽見王遊擊必迪答書。其中有當事者。有主和之意。我故難以專主之語。又云。具稟經略及提督。批示方可遵行。其書監封上送。從前天將等。已有講和之端。而不肯明言。蓋知我國痛心切骨於賊。有寧死不和之意。故前日沈遊擊

往龍山時。臣立於道左欲見。而托以行忙馳去。其還又不由此。直自江華而去。今又王遊擊所言如此。若不於經略提督處痛陳力辨。則將恐事機蹉失。狼狽益甚。而我國之事。益無奈何。不勝痛泣。大概倭奴雖憑據京城。而其氣已衰。若大軍牽掣其北。而奇兵出於南道。忠州以北。一舉蕩滅。則都城屯賊。不待血刃而自潰。此萬全之計。不可失之機。事勢灼然。只在目前。而遲疑不決。師老力竭。臣觀李山謙者。頗有才氣。言說通暢。且從南方而來。方留南兵二十餘人於其營。故此處將官吳遊擊王遊擊以下。於其所陳事情。頗有傾聽。萬一提督及經略。一言見施。則爲益不少。山謙亦自願進去。故使之速去。臣前此已具呈文。送于提督。大意則已盡於其文。伏乞 朝廷。急速祈懇。俾令大功有終。

論勦擊南路賊屯事宜狀

日同

近來賊兵出於東西者。只以焚掠民居。掘取財物爲心。旋卽還入。且 天兵方駐開城。賊必不敢容易西下。朴名賢鄭希玄。則時方在此。與高彥伯李時言等。遮遏本道之賊。大概今日所患。在於無食。而不在于無軍。有食則數千餘兵。可數日召集。雖不徵兵於遠道。可以制敵矣。大抵今日賊兵之所在。只有京城與一路耳。其他皆爲我有。臣之前日所陳。欲使唐兵。先從南道勦擊者。真是可行之策。此處 天將如查總兵王遊擊等。亦深以臣言爲是。遊擊所遣體探南兵三十名。方在振威李山謙之營。見其賊勢易與。亦欲勦擊。使一兵同李山謙馳

告於遊擊請兵數千。臣聞此語亦卽作書于王遊擊使之速決而時無回報未
知見施與否。大概南將則務於進取。只緣不能自擅難於決計誠可痛惜。

馳

啓宣諭官李貴募粟辭緣及姑留李貴爲從事官狀癸巳三月十七日

宣諭官李貴牒呈內卑職去年十二月承宣諭之命及道關據持空名帖往
黃海江原等道曉諭民間收合升斗以助軍需納粟人等成册上使事牒呈當
初李貴以國事方急隨力扶助之意出入民間周遍曉諭零瑣收合所得雜穀
三百六十六石除已輸到開城府爲天兵糧餉外其餘則添補於我國軍餉
俾免數日飢餓之患矣。向前李貴於天兵來駐開城之後各處糧草未及之
際臣馳送于安峽伊川平康遂安等處運米豆三百餘石細折草三百餘石長
草五千六百束來到以補其不足。此後別無宣諭之事而臣所率從事官只一
人凡千分遺檢督之際常患無人李貴姑留臣處稱爲從事官使之往來各處
看檢糧草等事矣。

馳

啓我軍勝捷狀癸巳三月十九日

兼三道防禦使李時言平安左防禦使鄭希玄京畿防禦使高彥伯平安助防
將朴名賢助戰將朴震男等牒呈內道節制據三道防禦使約束合勢抄擇精
銳本月二十五日夕時蘆原坪三角山底牛串洞等處潛師先送埋伏左右諸
將而二十六日未明時率大軍進陣樓院冷井峴隱伏待變辰時京城倭賊不

知其數出來蘆原牛串洞。遍滿原野。諸將等率軍與前埋伏之軍左右相應。一時馳突挾擊之際。都元帥軍巡邊使李贛軍。義僧將惟政軍人。自東繼至。合力搏擊。射矢如雨。賊徒驚潰敗遁。諸將士卒爭先買勇。追至京城十里許。乘勝轉鬪。多數射殺。斬首四十七級。又本月二十七日。倭賊多出。焚蕩於水落山等處。高彥伯軍及僧軍等乘高發射。賊之死傷者無數。皆扶載以歸。但以衆寡不敵。而賊在山下。未能下山斬獲。而射殺則甚多。有賊中出來之人。到龍山舟師言。水落山倭賊中矢之多。不下於前日。幸州之戰云。今此一戰。諸將合軍并力。頗爲近日大捷。惟政之軍亦頗精銳。而同事僧義嚴自備軍糧。使不匱乏。近日之戰。每爲先登買勇。賊必奔潰。其功可嘉。各別褒賞。以勸其餘。

有旨。祗受後自劾狀。四月七日

前月二十八日。右副承旨成貼。以大臣受闕外之任云云。有旨書狀。臣在東坡。祗受。臣本以至愚無狀。冒受重任於國事板蕩之際。其僭事辱國之狀。固難悉數。况與賊俱生。坐淹時日。京都未復。而專仰天兵。臣子之罪。萬死猶輕。第臣之區區愚意。則不得不達於君父之前。正月二十八日。李提督自坡州欲退東坡。臣與元帥金命元。戶曹判書李誠中。分戶曹判書朴忠侃。接待使李德馨。運糧使權徵。京畿觀察使李廷馨等。同進廷辨於大將幕次。問其退兵之由。提督始辭不見。但云此處不便駐軍。姑退東坡。留一二日休兵。更進。臣等以爲。

大軍一退。機關甚重。人聽驚惑。將許多曲折。移時爭辨。最後提督出立幕前。諸將環侍。臣等進於其前。或立辨。或扣頭泣請。提督反覆以少退更進之意。論解不已。至出。奏本見示。臣手指。奏本中若干語。辨爭不已。大將張世爵。至於發怒。以足蹴迫通事。使之速退。臣等不得已。皆各掩泣而退。右相俞泓。亦追到請之。而不得。其後欲自東坡退開城。臣等叩心拊膺。進退懇請者。不記其數。提督不得已。給臣等曰。兵馬不可露處。姑退開城。我則當留駐此處。臣等纔出城外。而提督跨馬馳去。臣等雖立於路傍。相顧駭歎。而無如之何。及還開城。久留之時。則講和之說。尙未發端。故臣只以登時進兵之意。隨事祈懇。而其時大軍既退。而坡州東坡等處。人心動搖。臣來在東坡。提督至。欲移權慄李贊之軍。皆退臨津。接待使李德馨。韓應寅等。陳其不可。提督令問於臣。臣卽遣從事官辛慶普。作書力陳坡州不可不守。而其時臣在東坡。金命元在坡州。急於鎮定人心。而提督之退兵平壤。又出於不意。故臣等未及馳去。請止。自此以後。天兵久留不還。而查將獨留東坡。不肯明言事情。日遣金志貴。往來於龍山等處。取見。王子書及擄臣等書簡。傳報提督。臣慮其更有如平壤講解之事。屢與金命元。同見查將。問其緣由。則查將不言實狀。只以大軍前進。必期勦滅之言。慰答。而觀其辭色。揣其所爲。則多有可疑者。一日。臣直問提督之意如何。則查將始以先爲圖出。王子後當進兵爲言。臣極力辨正。其言甚多。查將猶以王

子爲誘。臣不得已。據大義。攻破其說。曰。本國於倭賊。有廟社之讎。不可共戴。一天圖出。王子雖甚切迫。而亦是第二件事。旣而聞沈遊擊之來。其日。臣方以點視糧草。往在德津壇。卽遣從事官辛慶晉書小帖呈於道中。勸令進兵。臣追到。欲與面辨。則遊擊已在路中。馬上舉手遙止。不爲相見。但語通事曰。求見之意。則吾已知之。仍爲馳去。其還不由東坡。直自龍山。從水路以去。臣雖昏鄙。無狀。亦有人心。豈有徒聞講和之說。而甘心俯首。不爲一言相及之理乎。其後又聞開城留駐諸將中。惟南將王必迪。頗主用兵。前後作書陳策。請遣精兵。繞出南路。先擊漢南之賊。以斷賊路。王必迪亦以其計爲然。同義兵將李山謙。發遣炮手三十人。往探道路。其兵猶在振威。而臣又作呈文。馳送于平壤。使李德馨等。呈懇於提督。臣之瓚力。微誠。固已極盡無餘。而於事無補。臣罪當誅。尙復何言。但天兵進退和戰。制在經略與提督。而提督在此之時。旣不言和議。退兵之後。又在數百里之外。在此查總兵以下。又非主斷之將。而至今諱其實。每以行計用兵爲言。臣雖欲碎首爭辨。而其路無由。故只得詳具此間聞見事狀。盡達於朝廷。請急時區處。區區妄料。惟欲使朝廷早聞曲折。而致力於大將及經略所在之處。以濟大計而已。至於賊中出來王子書。及擄臣賊酋文字。臣亦見之。其間固多有駭痛切骨之事。而自古戰陣之間。彼此事情。關於機關者。朝廷不得聞知。而失於酬應。以至誤事者甚多。故臣與金命元。反覆詳議。

不得不達。而又難直達。或謄書上送。或送於備邊司。以備參考處置。而不知其陷於輕。朝辱國之罪。此則迷臣昏謬輕妄。料事不審之致。罪何所逃。大抵國事如此。臣死已晚。策勵疲鈍。死於干戈。臣之榮也。近日各處軍民。亦有死之心。無生之氣。臣未嘗不約束諸將。期於死戰。自京城東西。逐日血戰。不敢以天兵和戰之說。而有所搖惑。惟其食盡兵疲。不能一決於數日之間。以重君父之憂。臣之罪狀。萬死猶輕。國事至急。閭外重任。不可以負罪無狀之臣。因循冒處。使三軍之氣索然。而諸將無復有稟畏之勢。請亟下有司。以正刑章。而擇授可堪之人。收拾萬一。以濟時艱。則臣雖死之日。猶生之年。臣不勝惶恐涕泣之至。

馳啓

靖陵賊變狀九四日

本月初八日二更。提督自安城到開城府。臣翌日與都元帥金命元。自東坡馳來到提督下處問安。則提督即時改服。出立廳上。招臣等詣前行禮問慰。頗致懇勸。且曰。沈遊擊雖在龍山。倭賊狡詐。豈可憑信。吾自有定計。願勿疑慮。臣陳其進兵之意。提督曰。此事不可煩說。吾當處置。且云。今已日晚。明日再會商量。又云。南兵千餘。明日當先送馬山。臣等致謝而出。臣又別具呈文。極陳乘時討滅。不可講解之意。且押送城中。逃來兒童二十口。使之極陳近日賊勢孤弱之狀。臣等既出。提督卽出牌文。催促後來劉綬兵馬。似是用兵之意。而未可的知。

欲待明日。更與諸臣極力祈懇。適見京畿都事沈克明持左監司成泳報狀而來。宣靖陵賊禍。至於此極。臣子所不忍聞。臣等痛心切骨。求死不得。卽立於提督門外。相與涕泣號慟。陳此賊狀。提督亦加驚歎。取見報來文書。臣等與在此諸臣。退來滿月臺前。南望號慟。俄而提督出牌文。問我國軍兵駐筭何地。明白開報。以便分布。臣卽於小紙書各處軍馬所在。以送。而臣等馳向東坡坡州。欲更爲奉審。以知實狀。馳啓計料。此賊兇逆極天。罔極之禍。上及陵寢。而不能殲滅。至今與賊俱生。臣子之罪。萬死猶輕。緣由爲先馳啓。

馳啓提督所爲狀

四月十一日

臣等再昨。面見提督。提督明示進兵之意。且言明日當先送南方炮手于臨津。及坡州。臣等不勝喜幸。意有庶幾之望。然且難恃。退而呈文。極陳和戰利害。則提督亦以其言爲是。至於逐段批示。今日查總兵。密遣通事申應冲。言於臣曰。沈雖往來龍山。而獨不見平壤之事乎。須勿傳播此意。亦須放心。勿爲用慮可也。且遣母遊擊。率兵探視東邊道路。若將進兵之爲者。卽刻見倡義使金千鎰。馳報騰書狀。啓之辭。則似專出於講解。恍惚莫測頭緒。臣等前夜。因陵寢之變。號泣提督門外。提督密使通事附耳分付云。兵機不可漏洩。今但言天將欲爲講解。使賊聞此言而已。切不可言用兵。此意。陪臣何不知。而輕率如此乎云云。而然臣等所料。則終有所不可測知者。恐是以此慰解臣等。而實主於

講解尤爲悶痛。萬一賊兵退歸，則臣前日已令京畿忠清等道糾合官義之兵，相機勦擊。而近日又送義勇隊及軍官李忠韓、士立申、晁金、克忠等分道設伏於漢江以南，更爲約束於此處諸將，使之觀勢進勦，毋失機會。

馳

啓捷報狀

四月十日

近日京城東西捕賊形止，必具於都元帥狀啓矣。本月初九日，高彥伯伏兵軍官李克一、盧松、白雲世等率軍二百餘名，并朴名賢體探軍七人，遇賊於東小門外沙閑里，賊兵幾二千餘，我軍突出交戰，賊奔潰，高彥伯軍人所斬十七級，朴名賢軍斬一級，賊中矢顛仆者不計其數，將大捷，而軍士飢困已甚，不能馳逐而還，俄而賊衆從後大至，若如前圍抱，則我軍飢甚，幾不能自脫，而賊望見不敢前進，故得無事還陣，亦無一人死傷，極爲喜幸，惟是軍糧不敷，只以天兵糧或田米或水濕腐朽之米，日給人一升七合，軍士受糧之後，亦與其妻子飢餓者分食，故終日僅食米半升，而猶不能給菜色滿面，氣力全無，雖有奮勇討賊之心，而其路無由，極爲痛迫，罔知所處。

請李箕寶依律定罪狀

同日

臣於本月初九日夜，因京畿左監司成泳所報，宣靖陵賊變，不勝痛哭之至，卽馳到坡州，與金命元等相議，遣臣軍官李弘國率自募軍十名，由楊州取路，進去奉審，而獻陵亦與賊陣所在切近，亦未知如何，并令奉審來告事，馳送

矣。廣州一邑，自前年邊彥瑋敗軍之後，人民散盡，守令奔竄，已爲空虛之地。今此陵寢之變，不知出於何時。臣前者約束諸將，使之各守其處，把截勦捕。廣州牧使李箕賓，則令率廣州龍仁軍及召募官金琢俞大進之軍，與利川府使邊應星相倚在賊路之左，勦擊沙坪院穿峴金嶺等處之賊。又令金浦通津果川矜川等處之軍，別爲定將，與箕賓相對合力，互相挾擊。事再三丁寧勅矣。其後助防將邊應星，連次馳報內。李箕賓遠在南陽水原之境，臣極爲駭愕，而未省其故。其後李箕賓牒報內，因左監司成泳節制，與俞沃同在南陽云。此不過避亂趨歇，要遠賊路，棄其官守，寄在他處，無意討賊，而事急則將浮海入于江華情狀，極爲痛心。若使箕賓仍在其處，糾合軍兵，多般瞭望設伏，逐日力戰，如往日高彥伯奉護康泰陵之事，則君親泉壤之禍，庶或可救，而畏死巧避，全付賊手，使變故至此，其爲罪狀，死固難贖。大抵近來紀律渙散，號令多門，弊習已痼，極難整頓。左監司成泳，近來處事，大段疎濶，無以收拾一方。臣前者已陳此意，而朝廷尙不處置。若箕賓之事，又果出於成泳節制，則其爲顛錯益甚矣。李箕賓則臣已令捉來，欲爲究問按法。若陵寢之變，出於箕賓赴任之後，則其罪益重，似當事鞠依律，以警人臣不怠。君父之罪。

馳

啓周參將往入賊陣緣由及慶尙道倭賊添來狀

同

臣昨日往坡州，與權慄約束軍事。日暮，有周叅將弘謨旗牌朱朝元，率三百餘

人以鼓吹前導而至。臣令從事官柳熙緒李貴等問安。且問去處。則答以欲向京城迎來。王子及被擄諸臣云。俄而令擺撥兒宋後漢出語云。旗牌至此。陪臣須入扣頭行禮。臣答以旗牌扣頭所不敢辭。但此乃往于倭營之旗牌。生等何須先爲扣頭。且倭賊有不共戴天之讎。本國則萬無許和之理。尤不可扣頭承命。叅將大怒。促之不已。臣終不入。則因又出示經略牌文。其中一款云。朝鮮國與倭賊固爲不共戴天。然今已乞貢請降。姑且聽候本部報復啓釁者。斬云。臣等不勝痛惋。語之曰。觀此牌文。是欲我兵不殺倭賊。寧有是理。尤不可承命。反覆爭辨。終不叩頭而退。又爲呈文於提督。則每以軍機難泄。勿爲焦心等語。慰解。且推托於經略。其爲痛迫。不可形言。大概沈遊擊入賊中而不還者。今已六七日。其事極爲荒唐。而凡百舉措。全不使我人聞知。以此其間曲折。不得與聞。賊謀難測。遲延時月。狼狽日甚。雖提督向臣等所言如此。而亦難可憑。卽刻慶尙左監司韓孝純。四月初三日。成貼牒呈內。近日東萊釜山賊勢。比前大異。前則往來之船。多不過三四十隻。今則不知其數。來泊者。至於再次。賊情所在。極爲叵測。云。賊兵添來之言。雖不可知其虛實。而時方風和。兇賊逞計萬端。豈無此憂。所當登時急擊。以奪其氣。而天將處置。雜出於和戰之計。屢失機會。尤爲痛心。近日分遣精兵。方圖龍山等處之賊。且遣別軍于漢江以南。頗有斬獲。而龍山則因沈遊擊方在其處。諸將未敢輕易下手。今見牌文辭緣。益深痛

碗

馳 啓募得忠勇人移安

靖陵穢屨狀

六月十日

本月初十日。令臣軍官守門將李弘國率自募牙兵十名奉審。宣靖陵及獻陵矣。十五日弘國還來手本內道傳令據率牙兵禮賓寺奴朴麟衛將所奴李大成司畜署奴尹孝閔奉常寺奴金檢興私奴張許弄議政府奴李千福馬山驛奴李許弄良人千守西學奴金業龍私奴李金等十名由坡州蟹踰嶺過楊州邑內十二日夕到禿任乘小船沿江流下三更到楮子島無等嚴下舟入靖陵則隧道掘取處深布帛尺十五尺許廣七尺許弘國與李大成尹孝閔下入坎中夜暗不能詳視以手探審則穢屨似若移在於立宮外掘土壙中無他別物隧內瓦礫積置奉審後還出陵近處衣服片片腐朽棄置觸手破碎一一收拾埋置于禿任里以憑後考又自靖陵詣宣陵奉審則大王陵隧道前掘取處深七尺許廣五尺許坎中別無他物隧內築灰外設薄板幾盡火燒餘存只有數片王后陵隧道前掘取處深六尺許廣四尺許板子亦爲火燒灰隔則仍存兩位陵則并不犯立宮獻陵則夜已將曙賊陣至近未及奉審而來云禍變至此臣子所不忍言五內崩裂罔知所措臣與都元帥金命元巡察使權慄相議或言仍爲奉安於外梓宮以土塞穴徐待事定爲便或言竊負以出從船路移安於水上楊根等地稍遠賊禍爲宜臣等以此兩條

反覆詳量。賊兵時方留在沙坪及奉恩寺等處。而三田渡箭串之間。逐日出沒。或奉遷之際。短夜易明。中路遇賊。則其爲變故。尤不可言。故謹令權慄營中。略備精潔新衾油芑等物。欲乘夜入送。但賊陣距陵所至近。必得勇銳之士。忠敢之人。然後可以冒死入去。臣等又涕泣訪問。則有倡義使中衛將朴惟仁。臣軍官前萬戶金克忠等。應募請行。并前去。李弘國及牙兵十名。又加得自募之人。發送計料。但此事極重。所當先稟朝廷處置。而玄宮暴露一二日之間。又不知更有何事。不得已先令朴惟仁等入去。更爲奉審。十分觀勢處置矣。臣聞此變故。心精散亂。扣地號天。荒亂之中。恐致錯誤。尤不勝悶迫之至。朝廷急速善處。

馳

啓提督所爲狀

日同

臣等前在坡州。不叅旗牌事。大概已爲狀。啓其日周叅將。稟帖於提督云。陪臣等執迷不悟。不知久遠之慮。不叅旗牌。恐前途有攔截之事。乞老爺召諭。提督見之大怒。至欲依軍律治罪。招接待使韓應寅等。使問其狀。臣等不勝未安。將欲發行陳謝之際。又有提督家丁。馳來招臣等相見。曰。提督令議政留此。元帥則與我同往龍山。命元答曰。俺在此亦有所任。豈可因口傳容易出去。若有提督之命。則必有文書。願出示之。其人曰。別無文書。提督分付如此。強欲同去。而命元終不敢去。其人不得已獨向龍山。日暮。臣等同詣開城府提督門外。請

罪辭謝。提督始怒。不見臣等。兩立半餉。提督始爲出見。令臣等升堂行禮。問其緣由。臣答云。本國於倭賊。有不共戴天之讎。萬世必報之怨。方欲倚賴天兵。前進殺賊。不期牌文內。有報復啓戮者。斬生等。不勝驚痛。若叩頭承受。則卽當傳令各處將官。遵行約束。更不以討賊爲心。故事勢悶迫。欲更稟老翁。以聽裁處。倉卒失於叅禮。罪無所逃。提督低聲答之曰。此乃宋侍郎牌文。不關我事。牌文則何可拜受。只旗牌則不可不拜。臣答以失禮惶恐。但與倭賊講和之事。痛心切骨。故難於承受云云。則提督出示經略文字。指點其中數語。甚有不樂之色。以爲講和。非我所爲。此意陪臣知之。因論擊賊之策。更招接待使韓應寅。李德馨。與之同立言論。臨出。提督云。宋侍郎不無聞此之理。明日須略具曲折。書稟帖而來。臣等翌日。又爲呈文。力言與倭和親。必陷術中。沈遊擊久不還歸。竊深危之。當急時進兵云云。則提督答云。知道。臣等仍辭退。少坐外處。提督出示宋侍郎牌文。其中有前日倭將處遣使時。朝鮮李判書暗設奸計。不以船隻待候。致令不及於初八日之限。究問等語。仍云。經略所言如此。陪臣見此。則可知事不由我矣。臣等還向東坡。中道有持旗牌者。馳到招臣。驅迫之意。甚於星火。來到青郊驛前。又有一人馳來。令臣還去。臣不知何事。旣而接待使從事官黃沂。故不整齊。以防和事。提督大怒。以爲事出於臣。急遣旗牌。捉臣而來。曰。當痛杖。

四十棍。撤兵還歸。俄而聞其言非是。重杖千總。而令臣還去云。大概提督以下。既專主講解。知本國人心。痛憤於和議。不敢直說。互相推調。而猶慮中間。因臣等搪阻。其事不成。隨處發怒。氣象施措。全不如前日。事之難處。益甚於前。如臣愚劣。徒爲悶痛。不知所出。而遷延時日。已到風和頭頭之事。又未知稅駕之所。卽刻忠清水使丁傑等馳報內。謝相公周遊擊徐相公等。率家丁二十名。十五日辰時。到黑石江。先送小舟。通諭于賊中。至申時。倭賊全不出迎。但見騎馬之賊。多數出來向內路。天使傳令諸船。小紙書送云。令倭奴不來迎接。天使無禮之甚。可分付大小船。盡將各項大小器。藏置停當。若倭奴無禮。我等以火器攻之。此事要緊。要緊傳令事牒報。倭賊凶逆。至於此極。痛憤切齒。未知天將更何以處之。

請速懇請於經略以圖進兵狀

四月十日

臣將兵部牌文。謄書上送。提督今此舉措。每以爲非其本意。出於經略指揮。勢難自由。以此爲辭。今雖懇請於提督。而勢無所益。臣前日呈文云。將在軍。君令有所不受。苟有可乘之機。豈能千里請戰。提督不答。其意可知。大概主張之權。在於經略。故得以此爲言。且牌文內。有候本部議處之語。似有可議之端。朝廷急速懇請於經略。庶有萬分可望。痛迫之中。更爲陳達。

懲忠錄卷之十一 終

懲悖錄卷之十一

辰巳錄

馳啓與

天將論講和非計狀

癸巳四月十九日

前日提督發怒於船隻不時整齊欲拿致臣還止事則已爲狀啓矣今日李摠兵寧戚遊擊金錢遊擊世禎來在東坡立旗牌于館正廳假家呼臣等叅拜臣等以提督旣云旗牌乃皇上之命豈容不拜若又辭避則必生大事故仍往叅拜李戚錢三人與查摠兵同在一處招臣等及巡察使李廷馨同坐極言倭奴旣已乞貢而朝廷已許之且爾國人民幾盡死亡農作盡廢事勢危迫之狀縷縷不已臣對之曰老爺此言意思安在遊擊等言朝廷旣已許貢本國亦當勿爲勦捕以違經畧牌文臣等不勝憤鬱對之曰我國若欲與倭奴講和則不待今日當初倭賊要和於我國者非一非再一爲投書於東萊再投於尙州三投於平壤而我國憤倭奴有不恭天朝之語爲天下大義寧死不辱以至於此今倭賊焚燒廟社發掘丘陵屠戮人民有不共戴天之讐乃以牌文更爲禁約報讎此小邦人民之所以痛心切骨而不敢承命者也戚錢兩人反覆爭辨或書寫以示或嚴辭峻責臣對之曰弊邦雖小亦知有君臣父子之義今倭賊有君親之讎爲必報之地不圖天將更以殺賊爲罪兩人又云此

朝廷之命 天子聖旨。而經畧提督奉行。何敢不從。且倭奴已許返。王子陪身及人民。朝鮮亦當相時度勢。姑爲容忍。待後國勢稍康。軍兵稍鍊。自有復讎之日。如勾踐之生聚訓鍊。方爲長遠之慮。豈可不忍目前之忿。而敗大計乎。臣答之曰。雖以利害言之。恐 天朝爲此賊所欺。自古中國。與外夷講和。而誤事者多矣。錢遊擊勃然大怒。以手裂去所書之紙。厲聲相詰。戚遊擊笑而解之。臣曰。小國兵力寡弱。不能自復。大讎萬死無惜。至於和戰大計。天朝制之。小邦不敢干預。難以口舌爭。願辭退。遊擊云。經略牌文。當遵行。臣答之曰。各處官義之兵。皆有報復父母兄弟之讎。豈能禁之。況未承寡君之命。安敢擅便遵行。遊擊等怒曰。此乃 朝廷之命。雖 國王。豈敢異同。今若往稟 國王。而後行。則吾輩寧能坐待乎。辭色峻絕。斷無回意。臣等辭出。旣而還入。請見。則李總兵拂衣先馳向馬山去。獨與戚錢論說。縷縷爭辨。移時而不聽。臣等退來。又具呈文入送。二人怒曰。若然。則吾當稟於提督。撥兵還去。任爾等自處。旣而戚錢二人。又欲向馬山。全羅巡察使營傳示牌文。要臣等出公文傳示全羅營。且令出人向導。令通事下人環立催促。立馬以待。臣等念此乃 天朝命令。終不可以言辭停止。不得已。移文於全羅營。略言戚錢遊擊持牌文進去。除傳通各處外。整齊軍兵。如有倭奴亂出搶掠。隨處截殺。不少饒貸。事成送遊擊等取見。然後始爲起去。卽刻京畿左監司成泳馳報內。天將下帖。以近日我國人民與倭

構贊 天朝法令全然不遵。有倭夷效順。而朝鮮反叛亂之語。至拿成泳等于軍門查究云。其言不可忍聞。而在我國軍民萬姓之心。痛心切骨。而無如之何。大抵事勢難處。至於如此。而亦緣臣等誠意淺薄。不能感動。天將日見此事。罪死無赦。請先正臣等之罪。而朝廷別樣區處。

馳 啓軍功狀日同

臣軍官韓士立。率西江瓮幕軍人李千福等十餘名。往探龍山賊陣所在。欲爲乘夜火攻之計。已悉形勢。而緣沈遊擊等方在其處。不敢下手。本月十四日。李千福等遇賊於外城山。斬首一級。射殺十餘名。十五日。又戰於外城山。韓士立等斬頭一級。射殺九名。十七日。又遇賊於外城山。賊兵二百餘名。我軍十四人。突入亂射。賊奔北而去。李千福等射殺又十餘名。其餘射中者甚多。近日我軍無不思奮。爭先擊賊。賊氣亦衰。見輒奔北。而緣唐將往來禁約。賊兵不出。而我軍亦不敢薄戰。城下只待。天兵入城之日。少復窮天之讎。豈意。天將終與此賊講解。至於抑勒我軍。不得報復。十七日。周弘謨等。拿致成泳于軍中。查究捕倭何人者。實因韓士立等城山之戰。而然也。我國兵力寡弱。不能自振。而欲倚賴。天兵。終至於此。憤痛欲死。而無如之何。

馳 啓提督發向京城隨後前進狀四月二十一

本月十九日午時。查總兵。率兵發向坡州。申時。提督率大軍。繼至東坡。臣就去

問安提督答云知道。且云今日追擊賊尾如何。蓋提督以臣等每請進兵。故以此言之。其意則近於不誠。二十日朝提督盡率大軍。發向京城。臨發。臣與接待使等。力言倭奴狡詐。不還王子。經略牌文。亦有順則撫逆則勦之語。今既逆命。請速進兵。且我軍方欲渡漢追躡。願老翁明白分付。提督不甚諦聽。謾答曰。任汝兵力。且曰。爾國將官不待。王子之出。而先爲入戰。甚可惡。因卽上馬而去。京城體探人。皆言城中賊。幾盡出去。而沈遊擊及。天使兩人同行。王子亦不放出。極爲痛心。欲死無地。已令全羅巡察使權慄。巡邊使李蕘。防禦使高彥伯。李時言。鄭希立等。急速前進。相機施行。而臣亦隨後到臨津。因唐兵塞路。未卽渡江。緣由爲先馳。啓。

隨 天將入城後馳 啓城中形止及分付諸將邀截賊兵狀四月十一日。昨日提督自東坡入城事。則已爲馳。啓。臣日暮隨入城中。倭賊已盡出去。而天將隨後護行。故諸軍不敢追擊。高彥伯之軍。自東大門先入。擊斬落後之倭五級。李山輝自西道而入。斬六級。李蕘斬一級。而皆畏。天將之令。隱置他處矣。臣等與權慄。李廷馨。成泳等。進提督門外。致謝收復之意。則提督答曰。議政過我。今則致謝耶。因云。明日相見。蓋臣以進兵之意。累日苦口論辨。而天將不從。故其言如此。城中形止。則日暮未及詳知。今日諸處。廟社宮闕。陵寢。分道奉審。追後馳。啓。計料。自慕華館白骨堆積。城中則人馬顛仆而死者。不

計其數。臭穢滿路。人不可近。人家亦存四五分之一。不勝痛哭。天將出令云。倭賊不出。王子以去。我當發兵追勦。須於漢江具船隻云。故臣卽令京畿監司成泳及倡義秋義等使。達夜措置。賊兵所渡浮橋。則皆焚燬。無一船隻。督令京畿忠清水使所騎戰船。并由龍山上。送漢江。而潮水甚淺。恐不得曳上。用是憂慮。權慄高彥伯李時言鄭希立。則使之抄發精兵。先渡追勦矣。臣前日所遣司評李忠申。覩馳報內。與宣居怡合軍九百餘名。欲爲邀截。而賊兵挾道設伏。多持火砲。故未得下手云云。使之相機進勦。毋失機會。事分付。而惟是一路護行。處置極難。尤爲悶痛。

分付諸人收拾京城狀

四月二十三
日在京城

京城新復之後。事同草創。而人心危懼。剽掠四行。若不登時撫戢。誠爲可虞。臣卽令全羅巡察使中衛將趙徽。率全羅道軍三百名。爲都城西道捕盜大將。巡邊使李養。別將李恩命。率軍四百名。爲東道大將。使之修掃汙穢。撫綏居民。禁戢侵掠。京城內外公私廬舍及各處倉穀遺在者。則使戶曹專掌收拾。而倉卒典守無人。故龍山倉則令月串僉使看守。又令臣從事官判官金琢。軍官宣傳官李山輝。聽戶曹之令。分道收拾。又令湖城都正倡義使。收拾書籍。又令安撫使判尹柳根。以城中餘穀。除出數百石。賑濟飢民。且以皮穀。分給京城近處居民。以爲種子。虞候趙撥。收拾印信及銃箭軍器雜物。而各司書吏書員典僕等。

死亡之餘。多屬於秋義倡義。故移文兩陣。使之各還本役矣。臣前有體察三道之命。卽今東南事勢。尤爲緊急。臣若未蒙斥免。則賊兵未盡退去之際。當下料理策應。而京城之事。必須大臣鎮撫。兼且接待。天將可無疎虞失誤之患。

馳啓

天將禁戢我軍不得追賊狀

同

本月二十日。天兵入城事。則已爲狀。啓。其日初昏。提督向臣等言。今當發兵追蹶爾國軍馬。亦令同進。須速備過江船隻。臣等仍前分付。令京畿忠清兩水使。由龍山督上船隻。猶恐遲緩。又令左監司成泳。親去督促。而使巡邊使李贊。全羅巡察使權慄。京畿防禦使高彥伯。平安防禦使鄭希立。兼三道防禦使。李時言。亦依前日分付。由露梁抄率精兵過江。僧將惟政等軍。亦由楮子島近處過江。而通于前道官義之兵。合力邀截。二十一日早朝。臣等叅候提督。致謝收復京城。後因言進兵之事。提督即時分付大將張世爵。李如栢。發一萬五千兵追之。臣慮渡江船隻。猶未及期。出漢江監督船隻。水使丁傑。李贊等海船。因灘淺未得上來。有倭新造船五十餘隻。我國仍朴船四隻。往來渡軍。軍馬已在南岸者五六千。其餘陸續皆渡。而臣等出去時。路逢祖總兵自漢江還入城中。以爲提督命之還來。臣等固已疑之。及至江上。問安於李如栢。則如栢稱足病刺痛。臥在江岸樹陰。張大將則已爲還入。日晚。李大將亦稱病重。乘轎入城。

天兵之已渡者。亦皆還渡。臣等不勝疑訝痛悶。臨昏更就提督門外。探候其事。既而提督使椽房。出言宋經略諭帖來到。禁勿追襲。吾亦不得自由。且聞倭賊以天使二。王子在後而行。若爾國兵馬。果能蕩滅。則天使雖被害。猶之可也。不然則徒傷天使與王子。於汝國實無所益。經略聞之。亦必咎吾節制失宜。其說甚多。不能盡記。而大概皆不欲進兵之意。臣等答以倭奴狡詐。桀驁不還。王子及被擄人民而去。當以重兵躡其後。彼有畏懼之心。然後王子人民。可有還國之望。今若撥兵不追。則賊何所畏忌乎。且必屯據嶺南。兇謀難測。此時天兵雖欲更爲追勦。得無已晚難及乎。如此往復數次。因夜深退來。三更夜不收二人。押全羅監司權慄來提督處。詰問徑自渡江之意。又據巡邊使李贊。防禦使高彥伯等馳報。唐兵羅列江邊。勿令進兵。李贊先鋒將邊良俊。鑽項曳地。重傷歐血。李贊亦被拘留江邊。不使發去。又高彥伯馳報。二十一日進軍在中路。查將率二十餘人。列立前路。使不得前進。招高彥伯發怒詰責。彥伯不得已。托以整齊支持之事。查將全不聽從。挽留不放云。提督發送追兵渡江之事。不過難於臣等之力請。而姑示追擊之狀。實無進兵之意。故張世爵托故還來。李如栢稱病不進。將士皆無鬪心。而未抄出示經略牌文。顯言不得自由之由。如此支吾遮說。頃刻變遷。此雖臣等誠意淺薄。不能動人之所致。而亦緣經略與提督諸將。定計已久。殆難以口舌爭。至於我國軍兵。亦被處處遮

截不得進去。尤爲痛悶極天。臣等不能自力討賊以復宗社之讎。而事至於此。徒爲痛哭流涕。請先治臣等之罪。斥免重任。以謝軍民齊憤之心。

奉審松山

靖陵靈幄狀

四月二十三日在京城

臣二十日昏時。自東坡入城。二十一日護渡。天兵追賊事急。終日在漢江。二十二日始爲奉審於楊州松山里。靖陵靈幄奉安處。號痛罔極。呼天叩地。欲死不得。朝陵使順寧君陪侍。幄殿僉正朴惟仁。前萬戶金克忠。率軍數十餘名。仍爲侍衛矣。京畿各邑蕩敗已甚。又奔走於唐兵支待。頓無餘力。故臣移文于江原監司。使之進排凡物。而靈殿野次。宿衛孤單。凡事待朝廷指揮。急速不分晝夜處置。臣又奉審宗廟灰燼之餘。僅辨基址。三宮亦皆殘毀。不可忍言。并以大概馳啓。

病未南下狀

五月十日

臣積傷氣血。自前月二十四日得病危重。二十餘日不省人事。昨日爲始。稍省人事。尙未舉頭。生死難知。浮橋則前以驪州牧使金億秋。京畿水使李蘋。差定造排。今已畢造。大軍已爲盡渡漢江。戶曹判書李誠中。以糧餉事。隨大軍南下。督運饋餉等事。必已接濟無闕。他餘事。臣病勢如此。不能料理。以有旨辭緣。移文俞泓。臣身受重任。危病如此。差復未有期限。此處及東南事勢。日益危急。而百不料理。臥病垂死。非徒臣私計。悶迫其於公事。亦甚狼狽。敢望朝廷速

差他人使得幹理其任。以便公私。

馳啓 天將驅迫諸將使不得追擊狀

當初臣未病之日。天將入城之際。分付諸將。使高彥伯。李時言。金應瑞等。從東道過江。與利川府使邊應星。合勢追擊。李養及全羅監司權慄等。從西道過江。與全羅兵使宣居怡及京畿左道官義兵。合力追擊。因通於忠清慶尙等道。使之約束軍兵。一樣追擊。不意。天將查大受以下。各率其軍。羅列漢江之南。見有持弓矢捕賊形止者。輒結縛亂打。臣軍官司評李忠。別率一隊。亦在竹山地內洞里。斬賊五級。爲查大受軍人所望見。首級則僅爲藏置。而李忠爲查大受所毆打。幾於重傷。助防將洪季男。亦爲查軍所傷。使之自隨。不能任意捕賊。如李養以下。皆被拘執。獨有李時言。鄭希立。邊應星等。從間道乘其不見。擊斬遁歸之倭。我國兵力。固爲寡弱。而爲。天兵中路搪塞。使將士解體。賊兵任意退歸。其爲痛憤。莫此爲甚。臣固以此。至於憂憤。添疾。而無如之何。今則都元帥金命元。已爲隨。天將南下。而臣病重落後。凡事不能料理。伏枕垂死之中。祇受。聖旨。尤不勝悶痛摧隕之至。卽以有。旨內辭緣。急速移文於都元帥處。

料理糧餉且請急時募粟狀 六月十二日在京城

自四月二十日大軍入城之後。兩湖漕運軍糧米豆并四萬六千餘石。已盡用下。龍山倉遣在倭穀。其數不過二千餘石。今已以此穀繼之。其勢不出一二日。

亦當竭盡。此外城中倭館遺在之穀，亦不滿千石。各處我國用度及山陵之役，逐日費用，其數不貲。若天兵久留，則勢不得已。當以田稅之米繼之，而田稅已捧及時方到泊者，亦僅萬餘石。此亦能支幾日。臣伏聞兩湖財力無復寸餘，而天兵之留在尙州者，及近日駱參將宋遊擊等，各率其軍更向湖南。以兩湖之力，彼此調度，其勢百無可支。京外糧穀一時俱竭，則更無措辦之勢。其爲憫迫，不可形言。唐糧之來在義州者，急急船運上送，而督運御史尹敬立，自初專管唐糧，今則遠在慶尙道。唐糧之來到者，亦無句管檢察之人，不無踈漏之弊。常時則戶曹專掌國計，所任至重。堂上郎廳雖備員察任，而猶不免遺失之患。今則京城新復，事同再造，而判書李誠中下去後，戶曹無他堂上官。郎廳則皆是假官，事事判渙，不成頭緒，極爲可悶。判書上來間，參判參議中，急速差送，且帶郎廳數人，分掌察任。國家經費庶得措置。大抵今日所患，莫大於糧穀匱竭。如慶尙道賊兵屯據海邊，勢益鷓張，而道內公私俱乏。積屍相枕，調軍防備，百計無策。臣意全羅道各官兩麥稍熟處，欲爲購募，若得數千餘石，亦可以繼軍糧之乏。且可以賑濟飢民。臣前日賫來空名告身，其數不多，且無四品以下相當之職。請令該司急速成送數百張，以廣募粟之路。若失此時，數月之後，雖欲爲之，民間麥小，必無應募者矣。上項所陳諸條，朝廷緊急商議處置。近日京城糧餉等事，右議政俞泓專掌檢勅，凡干曲折，必爲已盡狀。啓而事係

閩迫并達大概。

乞抄擇精兵以爲後圖狀

請做浙江器械多造火炮諸具以備後用狀

募京城軍卒練習浙江火炮狀

并見本集

請修葺山城以爲戰守之計且慎擇守令以收人心狀

六月十日

近日連得慶尙左監司韓孝純及兵使權應洙水使李由義等馳報兇賊屯據於梁山機張蔚山東萊釜山金海昌原等地勢甚鷓張造設房屋廣築城堡收聚糧餉聲言將犯晉州其勢極爲可虞蓋蔚山之賊若犯慶州以及內地則左道不可保矣梁山之賊更上直路而昌原之賊西犯晉州以及湖南則彼此不能相救而三道危矣大抵今日之勢當且守且戰此正古人所謂先爲不可勝以待賊之可勝今賊兵雖在海邊而中道則密陽以上已爲我地當隨其所得設險堅守必擇地勢形便要害之處或設土壘木柵多備器械使賊不敢來犯然後蓄力乘便精擇勇軍統於猛將飽士秣馬乘其賊勢動靜左右勦擊令賊騷然不安賊進無所得退失所據其勢將不久而遁逃因其退遁之際半渡之時水陸合兵四面蹙之則可以全勝臣之區區愚意爲今日計似無出於此者臣前日妄獻一得請於郡邑之城急設炮樓又請修葺山城令民入保賊至清

野以待者。此正欲先爲固守之計也。我國自古長於守城。而短於野戰。頃日權慄幸州之戰。亦先得地利。故賊兵多於我軍數倍。盡日苦戰。而終不能陷城。大敗而歸。賊之棄城遁歸者。未必非此一戰爲之助也。臣以此知今日急務。無大於設險堅守。而天將中有識。如賂參將等所言皆然。請令該司。急速商議。如以爲可行。則下于諸道。漸次設立。而山城之可守處。曉諭民間。各出其力。次次繕修。公私穀食。亦令聚在其中。然要不可限以時日。以傷民力。在當事者。善措之如何耳。炮樓之制。若成。則誠爲萬世之利。但必有火藥火炮。然後可以卻敵。如火藥不敷。火炮不多。則徒設無益。此亦朝廷急急區處。或設局於京中。多聚匠人。晝夜打造。于萬餘介。分送諸處。火藥亦令外方。自爲燔造。使用之如水。則制敵保邦。此爲利器。不待他求也。我國人情。不能先事而圖。事過則輒悔。數年前軍器寺所藏火藥。有二萬七千斤。而臣其時隨在備邊司之列。欲以二萬斤留京。七千斤送于兩南。以備倭寇。而論者以爲京中火藥。不可濫費。只以數十斤充數分送。竟爲賊所盡有。而海邊防備之處。或無有一二斤之儲。雖欲用之。其可得乎。今宜深懲往事。弛火藥私造之禁。廣傳習銃箭之規。凡人之不能操弓者。盡爲火炮之軍。分運作隊。操鍊有法。紀律素行。則賊何由來犯。而國家之辱。庶可小雪矣。古人云。器械不利。以其卒予敵。驅市人而戰。則雖名將。猶難成功。今賊退已數月。事勢危迫。日甚一日。而中外人情。未免狃於少安。尙無

措置之事。幾於悠悠度日。萬一賊兵。更爲長驅。國事無稅駕之地。臣之無狀。竊獨寒心。且嶺南則凶饑癘疫。人民死亡殆盡。自聞慶以下。直至密陽數百里間。人烟斷絕。已成空虛之地。雖欲有爲。其勢未由。今宜急於兩湖。多般設策。厚爲賞格。及其兩麥之猶在民間。汲汲收合。則多至於萬石。少亦數千餘石。以此爲糧。旣可以繼軍食。又可以招集遊手。以爲炮樓築壘之役。故臣別爲狀。啓。亦望該司。急速舉行。成送告身帖文。則臣當遣帶行從事。馳往購募。獎不至及民。而事亦可濟矣。慎擇守令。亦爲今日急務。蓋兵興以後。苟且充差。民生之困於割剝。未有如此時之甚。怨毒憤罵。至有不可忍聞者。凡國家興衰撥亂之機。必以先得民心爲務。民心旣得。則天意亦自然悔禍。此必至之理也。臣願今日諸道守令。視平日更加慎擇。稱才量能。其有功勞才器者。則拔擢授任。貪鄙庸劣者。漸爲澄汰。又令監司及奉使出入之人。宣布德意。撫摩凋瘵。若痛癢之在己。使四方民情仰承。國家仁恤之意。如得更生。則雖勞而不怨矣。近日非徒守令。不體如傷之意。至於奉命往來之人。亦甚衆多。督責厨傳。鞭扑吏民。所至之處。人皆騷動。此亦更加申勅。而務爲除弊。然後驛路郡邑。庶有一分之利矣。且臣又有所慮。祖宗朝設立巨邑。皆因一道形勢。大小錯綜。使之捍外衛內。其意至深遠也。以京畿言之。則楊州水原廣州利川江華。皆是京城藩蔽股肱之地。此等之邑。當須留意。別爲慎擇守宰。如長安之三輔。洛陽之馮翊。則京城

自固矣。利川府使邊應星。今聞爲會寧府使。應星在利川。能績頗著。糾合民兵。捍禦盜賊。故賊兵終始不敢深入。而利川境內耕耘不失其時。北道重地。固當擇人。然在今日。則南邊賊路所經。其任尤重。臣之愚意。亦望姑留應星。使得撫輯成緒。而廣州牧使。亦十分擇人任之。使廣州利川驪州三邑。相比合勢。稍稍完集。則其爲後日之益。不少矣。此則但爲京畿一道而言耳。他道形勢。莫不皆然。如忠州居國上流。控扼咽喉。忠州失守。則沿江數百里。皆爲受敵之地。其重比他邑百倍。臣尙未知元愼居官之狀如何。然當今日板蕩新造之初。恐非此人所了。臣時未到其處。從當親見更。啓計料。而所以并爲預陳者。欲令。朝廷。凡此等緊重守令。一一愼取於差除之日。毋致遞代紛然之弊。臣本以無狀。從前負國孤。恩。久在行間。無一寸效。不意數月。危病纏身。性命如縷。乞免重任。更代他人。以紓國亂。而待命踰月。尙無指揮。病若漸蘇。竊欲扶曳南去。目見事益艱難。臣之精神才力。萬無報塞之路。而疾病昏瞶之中。時有一二妄見。不得不仰陳於。兼聽之下。不自知量。罪涉僭越。惶恐無地。

請募兵鍊習因乞遞免狀

臣卽見金命元所通狀。啓草。慶尙道之事。極爲危迫。賊謀兇逆難測。不勝寒心。兼之慶尙左右道。經年兵火。飢饉赤地。人民死亡略盡。白骨蔽野。不幸而右道。則兵使連殞。監司又逝。人心無所維繫。防備等事。無望措置。種種可虞。至於

如此。臣雖在病中，而晝夜憂迫，不知所出。昨日唐將駱參將來問臣疾，因爲暫留，亦甚念此。自經略以下，皆有不滿之語，以爲提督。今已撤兵將回，而倭賊尙留不去，提督之意，或欲留馬軍在此鎮守。然馬軍若留，則其弊與倭賊等。地方難支，南將中皆無可留者，而兵亦離家甚久，皆不願留。惟劉綎兵新到，而其人乃我親屬，雖未知欲留與否，然留此則有益，須速馳啓於國王，或移咨經略提督，區處可也。云留兵之事，必爲大弊，而賊兵未退，則恐亦難已。況南方之兵，素善禦倭，其操鍊教習，必爲我國久遠之利。然此則非臣愚所能預料其利害。惟在朝廷百分商量，急速善處而已。今日備賊之事，一刻急於一刻，抄擇伶俐之軍，分配天將，傳習兵事器械，乃是第一件事，而賊退已過一月，一無施措。前日駱參將抄率平安道軍百名，而其軍私自訴乞，不久還去。臣近與參將議於城中，募得火炮匠十餘人，年少可教者三十餘人。今日爲始，送于參將處，使之學習，但必資以糧料，然後可以無散。故欲除出城中賊窟，落庭米給料。此後應募之人，必不止此。朝廷早爲事目，別擇將帥二人，分爲左右隊，領之。日夜訓練，而又連續加抄外方精勇之人，次次傳習，如臣前日所陳，庶有成效。若又悠悠都不濟事，臣之病勢，則大勢少減，而元氣大敗。一室之內，杖而後起，至於精神志慮，益甚顛錯。軍國重事，決難料理，而痛念國事，伏欲輿病南下，氣力難任，罪無所逃，臣意必須朝廷早爲處置，或代以他大臣，經理東南，以赴事。

機之急。然後庶無後悔。

懲忿錄卷之十二終

懲忿錄十二

懲毖錄卷之十三

辰巳錄

病後南下狀六月二日

臣久病之餘。元氣憊敗。不能出門戶。今月十八日。始奉審于松山。十九日與諸宰會議狀。啓伏念臣冒受重任。時未遞免。討賊方急。適因狗馬之疾。初不得與都元帥一時南下。留滯累月。罪戾益積。今雖氣力如此。而南方事勢日急。一日不敢頃刻自安。今日朝往辭提督。則提督使通事傳言。凡事應自料理。但慎勿輕易也。臣且聞提督出牌文欲西還。與右相俞泓請少駐策應南邊之事。提督答曰。境內無賊。然後我當還去云。臣聞劉綎兵十三日自尙州南下。駱參將等亦皆率兵以去。萬一與我兵合勢。水陸并進。則庶可蕩滅殘寇於海上。以復不共一天之讎。而諸將相持已久。尙無消息。臣不得已扶曳下去。欲觀其勢。今日提督他餘所言。應在右相俞泓狀六月二日啓。臣不爲具狀。

馳啓慶尙道賊勢危急狀六月二日

臣昨昨日書狀封送。卽日申時。發自慶州。徹夜而行。昨日到大丘。當日朝參拜劉總兵。極陳事急請援之由。則頗有掣肘不能自由之意。乃卽成稟帖馳報。宋經略與李提督處。觀其意思。不無坐待回下之計。事將無及。至爲痛悶。卽刻到

付忠清兵使黃進。十六日。成貼馳報內。昌原留賊。與金海熊川之賊合勢。將向咸安。咸安城池淺薄。各將所持兵糧。僅支數日之用。賊若屯據城外高山。曠日相持。則保守極難。故全羅都巡察使權慄。巡邊使李養等。相議令全羅兵使宣居怡。助防將李繼鄭。京畿助防將洪季男。本道助防將鄭名世。慶尙右兵使崔慶會。義兵將高從厚。領兵。本月十四日。發自咸安。十五日。來陣晉州。俄有全羅道捍後將扶安縣監軍官金漢希。馳告內。昌原彌漫之賊先鋒。十五日未明時。直越竹嶺。已入咸安事。進告。又十六日。京畿助防將洪季男。親自馳來言內。同日卯時。咸安來入之賊。不知其數。出來晉州地。盤城縣屯聚。距晉州四十里。必是欲犯晉州之計云。諸處之賊。合勢衝突。果如前日被擄人所言。故晉州城中。諸將方約束把守。而全羅兵使及京畿助防將。則因巡邊使關率兵向宜寧。此地等賊勢緊急。緣由稟告於天將。急速赴援。事牒呈。一時到付。巡邊使李養。十六日。成貼馳報內。十五日。咸安之賊。分兵四出。江越邊上下。焚蕩云云。故先送慶尙左兵使高彥伯。使與星州牧使郭再祐。合軍把截。卽見郭再祐馳報。賊船百餘隻。自鵠院上來。到尺堂津下陸。去牧使結陣處。五里許。安國老家。焚蕩。故發送義兵軍及左兵使軍。使之勦擊事。馳報。又左兵使高彥伯。馳報內。宜寧地。五骨里。賊倭先鋒五十餘名。焚蕩。與星州牧使合軍追擊事。馳報。賊勢甚盛。四面充斥。而諸將皆赴晉州。此處則只有巡邊使左兵使星州牧使。而所率軍。

兵不滿六百。以此備禦無計。左道諸將。急速起送。天兵亦爲請來。繼援事牒呈。又一時到付。督捕使朴晉。防禦使李時言。金應瑞。鄭希立等。同狀。十八日。成貼馳報內。當日到付。密陽府使朴慶新。馳報靈山境內。賊船無數來泊。又賊百餘名。自買浦府地境。熊峴向去。府使率軍二十餘名。不意追逐。多數射殺云云。而靈山餘賊。還向買浦。不無衝突。直路之患。故使軍官朴守豪等。抄率精銳。與密陽府使合勢。阻遏買浦之賊。而諸將等。方抄率精銳。馳向靈山。以爲乘機。擊之計。事牒報。臣因此商度。咸安。避出之諸將。入守晉州者。其數似多。足可隄防。而所患。軍糧乏絕。若或持久。勢難支吾。宜寧所投之軍。果爲數少。加送援兵。固是得計。而右道及直路把截。亦不可虛。適值崔遠率軍來。到星州。故使之因率所領武士。急急馳赴。與右道監司。約束爲援。運糧官趙信道。所管糧料。已盡輸運。更無可爲之事。而生長咸安。熟諳晉州等處形勢云。故別爲督戰官。送于崔遠處。使之極力措置。大概賊勢極熾。諸處衝突。將有不戢之勢。而兵孤糧盡。環視本道。已無可爲之事。只恃天將之赴救。而又有掣肘相碍之端。尤爲痛悶。輒將告急文字。連稟劉總兵。庶幾動心。而各處將官。更爲嚴飭。期於收拾。先將已到之報。急此馳啓。

馳

啓晉州陷城狀

七月五日

臣在京時。聞慶尙左道兵勢孤弱。及出城之後。聞都元帥金命元。留慶州。欲就

議事將發向左道。及到道內，聞晉州事急，卽馳向右道，而蕩敗之餘，終日行路，不見一人。驛路不通，文報不傳。星州等處，則糧料掃如一行，飢困不得已寸寸前進，轉向高靈。及到安彥驛，有一驛子自下而來，乃持巡察使行移，往戶曹判書李誠中處者。而口傳晉州已於前月二十九日爲賊所陷，臣不勝驚痛之至。卽馳到高靈，則文報猶不來，而所傳之言，果似非虛，皆以爲賊累犯累退，不意二十九日天雨，城毀數疋長，賊兵乘時亂入。我軍不能禦，入城之將，則時未知某某人被害矣。督捕使朴晉都、元帥軍官朴宗男率軍結陣于高靈草溪之境，而賊兵昨日已入草溪云。距此只數十餘里，人心危懼，莫保頃刻。大概右道一境已爲空虛之地，而此縣自全羅道輪到軍糧千餘石，亦露積在外。賊若衝突，皆當被奪。臣方令差使員興德縣監李佶暫爲移置僻處矣。劉總兵之軍，今日自大丘來此，結陣於縣南山上，而其數不多。其委官率來者云：明與明明總兵亦率大軍來駐此處。臣作爲稟帖，馳人請救，亦未知肯許與否。臣觀此賊兇狡叵測，佯以巧計，少緩天兵，而吞噬無已。在我無軍無食，日就靡潰。區區南方之保障，惟恃晉州一邑，猛將精兵，多就城內，而今又不幸，徒爲拊心。本道左右道地勢懸遠，文移往復，動經時日。慶州等處，尤甚虛疎，而金命元又復遞去。新元帥權慄雖在湖南之境，而湖南諸邑守令亦因天兵支持，盡出在外。道內幾於空虛，末由策應，尤爲悶慮。

馳啓晉州陷沒後本道事勢危迫狀

七月八日

晉州之陷。雖因賊兵浩大。而策應之失。亦爲可慨。臣在京時。聞牧使徐禮元。以
天兵支待差使員。來在咸昌。卽移文以爲晉州朝夕將被兵。守城之官。豈宜
遠出使速還送。而遷延不還。及聞賊兵已迫。然後僅得入城。防備等事。不能預
先措置一也。且其諸將。率客兵多聚城中。而無統制之人。各執所見。未免紛雜
二也。諸將當初不量事勢。輕爲進陣於咸安。及賊兵大至。狼狽奔還。致賊乘勝
三也。鼎津若列軍固守。則賊或不敢四面俱進。而率皆棄去。賊兵水陸俱進。晉
州未陷之前。宜寧三嘉丹城鎮海固城泗川之地。賊皆雲合。援兵路斷四也。諸
將崔遠宣居怡以下。所率之軍甚多。雖不能直至城下救援。而或爲疑兵。或爲
夜襲。力盡乃已可也。而率皆逃避山谷。一不出頭。晉州之人。日望援至。祝手呼
天。而竟無一人來救。遂至於陷城。屠戮之慘。不可忍聞。諸將聞晉州失守。率皆
潰退。今不知在於何處。而其所經過之邑倉穀。皆縱其軍士。破散無遺。其中崔
遠所率之軍。作亂尤甚。極爲痛心。督捕使朴晉。助防將朴名賢。別將朴宗男等。
始自左道來。亦以元帥之令。將向湖南。臣以爲此道旣無兵使。諸將無一人見
在者。是委一道於賊手。故朴晉等三人。姑令仍留高靈。把截待變。且聽天將
指揮。使傳令。卽接伴官徐渚牒報內。劉總兵已率其軍。來駐高靈。其先鋒之在
陝川者。發向咸陽。且言總兵之意。急欲進勦云云。而未知畢竟如何。李都督亦

率軍來高靈。而道內直路各站軍糧。本道不能自辦。僅以湖南之穀充備。而遠處轉輸。其數不敷。今亦將竭。而大軍方更至。分散於各邑。往來不定。東西奔馳。人力殫盡。數日之後。軍糧將無出處。而湖南糧道。僅有居昌一路。本道亦被衝突。則何暇更念他道之事。百計千思。不知所爲。戶曹判書李誠中。病重不省人事。臥在咸昌路邊。調度等事。亦無料理之官。惟御史尹敬立及誠中從事官李自海。分投各處。督人催輸。而物力殫竭。極爲可慮。卽又見左道監司馳報。東海一帶賊船見形者甚多。此豈盡爲漂到之船。不無彼此俱發之患。元帥金命元旣遞去。權慄雖代爲元帥。而方在全羅道。道里懸絕。無路策應。大抵右道當時保全者。只晉州居昌山陰安陰四邑。而今者晉州山陰。又被陷沒。獨有居昌安陰。時無賊報。而人民倉庫。皆已空虛。號令調發。無處可施。臣以庸殘無似。大病之餘。精力頓不逮於前時。束手吁歎。計無所出。朝廷急施長策。以救顛危之勢。

慶尙道賊勢危急請速具由

奏聞

天朝狀

月七

當初賊兵自京城退遁之時。臣之愚識。已恐盤據於慶尙道。更逞兇毒。到今事勢日益危迫。佯以講和之說。籠絡天將。而東侵西掠。惟意自如。晉州旣陷。一道更無保守之處。若慶州又有此變。則嶺南之事。將無着手處。嶺南旣不能保。則江原忠清全羅道。將次第瓦解。而大事去矣。自沈惟敬挾倭將借行之後。道

路傳說不勝藉藉。或以爲請以漢江分南北。其說可駭。不可形諸口舌。臣在陝川時。義兵將鄭仁弘。以牛酒犒慰。天兵劉總兵語諸仁弘曰。倭奴與沈惟敬偕行。欲以漢江以北爲中國。以南爲倭地。天朝豈爲聽許。萬一許之。則汝國當何以爲之。云云。仁弘親聞其說。而傳於臣。臣始知道路之言。亦有所自。不勝駭愕痛心之至。臣竊慮凶賊。旣以巧計誘弄。天將而天兵屯守一年。師老糧匱。其勢將不日潰散。我國竭生靈之膏血。殫八道之財力。支持大兵。勢亦日就困竭。是賊坐以長策困之。而後乘其弊。誠可痛哭流涕。宋經略與提督。旣不可與論議。惟望朝廷。更加商量。具此事情。急急奏聞於天朝。使無意外之患。况倭賊若據南道。將以舟楫出於西海陸路。更爲長驅。必爲中國無窮之禍。非但爲我國之不幸。此等事情。亦當明白具奏。并爲十分從長善處。

請具兩南危急之狀。求救於經略提督。且戶曹判書李誠中身死。其代速爲差送狀。七月十日

臣於本月初九日。聞劉總兵在陝川。馳往見之。總兵頗從容談話。臣極陳倭奴譎詐。以和議緩天兵。使不救晉州。而實行吞噬。今本道與湖南。危在朝夕。懇乞馳救。總兵言吾志不行。無可言者。似聞賊已向全羅。若此道不能遮截。則患不可勝言。吾欲提兵往救。曾招住居昌遼將。使之來守高靈。陝川。然後吾欲行軍。而號令不行。然若實知湖南被兵。則當隨備等所言。而赴救。須討一地圖。詳

載道里由經之路以來。且言此處無一將官。軍兵亦無一人何耶。臣對以諸將初聚咸安。退保各處。而聞晉州之陷。皆潰散向湖南以去。曾已啓知國王。必按律治罪。但事勢危急如此。望老爺亟速救濟。總兵曰。吾意亦然。而不能自擅。若體探全羅賊勢虛實。則當卽進兵。臣退具地圖一件。又爲稟帖以呈。總兵見畢。猶言諸將不行其令。不得自由之狀。縷縷不已。而卽多發擺撥兒。哨探宜寧之賊。不無進戰之意。故臣姑留此。日日苦勸進勤矣。督捕使朴晉。助防將朴名賢。別將朴宗男。只率疲兵五六百。與天將吳遊擊。把截草溪。而崔遠。李贊。李時言。則聞晉州城陷。卽從居昌。咸陽等處遁去。未知在於何處。自晉州之陷。人心汹懼。遠近之民。荷擔以立。而湖南聲息斷絕。只見權慄。移文朴晉處云。倭賊已入求禮。將向谷城南原。以此觀之。倭之犯湖南。似爲的然。不勝痛悶。此處之賊。如宜寧。歧江等地。設柵屯守。其數甚多。日日散出。焚掠於陝川。三嘉宜寧之境。距陝川四十里。望軍傳告。總兵披掛令軍將發。而聞賊退去。乃止。今日宜寧探候若來。則臣當率巡察使金功。接伴官徐湑等。庭立泣請計料。糧餉支供。本道則處處蕩敗。只以湖南諸邑。出站轉輸。艱難支度。前來米饌。今已垂盡。近日則繼運路絕。又全羅各邑之民。來此者。聞其道有賊變。驚動逃散。不能禁止。今吳遊擊駐草溪。陝川有劉總兵。居昌又有遼將五人。駐軍大丘密陽直路。亦有往來。天兵或多或少。出站諸邑。隨其所往。顛倒追隨。人困馬疲。氣力都盡。千

思百計，不知所出，卽刻金泉察訪馳報內，戶曹判書李誠中，又於本月初七日，以病身死，雖有督運御史尹敬立，而無調度重臣，事事如此，尤爲痛悶。朝廷急察兩南危急之勢，連續致懇於經略提督衙門，今雖已晚，庶有萬一可救之望，而調糧之人，亦急時差出馳送，毋乏軍興。

馳

啓晉州城陷曲折狀

五月十日

防禦使金應瑞馳報內，被擄逃還人私奴萬春招內，晉州攻城時，在高峰結陣處，凡接戰曲折，一一看審，則賊晉州城五里外，東西北向及南江越邊，凡二十八處結陣，其日接戰時，倭賊先爲放炮，城內之人，亦放銃箭，賊進迫城下，城內人攢射如雨，賊多致死傷，還爲退陣，其日夜三更，賊多放鳥銃，鼓譟大呼，而城中之人，不爲搖動，第三日，賊伐取穉松雜草，作空石盛土，城外三十步許，造山四處，又作四層樓閣，高九仞許，俯瞰城中，以爲放炮之所，造山造樓時，城中人無數發射，死者甚多，而賊不計死生，死者曳出生者進前，不日成之，多登其上，無數放炮，城中之人，少無驚懼，反示揚揚自得之意，賊退陣，第六日黃昏，諸陣之賊，咸聚一處，城中人，放震天雷三度，落於賊中，衆賊觀其體樣之際，坼裂觸死者，不可勝數，賊不敢戰，還退，第七日，城中之人，又放銃箭一度，賊亦多死，戰數不利，將欲退兵，更生謀計，一日伐木作板，東邊有大槐木一，倭攀上其木，見其城中虛實，後以板子鋪之於城外，掘取其下，漸就城底，第八日午時，城子三

十餘把，不意頽落。槐木攀上之倭，一吹螺角，諸陣倭賊，或騎或步，一時突進。城中人，弓銃槍劍俱發，極力拒戰。賊徒冒死踐屍突入，守城之人，勢窮力竭，退縮一隅。賊已入城中，彼我交鋒，相爲血戰，死者不可勝數。城中積尸如山，彼我相半而死。我國人溺死浮水者，亦不知其幾。陷城之日，不計男女兒童，盡數斬殺。翌日，則殺男子擒女人，戰船先送釜山浦。諸倭仍留晉州，其隣邑如固城、河東、昆陽等處，日日焚蕩擄掠。又明日，有騎步倭十名，持踏圓印文書來，衆倭聚首爭見，曰：「斯速回兵入國事，吾國王之命云。」欣欣喜悅。又明日，群倭皆向昌原、金海去。小人亦隨去，因戀家鄉，逃來現告云云。事牒報。又據被擄逃回人朱義壽招內，倭賊於晉州前年退築新城，地形平坦處，造作山臺，凡八處，俯臨城中，多放鐵丸，而其山臺，束竹遮障，不相連續，故雖放立字銃箭，幸而得中，只爲貫穿而已，不得催倒渠之將帥。李宗仁逐日力戰，賊束竹乘夜齊立於壕邊，矢石不能入，因自束竹之內，亂投瓦礫於壕中，及城底，頃刻填滿，賊之着鐵甲者，十餘人，突進城底，將爲破城。宗仁曰：「事急矣，卽自射臺，發大箭射之。」洞貫七賊，賊少退。其時忠清兵使隱於城堞，聞宗仁射殺七賊，喜而起立，舉頭觀望之際，鐵丸中頭口貫額，仆地，卽曳去。自初被圍，黃進極力備禦，至於身擔土石，肩背爲之出血，旣而賊又以大木版作橫如棺狀，外以生牛皮數重裹之，載於童車之上，賊入其中，直推到城下，以鐵物毀城，城中亂投藁草柴木，灌油焚火，間間燒燬。

而擁城底數三石。賊已拔出城穴。城將頽圯。城中計不知所出之際。有一賊持鐵掘錐大呼直進。拔出城穴上大石。城遂頽落。城中又以拒塞木荆棘填塞。賊冒死入城。而城中之人亦死戰。賊幾不能入。適倡義使金千鎰之軍守北城。聞城毀先爲驚動。棄城奔走。賊望見從北城。因以竹梯登城。三賊攀堞大呼。衆賊四面俱入。城不能支。李宗仁獨在所守處。射矢不撤。俄而爲鐵丸所中。流血淋漓。顛仆不省人事。義壽扶起不得。遂自逃去。云各處馳報及取招之辭。雖有詳略。而大概皆同。宗仁黃進等力戰殉國之忠。尤可歎賞。而諸將金千鎰崔慶會等。聞城陷亦相携痛哭於蠹石樓上。自投崖下而死。城中積尸如山。三十里內。臭不可近。而館舍閭閻蕩然一空。城堞亦皆夷平。賊雖退去。更無完集之勢。但此乃兩南咽喉保障之地。其在城中者。雖盡死亡。而四境遺民奔竄山谷。賊退之後。不可不趁時還集。且其境內年穀頗盛。而土賊結黨橫行。邑無主宰。則餘民雖欲來尋故居。而有不可得。臣欲差遣假牧使。眼前無可合者。不得已令別將朴宗男率軍士數十餘人。馳去審視後。曉諭人民。禁止侵掠。仍爲假守之任。以待朝廷處置。

承 召命發向上道狀

本月十四日。臣軍官田齊安。自全羅道回來。持都元帥權慄膽送有旨。示臣。其有旨內都體察使已爲召還。行在諸道軍權。悉委於卿事。臣受任累。

月略無寸効。罪當萬死。而反蒙召還之寵。感激惶恐。不知所措。臣時雖未承有旨。而已知有召命。不可仍在此處察任。故即自陝川發向上道。以待召旨之下。上去計料。

請車駕早還京都。以答四方顛望之心。狀月七

京城收復已久。而車駕尙未還都。人心之顛佇日甚。即今賊兵屯據海邊。無渡海之意。衝東擊西。勢益鷓張。而諸將策應未免稽緩。且啓請往復於數千里之外。動經數月。因失事機者亦多。臣之愚意。六宮雖暫駐西路。車駕則早還漢都。以答四方萬姓之心。又經理東南。毋失機會。則其於中興大計。係關非輕。蓋進取之事。進一步則得一步。退一步則失一步。自古而然。伏望朝廷毋以此賊暫退。而益思長遠之慮。以恐後患。不勝祈祝之至。濫陳警說。惶恐無已。

馳啓賊勢方急。姑留本道待都元帥來到後。上去狀月七

臣祗承召命上來。行到軍威得本道左監司韓孝純馳報。倭賊欲犯蔚山慶州。雖其所報未知虛實。而事勢可憂。即書稟貼馳送于劉總兵。請移兵近駐慶州。以爲聲援。當日韓孝純又馳報。賊勢極熾。蔚山彥陽梁山等處倭賊。遍滿山野。處處列陣。衝斥上來之患。迫在朝夕。事勢甚急。都元帥巡邊。使以下諸將。方皆駐兵於右道及湖南之境。急速指揮。使之不分晝夜馳援。以救危急之勢。

云云。臣既承 召命，當急速上去。而適緣道內賊變如此，都元帥以下諸將，無一留在道內者。只有左兵使高彥伯在慶州，而率飢羸數百之卒，無望於捍禦。方張之賊，慶州危急，只在朝夕，而上道諸邑守令，皆因出站不還，人民飢餓，癘疫大熾，丁壯死亡殆盡。餘存者，僅屬聲氣。雖欲呼集軍兵，以爲救援之計，其路無由。韓孝純欲臣少留，指揮諸將，誠出於閔迫。臣卽時傳通於元帥，使之登時處置。惟是全羅道距此絕遠，而賊兵已在慶州數十里之近，設使來犯，將不能及來。而臣承 命中路遲滯，且未免干預軍事，極爲惶恐。姑看數日，待都元帥來本道，後卽時上去計料。

馳 啓都元帥已到卽時發行上去狀

臣既成此狀，啓未及發送，而軍官李惟生還自劉總兵處。總兵答書云：據來報知倭情叵測，隄防當嚴。今已發兵二隊，先赴大丘屯守，明朝統領衆兵俱往。云云。臣前在軍威道中，聞蔚山慶州事急，卽送稟帖予劉總兵，請速移兵救援。而總兵幸卽聽許，賊若聞之，庶有畏戢自退之望。且因李惟生口傳，聞都元帥權慄亦已到陝川，策應等事，自當處置。臣承 召已久，尙此遲滯，極爲惶恐。卽時發行計料。臣大病之餘，冒暑駢馳，引飲無節，因成痢疾，氣力委頓，寸寸扶曳，恐不能計日進程，尤爲惶恐。

請軍威縣監柳澈仍任狀

臣行到軍威。有縣民洪軸等三十餘人。聯名呈狀內。縣監柳澈。本以慈詳愷悌之人。專以奉公恤民爲事。變生之後。不離境土。當賊據本邑之日。定將抄卒。設伏要路。捕斬射殺。不知其數。賊退後。卽入官家。收聚餘穀。一以爲軍糧。一以救飢民。親持穀物。出入村落。至誠賑活。民賴得生者甚多。一境男女。莫不愛戴。雖於餓饉癘疫之餘。形息僅存。而天兵支待。軍糧輸運之役。爭先酬應。不敢違令。今聞與巡察使相避。當爲遞去。當此艱難蕩敗之日。若失縣監。則子遺殘民。萬無生活之路云云。臣自前素聞柳澈善於居官。今見民情。參以物論。果非虛語。當此調度支待百役叢集之時。善治守令。不可輕遞。道內賊兵猶在。平時相避之法。不可太拘。柳澈姑爲仍任。以慰一縣民情。且除迎送之弊。似爲便當。

以病請鑄罷職名狀

八月十日

臣自四月以後。大病之餘。氣力柴敗。病未盡差。而以南方事勢危急。不敢自安。於遠地遂扶病馳下。道中又聞右道事急。晝夜疾馳。因奔走於高靈草溪之間。雖無補絲毫。而賤病則日漸沉劇。尋常寒熱往來。洩瀉無度。引飲煩燥。食氣專廢。當此之時。所當以死爲限。不敢言病。及奉召命。感激惶恐。趁日起程。行到江原道原州。路次敬奉宣傳官賚來。聖旨。又回向堤川。是日風雨大作。山路艱險。病遂加發。寸寸前進。至忠州而幾不能運身。留一日。踰嶺抵聞慶。更留一日。冒死進程。到路中犬灘地。不省人事。顛仆於草野之中。數日內。症勢乍寒乍

熱有似痲癩。臣自量病入膏肓。皮骨相粘。見者皆謂面無人色。而國事方急。傳聞吳遊擊劉總兵。皆已發還尙州。殊無久住之意。道內糧餉已竭。湖南運糧不繼。戶曹判書李誠中身死。已經一月。而代員不來。運糧餉軍之事。日益虛疎。將不成貌樣。臣既晚來此道。不知頭緒。往來道路之間。時日蹉過。事機愈遠。身又病憊如許。不堪馳驅。擲奸檢舉。亦難如意。伏念賊兵時方屯據。兇謀難測。而在。我事勢一日危於一日。萬一。天兵以無食迫寒捲去。賊遂乘虛衝突。則未知何以爲計。此臣之所以俯仰寒心。而中夜拊膺者也。朝廷遠於千里。此間事情容有未及盡知者。如臣殘病。速許鑄罷。更遣重臣之有識慮能辦大事者。晝夜星馳。以濟國事。

請煮鹽賑救飢民狀月八

封上吳遊擊書兼陳禦賊形勢狀

請下送譯官照察 天兵放糧及發下三道奴婢貢布授衣 天兵狀

請急遣調度重臣勾管糧餉事及誅長興府使柳希先以肅軍律狀

并見本集

陳運糧之弊狀

臣竊詳軍糧散失有三弊。處置有三難。而繼粟之策。乃其第一急務也。當初嶺南賊勢未退之日。湖南軍糧。輸到嶺路。方俟賊遁。而星州亂民。假作倭形。聲言

賊至。不意突出。負戴之人。舉皆驚散。亂民恣意偷取。散失之數。幾至三百石。此則臣未到前事也。卽令各官徵還見偷之數矣。頃日晉州旣陷。賊向湖南聲息甚急。湖南軍糧。輸至雲峯南原。任實之間者。其數亦多。而將其穀物。或委棄道路。或徑還其家。若其旣入嶺界。未至站所者。則到處拘留接餉。天兵而事出倉皇。文簿錯亂。不可准信。今方文移兩南監司。推覈散失。俵給之數矣。大抵湖南各官軍糧輸運之時。計其田結人馬之數。准給軍糧。付之監官色吏之手。盤桓中路。耗費萬端。而及聞虛警。潰散遺失。如前所陳。此乃軍糧在路散失之一弊也。臣意後運軍糧輸運時。則或以剛明守令。或以秩高軍官。分路定差使員。各官受出時。一一計給。約日到境。上點閱。領納于站所。則可無在路散失之弊矣。湖南軍糧到站後。卽欲畢捧積峙一處。而嶺南無倉廩。人力可以藏守。且一應刷馬。專責軍糧載持。馬一捧之後。則必皆逃還。不得已分授納者。各自守直。以到站先後。逐日散料。隨其畢散。始聽還歸。已成各站規例。而日月旣久。糧食自絕。偷竊不已。防奸無路。或有恣行買賣者。隨現痛治。一二石耗欠。則典賣牛馬。卽加徵納。而至於十石之外。則各令本官分徵一族。其畢徵輸納。邈不可期矣。至於劉吳諸將所駐處。則軍兵自有元數。散料時可無濫授之弊。而各站無將留兵及道路往來哨卒。自書帖字。任意加數。或有一人一馬。而至於十者。又持大斗。自爲斗量。散料官欲辨正濫帖猥量之事。則橫加鞭箠。莫敢誰何。任其

自取以有限軍糧。何能塞其無窮之欲乎。此乃軍糧到站散失之一弊也。臣意興守偷竊之穀。則遲速間本國地方官。句當徵欠。而天兵濫費之弊。非臣等所能糾正。且經理提督三將標下。則劉吳號令。亦不能禁抑。自朝廷下書于接伴使。使得出提督禁標榜示嶺路。則庶有畏戢之望矣。大軍一帶分設站所。儲峙糧料。而頃日右道賊勢緊急。遼將四五員。自尙州移駐居昌咸陽。劉吳兩將。自海平大丘移駐陝川草溪。自各站移送之糧。不下千石。或至軍前。或在中路。參錯於百里間。而今又遽還本站。分布之糧。一朝還運。其勢末由。數少軍糧。耗散於移來移去之日者。不知其幾。而糧料易絕。專由於此。此乃軍糧移來移去散失之一弊也。臣意此則臣與地方官。參究去處。終當推還其數。而備達移來移去散失之弊者。欲其朝廷洞知糧料遷移。自就耗損之意也。軍糧大米。則不久將絕。豆子則各站遺在。通計萬餘石。露積空地。今已四月。不蔽雨水。腐朽太半。誠爲可惜。欲令嶺南守令看護。則湖南納者。必不受其檢勅。而湖南守令。則四五站。只有一二員。分守爲難。此乃軍糧處置之一難也。臣意近觀賊勢進退。天兵去留。納置一處。以本官守令看護。而湖南納者。皆令還送。其中尤其腐朽。不合軍糧者。則依前狀。啓各站飢民。斟酌分賑。宜當矣。轉餉軍食。會計爲重。自有該曹掌之。臣則自初隨其糧料。有無督運。繼餉而已。一自戶曹判書病逝。所率算員等。散歸京城。該曹文簿。亦不分明。臣只以各站用下遺在之數。

略加打算。而前後抵牾。取實爲難。此乃軍糧處置之一難也。臣意戶曹堂上郎廳中。率筭員急速下送。將兩南該曹元定及用下遺在之數。一一會計。俾無國穀耗散之弊。宜當矣。千里轉運。自至欠縮。既有欠縮。則不得不生徵。當此公私俱竭之日。刻期生徵。則人不堪命。若或少緩。則徵欠無期。生徵伸縮。而民生休戚繫之。伸縮得中。公私兩便。最是難處。此乃軍糧處置之一難也。臣意朝廷令兩南監司。各別留意。使隨生徵便。民生不至失業。國穀不至欠縮。宜當矣。臣請以繼粟之策繼之。今日賊勢不可以日月期。賊勢未退。則天兵不還。當初所備數月之糧。今已罄矣。繼粟之策。一刻爲急。而朝廷未有指教。方伯未有處分。督運一小臣。徒自煎悶。束手何爲。爲今之計。秋日尙晚。早穀已登。嶺南左右道付種處。或以貢物作米。或以田稅引納。而又從以空名帖。多般募粟。則隨所得多少。而可以添補軍食。此事必須身自巡歷。留連措置。可得就緒。而臣則急於劉吳轉餉。不得暫離。大路左右監司。方因賊勢。計不暇及。臣誠痛悶焉。前春督運宣傳官二員。來在左右道。而受命有限界。號令不遍。且武官不能彈壓。亦不爲有無於調度矣。朝廷速爲處置。調度督運。一時并舉。同力措置。則彼此兩便。而大事可濟矣。自轉運使遞還。戶曹判書病逝以來。臣有意陳達。而惶恐不敢有所云云。今則賊勢如是。糧絕如是。左右上下道路絕遠。未及周旋。又如是。謹此味死以啓。

松山所安 靖陵玉體奉審後馳 啓狀_{月八}

臣於前日宣靖陵奉審時。病未進參。今月十八日。始隨諸宰之後。奉審松山所安玉體。則頭面上毛髮盡脫。皮骨粘稿。自脛以下。肉盡骨在。大概顯是年久之體。而胷腹及背。則皮厚而堅凝。不見骨節。胷上甚高。背後左邊肩甲。有穴痕一大一小相距一分許。所見惟此耳。其他皆不可辨。伏念此乃變中之極變。辨別少差。則事不忍言。臣後生昧識。罔極之中。不敢輕議。如何惟在更加精審。參以陵上形止。并搜索近陵處古塚破壞與否。多般訪求。或爲神明所佑。萬一有得實之望。

懲毖錄卷之十三終

懲毖錄卷之十四

辰巳錄

陳慶尙道防守形勢狀

癸巳九月

今日形勢。反復商度。雖設百險於他處。而若嶺南不能支撐。則江原兩湖。莫非次第受兵之地。而大事去矣。蓋賊之所忌憚者。天兵。今若令劉摠兵之軍。進住於大丘清道之境。左右顧盼。遮蔽慶州及中路內侵之勢。又使駱參將等軍。進屯於固城泗川之境。遮遏賊兵西犯之路。且連三道舟師。水陸合勢。以壯聲威。而從海道。自順天運湖南之穀。以爲軍食。使風一日而可至。以省陸輸之弊。因令我軍。臨鼎津而設機固守。無使賊舟得渡。三處連亘。且戰且守。則賊勢自歛。不敢肆意衝突矣。

有旨。祇受後仍請解職歸見老母狀

甲午冬

臣於楊州道中。祇受承政院有旨書狀。以臣呈辭歸覲。雖出於人子之至情。目今南賊。尙未渡海。西邊又有警報。國事艱危。甚於前日。此豈大臣顧念私家之時乎。輕易去國。物情悶鬱。停行還來事。有旨。臣俯伏路次。惶懼隕越。不知所出。臣添在大臣之列。不念國事艱危。徒以區區私情。陳瀆聖聽。動招物議。有此狼狽失措之事。臣罪固難容於萬死矣。顛沛道路。進退維谷。俯仰慙覲。罔

知所達。臣之一家情事。他人豈能盡知。今日在朝之臣。豈有九十之母。遠在千里之外。三年不得相見。如臣者哉。宜人情之不見諒也。臣若母病不深。事勢稍可遲留。當此寒月。臣以經年病喘。何必忍死扶曳。跋涉脩程乎。誠有所不得已也。臣母亂離以後。多喪女息。憂傷成病。今又以念臣之故。病勢增添。臣之不孝極矣。如是而臣忍心不歸。諉之曰待國事寧帖。國事寧帖。既非朝暮可期。其時臣母之存與否。又何必耶。臣言之至此。不能爲心。夫母子之情。自臣一家而言。則固是私事。若以朝廷使入之道而言之。則亦天下公理。自古世雖危難。而此路不可蕪廢。今以臣之無狀。而公議之不容如此。臣所自致。尙何言哉。臣伏念聖恩如天。無物不遂。前此固哀臣之至情。難抑。已許他大臣出仕後歸省。臣祇奉明旨。計日以待。今則左相金應南。已出供職。廟堂不爲無人。邊事雖急。軍國重務。自當旬管。臣則於此際。歸見垂死之母。公義私情。可謂兩行不悖。而出城半日。嚴命又下。促臣還朝。臣欲進不得。欲去亦難。精神精奮。亂惶惑失措。心火熾發。病又添加。僮仆於荒墟草野之間。呻吟待命。伏乞聖慈。哀之。闕之。令臣仍奉前旨。寸寸下去。以見老母而還。如大臣之任。不可久曠。則亟遞臣職命。使臣安心時月之間。少免瓌曠之罪。公私兼濟。尤出陶鑄。不勝涕泣。祈祝之至。

陳修築南漢山城狀
丁酉二月二日
在龍津

臣巡到廣州。登南漢山城。更爲詳察形勢。圖畫上送。其城西北東。則皆據億丈之峯。勢甚斗絕。惟南面四千餘尺。水口近處。頗與外山相連。不甚險絕。若欲修葺。則當先專力於此處。然後可無疎虞。計其功役浩大。非今日人力所易辦出。而亦不可以時日望其成就。但本邑民情。則皆欲以此爲避亂之地。今旣略設城門。而臣以沿江淺灘等處。今已冰解。措置尤急。故今日發向龍津等處。巡審計料。僧將惟政。來在其處。欲與其徒。極力修築。不意下去南方。修築之計。尤似遲延。且近因兩天使之行。畿甸之民。累月出待。力甚困疲。而今年寒氣。入春猶甚。高山絕頂。冰雪尙在。土脈未解。旬日之內。勢難始役。萬一警報稍緩。而民力少紓。則當觀勢。漸次修築。以爲永久之圖。似爲宜當。臣從事官韓浚謙。黃海道操鍊防守形止檢舉次。分付上送。

請修設婆娑城外更爲措置楊根山城狀

卽見備邊司行移云云。夫婆娑一城。雖在上流。而各處關防津渡路徑之雜出者。豈可以一城而盡爲防塞乎。壬辰之變。賊陷忠州。分兵北上。一運由驪州清心樓前渡涉。其時元豪率數百之兵。把截江北數日。而賊兵不得徑渡。婆娑城在驪州利川之間。其所形勢相連。可以控制者。只此數邑而已。若論其遠勢。則必須堅守忠州。又以重兵留屯原州。而與烏竹兩嶺之勢。相爲輔車。然後婆娑之勢始固矣。婆娑以下。又有要害必守之地。楊根南山。正當沙灘。而過此則迷。

原之路。加平之路。月溪之路。皆從此分出。若賊過原州。由婆娑之後。直向楊根。則惟此處爲可控扼。臣今行登此山。審察形勢。則其山非徒關於守灘。上與婆娑相對。下與芙蓉相望。直當江邊諸路之會。實一形勝之地。故責令楊根郡守。崔輔臣。漸次措置柵壘。爲屯守之計。距此十餘里。又有咸公山城。在龍門山上。四面斗絕。又是天險。可爲一境老弱避亂藏穀之所。故并爲分付措置。大概畿甸遺民。百役叢集。瘡痍困頓之狀。不可忍見。防守禦賊之事。雖出於生道。役民而役。臣民殘。如蟻聚垤。難望成就於時月之間。極爲痛悶。忠州原州措置等事。則各令其道當事之臣。申勅舉行。俾無緩不及事之患矣。

請楊根郡守崔輔臣勿推仍任狀

二月

臣巡到楊根邑中。品官金應舜等五六十人。呈狀于臣云。本郡自經賊變。闔境空虛。孑遺之民。百不一存。而爲嶺南往來之路。使命絡繹。刷馬供頓。百弊旁午。不能支當。適郡守崔輔臣。清謹勤幹。盡去弊瘼。近日詔使之行。一國騷擾。而郡守處置得宜。境內之民。不至甚苦。今聞以秘密狀。啓路中開坼之故。被推。恐至罷去。不勝痛悶。一境大小之民。各出米豆合五十石。已爲積置。請以此爲軍糧。而贖郡守推考之罪云云。臣因以訪察民情。則似皆出於至誠。故臣諭以爾等民情。當爲上聞。而納米之事。近於無名。但旣已聚合。則還散亦難。本郡束伍軍二百餘名。軍器未備。脫有緩急。難以空手赴敵。若以此穀。爲匠人料食。措

備弓箭分給軍士使之佩持禦敵則此乃以一鄉公共之力爲一邑軍士之用有補於公家無害於事體庶爲便當云則郡民皆喜悅稱謝咸欲依此施行大抵楊根在京城上流上與婆婆相連下與龍津相接防守措置其事甚急崔輔臣以年少武臣到任之初頗得民情若又遞去則此處之事不成模樣不但民情缺然而已故不敢不達

陳京畿編伍軍及城柵措置形止且請水原判官趙撥論賞仍給印信狀京畿左後營軍臣巡到婆娑城初九日習陣因爲分付江灘防備等事約束罷遣後十六日巡到禿城聚右營軍三千餘名習陣而罷左右道軍人稍分隊伍不失期會則略成頭緒但衣服不備器械未精陣法未熟進退坐作尙多齟齬此乃編束壠畝之民而間操閱非坐營養練之兵勢固如此無足恠者惟當不廢鍊習之事日久漸磨成就庶或有用於緩急其中能射之軍則頗多亦有前日經戰可用之兵故使防禦使邊良傑於哨軍之中更加精抄百中取一以爲選兵不限多少以待其用使勇士金瑩等分總別加訓練事再三分付禿城則措置已久故城機砲樓木柵軍器比婆婆頗已備具而糧餉亦合米豆皮穀并五千餘石儲在城中本邑操鍊之軍又二千四百名計塲分配四面以擬策應脫有緩急不待遠徵他邑之軍而自可堅守矣城中募入軍士金瑩等數十餘名呈狀于臣云守城將趙撥改築城子造作三門大廳屋宇軍器房室盡皆

修繕。又勸諭哨軍。作爲屯田。前年收得稻六百餘石。勞苦如此。而未有論賞之事。群情各自缺然云。臣審察禿城措置之事。則大概此人之力爲多。似當量加褒獎。以慰軍心。趙撥雖爲本府判官之任。而長在禿城。凡文移鍊兵之際。無印信。每以白文施行。願依北青咸興判官之例。賜以印信。以應公務。亦出於軍民情願。朝廷量宜處置。

請把總哨官計仕遷轉激勸人心狀

武學事目內。營將把總哨官。考其勤慢。錄其實狀。并爲啓聞。別樣陞擢斥黜。以爲勸懲。故臣令左右防禦使。查考把總哨官等能否牒報矣。左防禦使邊應星。牒呈內。左營前司把總李影門。禦衆有序。訓練士卒。多有成才者。水北把總朴洙。弓馬超才。士卒倚恃。右防禦使邊良傑。牒呈內。右營前司把總辛璧。禦軍有法。善於其任云云。臣因自審察各人實跡。則李影門所鍊五哨之軍。試射中數居多。朴洙。武藝超群。勤察其任。辛璧。習陣時觀。其置陣整齊。部伍分明。似當依事目爲先論賞。或除授實職。以爲激勸之方。大抵鍊兵之事。各官守令。皆爲兼把總營將之任。軍兵操鍊。固當專責於守令。而但守令事多。軍民之政。或不能兼舉。使守令摠其大綱。而把總哨官。分掌所屬。各自訓練。考其成效。賞罰勸懲。則鍊兵之事。當自有頭緒。近日習陣期會之時。守令把總哨官。各以其軍來會。無故闕到之軍。絕無而僅有。益知編伍統攝之規。不可廢也。但把總哨官。

皆自食其糧。自備其馬。往來教鍊。只有終歲之勞苦。而別無酬報之意。群情以此。或至於懈怠。臣意京畿四營把總二十人。哨官百人。其中出身人等。依平安道入防江邊出身之例。計仕遷轉。此乃在朝家爲不費之惠。而其於勸勵人心之道。不爲無補。令該司商量施行。

請軍人試才優等及大炮能中者論賞狀

武學事目中。有試銃試射論賞。啓聞之規。而外方各官。尙未舉行。故軍士無興起之心。鍊兵之事。日就解弛。誠爲可慮。臣所巡左右道諸邑軍士。試射試銃。從其中數多少。以臣所賚廳中木正弓箭。量數分給其中優等者。後錄。啓聞。令該曹急速相考論賞。以勸其餘守城之具。莫過於大炮。而近日京外炮手。但習鳥銃。而不習大炮放法。雖有軍器寺破陣軍。而每大炮試放之際。心悸膽怯。不能以堅持。必中爲意。故聲威雖壯。而實難於中賊。臣到禿城。看砲樓之制。勝於婆娑。令陣中炮手。從砲穴放佛狼機。城外山麓遠處。立防牌。使之看中。則能者絕無。其中有三人得中。而一人則一發二丸。而俱中。穿過防牌。盡爲破裂。若使人人習此。則其爲守城之助不少。大炮論賞。雖不在於武學事目。而其中優等者一人。不可不獎勸。故并爲錄。啓。

查 啓守令能否狀

臣今行所經各官守令。考其政績。有能有否。所當查覈。啓聞。以爲勸懲。南陽

府使李慶涵政尚寬簡一境吏民皆共便之利川府使成泳自奉清簡愛民以誠雖政專惠愛事或不舉而撫字心勞亦自難得此二人似當量加褒錄振威縣令俞大衡鍊兵等事無意舉行擅自數易哨官以紊軍政且侵暴軍士水軍一人有結項致死者所當罷黜竹山一邑居畿甸前面接連忠州清州之路今雖殘破若能保葺完實則實一道控扼之地縣監姜翼文雖無顯然過尤而疲軟不能勝任所當遞差大抵振威竹山兩邑乃是直路劇地守令非尋常苟充之人所可堪任勿論文武門蔭以勤幹慈詳曾有聲績者十分擇差下送

請兼防水路副使盧稷并爲出送狀

丁酉八月

臣伏承有旨賊兵已陷晉州令臣率兵把守京畿忠清之界故臣今自龍津將向水原陽城之間壬辰之變賊兵分三路內犯都城二路由忠州而從驪州清心樓前江渡涉出於京城之左一路由清州鎮川之路而出於漢江今此賊兵亦有分路之勢雖聲言專向湖南而未知兇鋒定出於何地當初京畿分付則以左後營之軍屬於左防禦使而把守沿江數百里之地前右營之軍則分守禿城陽城二處而已近日天兵支持之事百役叢集本道盡以各處束伍之軍充供其役奔走無暇故其勢不得盡聚一處以爲防備之計只以其中稍解操弓者抄出若干分守各處其數零瑣不敷且沿江上下之軍不能撤備而移用於右道右道之軍又不可捨其信地而合用於左道兩處形勢皆爲孤單

此乃京畿防守形止難易之勢也。如不能已，則平安黃海道軍人依臣前日約束，盡數徵召屯守於前面。臣隨力策應，則或有萬分之望。朝廷急速商量處置。今日之勢與壬辰有異。水路陸路一時俱急。如晉州等處皆是海邊也。此言之則陸路猶有。天兵駐在湖南而道里稍遠。水路則蕩然無礙。傳聞前日永登敗軍時，忠清道格軍奔還者，乘破船五日到牙山云。水路迫近，據此可知。萬一賊船乘虛直犯，則京畿水路尤可寒心。臣雖在一處而道路隔遠，豈能遍及料理乎。外方凡事，監司爲主而臣則乃是檢勅之任，故自前凡有號令，皆移文於監司而監司又傳令於各處將官及守令，以存體統。近以京城天兵支供及西路將官迎候事，監司奔走不暇，長在京城而前面軍務及調糧器械等事未能顧察，臣獨出來，有似無主之事。文移往復，動經時日，百事遲緩，皆無着手處。此亦事勢之至悶而極難者也。若令巡察使洪履祥并出巡歷，而分道策應，則水陸之形似可相連，而於事或有少補。故惶恐敢稟，亦令朝廷急速商量。有所區處，副使盧稷初以兵曹判書李恒福呈辭，而參判獨在，故未能一時出來。今事勢甚急，盧稷亦令出來，同在一處料理事務。

請舍陰竹竹山先爲措置驪州防守，且右防禦使速爲差送狀。八月初十日，右副承旨成帖，今聞倭賊一運出沒於晉州宜寧之境。一運由洛東江上來云，不無直向京城之慮。忠州雖駐吳總兵一枝之軍，而形勢孤弱，京

畿防禦使抄擇精兵進駐於陰竹竹山之境。遙爲忠州聲援。事有旨書狀。臣在黃州道中。祇受京師防守大勢。只以長江爲重。而軍兵寡弱。防備虛疎。果如有旨辭緣。臣出城之日。卽巡歷江邊。馳到龍津。則左防禦使邊應星。方抄率後營東伍軍兵九百餘名。并龍津留陣僧軍百餘名。措置防灘等事。而更念上流形勢。驪州一路尤重於龍津。蓋以壬辰之變。賊兵由忠州直到驪州。從前江以渡。此處不守。則雖有龍津。亦難保其必守。故後營軍及龍津陣軍。則仍留龍津。使之把截其處。而又令邊應星。馳到婆娑城。更聚左營所屬一等被選軍兵。屯駐待變。事約束。臣則因前有旨。更向右道水原陽城之境。欲以措置防遏。湖南直上之路。今承有旨。知賊一運。由洛東江上來。烏嶺衝突之勢。尤爲切迫。更欲往來上流。申飭防備。但彼我之勢。衆寡強弱有異。則當擇地據險。以爲支撐之計。賊兵已踰烏嶺之後。則我軍當守江面。竹山陰竹。皆非駐軍遮截之所。若盡撤江面分部之軍。前赴空虛之地。糧運不繼。進退無據。則似非得計。且驪州距忠州。與陰竹竹山道路頗近。雖欲爲忠州聲援。似不當舍呂州。而移就於陰竹竹山。朝廷更加商度形勢。指授便宜。竹嶺之路。通於原州堤川。烏嶺之路。通於忠州京畿等處。若令江原道之軍。屯守原州。而京畿之軍。連勢屯駐呂州。以爲忠州形援。且不失江山之險。則緩急稍可得力。至於竹山直路。則蕩然無形。無一可據。而賊兵或分出左右之路。一路出呂州利川之路。一路出陽

城安城之路。則陰竹竹山。雖有些少軍兵。而難望遮截。此一道形勢大概也。大抵道內武將。只有一邊應星。而專防上流。右道尙無防禦使。凡抄軍措置策應等事。皆不能成形。臣前在備邊司。見防禦使。可堪者。難得其人。未得差出。然不可以無其人。而闕其任。以誤事機。聞前府使吳彥良。時無所任。云此人或可差送。臣未知彥良之爲人。而事勢悶迫。不得已舉名陳稟。亦令備邊司商量。可合與否。急速區處。

待京城上流防守器具粗備後巡審江華海道狀

丁酉八月

南方賊勢淺深。臣出城之後。未知如何。大概固守京城。防備江華。而堅護上流。乃是今日急務。臣頃承有旨。聞賊兵上洛。東江之路。驪州等處。上流接連鳥嶺。備禦尤急。故馳到婆娑江口一帶。檢勅守灘諸具。而江華則再三申勅水使李思命。日夜措置待變。且令臣軍官。擲奸海島瞭望形止。則如南陽昇荒島靈興島大部島海路通望處。各率邊將。已爲分布瞭望。今巡察使洪履祥。方巡向其處。故更爲傳令。使之仍在其處。另加申勅水使以下將官。整備船隻。無致疎誤。而臣則稍待上流防守器具粗備後。巡審海島計料。

請以黃海道出身二百名分守上流及京中軍器優數下送狀
臣觀今日京城防守形勢。上流爲急。而自驪州以及廣津。凡二十三灘。道里一百八十餘里。設令賊兵。全向一處。則猶可合力支撐。萬一散漫於江以南。而隨

處劫渡。則軍兵數少。力分勢弱。恐難處處把截。左防禦使邊應星。時率東伍選兵僅二千餘名。分屯龍津。婆婆等處。措備守灘諸具。而昨日因巡察使懲兵之令。分送京城者亦多。其餘東伍之軍。則或入於天兵馬草刈取之役。或應刷馬支供之事。奔走無暇。故不得全聚待變。形勢極爲孤弱。如使上流有失。則更無所望。臣日夜寒心。不知所出。前日因臣啓請徵召黃海道精兵一千名。則方在京城。不可出來。而本道出身先運二百名。則使之分守上流。以爲添兵把截之計。似爲便當。令該司急速處置。江灘防守之處。必須多設火炮器械。可以禦敵。前日啓請火藥火器。除婆婆等處守城排設外。用於江灘者。其數不多。軍器寺所藏唐制子母炮。火箭。伏兔。及連珠木棍。勝字銃。鉛鐵丸。玄子銃。弓。子長片箭。并爲優數。令次知官李自海。押領載船下送。交付於防禦使處。以備戰用。

馳

啓慶尙道軍兵事及柳永慶改稱分戶曹狀

月十二

卽據慶尙左兵使成允文牒呈。各官束伍軍。大半作米。所定三千名。整齊無路。已曾徵米之人。又令從軍。則民怨極多。潰散相續。罔知所處云。大概賊勢縱橫。出沒無常。我國之兵。雖云脆弱而難用。亦不可盡皆罷遣。使諸將空手而坐。無入之地。已爲失策。至於哨探瞭望。傳通邊報等事。皆爲廢弛。臣入慶尙道地界後。已過七八日。而左右邊報。漠然傳聞。右道等處安陰。居昌。陝川。賊勢熾發。至於搶奪。天兵積糧之處。而亦無傳報。其他調兵防守之事。蕩無模樣。事事極

爲寒心。大事當前。而我國凡百策應協同之事。疎濶如此。臣分道行文。十分申勅。如有失誤。未及期會。則將官以下。一切以軍律從事。事知委而已散之軍。未及數日間。整齊以爲進取之計。憂慮萬端。天兵糧餉竭。取公私之儲。僅備七八萬石。但道內使命極多。如總管使尹承勳。備邊司堂上柳永慶。分戶曹堂上成泳。皆以敵體衙門。各行號令。不無互相抵牾之患。一邑之穀。或令移轉於尙州。或令移轉於慶州。或令移轉於大丘。以此守令莫適奉行。而殘民日就困竭。彼此無及。尤爲可慮。凡事號令雜出。則事無由濟。當初經理。旣以尹承勳。總督諸道糧草。其後雖分營各治。而總督之名猶在。似當參酌三分之勢。通融相議。措置而柳永慶。勿稱備邊司堂上。與成泳同稱分戶曹。使事權歸一。而論議相通。似爲便當。朝廷急速處置。

馳 啓提督經理迎候事及軍糧形止狀

臣本月十四日。聞提督大軍已踰嶺。自安東馳到醴泉。欲爲伺候。而提督不入醴泉。直向豐山。故臣不得已。追到豐山。與提督相見。則提督問南邊賊情如何。臣以左兵使成允文所報賊勢對之。提督又問曰。今行於議政之意如何。臣答以倭賊窮兇極惡。天威大振。必有掃清之期。提督云是矣。臣旣見提督。又聞經理之行亦近。卽馳到龍宮。夜已二更。不得通名。明曉經理發行時。通名而未及見之。臣隨經理一行到安東。今日早牌。始爲進見。則經理分付云。大軍已爲

南下。此處之糧皆當輸運於慶州。無使匱乏。與尹承勳同議爲之可也。又招本道巡察使李用淳語之曰。運糧等事。雖有議政與總督。而本道陪臣當專筭。爲之若不盡力。必不濟事。又招安東府使鄭賜湖。跪於階下。問其本邑之糧已輸運未輸運之數。且云本邑未經蕩敗。人力必完。得粟之事更加竭力爲之。皆唯唯而退。經理似欲於明日直向慶州。本道左道措置之糧。以尹承勳所報觀之。則米六萬一千七百餘石。而已收者。米四萬三千二百九十九石。未收者。一萬八千四百十六石。馬豆二萬八千二百九石。而已收者。一萬八千九百二十四石。未收者。九千二百八十四石。此後措置之數。時未查報。右道成泳所管。亦未查報。故穀數多少。時未詳知。而此道蕩敗無形。只以上道數邑之力。辦此大兵糧餉。各邑品官士人。倡率民戶。無不竭盡其心。而今已無復餘力矣。前頭運糧之難。尤甚於聚糧。且軍行已發。而糧路不繼。則大事將去。臣晝夜憂慮。不知所出。萬一大軍有持久之勢。則必須催發後面之糧。以爲接濟之計。事不可已。朝廷預爲商度。從長處置。或忠清之穀。漸次移入於嶺南。而天糧自義州出來者。亦可調發前來。以續餽餉。但恐民力方困。不能趁時輸運。

馳 啓吳總兵軍中流言事狀

自吳總兵來駐安東後。軍中盛言此處人民有投入倭奴之意。或言府使鄭賜湖有女子二人。爲倭所擄。故府使與倭相通。而輸送糧餉。一人倡之。百人和之。

涵涵不已。適本府居民自前多數剃髮。賣爲女髻。如此者十居八九。故唐人動輒脫笠查驗。以爲投入賊中。而來作奸細。雖收繫還釋。闔境之人疑懼日增。赴役者亦不肯入於官府。且軍門差官白糞。恐被搶掠。呵噤安東之穀。勿令輸入於慶州大丘等處。而各營旬管之人。恐未及期會。逐日移文催督甚急。守令不得已。潛輪外縣倉穀。使之從間路輸去。唐兵處處譏察。以爲輸送於賊中。見輒毆打。中路勒駐。胥動浮言。無所不至。又於昨日。陳遊擊軍人於十里外。捉得安東人剃髮者。以爲倭諜。嚴囚獄中。且陳遊擊軍三人。托以樵探。出送於三息程外。昨日走回來告倭奴三名。本國人二名。皆着本國衣服。不意收縛。將爲過夜。偶然一人得脫。解縛逃來云云。百爾思之。似不近情。而疑訝之際。又添一倍。非但公然倡說。察其氣色。景像不佳。雖廝養下卒。若逢我國官人。必聚首指示。臣之出入時所見如此。大小將官。若以此移咨。則軍門亦或以先入爲主。不無轉達。天朝之患。大概如此。無形之事。雖曰保無他虞。自古天下之事。未嘗不因其疑阻。遂成難追之悔。自朝廷商量處置。俾無意外之患。

以楊經理言請鑄黜職名狀

丁酉

今日早牌。臣詣經理衙門通名。李德馨先入。論說何事。通事宋業男。在遠處聽得經理言。柳某得罪於邢軍門。聞軍門之來逃避。來此運糧等事。專委尹承勳爲之。業男卽以此言傳之於臣。而臣未敢信聽。旣而德馨退。臣問於德馨。德馨

云無有是語。臣亦意業男或誤聽。卽進行禮而退。午後有白都司潢伺候。通事白應俊來言。持平南以恭言於白都司云。此處管糧官多。且有議政檢勅。俺別無所事。何以爲之。都司言老爺言。柳某得罪。軍門逃來。必且隨我前去。糧運催督。不可爲云。汝須仍在此。催發軍糧。不可還去。臣始知朝來宋業男所傳者。非是誤傳也。臣斃孽既重。人鬼交惡。千萬意外。得此不測之言。近日之事。恍惚如夢。莫測頭緒。今番出來。已知因此添成一段禍端。必且上累國家。下速臣罪。曾將此意。暫達於天聽。只緣迹嫌避事。不敢堅辭。跼蹐承命而來。晝夜憂痛。如坐針氈。今果如此。臣行止狼狽。不知所出。臣之一死。有似螻蟻。但不死於國事。而死於惡名。目所不瞑。且臣名在大臣之列。受此名以死。則國事亦將如何。經理今日前去慶州。臣不敢隨去。以益其疑。當在中路。以俟朝廷之命。而亦難於自由。伏乞朝廷。亟賜處置。以不職無狀之罪。鑄黜臣職。使臣明白歸死於輦下。以昭雪誣枉。實天地父母生成之恩。而國家之幸。

初經理楊鎬始至。語御前通事沈友勝曰。汝國事當使如柳某者輔之。後請上同出銅雀江上。問柳某安在。當使在側。急召公近前。旣而有人構公於經理曰。柳某謂公不可成事。短之不已。經理信其說。丁酉秋。公出巡京畿。人又言於麻提督曰。柳某率家屬避賊出城。提督信之。傳通於邢軍門。至載奏文中。飛語又入內。熒惑萬端。至是經理與接伴使私語如右。而李以

爲不聞。公進退狼狽。遂上狀言狀。

以經理分付催督大丘糧運緣由狀

臣在安東。催發糧運。今日馳到永川。將向安康。經理接件使李德馨馳通內。經理當日五更。發向蔚山。臨發招德馨云。軍糧不爲趁給。朝鮮無紀綱無法度。致誤大事。國王何不以王法治誤事之臣乎。尹承勳成泳并調來此一路。使之催運。柳永慶則留看老營。回時當從梁山密陽大丘之路而來。柳成龍則急往大丘等處。催備糧餉云。安康距慶州四十里。自永川向慶州。直路所經。故當初尹承勳等各官糧餉。皆輸入其處。吳總兵軍糧。則皆支放於安康。而提督之軍。從間路直向慶州。倉卒搬運安康之穀。移就慶州。事多忽遽。所謂未能趁給者。以此故也。且大丘等處已輸之糧。以諸軍皆會於慶州。故方盡發老弱男婦。狼狽移運。而又有此令。梁山密陽。方爲賊藪。人民盡散。雖有傍邑之穀。何力輸入。况傍邑之穀。亦何多得。極爲悶迫。臣初非管糧之官。且新到之初。凡運糧多少。搬移彼此。皆不省始末。而分付如此。莫知端緒。而無可奈何。將自永川。轉向大丘。欲爲輸運。未知前頭之事如何。不勝憂慮。

馳 啓運糧形止及

天兵進攻蔚山賊陣勝捷狀

十二月二十日在慶州

臣自永川。因接件使李德馨馳通。欲往大丘。已爲狀。啓更念大丘運糧。已輸到米豆并時有五千餘石。回軍時數日之糧。猶可足支。而慶州蔚山以下大軍。

皆集此處。軍糧至急。故臣沿道催督守令。盡發見在人民。陸續輸送。臣因馳到慶州。與尹承勳、柳永慶等相見議事。以爲接濟之計。上道軍糧。負戴相續於道。盡向蔚山。本日五更時。京畿左防禦使邊應星、軍官柳成吉。回自蔚山陣所。說稱二十三日。天兵先鋒與倭賊交戰。斬首五百餘級。倭賊退入其窟。天兵圍之。二十四日。倭賊於城頭列立紅白旗無數。天兵以火箭大炮攻之。諸軍一時踰城而入。斬賊首甚多。餘賊退入內城。時方攻打云云。本日曉頭。臣軍官金潤得回自戰所。所言一般。我國之軍亦與。天兵相雜。以弓箭射殺倭賊亦多。合戰形止。都元帥權慄必已馳啓。而事係捷音。故臣亦以所聞馳啓。

馳 啓天兵進攻蔚山與賊相持狀

昨日臣軍官具希信回自蔚山。說稱天兵共我軍攻打賊內城。城甚堅險。大炮不能撞破。賊從城上孔穴多放鳥銃。天兵及我軍多爲損傷。經理鳴金退軍。方講求攻城之策。倭船自西生浦數十餘隻。浮泊海中。爲相救之狀。天將分軍橫截海口。使不得下陸云云。今日午後。又聞陳遊擊乘夜攻城。爲賊丸所傷。以調病事輿出慶州。而自昨日天氣微陰。今日自未末。東風連吹。雨勢漸多。至夜未霽。軍士露處原野。必有沾濕凍傷之患。甚可憂慮。

馳 啓賊窟形止及軍兵死傷狀

臣歲前一日。進往蔚山。初一日平明。與都元帥權慄。巡察使李用淳等及諸將

官行禮後，謁見經理。行新歲問慰之禮。經理問糧餉輸運之事。臣等又詣提督，令進入幕內，同坐行茶語之曰：當初擊倭時，俺軍五百名，定爲先登。此後楊登山擺賽二將軍繼之，權慄答以此事。小的親見之。提督又曰：俺平日每恨朝鮮軍不能擊賊。今天兵攻賊，而猶不易。朝鮮之軍，不能擊賊，無足恠也。又云：朝鮮之人，能力戰。都元帥亦能號令。天朝聞之，豈不喜悅。臣與諸人，措辭叩謝而退。少頃，經理語臣曰：此處大軍，留駐多日，糧餉之運，萬分緊急。議政不須留此。須卽還後頭，雖有一石之穀，早早輸運爲可。臣卽辭退，還到慶州矣。經理駐在處，與賊窟僅一馬場餘。賊窟據孤山之巔，築三重石城，甚爲堅固。城上皆設廊屋，見之寂若無人。而軍到城下，則炮丸亂發。中者無不穿透。前日連次進攻時，天兵與我軍多死傷，故不復攻之。聞城內飢乏無水，欲以持久困之。晦日夜，令金應瑞率降倭，伏兵於城外井泉之傍，捉得倭人之出汲者十餘人。經理甚喜，問其賊中事狀，則亦言糧絕無水，勢甚窮縮。其詳必在接伴使狀。啓。臣查點我國各將軍兵死傷逃亡時存之數，則戰死者二百九十八名，逢丸重傷者八百七十六名，逃亡者四千九百八十二名。時存陣中者三千八百十三名。京畿軍人則除出以爲運糧負草之軍，而平安之軍，今日始到陣所矣。

天兵退來緣由馳

啓狀

戊戌正月四日在慶州

臣等以經理分付在慶州催督後頭糧料陸續發送。當日未時，左水使李雲龍

馳報內。自初三日寅時至申時。倭船首尾相接。自西生浦。壩浦而來。鱗次不絕。水使親自看望。則大小船隻。檣竿如簇。蔽海而來。又當日初昏。臣體探軍官。鄭應天。馳告內。昨日夜半。天兵圍城接戰。不得陷城。暫退。他賊來陣箭灘。連亘山上。而賊船來泊者。又不知其數。軍糧已到陣處。而經理令還收。捧於慶州。又初更。京畿防禦使邊應星。馳報內。唐兵有退休慶州之意。路上見天兵絡繹出來。糧餉亦令於慶州收捧。故馱載還來者。相續於道云。天兵圍守賊窟。累攻不利。士卒多傷。且水陸之賊。日益添兵。勢甚可憂。更觀事勢。馳啓計料。」

天兵退後處置諸事狀

今此蔚山之役。天兵初日乘賊不意。以兵馬蹂之。賊倉皇不能支吾。奔敗不暇。外柵爲天兵所奪。賊被逐入內城。魄喪膽破。若於此時。登時進薄。則內窟可以卽破。而貪其斬級。擄掠之利。未免遲徊於城外。賊遂得入城。閉門堅守。天兵與我軍。累日攻之。且無器械。內薄登城。輒爲炮丸所傷。不克而退。死者日積於城下。旣而左右道之賊。從水陸來救。其數極多。天將知其勢難。遽卽回軍。外賊與窟中之賊。相應合攻。天兵與我軍之在箭灘者。被害尤多。而我軍則亦多乘亂逃走者。初五日。諸將金應瑞。金大虛。朴毅。長高。彥伯。權應銖。成允。文。鄭起龍。李時言。韓明璉。具思稷。李廷堅等。皆會於慶州。而散軍稍稍來集者。總計八百餘名。臣與都元帥權慄相議。使之仍駐慶州。鄭起龍則還右道。更收

餘兵以爲遮截之計而天兵糧餉輸到慶州者尙多若留之恐爲賊所資令巡察使從事官成安義次知支給我軍之料江原道軍糧船運迎日者又三千石此距賊船往來處尤近卽傳令於左水使李雲龍使之護輸於寧海府藏置待令上道軍糧方輸在道者各令收拾還去道內人民竭盡心力男女老弱負戴追隨庶幾得見平賊之日不幸至此莫不驚駭皆有散潰之計可爲痛哭臣姑留慶州數日少定人心追後上去安東經理駐軍處以待朝廷指揮計料

天兵退後慶州蔚山軍人擊斬賊首狀

慶州府尹朴毅長馳報內天兵退北後倭賊二百餘名或騎或步收取天兵所棄衣甲於路射牌等突進追擊斬首十七級又據本官馳報本月十五日倭賊三百餘名騎步相半出來我軍一時突入多數射中斬三級生擒一倭又據本官馳報十五日倭四百餘名出來橫行射牌等突入接戰斬頭二十一級又據蔚山郡守金大虛牒呈本郡屯賊出來時軍官朴應琢等戰於柳沙亭斬十三級云臣觀道內軍人可用於戰陣者蔚山慶州之軍爲上永川次之此輩非自初精勇有異於他邑之人而然也特以居近賊陣日與交鋒心膽已堅故能以少敵多而不爲退北此古人所以兵以土着爲貴而所謂徵兵滿萬不如召募得百者誠非虛語也但我軍無訓養之素每令軍士自爨糧食軍器亦令自備皆鈍不堪用以此雖勇敢力戰之士飢困無聊不能盡其材力而軍功論

賞又不以時。以此軍心。或至於懈怠而不振。極爲可惜。臣在慶州時。以天兵用餘軍糧之在慶州者。使之計日給料。今慶州之軍還集者七百餘人。蔚山之軍百餘人。皆敢死。一可當十者。繼今以後。若能措備軍糧。資以衣甲弓箭。別爲撫養。鼓舞其心。則邊上軍兵之漸次加聚者。似不止此數。而將來戰守之計。爲益必多。常時軍功。則自有都元帥等狀。啓。故其軍人名目。不爲并舉。只陳兩邑之軍力。戰希賞之意。請令備邊司。查考前後狀。啓。軍功等第。而急速行賞。以應賞不踰時之意。用以激勵軍情。

承有 旨處置道內軍民後上去狀

見本集

調度使成安義非緣厭避職事狀

當日到付摠督使尹承勳牒呈內。分兵曹正郎成安義。經理提督南下時。非但境上不爲來迎。稱以慶州軍糧收拾處置事落後。則事完之後。大兵駐在處。所當進來。而安東府中。乘夜過去。有若隱避者然。如此避事之人。不可不重治。以警他人。向前成安義。朝廷處置按法重究事狀。啓云。臣前在慶州時。蔚山運糧方急。成安義其時在大丘。遍尋山谷避役之民。大丘軍糧一千石。一時輸送慶州。安義因隨到慶州。而適值大軍退來。上項大丘軍糧負戴在途者。將至散失。臣令安義及李詠道等。分道收拾。輸入於慶州。松溪縣收儲。又令安義查

點慶州遣在軍糧。分給各陣軍人。數日後。安義回報於安東。臣前此已啓。請令李詠道成安義。分管左右道軍糧。故安義省其病親於榮川地。後時方往在右道。措置糧餉等事。今見尹承勳狀。啓。則安義過安東。不見摠督使。誠不爲無失。然必以大軍已回。而又緣臣狀。啓。以致如此。與無故厭避者有異。近日國綱解弛。任事之臣。率多占便自安。不肯奔走職事。臣常痛憤此習。而今此成安義事情。則臣所詳知。而尹承勳各在他處。臣狀。啓。辭緣。或未及知。而有此狀。啓。故不敢不達。

懲愆錄卷之十四 終

懲忿錄卷之十五

軍門謄錄

乙未。余以首相承命。兼京畿黃海平安咸鏡都體察使之任。戊戌春。辭遞。其局亦罷。凡啓草及文移。令廳吏方秀謄出。名曰軍門謄錄。其散落未收者。又三之二。余以鷲劣。當國事艱危。職兼內外。無一事裨補。徒然去位。辱聖主知遇。今看是錄。慙然自愧。因志數語於卷端。使覽者知余之罪云。

通諭四道巡察使文

本年十月十三日。聖旨。凡事有所主之人。然後經略有條理。今日國事。勿論虜勢。大賊在境。下四道則既委於右相矣。又出都體察使。專管其餘四道。南北相應。事有旨。當職。蒙差體察京畿黃海平安咸鏡四道事務。專委經略。以兵曹判書李德馨爲副使。侍講院輔德崔瓘。侍講院弼善韓浚謙。爲從事官。方開幕府。規畫措置。國勢艱危。日甚。南北之釁。交作。其勢固爲岌岌矣。今日措置之事。雖曰多端。不過釐革弊瘼。懷保小民。使邦本更固。然後措置糧餉。訓練軍兵。修緝城池。且察地勢險夷。以爲控扼之計。措備器械。申勅烽火。此其大段節目。若監司督率守令。閫帥申勅邊將。竭其心力。盡瘁晝夜。收拾補綴。則國事雖

急。尙有可濟之望。萬一因循廢墜。玩愒度日。置國事於無可奈何之地。體察使之令。不行於監兵使。監兵使之令。不行於鎮管節制使。鎮管節制使之令。不行於同僉都尉以下。同僉都尉之令。不行於哨官。哨官之令。不行於旗隊總。則雖有嘉謨善策。朝夕云云。而一無所益。今日之弊。政坐紀綱不立。體統渙散。以至於此。今者自上深懲。命令不行。事無實效之弊。特出聖意。使大臣分領諸道之事。事非偶然。當職雖甚。驚劣自知。不能奉承。明旨有所補益。而既在其地。無路引避。則不得不以紀綱體統之事。先爲知委於各道。其他應行事宜。當追後詳盡指揮。今後凡軍政所在。一依祖宗朝設法之意。必使鎮管督率所屬之邑。所屬之邑。亦承鎮管之令。無敢違越。而監司邊將。又承體察使之令。使體統粗立。紀綱粗張。號令通令。以濟艱危之勢。如此而守令以下。猶不動念。泄泄如前。則國法有在。非體察使所得以私也。

移京畿教鍊軍兵文乙未十月十八日

國家南北邊患未息。教鍊軍卒。以備不虞。日急一日。但爲之不得其方。使民間騷擾。而奸吏弄術。或令聚會官門。或令聚會鎮管。異糧往來。到處留連。民弊多端。怨咨因起。事未見效。而民力先困。今兵曹武學事目。深念此弊。鍊兵之規。簡便磨鍊。使各官四面各村。別定謹慎有心計勤幹可任之人。設爲哨官。使之自擇旗隊總。仍於村里地勢便近之處。立武塲。每於農隙閒暇之時。隨便鍊習。

事已爲啓下。知委鎮管及各官守令。遵依事目之意。先擇哨官。又擇旗隊總。各在其處鍊兵。無逐日往來遠處之弊。又無兵房色吏操弄侵徵之患。不勞而有成矣。今年禾稼少豐。民間幸免艱食之虞。且當農隙無事之際。政好鍊兵習射之事。失今不爲。則更待何時。今防禦使爲此事下去。毋踵前日之習。聽依防禦使指揮。從便處置。使民心樂趨。而軍政修舉。哨官中若有盡心其事。使所管軍卒精鍊成就。則當論賞。啓聞。實職除授。以爲激勸之地。并詳審舉行。

移京畿黃海道軍務文同月十日

國家昇平百年。民不知兵。一遇狂寇。不能支吾。禍至於此。今者懲創往事。圖懲後患之策。惟在於鍊兵一事。但爲之不得其方。使奸吏操縱其間。則民情有所不安。亦非可行之策。故別設武學事目。使之各在其面。隨便操鍊事。行移知委。京畿防禦使下去時。亦舉此意。已爲申勅。大抵祖宗朝軍政大綱。專在於設立鎮管。使有統屬。而昇平之後。此制墜廢。軍政無統。兵無部伍。卒然遇變。將出於朝。兵出於野。紛然無制。如驅群羊。以當矢石之場。不敗何待。今者朝廷深懲此弊。申明鎮管之法。非止一再。而外方鍊兵之規。尙多紊亂失序。誠爲寒心。頃者忠清道鍊兵之事。朝廷別遣御史爲之一從。訓鍊都監分付施行。故其哨官旗隊之法。歷歷分明。一覽可見。分數乃兵家之要法。分數既明。然後操鍊可爲。而號令可施。京畿則有水原廣州楊州長湍四鎮管。而江華喬桐。則以在

海中故不屬於陸軍而別爲一鎮黃海道則有海州黃州二鎮管此其祖宗經遠之慮今鍊兵之規不可捨此而他求京畿則各鎮管所屬之軍別爲成冊從其多少并其各面哨官旗隊總牒報黃海道亦依此一樣成冊急速牒報黃海道海邊各浦屬於所江而僉使爲其鎮管蓋以黃海無水使故使僉使爲鎮管使各浦之勢有所統屬立法本意實非偶然而今則僉使既不知自爲鎮管所屬各浦又不知屬於所江事無統領何以禦敵今後所江僉使次知屬浦之事一年入番水軍之數時存戰艦之數及常時船隻改造時材木所取處軍士應入數火迫飛報

移京畿黃海觀察使文

兵興四載各道各官倉穀一樣蕩竭前頭若又有調發戰需之事則糧餉出處百無可辦糧餉不足則雖有千兵萬馬高城深池將無所用今日措置糧餉一事最爲急先之務不可少忽糧餉措置之路亦無他策不過曰田稅也貢物作米也屯田所出也奴婢身貢作米也皂隸番價米也軍士自願納米除防也煮鹽買穀也此外各官糶糴雖係本官倉穀而亦不可不知其數京畿則今年田稅除作租收以米豆以爲軍糧但各官無城子處倉庫虛疎散儲零瑣之米臨時聚用爲難亦非經遠之慮姑以大概事勢言之則廣州鎮管所屬之穀則藏置於南漢山城水原鎮管所屬之穀則藏置於水原本倉或禿城山城楊州則

藏於豐壤山城。長湍則藏於長湍本官。其布置大略。似當如此。亦不可一概爲之。但當隨其便宜及民情所願。且觀山城倉庫堅實與否而爲之。區處在於本道。隨便處置。其他貢物作米等項。一樣處之。而各色之穀。不可混置於一庫之中。使難查考。皆當貯於別庫。門外書標籤。附某色穀。幾石入庫。則當不時別遣從事官。擲扞斗量。以驗虛實。且屯田所出之穀。亦須知數牒報。以備繼用之資。自隸價米。趁此秋穀未盡之時。依數收捧軍士自願納糧代防者。京畿則似無此例。如有自願者。則收捧無妨。各項之穀。雖零瑣湊合。而所得終是不敷。不足以當大軍調發之需。甚爲可慮。自古兵興之際。必以鹽鐵之利。以裕軍國之需。本國四面皆海。鹽之出於海水者。其利無窮。只緣無主管善處之人。一無措辦之事。今以京畿一道之勢言之。則漢江之水。達于忠州之境。臨津之水。達于伊川。安峽朔寧兎山之境。山谷之民。常時貴鹽如金。若於海邊措置鹽利。且備船隻。由兩江散買忠清江原京畿黃海之民。則公私兩濟。一年所得之穀。不可勝記。軍國經費所出。皆當倚此。此乃救時經遠之計。非尋常小小規模。亦在於本道處置之中。從長善處。後舉行緣由。爲先牒報。

移平安道巡察節度使文

本道四年調發轉輸之餘。民力殫竭。糧儲匱乏。軍卒寡弱。當此之時。又有西邊警報。雖事變遲速。不可預料。而其爲可虞。則甚矣。朝廷指授雖多。而臨機策

應專在於巡察使及節度使之手。不可一一遙制於千里之外。姑舉其大勢而言之。則江邊一帶蕩然空虛。虜若多率醜類乘虛突至。則以疲殘軍卒分兵把守。數百里間。勢不相及。若欲角力於平野無依之處。則我軍心膽先怯。衆寡不敵。勝敗之形。未可預期。必須先察地形險夷。防備緊歇。有城子之處。則合小堡之軍。協力固守。且多備軍火器械。烏銃勝字各樣火炮。以挫其飄忽動盪之勢。雖無城池。而若賊所必由之處。則亦當據險先爲不可勝之勢。以待而又於林木山谷之間。多設疑兵。鼓角相應。旗幟紛然。使賊不測多少。可以制勝。古語云。羌易以計破。難用兵碎。此乃兵家妙訣。爲將者不可不十分體念。沿江一帶。自江界至義州。總爲六鎮。渭原以上。則以虞候爲助防之任。碧潼以下。則以碧潼郡守兼助防。而兵使以主將總爲節制。朝廷指授。實非偶然。但聞江邊諸郡。自變生以後。軍糧甚少。當計食而聚軍。不可有軍而無食。內地之軍。別擇丁壯分守各處。又以晴川以北。炮殺手。多數添防。固不可已。所慮者糧餉不足。軍聚而無可食之物。朝廷所慮。惟在於此。此等辭緣。本道十分詳審。及時措置。無使臨急而有不及之悔。江邊以南之邑。如朔州。龜城。泰川。雲山等地守令。亦令鱗次整兵。預爲約束。聞變馳援。而內地之軍。亦須一樣約束。次第遮遏。謀慮先定。部分詳明。則軍心不搖。而緩急可以得力。并詳審舉行。各道鎮管。其數不過四五。而本道則有六鎮管。平壤所屬有七。寧邊所屬有四。安州所屬有四。義州

所屬有二。成川所屬有十。龜城所屬有二。當初分屬多寡之數。皆有深意。實非偶然。蓋以前朝以來。西方之變。或發於水上。或發於水下。或一時齊發。不一其處。故一道之兵。隨其便近。使各自分屬。平時則鎮管守令。依法操鍊。有事則各率其屬。聽主將號令。或馳援戰所。或把截要害。賊雖得志於一二處。而內地之軍。犬牙錯峙。輔車相依。使不得深入。經遠之慮。無以加矣。近日本道軍兵。已經訓練。炮手之技。頗爲可觀。苟使主將先定謀策。靜鎮不搖。而策應得宜。則可無債事之患。其他小小臨機處置事。則本道十分詳審處置。俾無蹉跌。道內軍兵之數。各鎮管所屬及哨官旗隊總。并成冊上送。以憑後考。安州形勢甚好。且當晴川之路。若成重地。而與寧邊。作爲唇齒。則一道形勢自固。但城面關遠。難於守備。朝廷欲移撤城之東面。進築於鄉校後峯。司倉牆外。而當此民力困極之時。似難更爲此役。若以三浦水軍入番者。除番築之。一朔之番。減其日數。使二十日築城而去。則民情亦似便之。今此冰凍時月。雖不能輕舉。而預爲商度。使其其關狹。計其人功多少。明春始築。亦爲無妨。并爲叅商牒報。

移京畿巡察使南漢山城設倉文同三月二日

南漢山城設倉基址。防禦使與本州牧使。看審設倉可當處。速爲牒報。此乃時急之事。而今此始役。地凍力弱。恐不得趁時成就。以誤大計。本道各別叅酌功役多少。便宜指授。俾令有成。

若本州民力不足。則或以其處上番。或入番水軍。及他有役人。除役使之。一
移威鏡道巡察使及南兵使文

自古爲政。寬猛相濟。務在得宜。不可偏廢。然若亂離之後。小民蕩析流離之際。則必須弔死問生。慈祥惻怛。使民心懷再生之意。邦本無動搖之憂。然後他餘措置之事。可以次第舉行。况本道則道里隔遠。王化不沾。如南道三水甲山等處。北道六鎮列邑。接連山戎。風俗強勁。龍蛇赤子。在於撫綏之如何。變生以後。些少人民。死於兵戎。死於飢饉者。固已十八九矣。當此之時。守令邊將。若不進心撫輯。視之如傷。而更以煩苛之政。繩之。則非徒塞下之民。怨咨必深。而藩胡叛服之形。亦將因此而有異。機關所係。至爲關重。朝廷遠於千里之外。雖有仁民之令。愛物之澤。而無路可究。使遠方赤子。嗷嗷於邊。鎮剝割侵毒之中。則邦本何自而固。民弊何自而去哉。道內之事。有監司兵使。自當隨所聞見。便宜處置。以紓民瘼。然守令邊將。一日之間。所以弊及於民者。如牛毛蠶絲。監司兵使。或有未能盡知者。朝廷雖別遣御史。而耳目多未導達。皆爲可憂。當職承此重任。遠處措置之事。難以懸度。亦必自本道所已施行。無煩於告說。若邊塞軍民弊瘼。未能盡無。則雖欲責之以親上死長之事。其道無由。爲此先爲知委。更加申勅列邑。遵依施行。

移平安道節度使文
同月二十九日

本道凡百措置之事。專在於監司兵使處置之中。無容煩說。御史下去時。防備大概已曾詳盡指授以送。江邊一帶。土兵數小。糧餉不足。器械不備。城池低淺。最爲可憂。急時措置。無失機會。守城之際。炮樓一事。是爲關重。已令軍器僉正李源。事知火炮匠。帶率下去。倉卒之際。雖難於鍊石作樓。伐木成形。堅設防牌。穿穴其中。纔可放炮。亦可禦賊。急速申勅舉行。前日右議政在本道時。平壤一府。亦設炮樓數坐。而判官所作之樓。至今未成。此乃一道根本重地。若成此樓。而多備天地玄黃及佛狼機大炮。各置其中。預爲習放。則一勞永逸。必爲萬世之利。今雖天寒冰凍。始役爲難。預備材木。待明春督令造成。道內各官各鎮糧餉絕乏。江邊鎮堡時存之穀。只有田米數十餘石。少則五六石。軍餉不足。則許多軍兵。何以添守。此非小患。朝廷十分憂慮。銀兩下送。使之買穀。田稅作米等事。已爲知委。但目今江水成冰。義州買穀運去爲難。田稅作米。亦皆內地之穀。散在各處。變生之後。一時聚合餉軍。亦所難必。皆爲可慮。而遠處之事。遙度爲難。不得一一指授。此等事十分計度。及時施行。俾無後時之弊。大抵無三年之蓄。則古人以爲國非其國。假使今年無事。當此干戈未息之時。道內得粟之計。不可不十分區處。以爲繼餉之計。但繼餉之計。他無善策。只有廣開屯田而已。道內沃饒閒廣之地。如安州三千坪。定州博川之境。蘆田及他可畀之處。非一二明年耕墾。可以得粟。惟農軍無出處。農糧種子亦難備。似是難行之條。前

年間劉總兵下去時。所率房子五百餘名。棄置於義州而去。其時朝廷別爲移文。使之分處列邑。賑濟資活。今不知餘存幾何。此屬收集。皆可爲農軍。且老江宣沙浦入番水軍。可以耕作。農牛則道內募得。官牛。今有幾隻。此等各項事。詳盡計度。牒報施行。鍊兵一事。專在於修明鎮管之法。此乃大段軍政所繫。鎮管之法。已明。則軍卒之在一鎮管者。合有若干名。可以知之。既計軍卒之數。則亦當以其數。各備糧餉。如一邑有鍊軍百人。則當令其邑預備百人幾月之食。合一鎮管之軍。而總計其鎮管所屬各邑糧餉儲置幾何。各以其力備之。則事有頭緒。而糧餉亦易備之。此乃甚爲便易之策。而爲經遠可行之規。文書間不能盡意。軍官崔應澤處。詳盡分付以送。十分計度便否。牒報施行。六鎮管鍊兵之數。炮手幾名。殺手幾名。哨官旗隊總某人。一邊成冊。星火上送。以憑後考。惟鍊兵炮殺手。勿論正軍公私賤。混合成隊。隊中正軍。當其番次。入番於江邊。則隊伍不具。而兩役被侵。民情似爲怨苦。此條何以處之。亦爲相考。牒報道內。時存軍器。弓矢外。鳥銃幾柄。勝字銃筒幾柄。各樣大小炮幾柄。藏於某處。相考開錄。牒報。火藥最爲關重。道內時存幾斤。及往日唐焰焔。分置於義州平壤寧邊三處者。改煉與否。亦爲相考。如未改煉。則刻日煉成。依法製造。江邊防禦火藥不足處。急急添送。李源所率火炮匠處。江邊伶俐人抄擇。火炮製法傳習。以備後用。崔應澤詳知道內之事。故公文準授下送。凡事爲先。牒報。

移黃海道巡察使所江僉使文二十一日

興鹽利以佐國用。歷代已行之策。古人以鹽爲國之大寶。而教民方便。使蕩敗之處。變爲殷富之地者。非一二矣。中朝別置糞鹽軍。定爲稅入之規。其爲法甚密。而許多軍餉。皆倚辦於此。我國邊海產鹽之地。不爲不多。而盡歸私用。當此軍需乏缺之時。坐失大利。誠爲可惜。本道瓮津海州鹽盆。最多於他處。今欲就此。別設鹽場。而除出七浦。應入水軍。隨力糞取。又令所江僉使。專力句管。使弊不及民。而得鹽優多。一邊建置鹽倉於兎山三省臺近處。將所糞鹽石。陸續運入儲峙。每鹽貴之時。許民平價來糶。則旁近山郡之民。皆便於得鹽。而官家得粟亦多矣。應行事宜。本道各別詳細磨度回報。以憑究處。而已曾排設公私鹽盆。凡幾坐鹽軍。凡幾名。一年稅入。凡幾石。亦一一知數牒報。且當春節。盛煮之時。若除入防軍。士助糧米。而買鹽納倉。以爲許民買食之資。則無別煮之舉。而得鹽亦不貲矣。此等曲折。亦參商回報。以憑處置。

移京畿巡察使文

今此鍊兵之規。欲以便於民。故盡去近日他道鍊兵遠處往來煩擾之弊。只就村民所居之地。使不出其鄉。而隨便鍊習。易於成就。假使外賊不來。而人人既習武藝。則土賊亦不敢來犯。而閭井得以安枕矣。哨官等先知此意。又以此意詳細教訓於各村之民。慎無驚疑謀避。哨官旗隊總以下。亦不可一毫侵擾。以

爲民弊。務在上下相信。以實心行實事。無得應文塞責。以長苟且之習。農時則力於耕種。有事則一心捍禦。自此以往。下可以保全父母妻子。上可以捍衛國家。有無限好事。不然則流離分散。不相顧護。或陷於溝壑。或蕩失家業。其身且不能保。況於他事乎。此利害得失之較。然明著者。其各盡心施行。江華喬桐措置事。專委江華府使。而鍊兵分部。大概亦依此例施行。

一京左京右京前京後。皆設營。一營統五司。一司統五哨。一哨統三旗。一旗統三隊。一營軍數大概以二千五百人爲準。京左則於龍津。設大營。所統五司。各於軍兵操鍊道里遠近平均處。設一司教場。而其司所統各哨。亦於所居里中。設演習射藝之場。平時則哨官各領其軍。於里中教場習射。或放炮。或習用槍疾走等事。每月一次。會於本司教場習陣。三朔一次。五司軍人齊會於本營。一日習陣。次日比較所業而罷。哨官旗隊總以下。差等賞罰。一司內軍人優等者。三人中居首者。一年復戶。刷馬等事。一切蠲免之。次者。六朔內刷馬雜役蠲除。又次者。三朔內雜役減除。通五司居首者。一年戶役雜事除減外。或賞物。或免賤免役。或爲禁軍。哨官善於其任者。各別牒報重賞。其或惰慢職事。或憑公營私。侵擾所屬軍士者。訪問覈實。重者。從軍律重治事。

一閭閻民丁。則當入編伍之中。此外出身武士禁軍等。不仕在家者。亦從時

在之數。略成隊伍。稱爲遊軍。不限多少。以備調用事。

一軍中哨探瞭望之人。擇其性識伶俐。詳知道路。能出入山谷。善於行步者。每一司擇十人。名爲哨探軍。亦立隊長以統之。各與擔報旗一面。以備調用事。

一每哨隨便備大小角及囉叭。無事時。軍人常常習吹。能才者。別錄牒報營將。習陣之日。試吹居首者三人。亦依能射例。論賞勸獎事。

一京右營設於禿城。京前營設於竹山山城。京後營設於坡州山城之下。各營鍊習聚軍事。依右例施行事。

一京左營軍器。則當於龍津。別設軍器營造廳。多造弓箭鳥銃等物。散給軍士。以備鍊習之用。京右營軍器。亦於禿城設廳造作。分給京前京後營軍器造作事。亦依此料理施行。

移京畿巡察使文十一月二日

京畿鍊兵欲使邑求其面。面求其里。里求其村。村求其人。所謂綱舉而目隨。卽古比閭出兵之遺意。無徵發往來之擾。無聚合餉飼之費。一番整飭之後。百事惟意。時平則如鄉徒習射之爲。而備土賊防患難。有事則各令哨官旗隊總領其軍聽用。則甚爲便益。况平時有賞罰連坐之法。臨事有手足相救之形。彼爲哨官隊長者。若深知此意。則自不得不用力矣。今防禦使有病。而鎮管守令。又

不見盡心奉行號令者。哨官之來受票旗者亦稀少。始事之初。弛廢如此。終何有濟。本道別加警勅。將各官四面哨官旗隊總姓名。斯速申報。以憑號令。

移京畿巡察使文十二月十八日

今此鍊兵之意。欲令各面各里各村團聚丁壯。隨便鍊習。使之各保鄉井。而守令不深究其意。爲哨官者。亦莫知其何事。視爲括軍赴防之類。規避而謀免者。亦有之。誠爲可歎。當初別爲武學事目。而指授者。只是在處束伍。如鄉徒作契。而射者爲射。炮槍者爲炮槍。隊伍既成之後。卽爲一番巡試。能於習藝。而哨官旗隊總誠心幹事者。破格論賞。或蠲免家口雜役。以示特異之意。而今聞抄軍之時。猶踵前習。委諸兵房鄉所之手。而不令哨官旗隊總專掌爲之。兵書內一隊之軍。考察能否。旗隊總哨官。并以次連坐而行賞罰。今者哨官旗隊總。若不等。等自擇。則他日巡試之時。何據而爲賞罰乎。且年五十歲以下十五歲以上。不至殘病者。則雖不解操弓者。皆可編入行伍。且又雖過五十歲。而勇力絕倫者。則亦不當以年歲爲拘。要之。男丁則盡令爲兵。而常時俱不忘鍊藝。然後鄉井可保。而後日必有其利矣。紀效新書編伍法一件。書送訓鍊都監。印出。事目。隊伍容貌冊。計其各官數印送。更宜明白分付。使之曉然。悉知此意。後日親巡試才時。當查覈舉行與否。另行黜陟。并相考施行。

編伍事目

一 古人以鄉井比閭出軍。今依此意。各邑先求地面有某某里。一里有某某村。一村有某某家。各以其面其里。分其濶狹。定爲哨官。使之各出旗隊總。抄民鍊習。此乃提綱挈領之法也。後日或抄軍不精。或脫漏丁壯。或鍊習不勤。則哨官旗隊總。當受其罪。不可推他。

一分軍之法。依紀效新書而稍加增損。一營統五司。司有把總。一司統五哨。哨有哨官。一哨統三旗。旗有旗總。一旗統三隊。隊有隊總。一隊并火兵十人。此其大綱也。然其間又有活法。不可拘泥。今從各里各村居民。附近團結爲隊。人多則三旗之外。雖四旗五旗皆可。三隊之外。雖四隊五隊皆可。軍少則一隊。雖不具十人。只六人七人皆可。不可移此以就彼。離近以附遠。然其分數既明。軍士係於隊。隊係於旗。旗係於哨。哨係於司。司係於營。營係於大將。則臂指之勢。不可亂也。凡習陣或調發時。大將傳令於各營。營將卽傳令於把總。把總卽傳令於哨官。哨官令旗隊總。各率其軍。齊赴信地。不可時刻參差。期而後至者。用軍律。

一 軍數雖多。而大將令營將。則所統只五人。營將令把總。則所統亦五人。把總令哨官。則所統亦五人。哨官令旗旗令隊。則只三人而已。天下豈有不能運用五人三人者哉。此乃操約施廣之道。韓信多多益辦。只是分數明者。不過如此。今之爲大將者。皆欲身領軍士。故雖勞神疲精。而不能成形。

其亦惑矣。

京畿左營龍津以利川驪州廣州楊根砥平楊州抱川加平八邑之軍屬焉。利川爲前司驪州爲左司廣州爲右司楊根砥平爲中司楊州抱川加平爲後司。

右營水原禿城以水原南陽仁川富平陽川通津金浦安城之軍屬焉。

前營龍仁石城山城以竹山陰竹振威安山陽智龍仁衿果川之軍屬焉。

後營坡州山城以高陽坡州交河豐德長湍漣川朔寧永平開城府之軍屬焉。各營分司依左營例。

中營京城訓練都監之軍常時則分操於各營各司各哨大閱則五營之軍都會一處。

江華喬桐在海中故自爲一營不隸於陸軍。

軍糧各營計軍而聚糧或備半年之食有餘則漸次儲備雖一年二年之食多得益善出能幹糧餉者主其事。

軍器亦視各營軍數各自准備亦多得益善其旗幟金鼓之屬責令各營措備各營皆擇形勢要險前臨平野可設教場處築城用土樓櫓務令完固各司所在處亦擇地爲小壘平時則合五哨之軍教練於此處有事則率近處老弱及糧穀清野入保於其中各哨各里亦設教場以便訓練。

則光陰有限。事機交迫。必有後時不及之悔。思之至此。極爲寒心。况冬月已盡。春耕將迫。農事若始。則雖欲勸民訓練。其可及乎。鎮管之法。朝廷申明。知委今已數年。而未聞一處奉行。近日知委鍊兵事目。至爲簡易。欲使邑求其面。面求其里。里求其村。村求其人。分其村落多少。裁定闊狹。擇出哨官。哨官既出。而隨便抄出。見在丁壯之軍。使之各在其處。設場鍊習。無往來道路之弊。無坐食糧餉之費。民情必所便宜。數日之間。可以成籍。上使而畧不聽從。以軍務重事。視同兒戲。除竹山。安城。陰竹。陽城。振威。陽智。龍仁。廣州。利川。楊根。砥平。水原。外其餘哨官。尙無黑白。南陽則以不辨菽麥之人。定爲哨官。又不成公事。起送。問抄兵等事。則惘然莫對。良可痛心。當此國勢危急之時。鍊兵禦敵。爲第一急務。九重之憂。切於宵旰。而守令以分憂共理之人。不爲動心。唱而不和。泄泄如此。何事可爲。思之傷痛。其中尤甚怠慢者。所當摘發一二。啓聞治罪。本道各別星火知委。限今月二十日。哨官無遺成冊上使。

約束守令將官文

丙申正月三日

古人云。天下雖安。忘戰必危。况於今日乎。鍊兵之爲急務。雖行道之人。皆知其不可已。况於守土之臣。當事任官之人乎。然人心積成怠慢。有志者少。無志者多。往往以此重事視之。爲文具塞責之事。唱而不和。似無感動奮發之意。尋常痛歎。不得不更申教戒。其各洗心惕慮。悉意遵行。今此鍊兵之規。非欲病民。只

欲便民，使平居則隣里相保，捍禦土賊。有事則同心一力，以衛國家之急。如斯而已。然又不可渙散無統，故置哨官，以統旗總、旗總，以統隊長、隊長，以統軍士。欲其互相維持，互相教訓，互相聽受。無前日烏合土崩之患也。大要守令，謹擇哨官。哨官謹擇旗總，旗總謹擇隊長，而軍士則亦必以隣里附近之人。隨其見在之數，團結爲隊。此其但欲其無往來遠處，招呼聚集之弊也。蓋以旣居一里，則面目相熟，情志相親，患難足以相救，守望足以相助。其與居在異地，平生不相識面，而一時聚合，名爲隊伍者，其效自不同也。哨官之任，極爲重大。至於旗隊總之任，亦爲非輕。苟非其人，非徒無益，必有民弊。自今以後，守令三令五申，約束哨官。哨官約束旗隊總，各各盡心所任之事。必使愛恤所率軍人。如一家之人，一毫不得侵擾。軍人亦視哨官，如一家之長。凡有教令，一一遵行。無敢違越。本府時時發遣防禦使、巡視各官，各哨能否，校其軍人成才多少。一邑之事，則責之守令。一哨之事，則責之哨官。能者，啓聞論賞。不能者，差次施罰。決不輕貸。今將應行事宜，開坐于後。

一京畿道內各官軍士，已分京前京後京左京右爲四營。一營統五司。一司總五哨。一司之中，亦以東西南北中央，分爲五哨。名爲左哨、右哨、前哨、後哨、中哨。務在量其道里之遠近，居民之疎密，往來便宜，使整整齊齊，如網目之相維，而不相紊。此軍政大段。而於事亦無難行者。更加詳審，着實施。

行。

一今日亂離之餘。各村民居稀闕。或數里而一家。或十里而一村。團聚收合。以爲一哨。鍊兵之際。若使之逐日來聚於一處。則必有往來煩擾之弊。民情恐亦不便。平時則使隊總旗總知委。各於其所居。或習射。或習用槍疾走等事。哨官則於所統三旗內。巡環試才。農隙則稍數。農時則稍疎。數則每初五日內。試一哨之軍。書其中數。次五日試二旗之軍。書其中數。如右。又次五日。畢試三旗之軍。每十五日而一試。則一月再試。疏則每初旬試一旗之軍。再旬試二旗。三旬試三旗。一月一試。極農五六月則停止。使之專力於農務。守令亦一月一次。或二月一次。合試境內諸哨之軍。校其成才多少。申報幕中。以行賞罰。

一近日他道之軍。則分屬各處。有巡察使軍。兵水使軍。防禦使軍。巡邊使軍。助防將軍。守令之軍。各自爭占軍政大擾。調發之際。文移夾馳。眩於奉行。不知適從。此是今日極弊。故今則一邑之軍。盡屬於守令。有事調發。守令各率其軍。來聽大將之令。惟其所用。此最爲簡要。若軍不齊一。或教練怠慢。則其責不歸於他人。而歸於守令。各各盡心施行。

一我國不閑陣法。今此團聚民兵。若無教訓之人。則如盲者之不識道路。極爲可慮。近日唐教師。分教各道之弊甚矣。本道則唐教師下去事。已極力

防塞。知委民間。使勿驚擾。龍津別將許雋。往在忠清道安興梁時。善於教誨。故營將兼差。使之往來諸邑。哨官一同教誨。軍士并爲知委施行。

一農隙務閒之時。防禦使持令旗出去。五司之軍。聚合於一處。爲大習陣。臨時聽傳令施行。

一哨官勤於其事。所率軍士。無弊教訓。使軍心親附。無怨苦之事。成才數多。則其中特異者。當各別。啓聞除職。預爲知悉策勵。

移咸鏡道巡察使南北兵使文

鍊兵一事。朝廷命下。外方所爲。尙未有頭緒。虛度時日。良爲可歎。兵曹頃日。磨鍊武學事目。啓下知委。其意欲使邑求於其面。面求於其里。里求於其村。村求於其人。所謂綱舉而目隨。卽古者比閭出兵之遺意。無徵發往來之擾。無合聚餉食之費。一番整勅之後。百事惟意。平時則如鄉徒習射之爲。而防備土賊。患難相救。有急則各哨官旗隊總領。其所鍊之軍。而聽其調用。允爲利益。此事若善爲措置。則萬一遇有邊患。精勇俱發。有手足相救之形。而括軍擾民之弊。可以祛矣。且本道南官各邑。多有從軍力戰之人。而或功多而賞典不及。頗有怨望之心。或上之人。無推起使用之者。而在家間臥者。亦不爲少。此輩。隨便盡爲調發。或施俵賞饋遺。蠲除完護之恩。使人情聳動而相慰。且雖調出。而勿爲發遣。分力作爲一隊。使之自當一面。大概治兵之事。如治亂繩。必以誠心臨。

之。勤加振作。又必有賞罰之柄。而頻數試才。有所勸獎。然後可期成效矣。各別申勅施行。

移黃海道巡察使文

凡政事施措之間。貴在於順民之情。民情既順。則事必有濟。急之不可。緩之亦不可。況當此兵革板蕩之後。瘡痍者未起。流亡者未集。今日之政。當以懷保小民。弔死問孤爲先。使愛洽於民心。然後其他鍊兵據險器械修措等事。次第可舉。此等緣由。本道十分詳審施行。山城修築。固爲今日之急務。然形勢有緊歇之異。功役有難易之殊。先其緊且易者。而後其歇且難者。則民力不至困弊。而防備之事。亦無後時之虞矣。近日忠清道等處。亦築山城。而處處未得其宜。多發民丁。并舉重役。而監董者。又不得人。其於城制曲直。山勢闊狹。皆不細入思量。只以苟且塞責爲務。故築城未既。旋即頽毀。民力徒費。而終不能爲可守之地。極爲寒心。道內山城。時方始役之處。未知幾處。監董之人。未知何人。某處某日始役。功役幾何。某處形勢最好。易於修築。本道於始事之初。詳盡計度。使爲之必可成。成之必可守。亦不可多用民力於創殘餓羸之餘。以擾民心。諸處築城形止。急速牒報。山城自募入居者。除其身役出於權時不得已之舉。若一處偶然爲之。則猶可也。許多山城。皆用此令。則避役之徒。相率而歸之。日月漸久。則或有不入城中。而冒托免役者。虛僞滋生。則軍士之避防厭番者。驛卒館軍

之謀避身役者。人吏官屬之厭苦就歇者。紛然向之。不勝其擾。此亦不可不慮。大抵山城。必在於險絕之地。平時則人不樂於居住。惟當預設倉庫儲粟其處。而或使僧徒居守。約束隣近各官之民。預爲分付。臨時各從指揮。處處入保。則事甚便宜。可以施行。古語云。百聞不如一見。本道親在其處。凡有見聞。互相通議。必使事無過舉。然後可以成事。爲此知委。更加詳審回報。

移京畿防禦使各營將文同月九日

京畿之民。酷被兵禍。蕩析離居。甚於他道。幸賴上年禾穀稍登。流離四散之民。稍稍還集。而時未定厥居。誠可矜惻。今於各村。設立哨官。使知軍數者。其意不但在於鍊兵而已。蓋欲其同隊共里之人。患難相救。有無相資。使相親相愛之心。結於平日。則臨事自能如手足心腹。不相潰散。哨官旗隊總以下。各別曉諭。率下之軍。盡心施行。卽今春節已入。農事將迫。各哨中如有農牛鮮少。種子不足之民。逐日牒報于營將。使之轉稟覓給。此外凡哨軍病患疾疫。欲得藥物救療而未得者。或爲徭役所侵。將至離散者。并皆一一報于營將。庶幾民生先爲安業。然後次第操鍊。各別知委施行。

移水原府文二月一日

右營所屬軍士。尙未束伍。延拖時日。已經累月。外方不行。朝廷號令。類多如此。極爲駭愕。前日防禦使具思稷。束伍成冊相考。則不惟亂雜無統。成冊內不

書軍人姓名。但云實軍幾名。有故幾名。未知某軍爲實。某軍有故。有同畫水而求痕。以此而名爲鍊兵。無異於兒戲。大抵一營統五司。一司統五哨。一哨統三旗。一旗統三隊。一隊并火兵十一人。乃是束伍大綱。故哨官自擇旗總。旗總自擇隊長。隊長自抄其軍。他日軍士不整。壯弱不分。則哨官當自受其罪。不可歸之於他人。故軍不得不精。教不得不勤。可用於戰陣。所謂多多益辦。只是分數明者。誠非虛言也。令之爲將者。全不知此意。且傲然自大。自以爲無所不能。於此等精微曲折。皆不致意。尤可歎息。水原常時軍兵之數。至於一萬七千餘名。今雖兵火之後。不應但有千餘名。此必哨官不自抄軍。而使都訓導色吏操縱。用手於其間。致令如此。往者已矣。自今更爲詳察。聽今去都監聽用官全尙文所言。親自束伍。自一哨二哨。次次傳令。各率其軍。來集府中。點閱軍卒。逐一成册。火迫上送。一營五司。軍人畢束伍。後卽時牒報。則當發送鍊兵牌。且遣副使。合五司之軍。習陣禿城。急速施行。

移平安道監兵使文

本月 日 備忘記云云。宵旰西顧之憂。至於如此。當事之臣。所當殫竭心力。策勵守令邊將。日夜思惟。廣求長策。以爲經遠之慮。使朝廷永紓邊警之虞。方是盡職。不可悠悠泛泛。應文塞責。以度時日。傳旨內諸條。宜詳審奉行。大抵今日之勢。只以關西爲根本。處置之事。不可少緩。自古戰守之計。不過糧

餉軍兵城池器械而已。四者俱備。而又必有人和。固結其心。更有良將。然後可以濟事。今以糧則處處竭乏。不足以支數月之用。以兵則守令惰慢。不顧十分。案亂不成。頭緒。城池則齟齬已甚。無金湯可固之處。器械則散失殆盡。銃筒火藥諸具未備。至於弓矢亦皆散失。四者無一可言。而民怨極天。人和又無可恃。其爲危迫之狀。不可一二以言也。然不可諉諸勢難而不圖。巡察使則當嚴明黜陟。以肅綱紀。使貪官猾吏不得侵剝於下。凡弊所當革者。利所當興者。逐一講究。悉罷行之。兵使則詳察沿邊鎮堡形勢。急時措置。城池之可設者設之。土兵之凋弊者撫之。器械之未精者改之。及此無事之時。多方經理。如一家之事。則雖日計不足。而歲計有餘。早晚必有完實壯固之勢。聖教之所以眷眷屢下者。實在於此。更加體念。且平壤一城。自愴唐以來。素稱險固。蓋其地勢帶江。據山。似若天成。所欠者城制頗濶。軍少則難守。今之炮樓之制。實爲萬古守城之妙法。此樓若成。則軍數雖少。不患難守。傳聞巡察使。今春欲爲加設於城外。云其爲關西根本之慮遠矣。但制造須曲盡其法。然後方爲有益。蓋我國城制。屈曲若炮樓。附城太近。則炮道之出於左右者。有所障礙。勢難及遠。若此之處。當使離城二三間。或四五間。隨其各間。以安火炮。炮穴愈多。而引勢愈遠。千步之內。賊不敢近。又於千步之外。立一炮樓。使之屹然相望。則兩處大炮。衝擊迭發。而賊雖百萬。難進城下。此乃妙法也。今於始造之初。更爲精察體勢。施行。沿

江一帶鎮堡可設處。并次次排設。肅川土城濶狹適中。今雖不能并舉其役。漸次蓄力。以爲修葺之計。安州城子進築事。乘此冰解之時。於晴川江上流。斫取材木。從水上流下。先於司倉南隅之路。立東門。後進築城子。方是便宜。又以舊東門材木。改作北門。無妨。第不可擾民於農時。以僧軍及水軍。隨便役使。宜當道內凡富人之有粟。而有志國事。願爲助力者。僧人之力於其事者。監官之盡心辦事者。畢役之後。分等馳報。則當入。啓論賞。鍊兵成冊。至今未來。良可恠歎。從事官下去時。鍊兵規制。已曾分付。鎮管之法。常川檢勅。勿令弛廢。成川鎮管。在大同江上流。與平壤爲輔車之勢。且其所屬郡邑。甚多於他鎮管。祖宗朝布置本意。實非徒然。若使成川鎮管。盡其職任。得精卒數千萬。以成節制之兵。則既可以壯固平壤。乃可以把截黃海道。遂安谷山之路。如此然後。大同一江。方成天塹之固矣。此等經遠之計。詳審勅勵施行。其次安州鎮管以下。亦當鱗次整齊。守令之奉行勤怠者。一切約束於賞罰之中。不可任其自爲而已也。今年農事。各別勸課。此外凡事。不能盡陳。并便宜施行。

移京畿巡察使文

三月十六日

京畿左營鍊兵之事。得成模樣。而右營軍兵。尙無頭緒。防禦使亦爲遞易。主管無人。極爲可慮。大概各官官吏及百姓等。不知武學事。日本意。便易簡約。非括軍之比。非官門傳令聚會之類。而處事之際。多失妙理。或委諸下人之手。致有

騷擾遺漏之患。或視同抄軍赴防之歸。而令民情不安。其間節節未便之事。不一而足。良爲痛心。此由各官當事者。不識鍊兵之本意。而然守令及將官。招致旗隊總。明白曉諭。諄諄教以各保鄉井。如團結香徒之爲。常時隨便各習所願之技藝。農時則許令歸農。而勿使有妨於耕作。守令但以賞罰一事。明施各哨官。使民知勸懲之方。則自然着實有效。更以此等辭緣。一一知委。速爲整齊。

移四道巡察使文四四月

國之所以維持綱紀者。只在於上下相承禮敬相接之間。近來綱紀解弛。百度廢墜。內外上下之間。禮貌蕩然。無復有敬慎之意。紀綱之廢。實在於此。姑以文報一事言之。方伯之於體察使。守令之於觀察使。階級有序。不可相混。以中朝文移之體觀之。如軍門號令。則自總兵提督。以及布政衙門。皆敬慎不敢視爲等夷。雖自相往來文移。語及上司。則必皆上書於他行。不得連書。可知紀綱之行。雖在文字之間。不敢輕忽。近觀各處監司粘移報狀。守令其於上司衙門。例皆連書。詞說倨傲。略無敬慎之意。極爲慢忽。此事如此。他可類推。以此朝廷之令。不行於外方。監司之令。不行於守令。守令之令。不行於民間。將帥之令。不行於編裨。編裨之令。不行於軍卒。下陵上替。不可收拾。良可寒心。本府猥當重任。他事百不整頓。而先言文報之事。捨重言輕。固未免不知類之譏。然小事尙未能正。則何望於大事哉。自今凡文移等事。自監司以下。一切依前日下四

道體察使入。啓所定規例施行。而守令文報中。如有不遵式例。仍舊傲慢者。觀察使。毋得上使。

移平安道巡察使文

一道軍數常時現付軍額者。通計一萬餘名。若合戶奉足。則其數必倍。今則合公私賤雜流抄發。而其數止此。未知其故。雖兵以務精爲言。然太少則恐不足。以禦大勢之寇。此未必抄軍無法。互相脫漏之弊。更加詳察施行。老乙可赤形勢。浸浸日盛。將來之禍。可以料度。凡事爲之於未甚之前。則其勢易爲之於既甚之後。則其勢難。乘此永解防歇之時。江邊鎮堡城子之類。圯者修之。烟墩之可築者築之。糧餉之不足者補之。兵器之未備者備之。邊將之庸殘者汰之。先爲不可勝。以待賊之可勝。則後雖有事變。有不足患。遠處指授之事。但舉大概。不能詳言。本道責勵兵使及邊將。至誠曉諭。期以同濟國難。

分付從事官應行事宜條

所管黃海平安等道應行事宜。關後錄相考舉行後牒報。

- 一 京畿軍糧方急。魚鹽急速上送。仍從便區處。使爲永久之利。
- 一 黃海道被抄操鍊軍人外。亦有軍功受職之人。及他間散武士出身之退居鄉曲者。才人山尺之類。皆當網羅收拾。各於其中。分隊伍定統屬。行其惠澤。得其歡心。明其約束。然後臨急易於調發。與被抄軍人。合勢犄角。此

爲上東與平安道一樣施行。

一兵之本在農。雖事變搶攘而務農則不可少。忽近來人心善動民無固志。風聲鶴唳皆爲失措。或散其家業。或廢其農務。分散他處。賊未至而先爲死亡者。比比有之。此意各別申勅守令。曉諭民間。無得輕動。其中如有造作訛言搖亂人心。乘時射利者。當以重律治之。掛榜知委。

一出站刷馬之弊。已爲通融出米。民怨少紓云。依前日分付。各別申勅。勿令中廢渾雜。更生弊端。且聞金郊察訪。勤察職事云。各站之事。使之專委。檢勅。如有弊端。則當責察訪知委。

一山城之役。旣不可一時并舉。又不可廢弛不爲。其要最須得其形勢。控扼之處而據之。然後用力少而收功多矣。蓋一道有一道之形勢。一國有一國之形勢。得其形勢者勝。失其形勢者敗。如漢人所謂守白馬之津。拒飛狐之口。塞成臯之險者是也。黃海道形勢。一路則自平山達於京畿。開城府。一路則由兔山谷山遂安而達於成川。其中必有十分形勢可據之地。更須遍訪土人之有識者。參以從事官。眼同條列牒報。如猪灘一帶形勢。不須著意。審察平山最爲直路要害。人言山城形勢不甚好。然古人築城之意。必非徒然。親審牒報。瑞興山城。則前行移已盡。第未知府使作用如何耳。平安道形勢。一樣類推而得之。安州城子進築事。亦檢勅施行。

一 黃海道常時入防於平安道軍人其數幾何而今之時存者幾何今西邊事勢日急或有更入黃海軍人防戍之議然此則徒爲民弊而實無益於禦敵無已則出其番價入送西方以爲募軍之資得軍必精而黃軍之弊亦除實爲兩便此事亦須參酌彼此之情牒報。

一 成川鎮管所屬各官於平安道六鎮管中最多其故何也自前朝時北虜入寇則必由此路而出於慈悲嶺以犯內地故特爲成川鎮管多其屬邑以爲遏截之計且是平壤大同江上流假使平壤且急而成川以大兵堅據上流與之掎角則平壤之勢自固祖宗朝宏遠之慮周密如此昇平以後徒有鎮管之名而無其實故兵分勢弱守令亦無以糾合軍兵保守境土爲心者良可痛也成川府使金庭睦朝廷以其善於鍊兵故由屬邑而陞爲鎮管實非偶然若使此人盡心職事修舉軍政不徒成川一邑之軍使其所屬皆成精勇之士則緩急得力非少更爲申勅且一樣知委於他鎮管視其屬邑之兵精麤與否特爲賞罰其鎮管使有成效。

一 平壤順安肅川安州爲大路所經之邑聞肅川最爲殘敗不能成形未知其故豈守令未得其人而然歟賦役獨重於他邑歟倉穀已盡糶糴不時民無所資歟於此必有其故矣須知其病源而改之然後民蒙實惠而完復有日矣以形勢言之則肅川前臨平野一望無際土地沃饒且連海有

魚鹽之利，苟能多設計策，措備農牛田器，因民之所無利而利之，去其侵督之害，則可以蘇殘矣。如土民中識事者，前主簿吳聘壽者，亦是一邑之翹楚，不妨招見，問其民瘼，且問邑中利病，而圖爲蘇復之策，與監司一樣經紀，必期安集。

一江邊一帶城池器械軍糧兵卒，及邊將稱職不稱職者，并皆檢察詢訪，且勅兵使，必於合永前汲汲措置可爲之事，力未自辦者，申報於軍門，逐一處置，其中炮樓之設，最爲守城善策，已設處合宜與否，未設處隨便指授，漸次成就，且以大炮常川習放，無復廢弛。

懲毖錄卷之十六

軍門膽錄

移京畿巡察使左右防禦使文五月一日

近自亂離以後。民心不定。少有警報。無論虛實。輒皆驚駭。老幼奔波。不知所適。往往死於土賊。填於溝壑。雖幸而得生者。一離鄉土。資糧殫竭。得食無路。餓死於山谷之間。不能接濟。其勢將盡死亡而後已。極爲寒心。原其所以致此者。不但民心動搖。不能鎮定所致。實由於無可恃之處。雖欲入保。而不可得。故倉皇顛仆。不能自定。其亦事勢所然也。如水原之民。則以禿城爲固。故往日驚動之時。一府之民。獨不動搖。此有所恃而不動之驗也。今宜於各邑。人民居住道里頗近。形勢便好處。擇其險要可保之地。漸次修築。預爲區畫。知委使某處之民。入於某處。假使丁壯調發出戰。而老弱相聚其中。多設石車以待之。盡收公私積蓄於其中。列屯相望。無事之時。則下山耕種。無復憂念。有事則攜其所有。卽爲入保。則賊雖欲衝突。而不可得。且四面清野。鹵掠無得。則不過數日。其勢自窘。乘其情歸之際。而迭出銳師。處處遮截。則蔑不勝矣。今日禦賊保民之要。惟此爲長策。不可少緩。特患人無遠慮。不肯致力於此事。只以奔竄爲得計。未知奔竄之後。將無往也。水原禿城。旣爲右營。營所屬之軍。分爲五司。亦當以五司

所近之處。曉諭人民。於農隙務閒之際。漸次修葺入保之處。一處如此。他處亦然。不過一年半年。而形勢自成。其與拱手而坐待死亡者。利害較然矣。仁川亦有山城。聞其處之民。則皆欲入保山城。此亦民情所願。故已爲聽許。專責本府官員修葺。其他如雙阜等處。及他餘民居稠密形勢險要處。必非一二。遍可巡歷看審便否。逐一馳報。且曉諭人民。以此乃爲民。非但爲國也。民雖至愚。必知其利害之實。而卽相聽從者。更加至誠告諭。龍仁石城山城。在直路之衝。形勢甚好。而民力不齊。至今不得成就。亦爲可惜。防禦使卽爲審視。量其功役多少。馳報。則農務稍歇之後。以前營所屬之軍。限二日赴役。無妨。婆娑城亦當依此。以驪州利川楊根軍人修築。此不過一二日之役。而可爲萬世之利。民心亦必不至於厭苦。更爲參商便否。牒報施行。

移京畿黃海道巡察使文

近日鍊兵之規。旣以鄉里村落團聚爲兵。此實管子內政篇之遺法。欲其平居。則患難相救。守望相助。疾病相扶持。有事則同伍共隊。死生不離。其與聚合遠處之軍。面目不相知。姓名不得聞。情意不相通。而強之爲隊伍者。甚爲懸絕。但有兵則必有食。目今公私積蓄掃如。脫有調發之事。無食之軍。必至顛仆。亦不可用。今欲依隣里修稷之例。各於其村其里。計其軍之多少。而於麥熟及秋穀成熟。民間穀賤之際。從其所願。升升斗斗。收合藏置其里。漸次添加。以爲里中

軍人所食。則足食之道。似在於此。假使無兵興之事。而蓄積先具。則水旱飢饉之災。亦當不至於損瘠。此古人所謂蓄積生人之大命。三年餘一年之蓄之遺意也。小民不識遠慮。穀賤則濫費無節。不念前頭狼狽之憂。若非在上之人。先爲曉告。開以利害。則愚民必不能自知。然又必於一營一司之中。擇其鄉士人之有誠心識慮。爲人所信服者。以主其事。然後乃可有成。此乃最急至緊之務。本道更爲參商便否。報稟施行。

移黃海道觀察使文

一路唐兵往來。出站刷馬支供之弊。日甚一日。民不堪苦。當今病民之事。莫大於此。本府十分商度。從事官下送。使通融一道田結之數。而均出米布。分置於三站。又以解事能幹。不爲汎濫之人。定爲三站監官。勾管各官收納米布。堅藏支用。俾無虛疎之弊。逐日用下之數。皆爲一一置簿。以憑後考。若黃州置簿。唐兵下來之數。與龍泉平山有異。龍泉平山之數。與京畿有異。則卽係虛僞。逐一治罪覈實。然後一路之積弊可祛。而中間猥濫隱匿之端。少除矣。且唐兵往來。或今日甚多。而明日則專無。若能推移補綴。不爲濫用。則前日一月所費。可以充用於二三月。此理甚爲昭然。如此而監官能稱其任。守令善於申勅。則當爲論賞。不然則治罪。自然事有條理。人各盡心。猶恐其怠慢不爲舉行。又以金郊察訪。元是主管七站之任。且年少文官。必致力於國事。故使之往來糾檢。而今

經累月。察訪則無一字牒報之事。三站監官。則又不知何人爲之。一道田結幾許。出米布幾許。以一站所收幾許。用下幾許。足與不足之數。皆無黑白。覈正無路。今日萬事。如行雲霧之道。寸步之外。迷昧莫知頭緒。至於上司所令。一切不爲奉行。事事如此。末由整頓。尤爲寒心。近日中朝。亦深懲本國刷馬支供之弊。至於別立規模。沿道各驛。各送空簿一件。使之逐日書填。俾無虛僞冒支之弊。中朝遠在千萬里外。而隱惻我國民瘼。處置之密。至於如此。我國官員。顧以身當其事。秦越相視。莫知省念。此意殊不可知。本府旣兼體察之任。凡事所當相關。而百事弛廢。號令不行。雖欲無言。而不可得。金郊察訪。則親問情由。次已令進來。各項辭緣。逐日相考。列錄牒報。中朝空簿。一樣別爲一冊。本府逐日上送。

移威鏡道巡察使北道兵使文

有人來言本道之弊。其中甲士正兵中。凡赴防者。幸有疾病事故。輒不到防。遷延一朔。則倍退立二朔。前番未畢。後番隨之。何暇治農業哉。此人逃亡。則侵漁一族。一族逃亡。則及於一族。一族切隣之切隣。是以一人之故。而民悉流亡。退立闕番長。在道上。民冤不賞。極爲寒心。各別變通。善爲處置。俾無如此之弊。北方守令等。或拘一時之利害。誘致藩胡之有罪者。便加誅戮。鎮將自以爲能。事闔師亦以爲當然。作爲常規。每有是舉。誠不知一再誘殺之後。更無可欺之

方誘術有限。變生無窮。他日之患。未必不由於誘殺。大概邊和之失。皆出於處置之失宜。况加之以誘殺無理之事乎。今後申勅。如有誘殺蕃胡。自以爲功者。逐一捉囚重論。嚴明禁斷。勿使激成邊釁。

移京畿巡察使文

今日之勢。賊在門庭。朝夕將動。在我措置之策。不可少緩。然其戰守大要。不過四條。一曰糧餉。二曰軍兵。三曰城池。四曰器械。四者措備。而又必不失人和。使軍民皆有親附之心。又必得將帥而任之。然後始可有濟。不然則雖有防守之處。而無益於事矣。本府自受任以來。已經半年。其欲布置規模。則不外於此四者。而求其成就之效。則尙無一事可以忘憂者。以此夙夜憂歎。每以求助於當事之地。本道宜盡心舉行。糧餉則前者已以本道田稅米豆藏於各官。以備不時之需。其數不過九千餘石。不足以供數千兵一月之糧。其後又令勸諭村落。令各出義粟。以備不時之用。前監司時。至於作爲榜文知委。爲先相考舉行。軍兵則分爲四營。出左右防禦。使以統之。觀其成效多少。而賞罰當在於防禦使。各別申勅。秋成農歇之後。合鎮大閱。惟左右前後營軍人。各爲帶牌事。已爲知委。左營則幾盡帶牌。而其他營軍。則時未舉行。并爲知委舉行。南漢山城措置事。前日已曾面議。今據別將權應元等牒報。炮樓材木六條。在山下未得輸入。云。某條指揮使之及時輸入。器械則各官一切蕩然。此非數日間措備之事。必

須多般預措。可以應用於倉卒。前者自軍門分送箭竹於各官。亦令急速造作。畢造後更爲受去。連綿造作。他餘事亦十分申勅。無失時刻。

移京畿巡察使文五月十八日

近來兵事素雜。雖有抄軍之令。而隱漏者太半。被抄者未免練習之勞。而閭閻安坐者。反以爲笑。本府前者慮有此弊。使各營之軍。皆帶腰牌。定其寸數。左營則爲直牌。而刻名處填以青色。後營則爲曲牌。而填以黑色。右營則爲方牌。而填以白色。前營則爲銳牌。而填以赤色。四營諸會。則不待考閱。而可知其爲某營之軍。閭閻之中。如有丁壯不爲帶牌者。則卽係閒遊漏落之人。自無所容。此乃紀效新書之法。而我國兵典中。令水軍帶牌者。亦此意也。聞左營則前防禦。使時幾盡帶牌。但未知寸數填刻如何。其他則皆置之相忘之域。極爲未便。但各使其軍爲之。則寸數或大或小。填刻或不精。青朱白黑。亦難分明。殊非軍陣整齊之意。今後於各營。使其營將得善手匠人。一依見樣。磨造精刻。其面填以依方之色。分諸五司。巡行佩之。既畢。報于本府。則當不時發遣軍官。使之暗行村落。點檢虛實。本道急速申勅舉行。

移黃海道巡察使文六月十九日

江陰一縣。以邑殘民少。已爲合併。亦出於隨時救弊之意。但郡邑布置。祖宗朝皆量其形勢道里而爲之。且以本道形勢言之。則自京城通於西方之路。有

二條一條自開城府出於興義由猪灘達於平山一條由兔山新溪谷山達於成川其間雖不無小路傍通之處而大概則此兩路爲形勢所在也至如江陰則在猪灘下流水路則通於喬桐江華陸路則通於白川延安海州實乃形勢可據之地故倭賊由直路以下之時旣置陣於興義以遏脫彌谷吾助川兩岐之衝又於江陰置陣使白川延安之軍不得出入侵擾直路往來之賊其審察於形勢而知所據守也如此今江陰若廢則平山白川直路之間道里濶遠形勢不接恐非長久之計故本府之意則常欲增重江陰之勢別於臨江斗絕之處設險耕守以接猪灘路脈然後賊兵不敢肆意直向於平山今雖已爲合併不可更置縣監而此意則不可忘之且合併之邑人吏官屬必提挈家產棄其土田就役於所屬之邑故先爲流散且本邑爲主而見屬者爲奴故凡有差役不無侵責於屬邑村民亦受其弊畢竟兩邑同歸於一失此合併之所以難爲也今江陰則當別爲處置縣內人吏官屬使之仍留其處毋得往役於白川仍令其處有識勤幹之人定爲屯長之任備給農牛種子使之招集流亡力於耕墾數年之後人民稍集氣勢稍蘇則其邑可以復設設險遮截之計可以成形但屯長不得其人則事無條理民之受弊依舊此等曲折急速商量且訪本土民情飛報施行廢縣必有文廟及城隍社稷之壇一朝人神失依處置不可緩忽此亦何以爲之并爲相考牒報。

移黃海道巡察使文

道內糧餉措置之事。專在於本道。大抵足兵在於足食。不得已則寧去兵。而不能去食。聖人之慮遠矣。今兵興未弭。而在處糧竭。脫有調度之事。及有水旱之災。則將以何術接濟。此乃至急至大之事。況今葉遊擊奉軍門之令出來。督責本國。各於沿路館站備三萬人。一二日之糧。勢難違拒。朝廷方患無策。萬一兵出而糧不繼。則當事之人。當受其責。殊非細慮。道內黃州龍泉平山三站。若有軍興之事。則儲糧接濟之策。將何以處之。宜預先計度。一一牒報。相議處置。古者兵興之際。理財之要。必以鹽鐵爲上。本道濱海之地。魚鹽之利。不可勝記。而自前不能勾管。散入於私門。故當此窘竭。亦拱手而不爲之計。本府尋常慨歎。若使沿海一二邑守令。爲國盡心。奉行命令。則事可易就。不然則必出士人之有計慮。能措置不貽弊端者。區畫經紀。使公私兩便。灌輸買穀於京江及各處。則一年所得。雖至於數萬石可也。比諸零碎收拾於空名募粟之舉者。其效遠矣。急速商量。查考道內魚鹽興產處幾處。鹽戶完集之策。當在何術。船隻往來。何以無弊。主管其事者。何人合宜。一一商量。畫爲條目。急速飛報。以憑裁處。」

移咸鏡道監兵營文

七月四日

本道所送鍊兵隊伍冊見之。則容貌年歲置簿內。不書營將把摠哨官旗總姓名。有似無頭之物。殊爲未穩。見據一本書送。依此改書上送。鍊兵必須得其要

領便易無弊。使人心樂赴。然後庶見成效。括軍一事。最爲今日大弊。而官門待令。又是百姓所厭苦者。今宜痛革此弊。就一邑內各面各里各村。隨其所居地面。擇定勤幹人爲哨官。旗隊總簽得現存丁壯團束行伍。使之各自操鍊於村巷。如鄉徒聚會習射之爲者。而守令但觀其勤慢能否。明示賞罰。則人心激勸。事不煩擾。鍊士興起。自至如林矣。此卽管子內政篇所謂教士三萬。橫行天下者。而其規矩要約。正爲今日所當法者。各別知委。申勅施行。三水甲山。尤爲孤弱。軍糧不可不先期措置。以爲接濟援兵之計。若不預措。則臨時雖欲入送數千健兒。將無以爲策。乘此閒暇之時。一應贖木鹽石等物。連綿入送于兩處。隨便販賣。生穀一事。最爲緊急。更爲商度施行。

移京畿巡察使文

道內山城。隨便修築。以爲保民禦暴之計。其中竹山山城。正當清州忠州兩路之會。直走京師。形勢之重。甚於他處。若於此地。設築城壘。爲前營。以爲操鍊之所。且於山下平野。廣開屯田。則又爲萬世之利。前朝之末。亦以此城。禦蒙古。此乃已試制勝之地。自前欲爲修築。而但恐功役浩大。勢至動民。其處之民。流亡纔集。土石之役。不忍遽爾出令。遷延至今。今者年穀頗稔。民間無艱食之憂。且無唐兵往來之擾。若失此時。則後無可就之日。若以前營所屬軍人。及遺漏未抄於軍丁者。調發築之。被抄軍丁者。稍減其役。未抄者。稍加其役。乘農事稍歇。

之際。數日爲役。則似可成就。惟役民事重。功役多少。亦難預期。本道十分預爲計度。且觀民情便否。急速回報。

移黃海道巡察使文

今月初六日。忠清道鴻山林川等處。有土賊竊發。勢頗鷓張。不得已分送京中。炮射手。期於勦滅。事定間。京中宿衛之軍數小。京城近處各官。武士發送事。已爲下書。此初非大端。難制之賊。萬一遠方之民。不知事實。過爲驚動。則事甚騷擾。十分詳審處置。勿使人心動搖。武士則延安白川海州等邑所居者。先抄三四百名。定將起送。刻日無滯。其餘亦鱗次整齊。以待朝廷命令。監司稍於近京之地。駐筭待候。本道之民。久困徭役。性且愚頑。鎮定之事。更加詳審處置。

移黃海道巡察使文

兵興以後。調發轉運之事。百倍於常時。民生之困悴。已不可言。至於山中僧人。亦皆被侵於築城等役。不得休息。僧人本非有根着恒居人。若逃亡無去處。則必以一族切隣。轉輾侵擾。使動鈴販賣等事。不得如意。流散甚多。諸刹一空。加以守令不爲撫恤。凡千官中雜役造紙造醬等事。無不侵責於此輩。自摠攝設立之後。依憑官令。中間被侵之事。又非一二。以此僧役之苦。又甚於平民。怨苦之狀。有不忍聞。僧雖逃役遊手之人。然其生理頓絕。則壯者化爲盜賊。弱者顛仆溝壑。寧不矜惻。今後申勅守令。所在諸寺僧人。各別完護。撫集。勿以法外非

理之事。侵責致怨。築城等事。亦觀勢相時。如秋冬僧人動鈴資活之時。勿爲服役。一處赴役之人。量其赴役日數多少。卽給完護之帖。一年之內。毋得再役於他處。其中如有名爲摠攝之令。而依憑作弊汎濫者。所在官。隨其告訴。或有所聞。逐一治罪禁斷。使其含生之類。各有安集之樂。將此事意。急速曉諭道內。於諸寺牆壁門間。皆爲大書張榜。使各僧無不聞知。本道常常檢勅。以祛弊端事。十分詳審舉行。

移平安道巡察使兵使文

自古鍊兵之事。有二條。軍食有餘。則募得精勇之軍。餉以官糧。聚於一處。而將官統之。晝夜訓練。此唐宋以來。以及今日。皇朝養兵之制。爲然也。軍食不足。則不能餉軍。故各從鄉里。團束部伍。而於其里中。出統率之人。使於農隙。隨便操鍊。有時聚會一處。習陣訓閱。此乃管子內政篇遺法。而唐時澤潞節度使李抱眞。亦用此法。教鍊步卒二萬。澤潞軍兵。爲一時藩鎮之最。亦其一法也。今我國糧儲蕩然。餉軍無路。雖欲聚兵訓練。其路無由。且各邑遠處之兵。每因操閱之事。分番往來。異糧立番。非徒勞苦倍甚。而農時則廢。失農務。或至於飢饉流散。此亦鍊兵之極弊。而民情之所不堪者也。本府深察此弊。於京畿則分爲四營。以道內諸邑。從其附近。屬於四營。而束伍之規。則一從鄉里團結。人多則隊伍亦多。人少則隊伍亦少。未嘗移近就遠。合此聚彼。大概如鄉徒作契之法。一切

務在便民。而乘其暇日。各在其處。操鍊所業。哨官計其晝數。送於把摠。把摠送於營將。營將申於監兵使。以行賞罰。若於習陣之時。則或合一營之軍。校閱於一營。或合四營之軍。大閱於中央。此乃京畿近日鍊兵大概也。傳聞本道。則各處之軍。每月分番直宿於官中。往來煩費。未免廢農失時之弊。東伍之軍。各自有身役。既爲立番於操鍊之處。又自供其原役。一身兩處奔走。人力亦所不堪。當初教鍊未成之前。猶可如此。今則砲殺射手等。幾盡成就。宜使之各在其處。依法操鍊。而其新入東伍者。次次傳習。則一人可以教十。十人可以教百。不多日內。一道之民。各成教鍊之軍。事甚便益。惟成才上等者。必有論賞之規。然後可以激勸他人。若勿論成才與否。而徒以編入東伍之故。盡免雜役。則他民之未入東伍者。偏受其弊。怨苦必甚。而非經久通行之規。故京畿則於各隊中。較其才藝。分爲上中下三等。上等則量免雜役某某條。中等則次之。下等則與平民一般。而別無免役之事。有事調發。則或令徵發上等。或令徵發中等。上等軍人徵發。則中下等軍人。留在其處。中等軍人徵發。則下等軍人。留在其處。既無冗雜盡發之患。又無本處閭里空虛之弊。事甚便宜。此等條件。十分參商。且訪民情便否。劃卽報稟施行。邊上鎮堡。辛亥年加設立之時。或五里或十里之間。連次設堡。相望不絕。而各出堡將。率軍官數人。料食則雖出於官倉。而凡差備供奉。則皆出於軍士。故軍士不堪其苦。漸至流散。官倉之儲。亦因此耗盡。若

於防戍之計有關。則些少之弊。似不可顧。此則以其軍少。不足以禦賊。故合冰後防緊之時。則盡空其地。而疊入於他鎮。是平居但有侵虐軍卒。耗食官廩之弊。而臨急實無所用。此事亦當相時變通。以蘇塞上之民。本府之意。自江界以下。以及義州。疊入諸堡。但依中朝煙墩之例。堅築墩臺。只令瞭望舉烽。而勿置堡將。但以土兵之有計慮者。作爲隊長。使處其中。而其間別於大鎮。合聚軍兵。以爲必守之計。則如有事變。墩臺連絡。足以報變。而大鎮軍兵既多。形勢壯固。亦可以合力制敵。其於防戍恤民。兩皆便宜。此事亦與兵使相議。并爲巡問於江邊土兵之老於邊事。有識慮者。得其便宜。可行之策。如某堡則當合於某鎮。詳細枚舉。牒報本道。水軍入番處。只有宣沙浦老江廣梁。其役不至困極。而但以中原行次。遼東護送軍之役。水軍不堪其苦。近日則節使之外。別行次相望不絕。民力尤爲困竭。此則當何以處置。亦爲參商訪問。得其可行之策。詳細牒報。兵亂之後。馬匹比前益貴。遼東往還。刷馬民間。辦出無路。此非小患。往在甲午年間。備邊司請於遼東。質得雄驢數十餘頭。於道內牧場水草便美處。聚雌馬百餘頭。放驢於其中。使之生育。則數年之後。驢子興產。因以成長。漸至蕃息。則凡驛路馬匹不足處。及遼東一路轉運路費等事。皆可取辦於此。必爲永久之利。啓下已久。而未聞施行。今則中江已爲開市。此事若可舉行。則以某物質得驢子多少。間可以試其行否。亦爲商量牒報。我國當初制法。未免苟簡。

如邊將不爲官供。而取食於軍士之類是也。本府之意。某條措置。於海邊諸鎮。各儲穀數千餘石。以爲之本。而春秋斂散。令近處之民受食。略如郡縣倉庫之法。每歲除出費耗。以爲邊將之食。而永絕軍士侵剝之路。則水軍庶可蘇息。此亦參酌牒報。江邊助防將。每於合冰時。使內地守令。各率牙兵。陪牌遠入諸鎮。使之協守。其初設立之意。只爲防備一事。但此事已成積久之弊。其於防備。亦未見其有益。今則事與平時有異。天兵往來絡繹。內地守令。不可一日離官。江邊助防之事。尤似難便。此亦何以處置。利害便否。并百分參酌牒報。

移京畿黃海道巡察使文

今日國事艱危。南北邊境之患。一時俱急。非兵無以禦敵。此愚夫愚婦所共知也。然鍊兵之要。惟在守令。盡心協力。聽從上司號令。視之爲己任。戒勅把摠哨官。勤勤鍊習。撫摩完恤。使民無離散怨苦之心。然後操鍊之事。始可成就。而無弊。近觀守令中。有遠慮誠心國事者。固不無其人。但往往亦有習於流俗之意。以鍊兵爲餘事。而不足爲甚者。若越人視秦人之肥瘠。人或問之。則必曰。此乃把摠哨官之任也。於吾有何干涉云。此言定非出於有識之人。亦恐傳聞之誤。萬一因此頽廢。軍政不舉。則已曾束伍之軍。亦難成就。極爲可慮。哨軍只爲鍊習之事。而今煙家雜役抄發之時。皆用哨軍云。尤爲駭愕。今後十分戒勅。使無如此之弊。本道巡察使。歲末殿最時。更考守令鍊兵實迹。以行黜陟。其中如有

盡心其事。卓有成效者。一一牒報軍門。使得 啓聞論賞。以勸他人。

移四道巡察使兵使文

親民之官。莫切於守令。而守令之盡職與否。在於殿最嚴明。一循公道。不以毀譽亂實而已。國家設一年兩考之法。爲上中下三等之考。其意不偶然也。如使殿最甚嚴。而守令之盡心奉公者。得居上考。怠慢職事。貪殘病民者。無所容護。則自然惠澤及民。而治道可舉矣。近者蕩敗之餘。民生鮮薄。比之平時之民。怨苦萬倍。而又有調發轉輸。迎接唐官。責出刷馬等事。民生艱苦極矣。當此之時。守令又復行其苛虐之政。或刑罰殘暴。讎歛多端。憑公營私。多接親故。病民之政。有同蝟毛。而 朝廷不知。監司不聞。則民生將何所赴訴哉。甚者。以善爲惡。以惡爲善。能否倒置。賞罰逆行。勸懲之路。一混於上。而民生之怨。無時可祛。尤爲寒心。此則一方風憲之地。雖欲辭其責。而不可得也。至於邊將鎮堡軍卒。撫摩凋瘵與否。所係非輕。此等殿最。尤不可不嚴也。本府受 命體察四道。今已二年。而尙未出巡所管地方。故其於守令賢否。雖或得之傳聞。未能詳知。今此冬月。殿最道內守令。邊將實績。各別嚴明考覈。啓聞後。其中尤甚能否者。具實績牒報本府。以憑查覈處置。

移咸鏡道巡察使南北道兵使文

遠方殘民。兵火之後。百役叢集。怨苦流散。在在皆然。本道去京師絕遠。凡民間

弊瘼未能詳知。姑以所聞言之。則南北道出身武士。勿論新舊。入防於江邊。每年二月入防。十月罷防。農時不得顧其農業。因以流散者甚多云。或以爲道內武士。分爲四番。相遞入防。以休其力。則可免倒懸之苦云。事勢便否。民情所願。詳察牒報。北道六鎮及官鹽販賣之處。似當從市直增減其價。而近日則鹽軍價勒定。穀四斗。民亦苦之云。亦爲相考變通。本道軍功人等。自備糧食。長在赴防之中。怨苦極天。自悔曾得軍功。官屬則願仍爲官屬。私賤則願仍爲私賤。怨聲嗷然。皆以爲軍功爲害身之資。自今雖有事變。必無爲國家出身立功之人。極爲寒心。變通之策。雖未知何在。而坐視不救。亦所難忍。或以爲立防之時。餉以官糧。以除自備之弊。此則官力不足。難可施行。惟當量其往來道里遠近。疎其番次。防歇時則使之在家作農。合冰防緊之時。相遞赴防。則亦可有休息之時。稍似便宜。急速商量處置。方今西北之憂。日甚一日。我國創殘之餘。夾於兩強寇之間。非兵無以制敵。非民無以衛國。此不待智者而可知。奈何邊將守令之中。識此者少。縱恣虐民。猶踵前習。使邊上民夷之心。日益離散。誠可痛心。而縱有善策。無可施之路。本道百分申勅。屏黜貪殘。罷軟者。不使留爲民害。而積年弊癘之事。次第改革。民情順服。則邊圉自固矣。北方之民。寒無所着。只以養狗衣皮爲大利。而邊將守令。每於胡人宴享之時。收取土兵之狗。殺數百餘口。既取其肉。而并沒其皮云。肉則宴享胡人。無他辦出之處。不得已爲之。皮則可

以還給。而并爲取之。則土兵之無衣者。何以掩身。今後一切嚴禁。一一還給本主。邊將敢有私取一張者。輒以重罪論斷。事并爲知委施行。

移黃海道巡察使文

今日之日夜經營者。只在於戰守二策。然先守而後戰。未有不能守而能戰者。守之道。惟在於得其形勢而已。蓋一國有一國之形勢。一道有一道之形勢。一邑有一邑之形勢。所謂形勢者。我所必守。而賊所必爭之地也。本道形勢。大槩有二路。一路則由開城府達於平山者也。一路則由兔山新溪達於成川者也。其間雖有傍通細路。而此二路爲一道之氣脈。然兔山新溪之路。山路險狹。敵所難進。而我所易守。故往年倭賊。亦未嘗經由此路。其意可見也。今據直路而言之。則惟江陰最爲要緊之地。據豬灘下流。舟楫無所不通。且與平山直路相近。而白川延安海州。皆在其後。如使此處有重鎮。則賊不敢徑由直路。以犯平山。而白川延安海州。皆在襟抱之內。此乃一道咽喉也。惟其如是。故壬辰倭賊西下時。於興義設鎮。以遏大路。及吾助川之路。又於江陰設鎮。以爲門戶。然後肆意西下。千里相連。而不能防其腰脅。賊之有奸計。眼目善知形勢。此亦可知也。往時江陰合併時。偶思此意。今爲還設。第當初還設之意。不但在於還復邑名而已。欲其漸次經營屯田積粟。擇地據守。爲延安白川平山海州之保障也。此乃一道大計所在。本道更加商度。軍糧則何以儲峙。人民則何以多聚。城

壘則何處可設。徭役之不緊者。盡數蠲減。先爲規模。限年修葺。漸次成就。以爲遠圖。平山瑞興鳳山黃州載寧。一樣緊要之處。并爲留心經紀。可行之策。爲先枚舉牒報施行。

諭黃海道巡察使文

屬得跟隨使黃慎馳啓賊渝。天朝講和之約。册使狼狽而還。數年羈縻之計。盡歸虛地。賊情叵測。事機方急。在我今日之策。惟在治兵繕甲。以決一戰。而朝廷根本之計。亦在二西。今方遣使告急于天朝。更請大兵。措置策應。亦係緊急。凡干事機。務在周密。預爲籌畫。毋緩毋急。十分善處。應行事宜。當追後連續知會。相考施行。

諭黃海道巡察使文

本道軍兵束伍鍊習等事。必已漸次成就矣。賊情已變。明春之事。極爲可慮。凡百措置。乘此數月之內。少無遺漏。然後可以應倉卒之變。軍卒雖束伍。而器械未備。則無空手赴敵之理。束伍中軍人所持器械。皆爲點檢有無。無者。自官家措備以給。本道之民。勇悍善戰。爲諸道之最。如黃州延安鳳山安岳等處。最爲武士之鄉。今雖束伍。而其外必多漏落。經戰可用之士。前日義兵將成册。相考招集。使之多方抄擇。以精勇爲主。不使冗雜。各義兵將中。可堪統率者。領之。一人不必多領。多則百名。少則或五十名。或二十餘名。隨其所得。分爲隊伍。預備

弓箭常川習射。而臨時聽主將分付。被抄之軍。今送選牌。見樣相考。隨其軍數多備。各自佩持。別爲一類。後成冊上使。雖有軍兵百萬。無食可餉。則終爲無用之物。道內見存軍糧。按簿可知。其數至少。不足以支數千兵一月之食。脫有天兵大勢出來。尤無支撐之勢。凡千聚穀之道。多般講究。急速收合。儲峙待用。各官元穀中皮穀。或作米收捧。以便軍餉。似爲宜當。但各官倉穀。今已畢捧。則已捧之穀。還爲散給。迫促春正。卜定其數。又爲太重。則民怨必深。當此民生困苦之際。亦難輕易施行。在本道參商民情事勢。便宜處置。海州不比他邑。米穀所當優數儲峙。以備意外之需。而考見倉穀置簿。則雜穀并僅二千餘石。可爲寒心。海州倉穀。別樣措置。頃日朴汝龍。募得米豆三千餘石。亦當輸入於海州道。從事官所募米豆。并四百餘石。留在鳳山。此乃直路所經。切於迎接。天兵因爲留置其處。同郡箭竹和賣米穀。亦在其處。新郡守邊好謙處傳授。以助軍餉之萬一。

諭京畿左防禦使文

前日分付沿江一滯防灘等事。更加詳盡舉行。倉卒砲壙排設。勢所難爲。若令軍人各備空石二葉。臨時傳令。於各灘岸上。盛土積置。以作弓家。使軍士隱身於其處。而發射放砲。則事甚便宜。相考舉行後牒報。

諭京畿右防禦使文

傳聞禿城城前設爲木柵排比太密其處形勢不能目見徒以傳聞便否難知但木柵太密遮蔽眼目賊之在遠時則可以石車砲矢制之若近在木柵之下城上之人爲木柵所礙放砲發矢皆不如意反爲有害南方鎮堡城外垓子之外自前兩樹枳木亭時以爲奇策而賊來反以枳木自蔽放砲城上之人不得制之此亦可爲深戒設柵形止急速詳審牒報勿令畫蛇添足徒困民力城堞多少預爲參量分定各軍東西南北某堞則某某人守之各定其所不相紊亂又出遊軍俟賊勢所向合力守禦此乃守城大法禿城之堞幾何而守城之軍足與不足預爲參定磨鍊於五塚立小旗五十塚立大旗塚上各書軍士之名一聞砲聲則軍士一齊城上守把信地城中寂然若無人如此整齊閒暇然後可以守城守城節制備細開錄牒報。

約束京畿巡察使左防禦使文

上流防灘節目大概已爲指授自驪州以下至楊根自楊根至龍津自龍津至廣津自廣津至楮子島左防禦使次知各司把摠各哨哨官聽防禦使指揮隨其灘勢緊歇添減軍數次次畫地把截把摠先捧甘結自某處至某處某人分受萬一疎虞失誤軍律不用主將之令則甘伏軍律事捧甘結後把摠又捧甘結于哨官哨官率旗隊總次次約束齊心合力不得一毫參差違越自就重罪事預爲三令五申所捧甘結一件留在防禦使處一件軍門及巡察使處上送。

以憑後考。大概軍律雖主於嚴。尤在於約束分明。兵書曰。約束不明。而士卒犯之。將帥之罪。約束既明。而士卒犯之。士卒之罪。防禦使十分親自詳審。明白分付。而把摠哨官以下。一聽防禦使指揮。毋敢違越。江水之勢所重。專在於驪州。水勢淺深。道里迂直。當使本處之人。詳知其處之事者。爲主而守之。使客軍添防助力。然後可以無失。驪州水南把摠。從江面作頭擺列。水北把摠。又次其下。正當婆婆娑城。爲入保婆婆之計。利川把摠。又次其下。楊根之軍。又次其下。接於龍津。而楊根李中復哨軍。則使之把守芙蓉山。但此一哨軍數少。而不足於用。則當使近處之人。勿論品官老弱。皆令於芙蓉。爲入保之所。多張旗幟。火炬。上與婆婆相應。下與龍津相應。則萬無一失。此事專委楊根郡守。倡率其邑之民。措置以待。龍津上流加平地界。山谷細路及淺灘渡涉處。預爲詳細致察。臨時觀賊勢所向。以相策應。設伏勦截。此不可一一分付。在將帥預定計策。隨機善應之如何。水南驪州利川之軍。旣爲移入江北。把截江路。其老弱餘丁。亦當隨來江北。以待賊退。不可無依泊團聚之所。各其把摠。擇水邊高阜形勢通望。可以據險之處。率其一司軍人。及其避亂之人。設爲木柵。或土壘。又以其力略設假家。以避風雨。此策若成。則沿江江列屯。連絡相望。達于京城。而形勢壯固。賊來無足憂矣。廣州之軍。當防江北。而惟南漢山城。形勢絕險。廣州之民。其數甚多。若非此城。則他無可往之處。明春修葺其城。稍爲成形。則廣州上下道軍人。境

內老弱男女及慶安察訪南宮簡之軍皆當并入此城與京城作爲輔車之勢爲江以南巨鎮則其於守灘形勢尤爲堅固僧將惟政既在其處各別申勅責令廣州牧使專委措置如有失誤則罪責隨之矣清野之事急則民怨緩則不及於事驪州利川往年田稅及唐穀某條輸入方可無弊令兩邑守令參商民情處置驪州去婆婆娑城雖甚近若以陸路搬運則必貽民弊明春冰解以後從船路順流輸來事勢便當并爲參酌從便施行。

移京畿水使文

琵琶串形勢甚好兩邊雖有民田而皆是沮洳之地若於狹項設築城壘以扼要衝一境之民皆將避亂於其中水營亦必堅固今聞南陽府使所言則民情亦欲爲之云此乃機會水使更與府使相議日氣稍暖之後爲先伐木待土脈融解別爲土築其法已爲分付於府使如有未盡之端事知軍官上送親聽教令以去期於成就。

移京畿巡察使修築南漢山城文

南漢山城爲京都保障今已定修築之議議者或疑役巨民少不足以有成若不宜指授大段經理則事未易就民力先困極爲可慮凡築城有制古人言城皆以千雉百雉計之所謂雉者卽今之曲城也城之精神緊要處都在曲城曲城既築而相對百步之間矢石相及則其間城子雖僅成形而賊不得近矣。

今計廣州之軍入於東伍者一千名。每五十名令築一曲城。則曲城當有二十矣。又使惟政僧軍百名。築曲城二坐。權應元所率軍。築曲城一。廣州冬三朔上番軍。計數若百名。則令築曲城二。五十名則築一曲城。本州人吏官屬及品官之有心國事者。各出其力。築曲城一二坐。若是則總計曲城二十七八坐。每兩間相距各百步。則一曲城。各占四五十步。而山頭形勢。列置聯絡。不待盡爲築城。而自有不可犯之勢。且五十人築一曲城。人力有饒。不日可成。若是則一城之大勢已成矣。總計南漢山城。周回一萬五千九百餘尺。其中完全者四千尺。又南門及西北面。皆是億丈之險。不必大段用力。只南門以東至水口。其間半馬場許。稍爲平低。築城之役。當專力於此。舊城頽圯之石。多在山下。必須先爲輸到山上。然後築之。甚易。若欲使人從山下推轉負載以上。則人力多入。不可爲也。當爲器械以輸之。其法先立兩柱於山上。柱上加橫木。使之轉環如纜車之狀。而又作大葛索。以兩條橫加於橫木之上。索末爲載石之具。數人從山下載石。五六人從山上曳之。則石雖甚重。而頃刻可上。一日之間。山下之石。盡在上面。而役事甚便矣。雪消後。令各軍人預備葛索材木。臨時一齊赴役。使無遲滯之弊。本府之意。築城軍人。本欲以官糧饋餉。釜鼎等物不具。千餘之軍。供給亦難。但令自食私糧。而終日爲役。則民情不勸。而事未易就。非古者鑿鼓不勝之意。欲多釀酒醪。以爲勸軍之用。米則似不難得。從本府百餘石。亦可量給。但

釀酒器具。難可猝辦。若以米麴計數分給於廣州邑內人吏品官屬。及近處僧人。稍有瓮器者。每人量給數盆之資。臨時聚用。衆力合湊。不至貽弊。此事則當使本州軍功鄉吏皮仁文李奉億。專掌次知施行。自本道亦爲措置。以爲繼給之計。壚百餘石。并爲輸到山城。軍人中勤役者。逐日賞給。亦是勸役之一端。大概此城。乃是天險。八道山城中。最爲第一。廣州之民。若能大小戮力。如爲私事。爲一勞永逸之計。則後來雖有事變。當安枕而臥。十分更加曉諭施行。曲城旣築之後。功役未就。則當以他官束伍之軍。限日繼之。期於成就。此外未盡條件。本道并爲料理施行。

書軍門謄錄後

數年經營。只成無用之空言。去者如斯。來者復然。千古萬古。增志士之一慨。今年自家雪裡凍死。未知明年。甚人喫大碗不托耳。

懲志錄卷之十六終

錄後雜記

戊寅秋。長星竟天。狀如白練。自西向東。數月而滅。戊子間。漢江三日赤。辛卯。竹山大平院後。有石自起立。通津縣。僵柳復起。民間訛言將遷都。又東海魚產於西海。漸至漢江。海州素產青魚。近十餘年絕不產。移產於遼海。遼東人謂之新魚。又遼東八站居民。一日無故相驚曰。有寇從朝鮮至。朝鮮王子十亭轎子。到鴨綠江。傳相告語。老弱登山。數日乃定。又我國使臣自北京還。宿金石山河姓人家。其主人言。有朝鮮譯官語我云。爾有三年酒。五年酒。毋惜爲樂。不久兵至。爾輩雖有酒。誰其飲之。以此遼人疑朝鮮有異志。多驚惑云。使臣歸。啓其事。朝廷以譯官必有造言生事。誣陷本國者。逮捕數人。鞠於仁政殿庭。用壓膝火刑。皆不服而死。此辛卯年間事。明年遂有倭變。是知大亂將生。人雖未覺。而形於兆朕。不一其端。至於白虹貫日。太白經天。無歲無之。人視爲常事。又都城內常有黑氣。非烟非霧。盤地接天。如此幾十餘年。其他變怪。難以殫記。天之告人。可謂深切。而特人不能察耳。

杜詩長安城頭頭白鳥。夜飛延秋門上呼。又向人家啄大屋。屋底達官走避胡。蓋記異也。壬辰四月十七日。賊報至。朝野遑遑。忽有恠鳥鳴於後苑。飛在空中。或近或遠。只一鳥而聲滿城中。人無不聞。終日達夜。其鳴不暫停。如此十餘日。

車駕出狩，賊入城，宮闕廟社公私廬舍一空。嗚呼！其亦恠甚矣。又五月，余隨駕至平壤，寓於金乃進家。乃進語余曰：年前有豺屢入城中，大同江水赤，東邊濁甚，西邊清，今果有此變。時賊猶未至平壤，余聞此語默然不答，而心不喜，未幾平壤又陷，蓋豺乃野獸，不合入城市。如春秋記鸚鵡來巢，六鷁退飛，多麋有蛾之類，鮮有無其應者。天之示人顯矣。聖人之垂戒深矣，可不懼哉！可不慎哉！又壬辰春夏間，歲星守尾箕，尾箕乃燕分。而自古言我國與燕同分。時賊兵日逼，人心洶懼，不知所出。一日，下教曰：福星方在我國，賊不足畏。蓋聖意欲假此以鎮人心，故也。然是後都城雖失，而卒能恢復舊物。旋軫故都，賊酋秀吉又不能終逞兇逆，而自斃。斯豈偶然哉！蓋莫非天也。

倭最奸巧，其用兵殆無一事不出於詐術。然以壬辰之事觀之，可謂工於都城，而拙於平壤也。我國昇平百年，民不知兵。猝聞兵至，倉皇顛倒，遠近靡然，皆失魂魄。倭乘破竹之勢，旬日之間，徑造都城，使智不及謀，勇不及斷，人心崩潰，莫可收拾。此兵家善謀，而賊之巧計，故曰工也。於是乃自恃常勝之威，而不顧其後，散出諸道，任其狂肆。兵分則勢不得不弱，千里連營，曠日持久，所謂強弩之末，不能穿魯縞，而張叔夜所謂女真不知兵，豈有孤軍深入，而能善其歸者。殆近之矣。是以天兵以四萬攻破平壤，平壤既破，則其在諸道者，亦皆奪氣。雖京城猶據，而大勢已縮。我民之在四方者，處處要擊，賊首尾不能相救，終不得

不遁。故曰拙於平壤也。嗚呼！賊之失計，我之幸也。誠使我國有一將將數萬兵，相時用奇，擊斷長蛇，分其要害，行之於平壤之敗，則其大帥可坐致也。發之於京城以南，則將使隻輪不返矣。如此然後賊心驚膽破，數百年間不敢正視於我，而無復後慮矣。當時我方積衰力不能辦此。天朝諸將又不知出此，使賊從容去來，略無懲畏，要索萬端，於是出於下策，欲以封貢羈縻之，可勝歎哉！可勝惜哉！至今思之，令人扼腕。

昔鼂錯上言兵事曰：用兵臨戰，合刃之急有三：一曰得地形，二曰卒服習，三曰器用利。三者兵之大要，而勝負之所決。爲將者不可不知也。倭奴習於攻戰，而器械精利，古無鳥銃，而今有之，其致遠之力，命中之巧，倍蓰於弓矢。我若相遇於平原廣野，兩陣相對，以法交戰，則敵之極難。蓋弓矢之技，不過百步，而鳥銃能及於數百步，來如風雹，其不能當必矣。然先擇地形，得其山陬險阻，林木茂密處，散伏射手，使賊不見其形，而左右俱發，則彼雖有鳥銃槍刀，皆無所施，而可大勝也。今舉一事爲證：壬辰，賊入京城，逐日分掠於城外。至園陵，亦不保有。高陽人進士李櫓，稍解操弓，有膽氣，一日與同伴二人各持弓矢入昌敬陵，不意賊衆大出，滿谷中。櫓等無以爲計，奔入於藤蘿蒙密叢中。賊來索之，徘徊窺覘，櫓等從其內輒射之，皆應弦而倒。又遷其處，往來倏忽，賊尤莫能測。自是所至，見叢薄則遠遠走避，不敢近。二陵得全，以此見之，地形得失，成敗隨

之方賊在尙州。中砲李鎰等。若知出此。先於兔遷鳥嶺三數十里間。伏射手數千人。使賊莫測多少。則可以制敵。乃以烏合之卒。不鍊之兵。棄其險塞。相角於平地。宜其敗也。余於兵機。備言之。今又特記之。以爲後戒。

城者。禦暴保民之所。當以堅固爲主。古人言城制。皆曰雉。所謂千雉百雉者是也。余平時讀書。鹵莽不知雉爲何物。每以礫當之。嘗疑礫但千百。則其城至小。不能容衆。將何以哉。及變後。始得戚繼光紀效新書讀之。乃知雉非礫。卽今之所謂曲城。甕城者也。蓋城無曲。城甕城。則雖人守一礫。而礫間立盾。以遮外面。矢石賊之來。傅城下者。不可見而禦之也。紀效新書。每五十礫置一雉。外出二三丈。二雉間相去五十礫。一雉各占地二十五礫。矢力方盛。左右顧呵。便於發射。敵無緣來附城下矣。壬辰秋。余久留安州。念賊方在平壤。若一朝西下。則行在前面。無一遮障處。不量其力。欲修安州城而守之。重陽日。偶出時川江上。顧視州城。默坐深念者久之。忽思得一策。城外當從形勢。別築凸城如雉制。而空其中。使容人。前面及左右。鑿出砲穴。可從中放砲。上建敵樓。樓相距千步以上。大砲中藏鐵丸如鳥卵者數斗。賊多集城外。砲丸從兩處交發。無論人馬。雖金石無不糜碎。若是則他堞雖無守兵。只使數十人守砲樓。而敵不敢近矣。此實守城妙法。其制雖倣於雉。而功勝於雉萬萬矣。蓋千步之內。敵旣不敢近。則所謂雲梯衝車者。皆不得用。此事余偶思得之。其時卽 啓聞 行在後於

經席屢發之。又欲使人見其必可用。丙申春。京城東水口門外。擇地聚石。作之未成。而異論紛起。廢而不修。後日如有遠慮者。勿以人廢言。修舉此制。則其於備禦之道。所益不少矣。

余在安州時。友人金士純爲慶尙右監司。有書云。欲修治晉州。爲死守計。先是賊嘗一犯晉州。不勝而退。余答士純云。賊早晚必來。報來則必用大勢。守比舊差難。惟當建砲樓以待之。可無患。遂於書中。詳言其制。癸巳六月。余聞賊復攻晉州。謂辛從事慶晉曰。晉事甚危。幸而有砲樓。則猶可支。不然難守矣。旣而下陝川。聞晉已陷。丹城縣監趙君宗道。亦士純友也。爲余言。前年與士純同在晉州。士純見余書。踊躍稱奇。卽與募下士友數人。巡城因其地形。以爲當設於八處。督令伐木。浮江而下。州民憚其役。乃曰。前無砲樓。猶守郤賊。今何用勞人。士純不聽。材已具。始役有日。適士純病不起。其事遂寢云。相與一痛而罷。嗚呼。士純之不幸。卽一城千萬人之不幸也。斯固數也。非人力之所能容。

壬辰四月。賊連陷內郡。我軍望風潰散。無敢交鋒者。備邊司諸臣。日聚闕下。講備禦之策。而無以爲計。或建議曰。賊善用槍刀。我無堅甲可禦。故不能敵。當以厚鐵爲滿身甲。長不見物。被入賊陣。則賊無隙可刺。而我可勝矣。衆曰。然。於是大聚工匠。晝夜打造。余獨以爲不可。曰。與賊鬪。雲合鳥散。貴於捷疾。旣被滿身厚甲。其重不可勝。身且不能運。何望殺賊。數日。知其難用。遂罷。又臺諫請見

大臣言計。其中一人盛氣斥大臣無謀。座上問有何策。對曰。何不於漢江邊。多設高棚。使賊不得上。而俯射之耶。或曰。賊之鐵丸亦不得上耶。其人無語而退。聞者傳以爲笑。嗚呼。兵無常勢。戰無常法。臨機制變。進退合散。出奇無窮。只在於將而已。然則千言萬計皆無用。惟在於得一將才。而疊錯所陳三策。尤係切要。闕一不可。其餘紛紛者何補焉。大抵國家擇將於無事之日。任將於有事之際。擇之貴精。任之貴專。當時慶尙道水將。則朴泓元均。陸將則李瑤曹大坤。已非才選。及其變生。巡邊使防禦使助防將等。皆自朝廷受命而來。各持專斷之權。自行號令。進退由意。而不相統屬。正犯輿尸之戒。事何由得濟。且所養非所用。所用非所養。將卒不相知。皆兵家大忌。奈何前車既覆。後不知改。至今尙循此塗轍如此。而望其無事者。特幸耳。言之其說甚長。非可一二盡。嗚呼危哉。一

癸巳正月。天兵發平壤。余在軍前先行。時臨津冰泮不可渡。提督連遣人。督造浮橋。余至金郊驛。見黃海道守令。率吏民候餉。大軍者滿野。余召牛峰縣令李希愿。問所率邑人幾何。曰。近數百。余分付曰。爾速領邑人。登山探葛。明日會余於臨津江口。不可失期。希愿去。翌日。余宿開城府。又明日曉。馳至德津堂。見江水冰猶未盡解。冰上流澌半身許。下流舟艦不得上。京畿巡察使權徵。水使李蕓。長湍府使韓德遠。及倡義秋義軍千餘人。集江面。皆束手無計。余令呼牛峰人。納葛絢爲巨索。大數圍。長可橫江。江南北岸。各立兩柱相對。其內偃置一橫。

木引巨索十五條，鋪過江面，兩頭結橫木。江面既濶，遠索半沉，水不能起。衆曰：徒費人力。余令千餘人，各持短杠二三尺，穿葛索極力回轉數周，互相撐起，排比如櫛。於是衆索緊束，高起穹窿，儼然成橋樣。刈細柳鋪其上，厚覆以草，而加之土。唐軍見之大喜，皆揚鞭馳馬而過。炮車軍器，皆從此渡。既而渡者益多，絞索頗緩，近水大軍由淺灘以渡，而無責焉。余念其時倉卒，備葛不多，更倍之，得三十條，則加緊無緩矣。後見南北史，齊兵攻梁主巋，歸與周總管陸騰拒之，周人於峽口南岸築安蜀城，橫引大索於江上，編葦爲橋，以渡軍糧，正是此法。余自謂偶思得之，不知古人已行爲之一笑。因記其事，以爲他日應猝之助云。

癸巳夏，余病臥漢城墨寺洞。一日，天將駱尙志訪余于臥次，問病甚勤。因言朝鮮方微弱，而賊猶在境上，鍊兵禦敵，最爲急務，宜乘此天兵未回，學習鍊兵法，以一教十，以十教百，則數年間，皆成精鍊之卒，可以守國。余感其言，卽馳啓于行在，因使所帶禁軍韓士立，招募京中，得七十餘人，往駱公處請教。駱撥帳下曉陣法張六三等十人爲教師，日夜鍊習槍劍篋筭等技。既而余下南方，其事旋廢。上見狀啓，下備邊司，令別設都監訓練，以尹相斗壽領其事。其年九月，余自南召赴行在，迎駕於海州，扈從還都，至延安，更命余代領都監事。時都城飢甚，余請發龍山倉唐粟米一千石，日給人二升。應募者四集，都監堂上趙儼，以穀小不能給，欲設法限節，置一巨石，令願募者先舉石。

試力。又令超越土牆丈許。能者許入。不能者拒之。人飢困無氣。中格者十一二。或在都監門外。求試不得。顛仆而死。未久得數百千人。立把摠哨官。分部領之。又欲教烏銃。而無火藥。有軍器寺匠人大豐孫者。以入賊陣。多糞火藥與賊。囚江華將殺之。余特貸其死。令糞焰焰贖罪。其人感懼。爲之盡力。一日所糞幾十斤。逐日分諸各部。晝夜習放。第其能否而賞罰之。月餘。能中飛鳥。數月後。與倭及南方之善鳥銃者。相較無不及。而或過之。余上筭請措置軍糧。益募兵滿一萬。置五營。營各隸二千。每年半留城中教練。半出城外。擇閒曠肥饒地。屯田積粟。輪還遞代。則數年之後。兵食之源厚而根本固矣。上下其議。兵曹不卽舉行。卒無見效。

沈惟敬自平壤出入賊中。不無勞苦。然以講和爲名。故不爲我國所喜。最後賊留釜山。久不渡海。李冊使逃還。中朝就差惟敬充副使。與楊使入倭國。終不得要領而回。行長清正等還屯海上。於是中國與我國論議藉藉。皆歸咎沈惟敬。甚者或言惟敬與賊同謀。有叛形。我國僧人松雲入西生浦。見清正。還言賊欲犯大明。所言絕悖。卽具奏。天朝聞者益怒。惟敬知禍至。憂懼不知所出。乃貽書金命元。叙其終始。以自辨。其書曰。日月倏馳。往事如昨。憶昔倭寇貴境。直低平壤。目中已無八道矣。老朽嚙命。哨探倭情。相機撫馭。得與足下暨李體察相會于擾攘之中。目擊平壤迤西一帶。居民流離愁苦。如坐針氈。朝不

謀夕之狀。殊可痛心。足下身歷其事。不待老朽之喋喋者。老朽勸召行長會乾伏山。約束不令西侵。聽命罔敢踰越者數月。延及大兵之至。而致平壤之克。設或彼時老朽不來。倭乘祖公之敗。而走義州。未可知也。平壤一道。居民不被其荼毒者。實國之幸莫大矣。既而倭將行長退守王京。總兵秀家付將三成長盛等三十餘將。合兵連營。控險扼要。牢不可破。碧蹄戰後。尤難進取。彼時判書李德馨者。謁見老朽於開城。將謂賊勢既張。大兵且退。王京必無可望矣。涕泣語老朽云。王京根本之地。得之可以號召諸道。乃今事勢至此。將奈之何。老朽云。徒復王京。若無漢江以南。諸道事勢亦難展布。德馨云。苟得王京。實出望外。漢江以南。小邦君臣。自能尺寸支撐。不難也。老朽云。我試與爾國圖之。務得王京。并復漢江以南諸道。乃還王子陪臣。方爲全國。德馨涕泣叩頭感激云。果得如此。老翁再造小邦。功德不淺鮮矣。俄而老朽舟次漢江。王子臨海君等。自清正營遣人奔語老朽云。偷得歸國。漢江以南。不拘何地。任意與之。老朽不從。且與倭將誓云。肯還還之。不肯還。隨爾殺之。其他不必言也。王子係貴國儲君。老朽敢不知重。當此之時。寧言殺之。而不肯許他事。及至釜山。捐資盡禮。多方曲意于王子。前倨慢而後恭敬。時有緩急。事有輕重。不得已也。數言之下。王京倭退矣。沿途營柵遺糧。不可勝計矣。漢江以南諸道盡得矣。王子陪臣歸國矣。終以一封羈縻諸酋。斂手於釜山窮海之地。候命三年。不敢妄動。續以封

事議成。老朽奉命調戢王京。復會足下暨李德馨輩云。今往封矣。倭或退矣。貴邦善後之計何如。德馨應聲云。善後之事。小邦君臣責任也。老爺不須掛意。老朽初聽其言。未嘗不奇其大有力量。大有識見。偉然一柱石也。及今覈其實。似覺文章功業。不相符合。老朽不能不爲李判書惜。且如釜山竹島諸營。未聞卽撤。老朽責也。而機張。西生諸處。倭兵盡渡。營柵盡焚。交割地方官。俱有甘結矣。何乃清正一來。不聞一戰。不折一矢。地方官抽身讓之何也。旣言漢江以南。自能尺寸支撐。而何至已得復失若此乎。又言善後之事。小邦責任。何不聞大計。止有號泣闕下之一策乎。法云。強弱不當。衆寡不敵。老朽亦非責難于貴國。諸當事但云。緩則治其本。急則治其標。鍊兵修守。相時撫馭。貴國當事諸賢。亦不可實之不問耳。渡海以來。老朽四會貴國王。彼此問對之言。出于胸臆。合于時宜。毫無假借。毫無虛謬。國王之心。老朽之心。彼此洞鑑明矣。老朽誠謂東事至此。可無他慮。不期貴國謀臣策士。機智百端。間事迭出。內以危言。激怒于天朝。外以弱卒。挑釁于日本。至于松雲一番說話。則又出禮法之外。其曰前驅伐。大明曰割八道。國王親自渡海歸服。頃刻之間。二三其說。但知此言可使。國王動念矣。可激。天朝發兵矣。獨不念貴國。止有八道。若盡許之。又許。國王親自渡海歸服。則貴國之宗社臣民。皆爲日本矣。又何取于王子耶。老朽以爲三尺之童。決不失言至此。清正雖橫。亦不放肆至此。又不念

我堂堂 天朝統馭外藩自有大體一恩一威亦自有時必不肯以數百載相傳之屬國置之度外亦不肯縱不奉約束之逆賊據我藩籬理勢然也老朽極不省事至于內外親疎之別逆順向背之情亦人人之所易曉者矧茲欽承勅命調戢此事成敗休戚關係非輕敢以貴國之事蔑焉不加意耶又敢以日本之橫隱然而不報耶足下深于大體詳于國事用是走書幸足下亮我素衷卽爲上達 國王併使當事羣僚概知所以既云仰我 天朝以爲萬全之圖還當聽命處分以冀無疆之福毋徒過計日勞而日拙也至囑不盡觀此書王京以前則鑿鑿可徵矣釜山以後未免支辭隱語然功罪自不相揜後之論惟敬者當以此爲斷案故著之云

沈惟敬遊說士也平壤戰後再入賊中此人之所難卒能以口舌代甲兵驅出衆賊復此數千里末梢一事參差不免大禍哀哉蓋平行長最信惟敬其在京城時惟敬密言於行長曰汝輩久留此不退 天朝更發大兵已從西海來出忠清道斷汝歸路此時雖欲去不可得我自平壤與汝情熟故不忍不言耳於是行長懼遂出城此事沈惟敬自言於金右相命元而金相爲余言之如此

懲毖錄雜記終

錄後雜記

懲毖錄全終

本會役員

本會名譽贊成員

故 子爵

朝鮮總督府政務總監

東洋拓殖會社總裁男爵

朝鮮中樞院副議長伯爵

朝鮮中樞院顧問子爵

朝鮮中樞院顧問子爵

本會特別贊成員

朝鮮總督府司法部長官

朝鮮總督府度支部長官

朝鮮總督府農商工部部長官

李王臨次官

前總督府農商工部部長官

朝鮮總督府內務部部長官

曾 禰 荒 助

山 縣 伊 三 郎

宇 佐 川 一 正

李 完 用

朴 齊 純

趙 重 應

倉 富 勇 三 郎

荒 井 賢 太 郎

石 塚 英 藏

小 宮 三 保 松

木 內 重 四 郎

宇 佐 美 勝 夫

本會評議員

朝鮮總督府中樞院書記官長

朝鮮總督府學務局長

朝鮮銀行總裁

辯護士法學士

高等法院刑事法學士

東洋專門學校京城分校幹事文學士

學務局編輯課長文學士

東洋專門學校京城分校講師

本會會主 朝鮮雜誌社長

國 分 象 太 郎

關 屋 貞 三 郎

市 原 盛 宏

三 宅 長 策

淺 見 倫 太 郎

河 合 弘 民

小 田 省 吾

鮎 貝 房 之 進

釋 尾 春 菴

朝鮮古書刊行會

圖書保存會

大正二年十一月二十三日印刷
大正二年十一月二十七日發行

會員豫約費一册金參圓
會員 外一册賣價四圓

朝鮮京城旭町二丁目六十八番地

朝鮮古書刊行會代表者
編輯兼發行者

釋尾春栞

朝鮮京城明治町三丁目日韓印刷株式會社

印刷者 金崎金平

朝鮮京城旭町二丁目朝鮮雜誌社

發行所 朝鮮古書刊行會

電話一千二百五十番
振替口座京城一三一番

朝鮮京城明治町三丁目

印刷所 日韓印刷株式會社

朝鮮京城本町二丁目

豫約並發賣取次店 日韓書房

東京市神田表神保町

豫約並發賣取次店 同文館

